



# ՀԱՅՈՑ ՊԱՏՄՈՒԹՅՈՒՆ

ԸՆԴՀԱՆՈՒՐ ԵՎ ԲՆԱԳԻՏԱՍՈՒԹՅԱՆ ԻՎԱՆՅԱՆ ՀՈՍՔԵՐ

# 10



Ա. ՄԵԼՔՈՆՅԱՆ, Գ. ԱՎԵՏԻՍՅԱՆ, Ա. ՄՈՎՍԻՍՅԱՆ,  
Պ. ԶՈՎՅԱՆՆԻՍՅԱՆ, Է. ԴԱՆԻԵԼՅԱՆ, Վ. ԲԱՐԽՈՒԴԱՐՅԱՆ,  
Գ. ԶԱՐՈՒԹՅՈՒՆՅԱՆ, Պ. ՉՈԲԱՆՅԱՆ

# ՀԱՅՈՑ ՊԱՏՄՈՒԹՅՈՒՆ

10-ՐԴ ԴԱՍԱՐԱՆ

ԸՆԴՀԱՆՈՒՐ ԵՎ  
ԲՆԱԳԻՏԱՍԱԹԵՍԱՏԻԿԱԿԱՆ ՀՈՍՔԵՐ



Ե Ր Ե Վ Ա Ն 2 0 0 9



ՀՏԴ 373.167.1: 941(479.25)(075)  
ԳՄԴ 63.3(2Հ)g72  
Հ 282

Գլխավոր խմբագիրներ՝

**ԱՇՈՏ ՄԵԼԲՈՆՅԱՆ, ՀՀ ԳԱՄ թղթակից անդամ  
ԱՐԱՄ ՍԻՄՈՆՅԱՆ, ՀՀ ԳԱՄ թղթակից անդամ**

Խմբագիր՝

**ԱՐԱՄ ՆԱԶԱՐՅԱՆ, պարունագիրության թեկնածու**

Հեղինակներ՝

**ԱՇՈՏ ՄԵԼԲՈՆՅԱՆ**

**ՀՀ ԳԱՄ թղթակից անդամ**

*(Ներածություն, Մաս Բ, Բաժին 2, Թեմա 2)*

**ՀԱՅԿ ԱՎԵՏԻՍՅԱՆ**

**Պարունագիրության դոկտոր**

*(Մաս Ա, Բաժին 1, Բաժին 4, Թեմա 1)*

**ԱՐՏԱԿ ՄՈՎՍԻՍՅԱՆ**

**Պարունագիրության թեկնածու, դոցենտ**

*(Մաս Ա, Բաժին 2, Բաժին 3, Թեմա 1, 2, Բաժին 4, Թեմա 2)*

**ՊԵՏՐՈՍ ՀՈՎՀԱՆՆԻՍՅԱՆ**

**Պարունագիրության թեկնածու, դոցենտ**

*(Մաս Ա, Բաժին 3, Թեմա 3, Թեմա 4, § 1)*

**ԷԴՈՒԱՐԴ ԴԱՆԻԵԼՅԱՆ**

**Պարունագիրության դոկտոր**

*(Մաս Ա, Բաժին 3, Թեմա 4, §§ 1-3, Մաս Բ, Ներածություն,  
Բաժին 1, Բաժին 4, Թեմա 1)*

**ՎԼԱԴԻՄԻՐ ԲԱՐԻՈՒԴԱՐՅԱՆ**

**ՀՀ ԳԱՄ ակադեմիկոս**

*(Մաս Բ, Բաժին 2, Թեմա 1, Բաժին 3, Թեմա 2)*

**ԳԱԳԻԿ ՀԱՐՈՒԹՅՈՒՆՅԱՆ**

**Պարունագիրության թեկնածու, դոցենտ**

*(Մաս Բ, Բաժին 2, Թեմա 3, Բաժին 4, Թեմա 2)*

**ՊԱՎԵԼ ՉՈՐԱՆՅԱՆ**

**Պարունագիրության դոկտոր**

*(Մաս Բ, Բաժին 3, Թեմա 1, Բաժին 4, Թեմա 3)*

**Մեթոդական մասի  
հեղինակներ՝**

**ԱՐՄԻՆԵ ՍԱՐԳՍՅԱՆ, պարունարան, մանկավարժ  
ԱՐՄԱՆ ՄԱՆՈՅԱՆ, պարունարան, մանկավարժ**

Հայոց պատմություն: 10-րդ դաս.

Հ 282. Ընդհանուր և քնագիտամաթեմատիկական հոսքեր: /Ա. Մելքոնյան, Հ. Ավետիսյան, Ա. Մովսիսյան, Պ. Հովհաննիսյան, Է. Դանիելյան, Վ. Բարխուդարյան, Գ. Հարությունյան, Պ. Չորանյան.- Եր.: «Զանգակ-97», 2009.- 240 էջ:

ԳՄԴ 63.3(2Հ)g72

ISBN 978-99941-1-638-6

© Ա. Մելքոնյան, Հ. Ավետիսյան, Ա. Մովսիսյան, Պ. Հովհաննիսյան, Է. Դանիելյան, Վ. Բարխուդարյան, Գ. Հարությունյան, Պ. Չորանյան, 2009 թ.  
© «Զանգակ-97» հրատարակչություն, 2009 թ.

«ՀԱՅՈՑ ՊԱՏՄՈՒԹՅՈՒՆ» ԱՌԱՐԿԱՆ ԱՎԱԳ ԴԴՐՈՑՈՒՄ

Հայ ժողովրդի՝ հազարամյակների հարուստ պատմության, համաշխարհային քաղաքակրթության մեջ ունեցած ծանրակշիռ տեղի ու դերի մասին գրվել են բազմաթիվ հետազոտություններ, հարյուրավոր դասագրքեր ու ձեռնարկներ: Դրանցից յուրաքանչյուրը յուրովի է նպաստել աշխարհի հնագույն ժողովուրդներից մեկի պատմական անցյալին հանրությանը ծանոթացնելու գործին:

Հայոց պատմությանը նվիրված հին և միջնադարյան հայ ու օտար հեղինակների ուսումնասիրությունների մեջ իր նշանակությամբ անգերազանցելի է մնացել համաշխարհային պատմագրության հսկաներից մեկի՝ V դարի հեղինակ *Մովսես Խորենացու* «Հայոց պատմություն» մեծարժեք երկը: Դարեր շարունակ որպես անփոխարինելի դասագիրք ծառայած այդ աշխատությունը բազմաթիվ հայ սերունդների կրթել ու դաստիարակել է հայրենասիրության ոգով, հայրենիքի նկատմամբ անսահման սիրո ու նվիրումի զգացումներով, ժամանակների արհավիրքներին ու մարտահրավերներին դիմակայելու կարողությամբ և իրենց ապագան կերտելու պատրաստակամությամբ:

Հայ պատմագիտության զարգացման համար մի նոր խթան է դարձել XVIII դարի նշանավոր պատմաբան Միքայել Չալչյանի եռահատոր «Հայոց պատմություն» աշխատությունը, որը Մովսես Խորենացու երկից հետո հայ ժողովրդի ամբողջական պատմություն գրելու երկրորդ հաջողված փորձն էր: XIX դարը դարձել է ինչպես ամբողջ հայագիտության, այնպես էլ պատմական գիտության աննախադեպ առաջընթացի դարաշրջան: Այդ ժամանակ հայոց պատմության բազմապիսի հիմնահարցեր բազմակողմանիորեն ուսումնասիրվել են ոչ միայն հայ, այլև օտար, հատկապես եվրոպացի

հայագետների կողմից: Առանձնապես կարևոր էին օտար հեղինակների՝ հնդեվրոպական լեզուների շարքում հայերի ունեցած տեղի մասին ուսումնասիրությունները:

Սակայն, ցավոք, նույն ժամանակ ծնվեցին ոչ միայն սխալ, այլ նաև հակազիտական ու հակահայկական առանձին տեսակետներ, որոնք հետագայում քաղաքական դրդապատճառներով զգտագործվեցին հայոց պատմության հանգուցային մի շարք խնդիրներ խեղաթյուրելու նպատակով: Մասնավորապես առաջ քաշվեց Հայկական լեռնաշխարհում հայերի եկվորության տեսակետը, կասկածի տակ դրվեցին միջնադարյան հայ հեղինակների հաղորդած տեղեկությունների հավաստիությունը, մատենագիրների գործած ժամանակի և ընդգրկման հարցը և այլն: Այդուհանդերձ, նույն ժամանակ հայ պատմագրությունն ունեցավ նոր ձեռքբերումներ:

Խորհրդային իշխանության տարիներին հայ պատմագիտությունը հայրենիքում հայտնվեց քաղաքական, գաղափարական կապանքների մեջ, սակայն շատ պատմաբաններ կարողացան այդ պայմաններում իսկ առաջին անգամ լուսաբանել հայոց պատմության մի շարք հանգուցային հիմնախնդիրներ, տալ դրանց հայեցակարգային լուծումները, նոր բարձրության հասցնել պատմական գիտությունը:

1991 թ.՝ անկախության վերականգնումից հետո, հայ պատմագիտությունը դուրս եկավ նախկին կաղապարներից: Հայ պատմաբանները ձեռնամուխ եղան անաչառ պատմության ստեղծման այնքան անհրաժեշտ գործին: Ինչպես հայոց պատմության, այնպես էլ հայագիտության մյուս բնագավառների զարգացումը դարձավ առաջնակարգ խնդիր հայոց պետականության ամրապնդման ու հայ ազգի կեն-

սական շահերի պաշտպանության ընդհանուր ռազմավարական հիմնախնդիրների շղթայի մեջ: Հետխորհրդային առաջին տարիներին հաջողվեց լույս ընծայել դպրոցական նոր դասագրքեր, որոնք, մեկուկես տասնամյակ լինելով շրջանառության մեջ, մեծ նշանակություն ունեցան նորանկախ հանրապետության պատանիներին պատմական գիտելիքներով զինելու հարցում:

Հայաստանում գործող կրթական համակարգը միջազգային չափանիշներին համապատասխանեցնելու բարեփոխումների ճանապարհին կրկին ծագեց դասագրքերի վերանայման ու հրատարակման խնդիրը: Միջին դպրոցի համար ստեղծվեցին հայոց ամբողջական պատմության դասընթացն ընդգրկող նոր դասագրքեր: Բնականաբար, ծառայած նաև ավագ դպրոցի ընդհանուր ու քնագիտամաթեմատիկական հոսքերի համար դասագրքեր ստեղծելու անհրաժեշտությունը:

«Հայոց պատմություն» առարկայի ընդհանուր և քնագիտամաթեմատիկական հոսքերի երեք դասագրքերը նպատակ ունեն միջին դպրոցում սովորողի ուսումնասիրած ու յուրացրած կյուրի իմացությունը մտաձանաչողական ավելի բարձր մակարդակի վրա խորացնելու նոր հարցադրումներով: Կարևոր նպատակներից է սովորողների մտք ձևավորել հայեցակարգային մոտեցումներ ինչպես հայոց պատմության, այնպես էլ աշխարհըմբռնման հանգուցային հարցերում: Ավագ դպրոցում այդպես ապահովվում են պատմական կրթության շարունակականությունն ու հաջորդականությունը:

10–12–րդ դասարանների դասագրքերի բովանդակության ձևավորման համար հիմնական չափանիշ է ընտրվել պատմության մեկնաբանման և արժևորման քաղաքակրթական սկզբունքը՝ այն զուգորդելով պատմական դարաշրջանների հաջորդականության տեսության հետ:

Առարկայի՝ ավագ դպրոցի ընդհանուր և քնագիտամաթեմատիկական հոսքերի ծրագիրը ժամանակագրական առումով ընդգրկում է հայկական քաղաքակրթության ամբողջական պատմությունը՝ նրա ակունքնե-

րից մինչև արդի հասարակության ժամանակաշրջանը: Հատկանշական է, որ *հայ ժողովրդի փառասեղ պարսնական ուղին համարայլ է եղել մարդկային հասարակության անցած քաղաքակրթական ընթացքին:*

Պատահական չէ, որ մարդկային հասարակության վաղաքաղաքակրթական դրսևորումների զգալի մասը բաժին է ընկնում քնակլիմայական բարենպաստ պայմաններ ունեցող, միմյանց սահմանակից և գերազանցապես արիական–հնդեվրոպական ժողովուրդներով քնակեցված նույն տարածաշրջանին՝ Հյուսիսային Միջագետքին, Փոքր Ասիային, Իրանական բարձրավանդակին և Հայկական լեռնաշխարհին: Դրանց վկայություններն են վաղերկրագործական մշակույթի բազմաթիվ քաղաղորհչները, քաղաքաշինական, հատկապես ամրոցաշինական ու տաճարաշինական արվեստի նմուշները, տոմարագիտական ու տիեզերագիտական գիտելիքների բարձր մակարդակը, ձիարուծության, մետաղամշակության, գինագործության, գինեգործության զարգացման աստիճանը:

Հայաստանը հին ժամանակներից եղել է քաղաքակրթության բնօրրաններից մեկը: Հայ ժողովուրդը, շփվելով և փոխազդեցությունների մեջ լինելով տարբեր քաղաքակրթությունների հետ, պահպանել ու զարգացրել է իր ինքնատիպ մշակույթը, ազգային նկարագիրն ու գոյակերպը: Դրա շնորհիվ հայությունը հազարամյակների միջով հասել է մարդկության պատմության արդի փուլին: Ահա թե ինչու հայկական մշակութային հարուստ ժառանգության համակողմանի ուսումնասիրումը կազմել է դասագրքերի կարևոր բովանդակային ուղղություններից մեկը:

Հայոց պատմության բովանդակային առանցքը կազմել է նաև հայկական պետականության պատմությունը, որը սերտորեն կապվում է նույն քաղաքակրթական խնդիրների հետ: **Ք. ա. III հազարամյակում** երկրագործական մշակույթի հետագա զարգացումը, տոհմացեղային կարգերի անկումը, ռազմական ավազանու դիրքերի ամրապնդումը, քաղաքային կյանքի ձևա-



վորման իրողությունը հետզհետե հանգեցնում են Հայկական լեռնաշխարհում *առաջին պետական կազմավորումների* առաջացմանը: Հնդեվրոպական մայր ժողովրդից անջատված հայալեզու ցեղամիավորումների հենքի վրա այդ հայկական վաղ պետականությունները միավորվում են, և Ք.ա. I հազարամյակի սկզբին հանդես է գալիս *համահայկական առաջին պետությունը՝ Վանի կամ Արարատյան թագավորությունը (Ուրարտու)*: Այս ամենը հաստատվում է հնագիտական, լեզվաբանական, սեպագրական, բանախյուսական, ազգագրական, մարդաբանական և այլ աղբյուրներով: Վանի թագավորության գոյության ընթացքում (Ք.ա. IX–VII դդ.) Հայաստանում ստեղծվում է Հին աշխարհի պետական մակարդակի հասցված քաղաքակրթական հզոր մի հենք, որի վրա հետագայում շարունակություն են ունենում հին հայկական մյուս թագավորությունները՝ Հայկազուն–Երվանդյան, Արտաշեսյան և Արշակունյաց:

Դասագրքերի ժամանակագրական կառուցվածքը տրված է ըստ հայոց պատմության պարբերացման, որը գրեթե առանց էական տարբերությունների նույնանում է համաշխարհային պատմության համապատասխան դարաշրջանների հետ: Հին շրջանն ընդգրկում է վաղնջական ժամանակներից մինչև ավատատիրական կարգերի հաստատման և պետականորեն քրիստոնեության ընդունման ժամանակաշրջանը՝ III դարի վերջը, միջնադարը՝ IV դարից մինչև XVII դարի կեսերը, նոր պատմությունը՝ XVII դարի կեսերից մինչև 1918 թ. և նորագույն շրջանը՝ 1918 թ. մինչև մեր օրերը: Յուրաքանչյուր դարաշրջան իր հերթին տրոհվում է մի քանի փուլերի:

Ավագ դպրոցի 10–րդ դասարանի սույն դասագիրքն ընդգրկում է հին շրջանը (հայկական քաղաքակրթության ակունքներից մինչև III դարի վերջը) և միջնադարը (IV դարից մինչև XVII դարի կեսերը):

Հայոց պատմության առանցքը կազմող ազատության և անկախության պահպանման կամ վերականգնման համար մղված

դարավոր պայքարի, դրանում Հայ առաքելական եկեղեցու ունեցած քացառիկ դերի, համահայկական պետության քացակայության պայմաններում պետականության հիմնական հատկանիշներով (իշխանության մարմիններ, զինված ուժեր և այլն) օժտված զանազան կազմավորումների (իշխանապետություններ, մելիքություններ, սղնախներ, լեռնային կիսանկախ համայնքներ և այլն), Հայկական հարցի և այլ հիմնահարցերի քննությունը, Հայաստանի առաջին հանրապետության և խորհրդային հանրապետության առաջին երկու տարվա պատմությունը ներկայացված է II–րդ դասարանի դասագրքում (XVII դարի կեսերից մինչև 1922 թ.):

Եվ, վերջապես, 12–րդ դասարանի դասագիրքն ընդգրկում է հայոց պետականության նորագույն պատմության ընթացքը՝ Խորհրդային Հայաստանի և նորանկախ երրորդ հանրապետության (1991 թ. մինչև մեր օրերը) կարևոր իրադարձություններն ու արդյունքները:

Դասընթացի գլխավոր նպատակն է սովորողներին հիմնարար գիտելիքներ տալ հայկական քաղաքակրթության պատմական զարգացման ընթացքի հիմնական օրինաչափությունների և առանձնահատկությունների վերաբերյալ, նպաստել նրանց՝ պատմական կարևոր իրադարձությունները և երևույթները ուսումնասիրելու, հասկանալու, վերլուծելու, համեմատելու, համադրելու, ինքնուրույն եզրահանգումներ կատարելու, հայկական պատմաձևակային ժառանգությունն արժևորելու կարողությունների զարգացմանը: Ավագ դպրոցում հատկապես կարևորվում է սովորողների ազգային ինքնագիտակցության զարգացման, ազգային արժեքային համակարգի, նրանց աշխարհայացքի ամբողջական ձևավորման խնդրի լուծումը: Առաջնային խնդիր է նաև ուսումնական այնպիսի գործընթացի ապահովումը, որը հիմնարար գիտելիքների հենքի վրա սովորողներին հնարավորություն կտա զարգացնելու իրենց ճանաչողական, տրամաբանական, ստեղծագործական կարողու-

թյուններն ու հմտությունները, *խնայարարելու և յուրացնելու ազգային արժեհամակարգի փայրերը*:

Հայոց պատմական փորձի տեսական յուրացումը կնպաստի, որ Հայաստանի Հանրապետության յուրաքանչյուր երիտասարդ քաղաքացի լիովին նվիրվի իր անկախությունը վերականգնած Հայաստանի շննացման և հզորացման նվիրական գործին: Ավագ դպրոցում հայրենական պատմության իմացության խորացումն ու ամ-

րապնդումը սովորողների համար ճանապարհ կհարթեն դեպի բարձրագույն ուսումնական հաստատություններ և գիտության բարձունքներ:

Դասագրքերի հեղինակները օգտագործել են հրապարակի վրա եղած մասնագիտական գրականությունը, բուհական դասագրքերը, ինչպես նաև վերջին տարիներին հրատարակված ձեռնարկների նյութերը, տարբեր հիմնախնդիրների վերաբերյալ պատմագիտության ձեռքբերումները:

## ՀԱՅԿԱԿԱՆ ԲԱՂԱՔԱԿՐԹՈՒԹՅԱՆ ՁԵՎԱՎՈՐՄԱՆ ՊԱՏՄԱՃԵՆԱՐՀԱԳՐԱԿԱՆ ՊԱՅՄԱՆՆԵՐԸ

### Հայկական լեռնաշխարհի դիրքը

Բազմադարյան հարուստ մշակույթ ու պատմություն ունեցող հայ ժողովրդի հայրենիքը *Հայկական լեռնաշխարհն է*: Այն իր բարձր դիրքի պատճառով հայտնի է եղել նաև *Հայկական բարձրալեռնային, Լեռնային երկիր* կամ *Լեռնային կղզի* անուններով: Հայկական լեռնաշխարհը հյուսիսից եզերվում է Կուր գետով, հարավից՝ *Հայկական Տալիուսի* լեռնաշղթայով և Հյուսիսային Միջագետքի հարթավայրով, հյուսիս-արևմուտքից՝ *Պոնտոսի* լեռներով: Մեր հայրենիքը արևելքից սահմանակից է *Կասպից ծովին, Իրանական բարձրալեռնային և Ուրմիա լճին*, արևմուտքից՝ *Փոքրասիական սարահարթին*: Այդ սահմանների միջև ընկած կենտրոնական ու ամենաբարեբեր տարածքը հաճախ անվանվել է *Միջնաշխարհ*:

Հայկական լեռնաշխարհը գործուն երկրաշարժային գոտի է, որտեղ այսօր էլ շարունակվում են լեռնակազմական գործընթացները: Այնտեղ է Մերձավոր Արևելքի միակ գործող հրաբխային գագաթը՝ *Թոնդուրենկը*, որի խառնարանից այժմ էլ ժայթքում են հրաբխային բեկորներ, տաք գոլորչի և գեյզերներ: Առաջին խոշոր երկրաշարժի մասին տվյալները վերաբերում են Ք.հ. 341 թ.: Հայտնի են 893 թ. Դվինի, 1319 թ. Անիի, 1679 թ. Գառնիի, 1840 թ. Ակոտի, 1926 թ. Լենինականի, 1931 թ. Ջանգեզուրի, 1937 թ. Երևանի, 1988 թ. Սպիտակի երկրաշարժերը:

Հայկական լեռնաշխարհում կան բազմաթիվ խոշոր լեռնաշղթաներ: Հյուսիսում՝



Արագած լեռան խառնարանը և հյուսիսային գագաթը

արևմուտքից դեպի հարավ-արևելք ուղղությամբ, վեր են խոյանում *Ջախախի, Գուգարքի, Գեղամա, Արցախի* լեռները: Հայաստանի Հանրապետության (ՀՀ) ամենաբարձր լեռը *Արագածն է* (բարձրությունը՝ 4096 մ): Բարձրությամբ ՀՀ երկրորդ գագաթը *Կասյուր ջուղն է* (3906 մ): Հայկական լեռնաշխարհի կենտրոնում ձգվում է երկրորդ լեռնաշղթան՝ *Հայկական Պարբ*, որը սկսվում է լեռնաշխարհի ամենաբարձր գագաթից՝ Արարատից (*Մեծ Մասիս՝ 5165 մ, Փոքր Մասիս՝ 3925 մ*): Հարավում երրորդ լեռնաշղթան *Հայկական Տալիուսն է*:

Հայկական լեռնաշխարհի երկրորդ բարձր գագաթը *Սիսիանն է* (4434 մ), որն ընկած է Վանա լճից (հնում՝ *Բզուննյաց ծով*) հյուսիս: Հայկական լեռնաշխարհի երեք խոշոր լճերն են *Սևանը, Վանը և Ուրմիան*: Սևանը հայտնի է նաև *Գեղամա ծով* անունով: Ծովի մակերևույթից բարձր է 1916 մ: Հայտնի է նրա իշխան ձուկը: Սևանի ջուրը քաղցրահամ է:





Մեծ ու Փոքր Մասիսները և Արաքս գետը



Բերկրիի ջրվեժը

Նրա մեջ թափվում են շուրջ 30 գետակներ, իսկ լճից դուրս է հոսում միայն **Հրազդան** գետը: **Կանա լիճը** (քարձրությունը ծովի մակերևույթից՝ 1720 մ) ունի չորս կղզի՝ **Աղթամար, Կորուց, Լիմ** և **Արսեր**: Միակ ձկնատեսակը տառեխն է, ջուրն աղի է: **Կասպուրանը (Ուրմիա)** ծանծաղ լիճ է, աղիության պատճառով չունի կենդանական աշխարհ: Կան նաև այլ փոքրիկ լճեր՝ **Մովսիկ Տրախտ** (Ցելի, Չլոլըր), **Արձակ, Նազիկ, Փարխանա, Գայլապու** և այլն: Վճիտ ջրեր ունեն Արագածի վրայի **Քարի լիճը** և **Նեմրոթի** խառնարանային լիճը: Հայաստանում կան մի քանի գեղատեսիլ ջրվեժներ (**Բերկրի, Թորթում** և այլն):

### Խոշոր գետերը

Հայկական լեռնաշխարհից են սկզբնավորվում տարածաշրջանի մի քանի խոշոր գետեր: **Եփրատը** գետն ունի երկու ձյուղ՝ Արև-



Նեմրոթ լեռան խառնարանային լիճը

մտյան Եփրատ (սկզբնավորվում է Էրզրումից հյուսիս ընկած **Մաղկավեար** լեռներից) և Արևելյան Եփրատ՝ **Արածանի** (սկիզբ է առնում **Մաղկանց** լեռներից): Երկուսն էլ հոսում են արևելքից արևմուտք և **Ալեն** քաղաքի մոտ միախառնվում են: Հարավում Եփրատը միանում է Տիգրիսին, լցվում Պարսից ծոցը: Հայաստանի մասում Եփրատն ունի 500 կմ երկարություն: Մյուս գետը **Ճորոխն** է՝ 345 կմ երկարությամբ: Այն սկիզբ է առնում Էրզրումից հյուսիս՝ Խաչափայտի լեռներից, հոսում արևմուտք, ապա՝ հյուսիս-արևելք և Բաթում քաղաքի մոտ լցվում Սև ծովը: **Տիգրիսը**, որը Հայկական լեռնաշխարհի հարավային մասում է, Հայաստանով անցնում է մոտ 400 կմ և նույնպես ունի երկու ձյուղ՝ **Արևմտյան** և **Արևելյան**: Առաջինը սկիզբ է առնում **Մուլք** լճից, երկրորդը՝ Հայկական Տավրոսից: Տիգրիսը Եփրատի հետ թափվում է Պարսից ծոց: **Կուր** գետը, որի երկարությունը 1113 կմ է, սկզբնավորվում է Հայկական լեռնաշխարհում և Արաքսի հետ թափվում Կասպից ծովը:

**Արաքսը** (ինձում՝ **Երասխ**)՝ հայոց մայր գետը, սկիզբ է առնում **Բյուրակնյան (Սրմանց)** լեռներից, հոսելով արևելք՝ խառնվում է **Կուր** գետին, լցվում Կասպից ծովը: Ունի մոտ 1000 կմ երկարություն և ամբողջապես հոսում է Հայկական լեռնաշխարհի տարածքով:

Հայաստանի Հանրապետության տարածքում հայտնի գետերից են **Հրազդանը, Աղսրենը, Դերեղը, Ախուրյանը, Որուրանը, Արփան, Ողջին** և այլն:

Մեր հայրենիքի նշանավոր դաշտերն են **Արարատյան, Շիրակի, Մշո, Կարնո (Էրզրումի), Երզնկայի, Արաշկերտի** և այլն:

## **Բնակլիմայական պայմանները և օգրակար հանածոները**

Ըստ բնակլիմայական պայմանների՝ Հայկական լեռնաշխարհը բաժանվում է երեք գոտու: **Ցածրադիր** գոտում, որն ունի ծովի մակերևույթից 350–1000 մ բարձրություն, աճում են խաղող, բամբակ, ծիրան, նուռ, դեղձ և այլն: Հայաստանում աճող ծիրանը Հին աշխարհում հայտնի էր **արմենիկա** անունով: **Նախալեռնային** գոտին (բարձրությունը՝ 1000–1500 մ) հայտնի է հացահատիկով, գարիով, մրգատու այգիներով և խաղողով: **Լեռնային** գոտին տարածվում է 1500–2000 մ և ավելի բարձրության վրա: Այստեղ աճում են հացահատիկի և գարու ավելի ցրտադիմացկուն տեսակներ, կան հարուստ ալյան մարգագետիններ, որոնք նպաստավոր են անասնապահության զարգացման համար:

Հայկական լեռնաշխարհի անտառները հիմնականում Արցախում, Սյունիքում, Գուգարքում և Տայքում են: Կենդանիներից տարածված են եղև վարազը, աղվեսը, գայլը, առյուծը, արջը, բորենին, նապաստակը, բարայծը (մուֆլոն), եղջերուն: Հայաստանը հոչակված էր որդան կարմիր ներկով, որը ստանում էին Արարատյան դաշտում բազմաթուղ կարմրատրոից:

Հայկական լեռնաշխարհը հարուստ է օգտակար հանածոներով, օրինակ՝ աղով (Նախիջևան, Կողբ, Կաղզվան), պղնձով (Ջանգեզուր, Լոռի), նավթով (Կարին), երկաթով (Վանա լճի հարավային շրջաններ), ոսկով (Սպեր, Մոդք), շինաքարով (Շիրակ), հանքային բուժիչ ջրերով (Ջերմուկ, Արզնի, Բջնի) և այլն:

Հայաստանը, գտնվելով միջազգային տարանցիկ առևտրական ուղիների, այդ թվում՝ Արևելքը Արևմուտքին կապող Մետաքսի ճանապարհի վրա, տնտեսական մեծ զարգացում է ապրել: Սակայն Հայաստանի չափազանց բարենպաստ դիրքը և պատմաաշխարհագրական պայմաններն անցյալում և նորագույն շրջանում առաջացրել են տարբեր ժողովուրդների, պետությունների և քոչվոր ցեղերի հետաքրքրությունը:

## **Վարչական բաժանումը**

Հայկական լեռնաշխարհում հնագույն ժամանակներից գոյություն են ունեցել հայկական երկու պետություններ՝ **Մեծ Հայքը** (օտար հեղինակների կողմից հիշատակվող **Արմենիա մայորը**) և **Փոքր Հայքը** (**Արմենիա մինորը**): Երբեմն Մեծ Հայքի աշխարհներից **Ծոփքը** ինչպես և վերջինիս սահմանակից **Կունազենն** առանձնացել ու դարձել են առանձին թագավորություններ:

Հայ ժողովրդի կյանքում ամենամեծ դերը կատարել է Մեծ Հայքը, որը, ըստ V–VII դարերի «Աշխարհացույցի», բաժանվել է 15 խոշոր նահանգների, որոնք իրենց ընդարձակ տարածքի պատճառով հաճախ անվանվել են աշխարհներ: Դրանք են **Գուգարքը**, **Տայքը**, **Բարձր Հայքը** (**Կորստ աշխարհ**), **Ծոփքը** (**Չորրորդ Հայք**), **Աղձնիքը**, **Տարուն-Տարուերանը**, **Կորդուքը** (**Կորձայք**), **Մուկքը** (**Մուխ**), **Վասպուրականը**, **Պարսկահայքը**, **Փայտավարանը**, **Ուրիքը**, **Արցախը**, **Սյունիքը** և **Այրարատը**:


Մեծ Հայքի տարածքը 311 հազ. քառ. կմ է, Փոքր Հայքինը՝ մոտ 80 հազ. քառ. կմ: Մեծ Հայքի բոլոր 15 աշխարհները միասին ունեն 191 գավառ, որից 37–ը՝ Վասպուրականում, 20–ը՝ Այրարատում: Ամենանշանավոր աշխարհը Այրարատն է: Բավական է նշել, որ հայոց մայրաքաղաքների մեծ մասը (Երևան, Անի, Արտաշատ, Դվին, Արմավիր, Կարս, Երազգավորս, Վաղարշապատ, Երվանդաշատ, Բագարան) եղել է Այրարատում:

Հայաստանի Հանրապետությունը, որն ունի 29,8 հազ. քառ. կմ տարածք, ամբողջությամբ իր մեջ չի ընդգրկում Մեծ Հայքի ոչ մի աշխարհ: Մեր հանրապետության կազմում ամենաշատ գավառներ մտնում են Սյունիքից և Այրարատից, ավելի քիչ՝ Գուգարք և Ուտիք աշխարհներից:

Հայկական երկրորդ պետության՝ Լեռնային Ղարաբաղի Հանրապետության (ԼՂՀ) մաս են կազմում գավառներ պատմական Արցախ և Սյունիք աշխարհներից: Հայերը միջնադարում ուժեղ պետություն են ստեղծել նաև Միջերկրական ծովի հյուսիս–արևելքում ընկած **Կիլիկիայում**, որն ունեցել է մինչև 50 հազ. քառ. կմ տարածք: Նշանակում է՝ Մեծ Հայքը, Փոքր Հայքը և Կիլիկիան միասին կազմել են մոտ կես միլիոն քառ. կմ տարածք:

Ա

Ս Ա Ս



ՀԱՅԿԱԿԱՆ  
ՔԱՂԱՔԱԿՐԹՈՒԹՅԱՆ  
ՁԵՎԱՎՈՐՈՒՄՆ ՈՒ ԶԱՐԳԱՑՈՒՄԸ



ԹԵՍԱ 1. ԶԱՐԻ ԴԱՐԻՑ ՄԻՆՉԵՎ ԶԱՂԱԶԱԿՐԹՈՒԹՅԱՆ  
ԱԿՈՒՆՔՆԵՐ

§ 1. ՀԱՅԿԱԿԱՆ ԼԵՌՆԱԾԵՆԱՐՀԸ ՀԻՆ ԵՎ ՄԻՋԻՆ ՔԱՐԻ ԴԱՐԵՐՈՒՄ

Համաձայն ժամանակակից պատկերացումների՝ երկրագնդի վրա մարդը հանդես է եկել մոտ 3 մլն տարի առաջ: Հայկական լեռնաշխարհը հնագույն մարդու նախնական քնակեցման այն տարածքներից է, որը հարուստ է քարի դարի բոլոր փուլերն ընդգրկող (*պալեոլիթ* կամ *հին քարի դար*, *մեզոլիթ* կամ *միջին քարի դար*, *նեոլիթ* կամ *նոր քարի դար*) հուշարձաններով:

**Հին քարի դար:** Հինքարիդարյան ժամանակաշրջանը բաժանվում է երեք ենթաշրջանների՝ ստորին, միջին և վերին: Նախնադարյան հասարակության հինքարիդարյան փուլի առաջին ենթափուլը՝ ստորին հին քարի դարը, Հայաստանի տարածքում սկսվել է մոտ 2 *միլիոն տարի առաջ* և ավարտվել մոտ 100 *հազար տարի առաջ*: Մեր հայրենիքի քնակեցման սկզբնակետերից մեկն այսօր, ըստ վերջին տվյալների, կարելի է համարել *Գուգարքում* հայտնաբերված հինքարիդարյան կայանը: Այս հնավայրը մոտ 1,8 *միլիոն տարեկան* է: Այն Արևմտյան Եվրասիայի՝ մարդու մինչև այժմ հայտնի հնագույն կայանն է:

Հնագույն ժամանակների մասին հարուստ տեղեկություններ են պարունակում հատկապես *Ազոխի* քարայրն Արցախում, *Արրին լեռան* շրջակայքը և մի քանի հուշարձաններ Արևմտյան Հայաստանում: Հնավայրերից (Արզնի, Նուռնուս, Ջրաքեր, Հատիս, Ապարան, Արտենի և այլն) պեղված նյութերը պատրաստված են գերազանցապես բազալտից ու վանակատից:

Հայաստանի տարածքի հնագույն քնակիչներն աստիճանաբար ձեռք են բերել կենսագործունեության կարևոր հիմնություններ, օրինակ՝ կրակի օգտագործումը: Իսկ

լեռնաշխարհի հնագույն քնակիչները ոչ միայն հարմարվել են տեղի պայմաններին, այլև նրանց մի մասը հաղթահարել է Մեծ Կովկասի լեռնաշղթան և անցել Հյուսիսային Կովկաս:

Միջին հին քարի դարն ընդգրկում է մոտ 100 *հազարից* մինչև 40 *հազար թվականներն* ընկած ժամանակաշրջանը: Հինքարիդարյան այս ենթափուլին բնորոշ է քարե գործիքների զանգվածային պատրաստումը: Այդ ժամանակի գործիքների հիմնական տեսակներն են սրածայրերը, քերթիչները և տարատեսակ ատամնավոր-փոսիկավոր գործիքները:

Հայկական լեռնաշխարհում հայտնի է ավելի քան 150 միջին հինքարիդարյան հուշարձան՝ քարայր-կացարաններ, բացօթյա կայաններ և հնավայրեր:

Այս ժամանակաշրջանի մարդիկ ապրել են ոչ մեծ խմբերով՝ *համայնքներով*: Քարայր-կացարանների ընդհանուր «քնակելի մակերեսը» վկայում է, որ այդպիսի մեկ համայնքի անդամների թիվը չէր կարող գերազանցել 20-ը:

Վերին հին քարի դարն ընդգրկում է մոտ 40000-14000 *թվականներն* ընկած ժամանակաշրջանը: Մեզանից 40-35 *հազար տարի առաջ* Եվրոպայի և Մերձավոր Արևելքի հինքարիդարյան մշակույթներում տեղի է ունենում զգալի առաջընթաց: Այն կապված էր մարդկային հասարակության համար շրջադարձային իրադարձության՝ երկրագնդի վրա *բանական մարդու (Homo sapiens)* և նրա մշակույթի տարածման հետ: Մարդկանց գործիքային կազմն ընդլայնվել է. պատրաստվել են տարատեսակ քերիչներ, սրածայրեր, կտրիչներ,



Հեագույն մարդկանց գործիքներ վանակատից

կացնաձև և դրաձև գործիքներ, դանակներ, ծակիչներ և այլն:

Հայաստանի տարածքում հայտնի է վերին հիմքարիդարյան շուրջ 60 հուշարձան: Դրանց հիմնական մասը լեռնաշխարհի էյուսիսարևելյան, հարավային և հարավարևմտյան մասերում է՝ Եփրատի ավազանում, Կորդվաց աշխարհում, Տիգրիսի ավազանում և այլուր:

Այս ժամանակաշրջանի **մարդկանց հիմնական գրառումները** մնում էր որսորդությունը: Համայնքները բնակեցնում էին քարայրեր, ժայռածածկեր, գետերի դարավանդներ, լճերի ափամերձ հատվածներ: Վերինհիմքարիդարյան ժամանակի բնակչությունը ձգտել է առավելագույնս մոտ ապրել իր համար անհրաժեշտ կենսապահովման պաշարներին: Այս փուլի ավարտին սկսել է ձևավորվել կենսապահովման մի նոր ճյուղ՝ **ձկնորսությունը**:

Ջարգացման համեմատաբար քարձր աստիճան ունեցող նյութական մշակույթը հանգեցնում է նաև հասարակության հոգևոր կյանքի հարստացմանը: Այս ժամանակաշրջանում արդեն առկա էր, օրինակ, բազմակողմանի թաղման ծեսը:

Մշակույթում առանձնակի տեղ էր գրավում **արվեստը**: Այն հիմնականում բաժանվում էր երկու խմբի՝ քարանձավային արվեստի՝ քարայրերի պատերին պահպանված գծանկարներ, և փոքր չափերի արվեստի՝ արձանիկներ, տարատեսակ առարկաների վրա փորագրված և ներկանյութով պատված զարդեր, պատկերաքանդակներ:

Հայկական լեռնաշխարհի վերին հին քարի դարի մշակույթն ընդհանրություններ ունի Մերձավոր Արևելքի վերին հինքարի-

դարյան մշակույթի հետ: Դա թույլ է տալիս Հայկական լեռնաշխարհի, Միջերկրական ծովի ափամերձ շրջանի (Լևանտ) և Ջագրոսի հուշարձանները միավորել մեկ՝ այսպես կոչված **առաջափորասիական մշակութային գոտու** մեջ: Վերջինս էապես տարբերվում է աֆրիկյան, միջինասիական և հարավուսական մշակութային գոտիներից:

**Միջին քարի դար**: Միջին քարի դարը, ըստ նորագույն գիտական տեսակետների, հին քարի դարից նոր քարի դարին անցման ոչ երկարատև մի ժամանակահատված է. ընդգրկում է **Ք.ա. 12000-10000 թվականները**: Մեզանից մոտ 14 հազար տարի առաջ, երբ սկսվում է համաշխարհային հետսառցային տաքացումը, երկրագնդի բնակլիմայական պայմանները փոփոխվում են:

Միջին քարի դարի փուլում շարունակվում են տարբեր նշանակության գործիքների տեսականու ընդլայնումն ու եղածներին կատարելագործումը:

Միջինքարիդարյան բնակչության տնտեսության հիմքը շարունակվում են մնալ որսորդությունն ու հավաքչությունը, սակայն էականորեն փոխվում է դրանց քույրը:

**Նեպոն ու սպեղը**, որն արդեն կիրառվում էր վերին հին քարի դարի վերջում, միջին քարի դարում հաստատվում է որպես որսորդական տիրապետող գենքի միջոց: Միջին քարի դարում ձկնորսությունը դառնում է սննդի հայթայթման հիմնական ձևերից մեկը:

Միջին քարի դարում են սկզբնավորվում նաև հասարակական առաջընթացի հաջորդ երկու նվաճումները՝ վայրի կենդանիների ընտելացումն ու քույսերի (գերազանցապես՝ հացազգիներ) մշակումը: Այս ժամանակաշրջանում արդեն լայն տարածում ունեն ընտելացված շունը: Վայրի հացազգիները ևս աստիճանաբար դառնում են սննդի հիմնական և հուսալի աղբյուր:

**Վերին հին քարի դարը հաճախ համարում են սնունդ հասխարողների, միջին քարի դարը՝ սնունդ պահեստափորողների, իսկ նոր քարի դարը՝ սնունդ արգաստորողների ենթափուլեր**:



Միջին քարի դարում հասարակության մեջ զգալի է դառնում ընտանիքի դերը: Դրա հետ մեկտեղ աճում է համայնքների միավորման գործընթացը ավելի խոշոր կազմավորումների՝ ցեղերի մեջ: Միջին քարի դարի վերջում զգալիորեն աճում է բնակչության թիվը:

**Միջին քարի դարի և նոր քարի դարի սկզբնափուլի մշակույթը:** Հայկական լեռնաշխարհի միջին քարի դարի և նոր քարի դարի սկզբնափուլի (Ք.ա. 10000–8000 թթ.) հուշարձանները առայժմ թույլ են ուսումնասիրված: Դրանց թիվը լեռնաշխարհի սահմաններում դեռևս չի անցնում 35–ից, որոնք ինչպես բացօթյա կայաններ ու հնավայրեր են, այնպես էլ քարայր–կացարաններ ու ժայռածածկեր: Կարելի է առանձնացնել այս փուլին պատկանող հուշարձանների երկու խումբ՝ *Թռեղքյան* (Շալկայի սարահարթ) և *Ագարանյան* (Ապարանի գոգավորություն):

Միջին քարի դարի և նոր քարի դարի սկզբնափուլի հուշարձանների սահմանափակ քանակ է արձանագրված նաև Ճորոխ գետի վերին հոսանքի շրջանում, Եփրատի և Նրա վտակ Արածանիի ավազանում: Այս ժամանակաշրջանի մշակութային մի յուրօ-

րինակ օջախ է լեռնաշխարհի հարավ-արևելյան մատույցներում գտնվող Տիգրիսի վտակ Մեծ Զար գետի ավազանը:

Այսպիսով՝ Ք.ա. XII–VIII հազարամյակներում Հայկական լեռնաշխարհի մշակույթը, զարգացել է յուրօրինակ ֆիզիկա-աշխարհագրական պայմանների ազդեցության ներքո:

Որակապես նոր մակարդակի հասած ձկնորսությունը և որսորդությունը շարունակել են մնալ բնակչության սննդի հիմնական աղբյուրը: Միաժամանակ առկա է եղել բուսատեսակների ու փափկամարմինների հավաքչությունը: Սահմանափակ էր նաև ընտելացված կենդանիների՝ ոչխարի, այծի և խոզի դերը:

Այս փուլում լեռնաշխարհի բնակչությունը բավական շարժուն էր, ապրում էր ոչ մեծ խմբերով, միևնույն տեղում երկարատև բնակության հետքեր չեն մնացել: Մարդիկ զբաղեցրել են քարձրլեռնային շրջանները՝ սարահարթերն ու գոգավորությունները:

*Մարդկանց կյանքում տեղի ունեցող որակական փոփոխությունների սարիճանակյան աճն ու տարածումը դարձան սցենարի, որը շուրջով Հայաստանի տարածքում սարսևովեց նորքարիդարյան հեղափոխության հաղթանակը:*

**Հարգիր և առաջադրանքներ**

1. Ինչ գիտեք մարդու ծագման մասին: Հնագույն մարդու նախնական բնակեցման տարածքներից ինչով է առանձնանում Հայկական լեռնաշխարհը:
2. Որքան է տևել հին քարի դարը Հայկական լեռնաշխարհում: Ներկայացրեք հին քարի դարի ենթափուլերի դրսևորումները մեր հայրենիքի տարածքում:
3. Ո՞ր փուլն է հաջորդել հին քարի դարին: Ինչո՞ւ է այդպես անվանվել: Ինչ նոր երևույթներ են բնորոշ այս փուլին:
4. Աղյուսակի տեսքով ներկայացրեք նախնադարի փուլերն ու ենթափուլերը, որքան է տևել, ինչ տեսակի հնավայրեր են հայտնի և որտեղ են գտնվում:

**§ 2. ՀԱՅԿԱԿԱՆ ԼԵՌՆԱՇԽԱՐԿԸ Ք.Ա. X - II ՀԱՋԱՐԱՄՅԱԿՆԵՐՈՒՄ**

Նոր քարի դար: Պատմության քարիդարյան շրջանի վերջին փուլը՝ նոր քարի դարը, նորագույն ուսումնասիրությունների համաձայն, *Հայաստանի տարածքում* թվագրվում է *Ք. ա. X հազարամյակից* մինչև

*VI հազարամյակի կեսերն* ընկած ժամանակաշրջանով:

Ք.ա. VIII հազարամյակի վերջերից ոչ միայն մեր հայրենիքի, այլ նաև Առաջավոր Ասիայի մյուս շրջաններում արդեն գոյու-

թյուն ունենին կայացած երկրագործական հասարակություններ: Միջերկրական ծովի, Սիրիական անապատի և Հայկական (Արևելյան) Տավրոսի միջև ընկած գետահովիտներում ու արգավանդ հողերով հարուստ տարածքներում հանդես են գալիս առաջին նստակյաց բնակատեղիները: Դրանք նեղ շերտով ձգվում են հարավից հյուսիս՝ Հորդանանի հարթավայրից, դամասկոսյան օազիսի լճերի ափերով դեպի միջին Եփրատ և Ուրֆայի (Ուտիա) շրջանից՝ Եփրատի ու Տիգրիսի վերին հոսանքները: Հայկական լեռնաշխարհի հարավարևմտյան և հարևան շրջաններում տեղաբաշխված մի շարք հուշարձանների վերջին տասնամյակների պեղումները հիմնովին փոխել են մեր տարածաշրջանի նոր քարի դարի մասին եղած պատկերացումները:

#### **«Նորքարիդարյան հեղափոխություն»:**

**Ք.ա. X-VIII հազարամյակներում սկզբնավորվեցին քաղաքակրթության անցման նախադրյալները Հայաստանի տարածքում:** Հայկական լեռնաշխարհը երկրագործության սաղմնավորման խոշորագույն կենտրոն է եղել: Այստեղից երկրագործությունը և դրա հետ կապված մշակութային նորամուծությունները (բնակարանաշինություն, մետաղագործություն, խեցեգործություն, մանածագործություն և այլն) տարածվել են նաև լեռնաշխարհի հարևան շրջաններում:

Քաղաքակրթության ձևավորման տնտեսական, սոցիալական, մշակութային նախադրյալների ձևավորման համար հատկապես կարևոր եղավ բնական նոր միջավայրին հարմարվելու կենսաձևը: Դրա մասին վկայող փոփոխությունները մեր տարածաշրջանում այնքան նշանակալից էին, որ անգլիացի պատմաբան-հնագետ Գ. Չայլդն այն որակեց *«նորքարիդարյան (նեոլիթյան) հեղափոխություն»* եզրույթով: Այս կենսաձևը աստիճանաբար տիրապետող դարձավ Առաջավոր Ասիայում և Հարավային Եվրոպայի զգալի մասում:

Դեռևս 1960-ական թթ. Հայկական լեռնաշխարհի հարավ-արևմուտքում՝ *Աղձնի-*

*քում*, նոր քարի դարին ընդոռչ նյութերով հնավայրի պեղումներից հետո անպատասխան էր մնում այն հարցը, թե որտեղ պետք է փնտրել այս մշակույթի ակունքները: 1990-ական թվականների առաջին կեսին *Սասնո ջուր գետի արևմտյան ափին պեղված հնավայրի* տվյալները եկան փաստելու, որ այստեղ կայուն բնակատեղիներ հիմնող առաջին համայնքները հանդես են գալիս արդեն *Ք.ա. X հազարամյակից:*

Ուսումնասիրությունների արդյունքում ակնհայտ դարձավ, որ Հայկական Տավրոսից հյուսիս ընկած շրջանների նոր քարի դարի մշակույթը տեղական արմատներ ունի: Այսօր Ուրֆայում (Եդեսիա), Աղձնիք և Ծոփք աշխարհներում հայտնի են մի շարք հուշարձաններ, որոնք ակնհայտորեն ձևավորվել են տեղական մշակութային ավանդույթների հենքի վրա: *Եփրատի և Տիգրիսի վերին հոսանքներում* (այսպես կոչված՝ *ուլիե Լուսնեյունում*) տեղաբաշխված նորքարիդարյան հուշարձանները վաղ երկրագործական հասարակությունների մասին նոր և բազմակողմանի տվյալներ են տալիս:

#### **Նորքարիդարյան մշակույթը:**

Գոյատևման տարրական միջոցներ ունեցող փոքր գյուղակներին փոխարինում է բավականին բարդ սոցիալական կազմ և զարգացած մշակույթ ու տնտեսություն ունեցող մի հասարակություն: Որմնաքանդակներով և որմնապատկերներով զարդարված կոթողային կառույցները, բարդ տեխնոլոգիաներով արհեստների մասնագիտացումը, միջտարածաշրջանային արդյունավետ կապերն ու առևտուրը, ինչպես նաև մետաղագործությունն ասվածի լավագույն վկայությունն են:

Առաջինը, ինչն աչքի է զարնում այս հուշարձաններում, բնակավայրերի առանձնացված հատվածներում կոթողային շինությունների առկայությունն է, որոնք շինարարական տեխնիկայով և կահավորանքով խիստ տարբերվում են այլ կառույցներից: Մասնավորապես *Եդեսիայի մուր գրնվող Պորպարյուր հնավայրի* արևելյան հատվածի վաղ շերտերում բացվել է 1000 քառ. մ տարածք զբաղեցնող մի հրապարակ, որի





Տաճարային համալիր. Արևմտյան Հայաստան



Ներքին հարդարանքի կոթող. Արևմտյան Հայաստան

հարևանությամբ պեղվել են, այսպես կոչված, **սպե կոթողների գունդ** և **գանգերի գունդ**: Այս կառույցները նախատեսված են եղել համահամայնական արարողությունների ու հավաքների համար:

Հասարակական կառույցների մեջ առանձնակի դեր է ունեցել, այսպես կոչված, «խճապատ հատակով շինությունը»: Վերջինիս հատակը զարդարվել է գիպսով ամրացված և կարմիր, նարնջագույն, սպիտակ երանգների համադրություն կազմող խճաքարերով: Կառույցից գտնվել են մարդու գլխի կրաքարե քանդակ և մարդակերպ բարձրաքանդակ պատկերով հարդարված քարակոթող:

Այս գտածոների տեղն ու դերն ավելի պարզ դարձավ, երբ պեղվեց մյուս հուշարձանը, որտեղի պաշտամունքային կառույցներն արդեն իսկական տաճարներ են: Հարկ է նշել, որ **Պորտաբլուրում բացվել են երկիր մուդրակի վրա մինչ օրս հայրնի ամենահին տաճարները**:

Մինչև 4 մ բարձրություն ունեցող քանդակագարդ կոթողներով «սրբազան շինություն» է բացվել նաև մեկ այլ հուշարձանում (այսպես կոչված՝ «**սոյուժների գունդ**»): Բլրի վրա գտնված քարակոթողներից ամենամեծի բարձրությունը հասնում է 9 մետրի և կշռում է ավելի քան 50 տոննա: Քարակոթողները քանդակագարդված են մարդու, թռչնամարդու, կրիայի, առյուծի և այլ պատկերներով:

Ք.ա. VIII հազարամյակում արդեն

Պորտաբլուր հնավայրում զգալի քանակությամբ պղնձի օքսիդաքար՝ մալախիտ և լազուրիտ է հայտնաբերվել: Փաստագրվել են նաև պատրաստի իրեր, որոնք **երբևիցե հայրնաբերված հնագույն մետաղե զսածոներից են**: Այս իրերը պատրաստվել են սառը կոման եղանակով՝ մալախիտի կտորներից: Հատկանշական է, որ իրերի մեջ մեծամասնություն են կազմում զարդերը՝ ուլունքները՝ պատրաստված գերազանցապես մալախիտից, մասամբ՝ պղնձից, և կախիկները:

Վերջին տարիներին բացառիկ հետաքրքիր տվյալներ են ձեռք բերվել հացագգինների ընտելացման մասին: Պարզվել է, որ հաճարի և մշակովի կարծր ցորենի ընտելացման օջախը քարտեզագրվում է նշված մշակույթի տարածման շրջանում: Նորքարիդարյան հիմնական մշակաբույսերը՝ ոլոռ, սիսեռ, ոսպ, միահատիկ ցորեն, նույնպես հիշյալ տարածքում են ընտելացվել:

**Պղնձի-քարի դար**: Վանա լճի ափամերձ գոտու, Խարբերդի հովտի հուշարձանների տվյալները ցույց են տալիս, որ Հայկական լեռնաշխարհը **Ք.ա. VI հազարամյակի երկրորդ կեսում** և **V հազարամյակում** ընդգրկվում է պղնձի-քարիդարյան մի ինքնատիպ մշակութային ոլորտ:

Ք.ա. VII հազարամյակի վերջերից լեռնաշխարհի մեծագույն մասում արտադրող տնտեսությունը հանդես է գալիս արդեն որպես լիովին ձևավորված համակարգ՝



հիմնված ընտելացված կենդանական և բուսական աշխարհի շահագործման վրա:

Նորքարիդարյան և պղնձի-քարիդարյան քնակատեղիները (Վերին Խաթունարխ, Ծաղկունք, Մասիս բլուր, Աղաբլուր, Թեղուտ) տեղաբաշխված են հարթավայրում և կապված են գետային որոշակի ցանցի հետ: Տարածաշրջանի վաղ երկրագործական հասարակությունների կայացման և զարգացման համապատկերը վեր հանելու համար բացառիկ տվյալներ են գրանցվել *Առաքաշեն* բլուր-քնակատեղիում (Արարատյան դաշտ): Պղնձի-քարիդարյան մշակույթը ներկայացնող հուշարձաններից կարելի է հիշատակել Արարատյան դաշտում պեղված Աղաբլուր (հայտնի է նաև Կղզյակ բլուր անունով) հնավայրը:

Արաքսից հյուսիս ապրող հասարակությունների անասնապահական տնտեսությունը խարսխված էր խոշոր և մանր եղջերավորների բուծման վրա: Գերակշռում էին ոչխարներն ու այծերը, չնչին քանակությամբ բուծվում էր նաև խոզ:

Մետաղե (պղինձ, կապար) առարկաների սկզբնական պատրաստումն ու օգտագործումը սկսվել են դեռևս նոր քարի դարի շրջանում: Մալախիտի և լազուրիտի չմշակված բեկորներ են գտնվել հումքի աղբյուրներից բավականին հեռու գտնվող Արարատյան դաշտի Ք.ա. VI հազարամյակի հնավայրերից՝ Առատաշենից և Ակնաշենից: Այստեղ հայտնաբերվել են նաև պղնձե մանր զարդեր՝ փաթաթված թիթեղից պատրաստված գլանաձև ուլունքներ: Նման պատկեր ունենք նաև Կուրի միջին հոսանքի համաժամանակյա քնակատեղիներում: Ք.ա. V հազարամյակի վերջերից մետաղե իրերի տեսականին ընդլայնվում է:

Ք.ա. IV հազարամյակի կեսերից Հայկական լեռնաշխարհի Տիգրիս-Եփրատ հատվածը սերտ փոխառնչությունների մեջ է մտնում Հարավային Միջագետքի հետ: Նույն ժամանակահատվածում լեռնաշխարհի հյուսիսարևելյան շրջաններում ձևավորվում է մշակութային բոլորովին նոր պատկեր:

**Բրոնզի դար:** Ք.ա. IV հազարամյակի երրորդ քառորդից հասարակական առաջընթացը Հայաստանի տարածքում մի նոր փուլ է թևակոխում: Զարգացման տարբեր մակարդակների վրա գտնվող վաղ երկրագործական հասարակություններով ներկայացված համապատկերը գլխավին փոխվում է: Լեռնաշխարհն այսուհետ ներկայանում է զարգացման նույն մակարդակի վրա գտնվող և համասեռ մշակույթով մի հասարակությամբ, որը *չուրջ հազար տարի պահպանում է մշակութային միասնությունը:*

Տարածաշրջանի հնագույն հասարակական զարգացման քնկումնային համարվող այս ժամանակահատվածը հիմնականում համապատասխանում է մեր պատմության վաղ բրոնզի դարին՝ **Ք.ա. 3500-2300 թվականներին:**

Հայաստանի վաղբրոնզիդարյան ընդհանրության՝ այսօր հայտնի վաղագույն համալիրները կենտրոնացված են Կուր և Արաքս գետերի ավազաններում: Կուր-արաքսյան հուշարձանները թվագրվում են Ք.ա. IV հազարամյակի կեսերով: Նույն հազարամյակի վերջում միայն այդ մշակույթը սկսում է տարածվել Հայկական լեռնաշխարհի հարավարևմտյան շրջաններում, Իրանում, Հյուսիսային Կովկասում:

Կուր-արաքսյան գետահովտից և հարակից շրջաններից քնակչության հոծ զանգվածներն աստիճանական տեղաշարժերով սկսում են նոր տարածքներ յուրացնել: Ք.ա. III հազարամյակի երկրորդ քառորդում արդեն, այսպես կոչված, «Կուր-արաքսյան ծավալման» ալիքը հարավարևմտյան ուղղությամբ հասնում է մինչև Պաղեստինի հարավային շրջանները, հարավ-արևելքում՝ մինչև Համարան և Քերմանշահ, հյուսիսում անցնում է Կովկասյան լեռնաշղթան՝ մինչև Հյուսիսային Օսիա:

Հետագա բոլոր ժամանակաշրջաններում ոչ մի մշակույթ, որի պատմական միջուկը Հայկական լեռնաշխարհն էր, իր էական հատկանիշներով այդպիսի ընդարձակ տարածք չի ընդգրկել, ինչպես Կուր-արաքսյանը: Մշակութային այս աննախադեպ տարածումը մեկնաբանվում է որպես



միգրացիայի, էթնիկական տեղաշարժերի արդյունք: Այդ համատեքստում աննախադեպ տարածում է ստանում հատկապես շենգավիթյան մշակութային համալիրը: **Շենգավիթի համալիրը** Երևանի հարավարևմտյան մասում է՝ Հրազդան գետի ձախափնյա բլրին (ներկայիս՝ Երևանյան լճի շրջանում):

Ք.ա. III հազարամյակի երկրորդ կեսում Կուր-արաքսյան մշակութային ընդհանրության անկման մասին առավել տարածված է այն տեսակետը, որ տնտեսության մեջ անասնապահության դերի աճով պայմանավորված՝ այս հասարակությունը անցնում է նոր՝ ոչ նստակյաց կենսաձևի:

Կուր-արաքսյան ընդհանրության կազմալուծմանը զուգընթաց Ք.ա. III հազարամյակի երրորդ քառորդի ընթացքում լեռնաշխարհի մեծ մասում ասպարեզից դուրս մղվեց շենգավիթյան մշակութային համալիրը: Այստեղ տարածում է ստանում առավելապես դամբանաբլուրներով հայտնի՝ «**վաղ կուրզանների մշակույթը**»:

Կուր-Արաքս ավազանի կենտրոնական շրջաններում, ինչպես նաև Կուրից հյուսիս և արևելք ընկած տարածքներում Ք.ա. III հազարամյակի վերջին երկու հարյուրամյակներում արմատավորվում են, այսպես կոչված, «**Թոնդր-վանաձորյան**» մշակութային համալիրները:

Թոնդրի, Լոռի բերդի, Վանաձորի, Քարաշամբի «արքայական թաղումները» միանշանակ վկայում են տարածաշրջանի սոցիալական միջավայրում արմատական փոփոխությունների մասին:

**Նոր մշակութային ընդհանրությունների առաջացումը:** Շուրջ Ք.ա. XIX դ. կեսերից լեռնաշխարհի արևելքում և հյուսիս-արևելքում (Սյունիք, Արցախ, Սևանի ավազան, Աղստևի հովիտ) տարածում են ստանում, այսպես կոչված, **Սևան-արցախյան** մշակույթին բնորոշ իրողությունները: Նորահայտ այս մշակութային համալիրն արդեն առավելապես ներկայացված է բնակատեղիներով, ինչը տարածքի յուրացման և բնակեցման՝ նախորդ դարա-

շրջաններից տարբերվող նոր համակարգի արմատավորման մասին է վկայում:

Ք.ա. XVIII դարի վերջերից փոփոխությունների մի նոր ալիք է սկսվում: Այն տարածվում է ավելի ընդարձակ սահմանների մեջ՝ ներառելով Ուրմիայի և Վանի ավազանները, Նախիջևանը, Արարատյան դաշտը, Շիրակը, Կարսի սարահարթը, Արագածի փեշերը, Կոտայքը, Սևանի ավազանը: Մշակութային միջավայրի արագահաս փոփոխություններով հագեցած այս փուլն իր ավարտին է հասնում Ք.ա. XVI դարի վերջին:

Հատկապես վերջին տարիներին Հայաստանի հնագիտական հուշարձանների բազմակողմանի ուսումնասիրությունները, հայտնաբերված նյութերը և թաղման ծեսը փաստագրում են ուշ բրոնզի դարի հասարակությունների աննախադեպ վերելքի մասին:

**Երկաթի դարի սկիզբը:** Հայաստանում երկաթի դարը սկսվում է Ք.ա. II հազարամյակում: Երկաթի պաշարներով հարուստ **Հայկական լեռնաշխարհը**՝ Սյունիք, Մուշ, Խնուս և այլն, **Առաջավոր Ասիայում դարձավ հունքի գլխավոր մատակարար և գերիշխող դիրք գրավեց:**

Հայաստանի երկաթիդարյան հայտնի հուշարձաններից են Մեծամորը, Շամիրամը, Դվինը, Կարմիր բլուրի նախաուրարտական բնակավայրը, Այգեշատը, Թալինը, Լոռի բերդը և այլն: Նշված բնակավայրերից և դամբարաններից, համալիրներից հայտնաբերվել են երկաթից պատրաստված բազմաթիվ իրեր՝ զենքի տեսակներ, աշխատանքային գործիքներ, պերճանքի առարկաներ, ձիասարքի մասեր, արձանիկներ և այլն: Երկաթից գործիքները և զենքերն անհամեմատ ավելի ամուր և էժան էին, քան բրոնզից պատրաստվածները, չնայած որ երկաթի մշակման համար պահանջվում էին ջերմային ավելի բարձր պայմաններ: Հայաստանի մի շարք հնավայրերից հայտնաբերվել են **երկաթի ձուլման հնոց-արհեստանոցներ**, որը վկայում է տնտեսության և արհեստների աննախադեպ զարգացածության մասին:



1. Նորքարիղարյան փուլին վերաբերող ինչ հնապայեր են հայտնի. որտեղ են դրանք: Ինչ փոփոխություններ են կատարվել մարդկանց կենցաղում:
2. Պղնձի-քարիղարյան հնապայերից որոնք են ուսումնասիրվել: Ինչ փոփոխություններ կատարվեցին մարդկանց կենցաղում:
3. Բրոնզիղարյան փուլը ներկայացրե՞ք աղյուսակի տեսքով: Համեմատե՞ք այն քարիղարյան և պղնձի-քարիղարյան փուլերի հետ. ցույց տվե՞ք փոփոխություններն ու առաջընթացը:
4. Երբ է սկսվել երկաթի դարը Հայկական լեռնաշխարհում:

### § 3. ՊԱՇՏԱՌՈՒՆՔԸ: ԱՐՎԵՍՏԸ: ԳԻՏՈՒԹՅԱՆ ՏԱՐԲԵՐԸ

**Պաշտամունքը:** Մարդիկ հնուց ի վեր մշտապես կապված են եղել իրենց շրջապատող աշխարհին: Ուսումնասիրելով բնությունը՝ նրանք նկատում էին, որ տարվա եղանակները հաջորդում են իրար, արևը և լուսինը, քամին, անձրևը և այլ երևույթներ գոյություն ունեն իրենց կամքից անկախ: Հաճախ այս երևույթները սարսափ էին առաջացնում մարդկանց մոտ, քանի որ մնում էին անհասկանալի և անբացատրելի: Այս բոլորը նրանք սկսում են վերագրել գերբնական ուժերին՝ անտեսանելի, գորավոր ոգիներին: Մարդիկ կարծում էին, որ ոգիներին՝ քարի և չար գերբնական ուժերին, պետք է սիրաշահել ու գոհեր մատուցել, կատարել ծիսակատարություններ: Այդպես առաջացավ կրոնը: Կրոնի նախասկզբնական ձևերը բնորոշ են գրեթե բոլոր հանրություններին: Դրանք են *պոլեոմիզմը, անիմիզմը, ֆետիշիզմը, մոզությունը:*

**Տոլեմիզմը** հավատն է կենդանու, բույսի, բնության երևույթի հանդեպ, ըստ որի՝ տոհմային խմբի ծագումը կապվում է դրանց հետ: Տոհմը կրում էր իր տոտեմի՝ արջի, ցուլի և այլնի անունը և հավատում էր, որ իրենք ծագում են ընդհանուր նախնուց ու նրա հետ կապված են արյունակցական սերտ կապերով: Տոտեմին համարում էին «հայր», «ավագ եղբայր» և այլն, որն օժանդակում էր տվյալ տոհմի անդամներին: Յուրաքանչյուր տոհմ ուներ իր սրբազան կենտրոնը: Այստեղ պահպան-

վում էին տոհմական մատուցները և կատարվում էին զանազան ծիսակատարություններ: Տոտեմիզմը արտահայտում էր տոհմի անդամների և բնական միջավայրի հետ սերտ կապը:

**Անիմիզմը (ոգեպաշտություն)** որևէ մարմնի մեջ ամփոփված (հոգիներ) կամ ինքնուրույն գործող (ոգիներ) գերբնական էակների նկատմամբ հավատն է: Ոգեպաշտական հավատալիքների սաղմերը, որով բնության երևույթներին շնչավոր րովանդակություն էր տրվում, երևան են եկել դեռևս ամենավաղ շրջանում: Հին հանրություններն աղոտ պանկերացում ունեին կենդանի և մահացած մարդկանց հոգիների, չար ու քարի ոգիների մասին: Մարդիկ կարծում էին, որ դրանք շոշափելի առարկաներ են:

**Ֆետիշիզմը (առարկայապաշտություն)** հավատն է անշունչ առարկաների՝ ծառերի, ժայռերի, քարանձավների, պաշտամունքային հատուկ պատրաստված իրերի գերբնական հատկությունների նկատմամբ: Ֆետիշ կարող է համարվել, օրինակ՝ նիզակը կամ դաշույնը, որը մարդկանց համար ուներ կենսական, հրաշագործ հատկություն և նշանակություն:

**Մոզությունը** հավատն է այլ մարդկանց, կենդանիների, բույսերի, բնության երևույթների վրա առանձնահատուկ ձևով ներգործելու՝ մարդու ունակության նկատմամբ: Հնագույն մարդը նեթաղրում էր, որ որոշակի հնարքների, գործողությունների, բառերի, երգի, պարի և այլ միջոցներով


հնարավոր է անձրև բերել, քամի բարձրացնել, ապահովել բարձր բերք, ունենալ առատ որս և այլն: Մարդը մոգությամբ «բուժում էր» վերքերը և կանխում հիվանդությունները:

Տարբեր հուշարձաններից գտնված մերկ կանանց և կենդանիների արձանիկները, կավակերտ օջախները վկայում են, որ հնագույն բնակիչների կյանքում մեծ տեղ են ունեցել **ծեսերն ու պաշտամունքը**: Երկրագործ և անասնապահական համայնքներում, բնականաբար, տիրապետող էին ագրարային ծեսերը:

Պաշտամունքի գլխավոր առարկան աշխարհն արարող **մայր երկիրն է** որի խորհրդանիշը դարձավ սերունդ տվող կինը՝ **«Մեծ մայրը»**: Համայնքների սոցիալական կառուցվածքում և կենցաղում տեղ գտած փոփոխությունները ևս իրենց կնիքն էին թողնում պաշտամունքային պատկերացումների վրա:

Մեր հեռավոր նախնիները երկրային կյանքը, դրա բազմազան դրսևորումները, մահը և անդրշիրիմյան կյանքը բացատրում էին ոգու ներկայությամբ կամ բացակայությամբ: Հետզհետե **սկզբնավորվում է նախնիների պաշտամունքը**, հավատը տոհմի նախորդ սերունդների անդամների ոգիների հրաշագործ զորության նկատմամբ: Տոհմի, հետագայում նաև գերդաստանի, ազգի **հիմնադիր նահապետները սրբացվում են**: Յուրաքանչյուր համայնք, ընտանիք ուներ իր հովանավոր նախնին, որից սերվել էին իրենք: Մահացած տոհմակիցներին թաղում էին բակում՝ տան շեմին կամ հատակի տակ, որպեսզի մահացած ազգականի ոգին չքթեր իրենց:

Պեղումներից հայտնաբերված ցլագլուխ և խոյազլուխ զարդաքանդակներով ծիսական օջախները, կենդանիների և մարդկանց արձանիկները յուրաքանչյուր բնակելի համալիրի անբաժան ուղեկիցներն էին: Սրանք վկայում են, որ, իրոք, Հայաստանի տարածքում ապրած մարդկանց կյանքում կրոնական պատկերացումներն ու ծիսական արարողություններն էական դեր են խաղացել:



Ժայռապատկեր. Ուղտասար, Ք.ա. V-II հազ.

**Արվեստը**: Նախնադարյան Հայաստանի մշակույթի մասին հարուստ նյութեր են հայտնաբերվել: Դրանք հստակ պատկերացում են տալիս մեր հայրենիքի բնիկների կյանքի մասին:

Հայաստանի տարածքում (Գեղամա, Վարդենիսի, Վասպուրականի, Կորդվաց, Հայկական Տավրոսի լեռնաշղթաներ, Սյունիք և այլն) հայտնաբերված քարակոթողները, հատկապես Քարահունջը և ժայռապատկերները մեր հնագույն նախնիների ապրելակերպի և աշխարհըմբռնման կարևորագույն աղբյուրներ են:

Որսորդական, ծիսական տեսարանները, երկնային մարմինների երկրաչափական խորհրդանիշներն ու մարդակերպ աստվածների, երևակայական կենդանիների պատկերները վկայում են այդ ժայռապատկերների կրոնական բնույթի մասին:

Հայաստանում տարածված հավատալիքները բրոնզի դարում մեծ առաջընթաց են ապրում: Այս ժամանակի պաշտամունքային համակարգում կենտրոնական տեղ էր զբաղեցնում **արևի պաշտամունքը**: Հնավայրերում արևը պատկերող ու խորհրդանշող բազմաթիվ բրոնզյա իրեր են հայտնաբերվել: Լայն տարածում են գտել մարդակերպ և կենդանակերպ արձանիկները:

Բրոնզիդարյան կիրառական արվեստում իր պատշաճ տեղն ունի նաև երկնային լուսատուների պաշտամունքը: Իսկ ջրի պաշտամունքի խորհրդանիշներ են օձի կամ այծի, օձի և թռչունի, վիշապաձկների, ցուլերի պատկերները: Հնագիտական նյութերը պատկերացում են տալիս թաղ-



ման սովորույթների և հուղարկավորման ծիսակատարությունների, անդրշիրիմյան կյանքի մասին հավատալիքների վերաբերյալ:

**Գիտության տարրերի առաջացումը:**  
Հայաստանում գիտական իմացությունը սկիզբ է առել ու զարգացել մարդկանց առօրյա կյանքի և աշխատանքային գործունեության պահանջներին համապատասխան:

Մարդկանց անհրաժեշտ էր հաշվել հողատարածքի մակերեսը, ստացած նյութական բարիքները և այլն: Աստղերի ու մոլորակների դիրքն ու շարժումն իմանալն անհրաժեշտ էր օրացույց կազմելիս, վարուցանք անելիս: Մետաղները ձուլելիս, տարբեր համաձուլվածքներ ստանալիս հարկ էր իմանալ դրանց որոշակի հատկությունները:

Մարդիկ գիտակցում էին, որ հիվանդությունները հնարավոր չէ բուժել միայն գուշակների և հեքիմների օգնությամբ: Անհրաժեշտ էր մարդու ներքին օրգանների իմացություն և հետազոտում:

Գրերի շնորհիվ սերնդեսերունդ կուտակված փորձն ամփոփվում և պահպանվում էր հազարամյակներ: Գիր ստեղծելիս պետք է իմանալ այս կամ այն լեզվի հնչյունական կառուցվածքը:

Այսպես **սարիճանաբար առաջացան գիտության փարբեր բնագավառներին վերաբերող նախնական գիտելիքներ:** Հին ժամանակներում դրանք ունեին գործնական նշանակություն: Դրանցով զբաղվում էին թագավորները, քրմերը և այլն:

Բնագիտական գիտելիքները մարդկանց անհրաժեշտ էին ամենօրյա կյանքում: Մարդիկ իրենց իմացությունը փոխանցում էին սերունդներին: Վերջիններս ուսանում էին ժամանակի բոլոր հայտնի գիտելիքները:



Արձան-կոտք.  
Կարմիր քերթ

Քարի դարի ավարտին և բրոնզի դարում մարդն առաջին քայլերն արեց ժամանակը չափելու ուղղությամբ: Սկզբում նա հաշվեց օրերի այն քանակը, որի ընթացքում լուսնի մահիկը, անընդհատ մեծանալով, վերածվում էր լիալուսնի և վերադառնում իր սկզբնական վիճակին: Այսպես ծագեց լուսնային ամսվա գաղափարը: Հնարավոր եղավ ժամանակը չափել ոչ միայն օրերով, այլև լուսնային ամիսներով:

Մարդկանց համար շատ դժվար էր պարզել տարվա տևողությունը, սակայն մարդն անընդհատ զարգանում էր ու առաջադիմում: Հետևելով եղանակային փոփոխություններին՝ նրանք հայտնագործեցին, որ գարնանից մինչև հաջորդ գարուն, բերքահավաքից մինչև հաջորդ բերքահավաք մոտավորապես նույն քանակությամբ օրեր են անցնում: Հետևելով երկնակամարում որոշ աստղերի շարժմանը՝ պարզեցին, որ տարին բաղկացած է 365 օրից, որով փաստորեն սկիզբ առավ շարժական տոմարը:

Առկա նյութը ցույց է տալիս, որ Հայկական լեռնաշխարհի բնակչությունը հավանաբար Ք.ա. III հազարամյակից հիանալի պատկերացում ուներ արեգակնային տարվա մասին:

**Հարցեր և առաջադրանքներ**

1. Նկարագրե՛ք Հայկական լեռնաշխարհի հնագույն բնակիչների հավատալիքների սկզբնական ձևերը:
2. Ինչպե՛ս ձևավորվեցին արվեստն ու գիտության տարրերը. ինչ դրսևորումներ դրանք ունեցան: Արվեստի և գիտության ինչ նշանավոր հուշարձաններ ու գտածոներ են հայտնաբերվել:
3. Աղյուսակի տեսքով ներկայացրե՛ք նախնադարյան մշակույթը, դրա նվաճումները Հայաստանի տարածքում:

Թեմա 1. ՀԱՅՈՑ ԵՍԳՈՒՄՆԱԲԱՆՈՒԹՅՈՒՆԸ


§ 1. ՀԱՅՈՑ ԵՍԳՈՒՄՆԱԲԱՆՈՒԹՅԱՆ ՀԱՐՅԸ

Հնդեվրոպական նախահայրենիքը: Ժողովուրդների ու լեզուների առաջացման հարցը միշտ էլ հետաքրքրել է մարդկությանը: Այդ խնդրի նկատմամբ հետաքրքրությունը խիստ մեծացավ XVIII–XIX դարերում: Նոր ժամանակների գիտության մեջ ծնունդ առավ *համեմատական լեզվաբանությունը*, որի շնորհիվ պարզ դարձավ, որ նախապատմական ժամանակներում ներկայիս ժողովուրդների նախնիները կազմել են մեծ ընտանիքներ: Դրանք գիտության մեջ կոչվեցին *«մայր ժողովուրդներ»*, իսկ վերջիններիս զբաղեցրած տարածքները՝ *«նախահայրենիքներ»*:

Հայերն ունեն հնդեվրոպական ծագում, այսինքն՝ մի շարք այլ ժողովուրդների նախնիների հետ նախապատմական ժամանակներում կազմել են մեկ ազգային ընդհանրություն (ազգակցություն): Այն այսօրվա գիտության մեջ կոչվում է «հնդեվրոպական մայր ժողովուրդ» և զբաղեցրել է միննույն տարածաշրջանը՝ «հնդեվրոպական նախահայրենիքը»: Լեզվաբանության անվանակոչումը պայմանավորված է դրան պատկանող ժողովուրդների Հնդկաստանից մինչև Եվրոպայի արևմուտք տարածվածությամբ:

Հնդեվրոպական նախահայրենիքը Հայկական լեռնաշխարհում էր, Փոքր Ասիայի արևելյան, Միջագետքի հյուսիսային և Իրանական սարահարթի հյուսիսարևմտյան շրջաններում:

Աշխարհի ամենաբազմանդամ լեզվաընտանիքը հնդեվրոպականն է: Հնդեվրոպական մայր լեզվից են առաջացել ռոմանական, գերմանական, սլավոնական, հնդկական, իրանական և այլ լեզվաճյուղերը, որոնք իրենց հերթին տրոհվել են ավելի փոքր լեզվաճյուղերի ու լեզուների:



Հետաքրքրական է, որ այսօր կենդանի հնդեվրոպական լեզուներից միայն ալբաներենը, հունարենն ու հայերենն են, որ ի սկզբանե եղել և առ այսօր մնում են որպես առանձին ու ինքնուրույն լեզվաճյուղեր: Հայերենի անջարկը հնդեվրոպական ընդհանրությունից, ըստ լեզվագիտական ուսումնասիրությունների, տեղի է ունեցել *Ք.ա. IV հազարամյակի վերջին*:

Վերջին տարիներին կատարված ուսումնասիրությունները գենետիկայի քննազննում ցույց են տալիս, որ հայերենի անջատվելը հնդեվրոպական ընդհանրությունից և հայերենի՝ ինքնուրույն լեզու դառնալը կարող էին տեղի ունեցած լինել շատ ավելի վաղ:

Հայերը միակ ժողովուրդն են, որի ծագումն ու կազմավորումը տեղի է ունեցել Հայկական լեռնաշխարհում՝ հնդեվրոպական նախահայրենիքի տարածքում: Հետևաբար հայերը Հայկական լեռնաշխարհի բնիկ տերերն ու ժառանգորդներն են:



**Հայոց ծագումնաբանության վերաբերյալ ավանդագրույցները:** Հայերի ծագման մասին պատմական և առասպելական տեղեկություններ են պահպանվել ոչ միայն հայ մատենագրության էջերում, այլև հունական, հին երբայական (հրեական), վրացական, արաբական և պարսկական գրավոր հուշարձաններում:

**Հայկական ավանդագրույցը:** Հայոց ծագումնաբանության մասին քնիկ հայկական ավանդագրույցը ստեղծվել է վաղնջական ժամանակներում և մեզ հասել պատմահայր Մովսես Խորենացու «Հայոց պատմության» շնորհիվ: Ավանդագրույցի առանձին դրվագներ հիշատակվում են միջնադարի հայ մատենագիրների երկերում, որոնք XVIII դարում ի մի բերվեցին հայ նոր պատմագրության հայր Միքայել Չամչյանի «Հայոց պատմության» էջերում:

Ավանդագրույցում որոշակիորեն առանձնանում է ժամանակագրական երկու շերտ: Առաջին՝ հնագույն շերտը ստեղծվել է գոյություն է ունեցել նախաքրիստոնեական ժամանակներում: Ավանդագրույցի համաձայն՝ հայերը սերվել են դյուցազուն Հայկ նահապետից, որն առաջին և արարչագործ աստվածների հսկա որդիներից էր:

Թե՛ն առաջին աստվածներից ում որդին է Հայկ դյուցազնը, մեր ավանդությունը չի պահպանել: Սակայն այդ բացը լրացվում է Ք.ա. III հազարամյակով թվագրվող հնագույն միջագետքյան (շումերա-աքքադական) սեպագիր արձանագրությունների շնորհիվ: Դրանցից տեղեկանում ենք, որ

Հայկական լեոնաշխարհի այսօր հայտնի հնագույն պետության՝ **Արարությանի հովանավոր աստվածը Հայկն** էր՝ իմաստության և տիեզերական ջրերի **Հայ(ա)** աստծո որդին: Հայ(ա) աստծո պաշտամունքը կապվում էր Հայկական լեոնաշխարհի՝ Եփրատ և Տիգրիս գետերի ակունքների հետ: Պատահական չէ, որ պատկերաքանդակներում նա հանդես էր գալիս որպես այդ գետերը սկզբնավորող:

Հայոց նախաքրիստոնեական ավանդագրույցի համաձայն՝ մեր ժողովուրդը համարվել է արարչագործ Հայ(ա) աստծո և նրա որդի Հայկ դյուցազնի ժառանգը՝ կրելով արարչագործ աստծո անունը:

301 թվականին քրիստոնեությունը Հայաստանում հռչակվեց պետական կրոն, իսկ քրիստոնեական միաստվածության դավանաբանությունը՝ պաշտոնական գաղափարախոսություն: Աստվածաշնչի առաջին՝ Ծննդոց գրքի համաձայն՝ Համաշխարհային ջրիեղեղից հետո վերացավ ողջ մարդկությունը, փրկվեց միայն **Նոյ նահապետը**՝ իր ընտանիքով, որի տապանը հանգրվանեց Հայկական լեոնաշխարհում՝ **«Արարար լեոնների վրա»:** Ըստ նույն աղբյուրի՝ բոլոր ազգերն առաջացել են Նոյ նահապետի երեք որդիներից՝ Հաբեթից, Քամից և Սեմից: Այս պայմաններում հայոց ազգածագման նախաքրիստոնեական ավանդագրույցը համապատասխանեցվեց Աստվածաշնչի պատկերացումներին:

Ձևավորվեց հայոց ծագումնաբանության նոր տեսությունը, որի համաձայն՝

Միջագետքյան կնքադրոշմ  
*Հայա աստծո թիկունքից թխող գետերը խորհրդանշում էին Եփրատն ու Տիգրիսը:*





Հայկ նահապետի հայրը *Թորգոմ* նահապետն է՝ *Նոյի Հարեթ որդու ժառանգներից* մեկը: Աստվածաշնչում Թորգոմ նահապետը համարվում է հայկական հնագույն պետական կազմավորումներից մեկի՝ *Թորգոմնա քան* (Թոգարմա կամ Թեգարամա երկրի) անվանադիր-նախնին: Թորգոմնա տունը եղել է Եփրատի վերին ավազանում և հիշատակվում է դեռևս *Ք.ա. XX-XVIII դդ.*: Այդտեղից էլ ծագում են միջնադարյան գրավոր աղբյուրներում հայերին տրվող «Հարեթածին», «Թորգոմածին», «Թորգոմյան ազգ» անվանումները:

Հայոց ծագումնաբանության նոր քրիստոնեացված ավանդազրույցում ևս հայերը ներկայանում են որպես քնիկ ժողովուրդ Հայկական լեռնաշխարհում, որն իրենց հայրենիքն է և մնացած մարդկության նախահայրենիքը:

Հայոց ազգածագման ավանդազրույցի կարևոր մասն է կազմում «Հայկ և Բել» վիպաքը, որում արտացոլվել է Հին Միջագետքի և Հայկական լեռնաշխարհի դարեր տևած հակամարտությունը: Ավանդությունը պատմում է, որ Հայկը պատերազմել է միջագետքյան բռնակալ Բելի դեմ և հաղթել նրան: Ի նշանավորումն հաղթանակի այդ օրվանից հայերը սկսել են հաշվել *Բուն Հայոց Կոմարը*:

Հայկական ավանդության համաձայն՝ Հայկ նահապետի անունով մեր ժողովուրդը կոչվեց *հայ*, և երկիրը՝ *Հայք, Հայաստան*, իսկ նրա ժառանգներից *Արամ* նահապետի անունից առաջացան Հայաստանի «*Արմենիա*» և հայերի «*արմեն*» անվանումները:

Ըստ նույն ավանդության՝ Հայկի ու հայկազուն նահապետների անուններով կոչվեցին մեր լեռնաշխարհի բազմաթիվ տեղանուններ: Հենց իր՝ Հայկի անվամբ կոչվեց Հայկաշենը, Արամանյակի անունով՝ Արագած լեռը և Արագածոտն գավառը, Արամախիսի անվամբ՝ Արմավիր մայրաքաղաքը, Երաստից՝ Երասխա (Արաքս) գետը և այլն:

*Հունական ավանդազրույցը*: Հայերի ծագման հունական զրույցը կապվում է Հին Հունաստանում սիրված ու տարածված արգոնավորդների մասին ավանդության հետ:

Վերջինիս համաձայն՝ հերոս Յասոնը և նրա ընկերները Արգո նավով կատարում են հեռավոր նավարկություն դեպի Սև ծովի արևելյան ափերը՝ Կոլխիդա, որի նպատակը երջանկության ու հարստության խորհրդանիշը համարվող ոսկե գեղմը ձեռք բերելն էր:

Յասոնի և նրա ընկերների հետ նավարկությանը մասնակցում էր Արմենոսը, որ Հունաստանի Թեսալիա մարզի Արմենիոն քաղաքից էր: Զրույցի համաձայն՝ նավարկությունից հետո նա չի վերադարձել Հունաստան, այլ հաստատվել է Հայաստանում, որն էլ նրա անվամբ կոչվել է «Արմենիա»:

*Վրացական ավանդությունը*: Վրացական ավանդությունը գրի է առնվել IX-XI դարերի վրաց հեղինակների կողմից: Ըստ վրացական ավանդության՝ Թարգամոսի (Թորգոմի) ութ որդիներից առաջացան ութ ժողովուրդներ. ավագ որդի Հայոսից՝ հայերը, Քարթլոսից՝ վրացիները, մյուս որդիներից՝ կովկասյան մի շարք ժողովուրդներ:

Հայերի ծագման մասին գրառվել են նաև հին եբրայական (հրեական), արաբական և պարսկական ավանդազրույցներ, որոնք իբրև սկզբնաղբյուր էական հավելումներ չեն բերում հայոց ծագումնաբանության խնդրում:

**Հայերի ծագման հարցը արդի պատմագիտության մեջ**: Սկսած V դարից մինչև XIX դարի կեսերը հայերի ծագման հարցում անառարկելիորեն ընդունվում էր հայկական ավանդազրույցը՝ ձևակերպված Մովսես Խորենացու «Հայոց պատմության» էջերում:

XIX դարի երկրորդ կեսին գիտության մեջ առաջ քաշվեցին մի շարք նոր տեսություններ, այդ թվում՝ անգամ կասկածի տակ դրվեց հայ ժողովրդի տեղաբնիկության հարցը: Սակայն կարճ ժամանակում ակնհայտ դարձավ նման տեսությունների լիովին հիմնազուրկ լինելը:

1980-ական թվականների սկզբներից հաստատվեց, որ հնդեվրոպական նախահայրենիքը Ք.ա. V-IV հազարամյակներում եղել է Առաջավոր Ասիայի հյուսիսում, ավելի որոշակի՝ Հայկական լեռնաշխարհում, Փոքր Ասիայի արևելյան շրջաններում,

Հյուսիսային Միջագետքում և Իրանական սարահարթի հյուսիս-արևմուտքում: Ինքն-ըստինքյան վերանում է հայերի եկվորության հարցը, բանի որ հնդեվրոպական նախահայրենիքը եղել է հենց այն տարածքում, որում կազմավորվել և իր պատմությունն է կերտում հայ ժողովուրդը:

Այսպիսով՝ Ք.ա. IV հազարամյակի վեր-

ջին հայերն առանձնանում են հնդեվրոպական ընդհանրությունից: Այդ ժամանակաշրջանից սկսվում է հայ ժողովրդի ազգային՝ ցեղային և վաղ պետական կազմավորումների ժամանակաշրջանը, իսկ ամենաուշը՝ Ք.ա. I հազարամյակի առաջին կեսին բարձրանում է համահայկական միասնական պետությունը:

### Հարգեր և առաջադրանքներ

1. Ո՞րն է աշխարհի ամենաբազմանդամ լեզվաընտանիքը, որն է նրա նախահայրենիքը: Ինչո՞վ են առանձնանում հայերը հնդեվրոպական մյուս ժողովուրդներից:
2. Ինչո՞վ է քաջատրվում այն հանգամանքը, որ հայերի ծագման վերաբերյալ ավանդագրույցներ են պահպանել նաև ուրիշ ժողովուրդներ: Հայերի ծագման վերաբերյալ ինչ ավանդագրույցներ գիտեք:
3. Հայ ժողովրդի ծագման վերաբերյալ պատմագիտության մեջ ինչ տեսություններ կան: Հիմնավորե՞ք հայերի ծագման տեղաբնիկության տեսությունը:

## § 2. ՀԱՅԱՍՏԱՆԻ ԵՎ ՀԱՅԵՐԻ ՄԱՍԻՆ ՀՆԱԳՈՒՅՆ ԳՐԱՎՈՐ ԷՒՀԱՏԱԿՈՒԹՅՈՒՆՆԵՐԸ

Հնագույն պատմական տեղեկությունները: Մինչ օրս հայտնի առաջին պատմական տեղեկությունները Հայկական լեռնաշխարհի մասին պահպանվել են շումերական սեպագիր արձանագրություններում և վերաբերում են Ք.ա. XXVIII–XXVII դարերին: Այդ արձանագրություններում հիշատակվում է **Արարդուս** վաղ պետական կազմավորումը: **Արարդուս** անունն իրավամբ համադրվում է Արարատի հետ (համարվելով վերջինիս նախածեր), ինչն առավել ակնառու է Համաշխարհային ջրհեղեղի մասին շումերական և աստվածաշնչյան պատմությունների համեմատությունից: Դրանցում համապատասխանաբար Արատտան և Արարատն են հանդես գալիս իբրև փրկության վայր:

Հնագույն միջագետքյան սեպագրության մեջ հատուկ անունները գրվում էին երկու եղանակով՝ հնչյունային (վանկային) և մեկ ամբողջական գաղափարագիր–նշանով: Հնչյունային գրության պարագայում Արատտա երկրանունը գրվում է երեք վան-

կով (Ա–րատ–տա), իսկ գաղափարագիր տարբերակում՝ **Սուրուր** (**Սուբարի**, **Սուբարբու**) երկրանվան գաղափարագրով: Դա նշանակում է, որ այդ երկու երկրանունները միևնույն երկրին տրված անվանումներ են:

Ք.ա. XXVI դարից սկսած՝ միջագետքյան բնագրերը հիշատակում են Հայ(ա) աստծուն, նույնանուն երկիրն ու ժողովրդին: Հատկանշական է, որ շումերաքթադական երկլեզու արձանագրություններում շումերական բաժնի Սուրուրին արքայերին բաժնում համապատասխանում է Հայ(ա)ն: Այսպիսով՝ Ք.ա. III հազարամյակի առաջին կեսում արդեն Հայաստանը հայտնի էր երեք համարժեք անվանումներով՝ Արատտա–Հայ(ա)–Սուրուր:

Ք.ա. XXIV–XXIII դարերից սկսած՝ Հայկական լեռնաշխարհում հիշատակվում են «**Արման(ի)**», «**Արմի**», «**Արսու**» և այլ երկրանունները, որոնք «Արմենիայի» նախաձևերն են: Այս անվանումներից Սուրուրը դադարում է գործածվելուց Ք.ա. I հա-



գարամյակի առաջին կետին, իսկ մյուսները շարունակում են կենսունակ մնալ որպես Արարատ, Հայք-Հայաստան և Արմենիա:

### **Հայաստանը Հին աշխարհի հոգևոր ընկալումներում:**

Աստվածաշնչի առաջին՝ Ծննդոց գրքում պատմվում է, որ Աստված մարդկությանն արարեց *Եղևմ-դրախաբում*, որից դուրս էին գալիս չորս գետեր՝ *Եփրատը, Տիգրիսը, Գեհոնը և Փյունը*: Գիտնականները դեռևս շարունակում են վիճել, թե որոնք են նշված վերջին երկու գետերը, որոնցից մեկն, անշուշտ, Արաքսն է: Սակայն աներկբա է, որ Եփրատ և Տիգրիս գետերի ակունքի շրջանը Հայկական լեռնաշխարհն է: Այսինքն՝ *Ասորիստանի համաձայն՝ Հայաստանն է Եղևմ-դրախաբաշխարհը*, որտեղ արարվել են մարդկության առաջնեկները, և որտեղ պահվում էին անմահության ու իմաստության խորհրդանշանները՝ երկու սրբազան ծառերը (Կենաց և Բարու ու չարի իմացության):

Ծննդոց գրքում պատմվում է նաև, որ ժամանակներ անց մեղազործությունների պատճառով Աստված որոշեց ոչնչացնել մարդկությանը՝ Համաշխարհային քրիեղեղով: Նոյ նահապետն իր ընտանիքով փրկվեց՝ ապաստանելով «Արարատի լեռների վրա», այսինքն՝ Հայկական լեռնաշխարհում: Փաստորեն, *Ասորիստանը սրբազան մի քարածք է*, որտեղ արարվել է մարդկությունը, պահվել են անմահության ու իմաստության խորհրդանշանները, և որն էլ Համաշխարհային քրիեղեղից հետո դարձել է մարդկության վերածննդի երկիրը:

Շուվերական դյուցազնավեպում Արատա երկիրը մշտապես մեծարվում է *ասորիստանին տարբ օրենքների երկիր և անմահների երկիր* պատվանուններով:

Հատկանշական է, որ միջագետքյան դյուցազնավեպում անմահություն փնտրող հերոս Գիլգամեշը բռնում է «ճանապարհը դեպի Արարատ», գնում Եփրատի հոսանքն ի վեր և ճանապարհին հաղթահարում Մաշու (Մաու) լեռները, որոնք Հայկական

լեռնաշխարհի հարավը եզերող Մասիու կամ Մասիոն լեռներն են:

Նույն պատկերացումը գտնում ենք Ալեքսանդր Մակեդոնացուն նվիրված վիպերգում, որն առաջին անգամ գրի է առնվել դեռևս Ք.ա. 240 թվականին: Ըստ այդմ՝ Ալեքսանդրը ձգտում էր անմահության և կրկնում է Հին Արևելքի անմահանալիս հերոս Գիլգամեշի ճանապարհը: Իրականում երբևէ Հայաստան չմտած Ալեքսանդր Մեծը բռնում է ճանապարհը «դեպի Հայոց աշխարհ, որտեղ ակունքներն են Տիգրիսի ու Եփրատի», իսկ ճանապարհին հաղթահարում է Մասիս լեռնաշղթան:

Աստվածաշնչյան Եղևմ-դրախտի երկրորդ՝ Բարու և չարի իմացության ծառը իմաստության խորհրդանիշն է: Որ Հայաստանը Հին Արևելքի հոգևոր ընկալումներում ներկայանում էր նաև իբրև իմաստության երկիր, նախ և առաջ ակնառու է իմաստության Հայ(ա) աստծո մասին Առաջավոր Ասիայում տարածված դիցաբանական պատկերացումներից: Դրանցից բացի, հնագույն շումերական մի քնագրի համաձայն՝ «Իմաստությունն ու արվեստը ցած են թերվել Արարտա երկրից»:

Մի շարք ժողովուրդների դիցաբանական պատկերացումներում Հայոց լեռնաշխարհը ներկայանում է որպես աստվածների քնակատեղի, որպես սրբազնագույն մի տարածք: Նման պատկերացումները տարածված են եղել նաև լեռնաշխարհի քնիկ տերերի՝ մեր նախնիների հավատալիքներում, որոնցից առանձին քնկորներ են պահպանվել հայոց քրիստոնեական մատենագրության էջերում: «Աշխարհի գագաթ» կոչվելը հիշողությունն է հնագույն շրջանում մեր հայրենիքի՝ աստվածների քնակատեղի համարվելու, իսկ այնտեղից դեպի աշխարհի չորս կողմերը հոսող չորս գետերը ակնհայտորեն հիշեցնում են աստվածաշնչյան Եղևմ-դրախտից սկիզբ առնող չորս գետերը:

Եղևմը հիշատակվում է «արևելյան կողմում», ինչն արժանի է հատուկ ուշադրության: Արդեն գիտեք, որ Ծննդոց գրքի մեկ այլ մասում պատմվում է, որ Նոյի տապա-



նը փրկվեց Արարատ լեռների վրա, (իմա՝ Հայաստանում), որից հետո դեռևս մեկ լեզվով խոսող մարդիկ «արևելքից» գնացին Սենաարի երկիր (Շումեր) և որոշեցին կառուցել երկնահաս «Բաբելոնյան աշտարակը»: Երկու դեպքում էլ Հայաստանը ներկայացվում է իբրև «արևելքի» երկիր, մինչդեռ այն Հին Կտակարանը գրի առած իրեաների երկրից դեպի հյուսիս էր:

Հայկական լեռնաշխարհի՝ արևի հանգրվանը լինելու մասին պատկերացումը պահպանվել է նաև խեթական աղբյուրներում, որոնց համաձայն՝ արեգակը ծագում էր «Արևելյան ծովից»՝ Վանա լճից: Դա լիովին համահունչ է հայկական ավանդագրույցներին, որոնց համաձայն՝ արևի ոսկյա ննջարանը Վանա լճի հատակին էր, որտեղից ամեն առավոտ ելնում և ուր

ամեն գիշեր վերադառնում էր ցերեկվա յուսատուն:

Վերոնշյալ բոլոր փաստերը պետք է խորհելու տեղիք տան ամեն հայ մարդու: Հայաստանը արարչագործության, ջրհեղեղից հետո մարդկության վերածննդի, անմահության ու իմաստության, արևի երկիր են համարում ոչ միայն մեր նախնիները, այլև մեզ հետ անգամ հեռավոր ազգակցություն չունեցող ժողովուրդները:

Ուրեմն վաղնջական ժամանակներում կար վերագգային, վերկրոնական սրբազան մի գաղափարախոսություն, որում առանցքային դերակատարում ուներ մեր լեռնաշխարհը: Ինչո՞ւ հենց Հայկական լեռնաշխարհը: Ո՞րն է մեր երկրի խորհուրդը, ո՞րն է մեր հայրենիքի սրբազնության գաղտնիքը...

### Հարցեր և ստուգադրանքներ

1. Առաջին պատմական վկայությունները Հայկական լեռնաշխարհի պետական կազմավորումների մասին ո՞ր արձանագրություններում են պահպանվել և ո՞ր դարերում են թվագրվում: Միջազգեստյան արձանագրություններում Հայաստանն ու հայերը հինչ անվանումներով են հիշատակվում:
2. Աստվածաշնչի ո՞ր գրքում վկայություններ կան Հայաստանի մասին, հինչ է պարզվում դրանցից:
3. Ինչպե՞ս է ներկայանում Հայաստանը տարբեր ժողովուրդների դիցաբանական պատկերացումներում:

## ԼՐԱՑՈՒՑԻՉ ՆՅՈՒԹ

### *Աստվածաշունչը Եղեմ-դրախտի մասին*

ԳԻՐՔ ԾՆՆԴՈՅ, Գրուխ Բ, 7. Տեր Աստված մարդուն ստեղծեց Երկրի հողից, նրա դեմքին կենդանության շունչ փչեց, և մարդն եղավ կենդանի էակ: 8. Աստված դրախտ տնկեց Եղեմում՝ արևելյան կողմում, և այնտեղ դրեց իր ստեղծած մարդուն: 9. Տեր Աստված Երկրից բուսցրեց նաև ամեն տեսակի գեղեցկատեսիլ ու համեղ մրգեր տվող ծառեր, իսկ Կենաց ծառը՝ Բարու և չարի գիտության ծառը, տնկեց դրախտի մեջտեղում: 10. Գետ էր բխում Եղեմից, որպեսզի ոռոգեր դրախտը, և այնտեղից բաժանվում էր չորս ճյուղերի: 11. Մեկի անունը Փխոն է... 13. Երկրորդ գետի անունը Գեհոն է... 14. Երրորդ գետը Տիգրիսն է... 20րորդ գետը Եփրատն է:

§ 1. ՔԱՂԱՔԱԿՐԹՈՒԹՅԱՆ ՍԿԶԲՆԱՎՈՐՈՒՄԸ  
ՀԱՅԿԱԿԱՆ ԼԵՌՆԱՇԽԱՐՀՈՒՄ

Հայկական լեռնաշխարհը Ք.ա. IV հազարամյակի կեսից մինչև III հազարամյակի կեսերը: Հայկական լեռնաշխարհում նախնադարից անցումը վաղ քաղաքակրթության և վաղ պետական կազմավորումներին տեղի է ունեցել վաղ քրոնզի դարում: Ինչ է մեզ հայտնի այդ դարաշրջանում լեռնաշխարհի գարգացման մակարդակի մասին:

**Ք.ա. IV հազարամյակի կեսերից** սկսում է շուրջ մեկ հազարամյակ տևած վաղքրոնզի դարյան ժամանակաշրջանը, որի ընթացքում ողջ Հայկական լեռնաշխարհը միավորված էր մեկ մշակութային գոտու մեջ: Լայն տարածում ունեն պաշտամունքային նշանակության իրերը՝ եռոտանի պատվանդաններ, եզան ու խոյի տեսքով քաղմատեսակ հենակներ, որոնք Հայկական լեռնաշխարհի մշակութային գոտուց դուրս հայտնի չեն:

Պաշտամունքային ու կենցաղային իրերի, աշխատանքային գործիքների ու ճարտարապետական կառույցների միակերպությունը վկայում է լեռնաշխարհի բնակիչների ազգակցության, այսինքն՝ ազգային-հոգևոր միասնության մասին:

Հայկական լեռնաշխարհում վաղ քրոնզի դարաշրջանում արձանագրված են վաղ քաղաքակրթություններին բնորոշ գրեթե բոլոր հատկանիշները: Առկա է իր ժամանակի համար **բախականին զարգացած քաղաքաշինություն**: Քաղաքներին բնորոշ է կանոնավոր հատակագծով կառուցապատումը, մեջտեղում էին տաճարն ու վարչական կենտրոնը, առկա էր ամրաշինական համակարգ՝ միջնաբերդ և բնակավայրը եզերող պարիսպ: Քաղաք-կենտրոնի շուրջ կային փոքր արբանյակ-բնակավայրեր: Այս ամենը բազմիցս վկայված ենք տեսնում Շենգավիթում, Մեծամորում, Էլարում, Մոխրաբլուրում, Թագավորանիստում, Աղ-

թամարում, Ջրահովտում, Ուրմիո լճի ափագանի, Գուգարքի, Ծուփքի, Բարձր Հայքի և լեռնաշխարհի այլ հնավայրերում:

Հասարակությունն ունի բարդ կառուցվածք և համայնքային-տնտեսական շերտավորում, ինչն ակնհայտ է հարուստների ու շարքային մարդկանց դամբարանների պեղումներից, նաև հարուստ և աղքատ բնակարաններից: Դա նշանակում է, որ նախնադարյան հասարակությունը, որին բնորոշ է համայնքի բոլոր անդամների հավասարությունը, անկում էր ապրում՝ իր տեղը զիջելով դասային, ընկերային շերտավորում ունեցող հասարակությանը:

Հնավայրերից հայտնաբերվել են կիսաթանկարժեք քարերից պատրաստված գուրգեր, որոնք հավանաբար եղել են իշխանության խորհրդանշաններ:

Ժամանակի գիտության քացառիկ նվաճում է **Մեծամորի աստղադիպրասանը**, որտեղից աստղային երկինքը դիտարկել են **Ք.ա. 2800-2600 թթ. ընթացքում**:

Գիտության և տեխնոլոգիական ժամանակի համար համեմատաբար բարդ հնարքների կիրառումը ակնհայտ է բազմաթիվ մետաղաձուլարաններում, որոնց առկայությունն արդեն իսկ խոսում է տարբեր արհեստների ձևավորման և աշխատանքի բաժանման մասին:

**Միջազգային առևտրի** և տարածաշրջանային կապերի մասին են վկայում ինչպես Հայաստանի հնավայրերից հայտնաբերված օտար ծագում ունեցող իրերը, այնպես էլ հայաստանյան նյութերի լայն տարածումը լեռնաշխարհից բավականին մեծ հեռավորությունների վրա:

Հայաստանյան վաղքրոնզի դարյան խեցեղենի վրա մեծ առատությամբ հանդիպում են խորհրդանշաններ և գաղափարազրեք, որոնք դարձել են հայկական մեհենագրության հիմքը:



**Հայաստանյան մշակույթի աննախադեպ տարածումը:** Հնագիտական պեղումները ցույց են տալիս, որ *Ք.ա. մոտ XXVIII դարում* Հայկական լեռնաշխարհից տեղի է ունենում *վաղորոնգիդարյան մշակույթի աննախադեպ մեծ վարածում:* Այդ մշակույթը հյուսիսում հասնում է Հյուսիսային Կովկաս, հարավում՝ Սիրիա և Պաղեստին, հարավ-արևելքում՝ Իրանական սարահարթի կենտրոնական շրջաններ: Մշակութային այս ներթափանցումն ու տիրապետությունը շարունակվում են երկուերեք հարյուրամյակ՝ մինչև Ք.ա. XXVI դարը, որից հետո Հայաստանի մշակութային գոտին կրկին սահմանափակվում է Հայկական լեռնաշխարհով:

Նման աննախադեպ մեծ ընդգրկումը ենթադրում է նոր որակի փոխադրամիջոցների ցանցի առկայություն: Եվ դա ակնհայտ է ինչպես հնագիտության տվյալներից, այնպես էլ դրանց հետ համահունչ գրավոր հիշատակարաններից: Գրավոր աղբյուրներում սանձված ձիեր առաջին անգամ հիշատակվում են Արատտայում (Ք.ա. XXVIII–XXVII դդ.)՝ ծառայելով որպես փոխադրամիջոց: Ի դեպ՝ ձիավոր հեծյալ ռազմիկների առկայությունը հնագույն շրջանում քննարկ է հնդեվրոպական աշխարհին, իսկ Հայկական լեռնաշխարհը կազմել է հենց հնդեվրոպական նախահայրենիքի միջուկը:

Փաստորեն, պատմության մեջ ստեղծված *առաջին «մշակութային աշխարհակալությունն»*, իր ազդեցությամբ հանդերձ, տեեց մի քանի հարյուրամյակ՝ Ք.ա. XXVIII–XXVI դարերը: Այն մեկ մշակութային գոտու մեջ միավորեց հսկայական տարածք՝ դառնալով հայոց պատմության առաջին աշխարհակալությունը...

**Առաջին պետական կազմավորումը.** **Արատտա:** Հայաստանի Ք.ա. III հազարամյակի պատմության լուսաբանման համար անգնահատելի տեղեկություններ են հաղորդում հնագույն միջագետքյան (շումերական և ասորական) գրավոր հուշարձանները: Շումերական քնագրերում հիշա-

տակվում է Արատտա երկիրը: *Արատտա* Հայկական լեռնաշխարհի՝ մինչ օրս հայտնի *առաջին վաղ պետական կազմավորումն* է որի մասին տեղեկությունները վերաբերում են *Ք.ա. XXVIII–XXVII դարերին:*

Արդեն նշվել է, որ Հայկական լեռնաշխարհի հետ էր կապվում իմաստության և տիեզերական ջրերի աստված Հայ(ա)ի պաշտամունքը, որի որդի Հայկն Արատտայի հովանավոր աստվածն էր:

Արատտան եղել է աստվածապետական (կրոնապետական կամ թեոկրատական) կարգերով երկիր: Դա պետական կառավարման այն ձևն է, որում ն աշխարհիկ, և հոգևոր ողջ իշխանությանը տիրում էր հոգևոր դասը, որն էլ Աստծո անունից կառավարում էր երկիրը: Արատտայի արքան միաժամանակ երկրի գերագույն քուրմն էր: Երկրի ձակատագրին վերաբերող կարևոր հարցերի լուծման համար քրմապետ-արքան գումարում էր ավագների ժողով: Հիշատակվում է երկրի գլխավոր տնտեսական պաշտոնյան, որը կոչվում էր «կառավարիչ»: Արատտայում հիշատակվում են նաև տնտեսական ոլորտի պաշտոնյաներ՝ հարկահաններ, վերակացուներ և այլն:

Շումերական քնագրերը տեղեկություններ են պահպանել Արատտայի բանակի և պարսպապատ մայրաքաղաքի մասին: Արատտայի մասին կարևորագույն տեղեկություններից մեկը երկրում սեփական գրի գործածության փաստն է, ինչն ապացուցվում է նաև Հայկական լեռնաշխարհից հայտնաբերված Ք.ա. III հազարամյակի մեհենագիր հուշարձաններով, որոնք դեռևս վերծանված չեն:

Ք.ա. XXVIII–XXVII դարերում Արատտայից Շումեր էին գնում ճարտարապետներ՝ այնտեղ մեծ շինություններ կառուցելու նպատակով: Ք.ա. XXVI–XXV դարերով թվագրվող քնագրերում Միջագետքում քնակություն հաստատած սուրբերցիները հիշատակվում են որպես դպիրներ, դպրապետեր, հացթուխներ, հացթուխապետեր, դարբիններ, այգեպաններ և այլն:

Արատտայի հիշատակության ժամանակաշրջանում Հայկական լեռնաշխարհը,



ինչպես արդեն գիտեք, միավորված էր մեկ մշակութային գոտում:

**«Արմենիա» անվան հնագույն հիշատակությունները.** Արմի, Արման(ում), Արամ: *Էրլա և Արմի:* Ք.ա. XXVI–XXIII դարերում ներկայիս Սիրիայի տարածքում կազմավորվում է Էրլա պետությունը, որն առևտրական լայն ցանցով կապված է եղել շրջակա երկրների հետ: Էրլայի բնագրերը Հայկական լեռնաշխարհի և հարակից տարածքներում հիշատակում են երկու տասնյակից ավելի բնակավայրեր: Դրանցից առանձնապես կարևորվում է *Արմին*, որը համանուն թագավորության մայրաքաղաքն էր: Հատկանշական է, որ Ք.ա. XXIV–XXIII դարերի բնագրերում հիշատակվում են Արմի երկրում բնակված «Հայայի որդիները» (հայորդիները), որոնք գործուն փոխհարաբերություններ են ունեցել Էրլայի հետ:

*Աքքադ և Արմանի:* Ք.ա. III հազարամյակի սկզբին Արաբական թերակղզուց Միջագետք ներթափանցած սեմական ցեղերը Ք.ա. XXIV դարի երկրորդ կեսին ստեղծում են պատմությանը հայտնի առաջին բռնակալությունը: Պետության հիմնադիր Սարգոն Աքքադացու զորքերը հյուսիսում հասան մինչև Հայկական լեռնաշխարհի հարավային փեշերը և անհաջողություն կրեցին այնտեղ: Մեզ է հասել Սարգոն Աքքադացու տերության աշխարհագրությունը ներկայացնող մի արձանագրություն, որում առաջին անգամ ներկայացված է «Արմենիա» անվան նախաձևը՝ Արման(ում) երկրանունը:

Աքքադի չորրորդ տիրակալ Նարամսինին (Նարամ–Սոնն, Ք.ա. XXIII դ.) հաջողվեց վերականգնել արքայական տերության հզորությունը: Եփրատի և Տիգրիսի հոսանքներն ի վեր նա ձեռնարկել է բազմաթիվ ռազմական արշավանքներ: Նարամսինը Տիգրիսի հովտով արշավանքներ է ձեռնարկում դեպի հյուսիս ու Վանա և Ուրմիո լճերի միջնատարածքում հիշատակում Արամ երկիրը: Այդ տարածքը Վանի թագավորության ժամանակաշրջանում ևս շարունակվում է հիշատակվել գրե-

թե նույն տեսքով (Արամայի, Արմարիլի): Հիշենք, որ ըստ Մովսես Խորենացու տեղեկության՝ «արմեն» և «Արմենիա» անունների հիմքում ընկած է «Արամ» անունը:

Եփրատի հոսանքով դեպի վեր կատարված Նարամսինի մի քանի արշավանքներն ուղղված էին Սուրուր (Սուբարտու) երկրի դեմ, որը «Վերին ծովի ափերին» էր, այսինքն՝ Վանա լճի ավազանում:


Նարամսինի ամենածավարուն արձանագրություններից մեկում Արման(ում)ը ներկայանում է իբրև մի երկիր, որը «*երբևէ մարդկության արարումից ի վեր, ոչ մի թագավոր չէր նվաճել*»: Նարամսինի դեմ ձևավորվում է Հայկական լեռնաշխարհի և հարակից 17 պետական կազմավորումների դաշինքը՝ Արման(ում) երկրի գլխավորությամբ:

Տասնյոթ երկրների դաշինքի ղեկավարումը հետագայում անցավ Կուտիական երկրին (համապատասխանում է Մեծ Հայքի Կորդվաց աշխարհին), որն էլ վերջ դրեց Նարամսինի բռնակալական իշխանությանը:

**Կուտիական (Կորդվաց) աշխարհակալությունը:** Նարամսինն իրեն հռչակեց «աստված»՝ կործանելով աստվածների տաճարը և պարտադրելով պաշտել իր անձը: Շումերական քրմությունը օգնություն խնդրեց տասնյոթ երկրների դաշինքից: Միջագետքի կենտրոն արշավեցին Հայկական լեռնաշխարհի լեռնականները, որոնց դեմ պատերազմում ինքնակոչ «աստվածը» սպանվեց...

«Աշխարհի չորս կողմերի արքա» տիտղոսը հաղթողի իրավունքով անցավ կուտիական տիրակալներին: Կուտիական աշխարհակալությունը ունեցել է տարածքային հսկայական ընդգրկում՝ Ամանոսի լեռներից ձգվելով մինչև Էլամ, Հայկական լեռնաշխարհի հյուսիսից մինչև Պարսից ծոց:

Նրանք շուրջ մեկ դար (Ք.ա. XXII դ.) գերիշխում են Առաջավոր Ասիայի զգալի մասի վրա: Այդ ժամանակահատվածում իշխեցին 21 արքաներ, որոնք կառավարում էին որոշակի ժամկետով: Այսինքն՝ գործում էր գերագույն իշխանության ընտրովի կարգը:



Կոտիական աշխարհակալության ավարտից հետո էլ Հայաստանը պահպանում է հզորությունն ու կարևոր դիրքը Հին Արևելքում: Այդ մասին տեղեկանում

ենք Ք.ա. XXI դարի միջագետքյան նամակներից, որոնցում Սուրուր երկիրը ներկայանում է իրեն հզոր թագավորություն:

**Հարցեր և առաջադրանքներ**

1. Ե՞րբ է Հայկական լեռնաշխարհում տեղի ունեցել անցում նախնադարից վաղ քաղաքակրթության և վաղ պետական կազմավորումներին:
2. Ե՞րբ է տեղի ունեցել Հայկական լեռնաշխարհից մշակույթի մեծ տարածումը: Ինչո՞վ են նշանավորվում Ք. ա. XXVIII-XXVI դարերը:
3. Ներկայացրե՞ք Արատտա երկիրը: Հայաստանից քաղաքակրթական արժեքների տարածման վերաբերյալ ի՞նչ տեղեկություններ են պահպանվել շումերական քնագրերում:
4. Ո՞ր աղբյուրներից ենք տեղեկանում «Արմենիա» անվան հնագույն հիշատակությունների մասին:
5. Ո՞ր տարածքներն էր ընդգրկում կոտիական աշխարհակալությունը: Բնչ դիրք ուներ Հայաստանը Հին Արևելքում կոտիական աշխարհակալության ավարտից հետո:



## § 2. ՀԱՅԿԱԿԱՆ ՊԵՏԱԿԱՆ ԿԱԶՄԱՎՈՐՈՒՄՆԵՐԸ

Ք.Ա. II ՀԱԶՄԱՐԱՄՅԱԿՈՒՄ ԵՎ Ք.Ա. I ՀԱԶՄԱՐԱՄՅԱԿԻ ՍԿԶԲԻՆ

**Հայկական լեռնաշխարհը Ք.ա. XX-XVII դարերում:** Ք.ա. XX դարում Հայաստանը շարունակում էր լուրջ դերակատարում ունենալ Հին Արևելքում: Առաջավոր Ասիայի հյուսիսում գործում էր մետաղի առևտրի մայրուղին, որի հետ կապի մեջ են եղել Հայկական լեռնաշխարհի ավելի քան երեք տասնյակ քնակավայրեր: Գտնված սեպագիր արձանագրություններում հիշատակվում են հայկական շուրջ մեկ տասնյակ իշխանություններ՝ *Մուփանա* (Մոփք), *Թեգարանա* (Թոգարնա, Թորգոմա տուն), *Խախ* (ոսմ) և այլն:

Ք.ա. XVIII դարում հզորության գագաթնակետին էր Հին Բաբելոնի թագավորությունը, որի տիրակալ Համուրապիի մասին մեզ հասած սկզբնաղբյուրներում քազմիցս հիշատակվում են Հայկական լեռնաշխարհի պետական կազմավորումները, մասնավորապես *Սուբարպուն* (Սուրուր-Արմանի), *Կուպի(ոսմ)ը* և այլն:

Մետաղի լայն կիրառությունը խիստ կարևոր էր ինչպես տնտեսության, այնպես էլ ռազմական գործի մեջ: Ռազմարվեստում կարևոր նշանակություն ունեցավ ձիերի, հատկապես ձիերին լծված մարտակառքերի կիրառությունը:

Հնդեվրոպական ծագում ունեցող խեթերը Փոքր Ասիայում Ք.ա. XVIII դարում ստեղծում են քավականին հզոր Խեթական թագավորությունը, որը գոյություն ունեցավ մինչև Ք.ա. XII դարը՝ իր ազդեցությանը ենթարկելով նաև Հայկական լեռնաշխարհի արևմտյան որոշ երկրամասեր:

**Միտաննի թագավորությունը:** Ք.ա. XVI դարում Հայաստանի հարավում և Միջագետքի հյուսիսում ստեղծվեց հնդեվրոպական Միտաննի թագավորությունը՝ *Վաշշուգանե* մայրաքաղաքով (Մասիոն լեռներում): Այս թագավորությունն էական դերակատարում է ունենում Առաջավոր Ասիայում սկսած Ք.ա. XVI դարի վերջերից: Եգիպտական, քարեյական, խեթական

տիրակալների նման Միտաննիի արքաները կրում էին «Մեծ թագավոր» տիտղոսը:

Հատկանշական է, որ այս թագավորության տիրակալները հայոց ազգային պատմագրական ավանդույթում համարվում են բնիկ հայ արքաներ, և նրանց անունները գտնում ենք Մովսես Խորենացու մոտ պահպանված Հայկագուն նահապետների և արքաների ցանկում:

Միտաննին անկում ապրեց Ք.ա. XIII դարում հզորացող Ասորեստանի հարվածներից:

**Հայասա թագավորությունը:** Խեթական սեպագիր արձանագրություններում Ք.ա. XV-XIII դարերի իրադարձությունների կապակցությամբ հիշատակվում է Հայասա երկիրը: Երկրանվան հիմքում հայ ժողովրդի ինքնանվանումն է: Խեթերենում -(ա)սա մասնիկով կազմվում են տեղանունները, այսինքն՝ *Հայասա* նշանակում է *Հայք, Հայասպան*:

Հայասան հիշատակվում է Հայկական լեռնաշխարհի արևմտյան շրջանում: Նրա կարևոր կենտրոններից էր *Կումախան*՝ հետագա Մեծ Հայքի Բարձր Հայք աշխարհի Անի-Կամախը, որտեղ հայոց թագավորների մեծ դամբարանն էր:

Հայասան առաջին անգամ հիշատակում է խեթական արքա Սուպիլուլիումասը (Ք.ա. XIV դ.) իր հոր՝ Թուդխալիաս III-ի արշավանքների կապակցությամբ, որոնց ժամանակ նրա ղեմ է դուրս գալիս Հայասայի Կարանի թագավորը: Որոշ ժամանակ անց Սուպիլուլիումասի և Հայասայի արքա Խուկանայի միջև կնքվում է քարեկամության և փոխօգնության պայմանագիր: Այն ամրապնդելու նպատակով Սուպիլուլիումասն իր թրոշը կնտության է տալիս Խուկանային:

Հայասան վերջին անգամ հիշատակվում է Ք.ա. XIII դարի վերջին: Գիտության մեջ Հայասայի պատմության ավարտի մասին կա երկու տեսակետ: Մեկի համաձայն՝ Հայասան պետք է անկում ապրած

լինի Ք.ա. XIII դարավերջին: Մյուս տեսակետի կողմնակիցները կարծում են, որ այն շարունակել է իր գոյությունը, պարզապես այլևս չի հիշատակվում «Հայասա» խեթերեն անվամբ, քանի որ Ք.ա. XII դ. անկում էր ապրել հեթանոսական տերությունը:

Հայասան ուներ իր արքունիքը, բանակը և քաղաքային կենտրոնները: Այն ուներ նաև իր դիցարանը: Դատելով խեթական սկզբնաղբյուրներից՝ Հայասան ուներ արքունի դիվան՝ իր դպիրներով, որոնք վարել են պետական գրագրությունը:

Հայասան ռազմադաշտ էր դուրս բերում 700 մարտակառքից և 10-հազարանոց հետևագործից բաղկացած բանակ, որն այդ ժամանակաշրջանի համար նշանակալից ուժ էր:

**Նաիրյան երկրները:** «Նաիրի» երկրանունն առաջին անգամ հիշատակված է Ք.ա. XIII դ. առաջին կեսին Ասորեստանի Սալմանասար I թագավորի կողմից: Այդ անվան տակ միավորված էին Վանա լճի շրջանը և նրանից դեպի հարավ ու արևմուտք ընկած ընդարձակ տարածությունները, ուր ապրում էին դաշնային հիմունքներով միավորված բազմաթիվ իշխանություններ: Ասորական աղբյուրներում դրանք բոլորը կոչվում են *«երկրներ»*:

Ք.ա. XIII դ. Նաիրյան երկրների հզորության մասին է վկայում այն փաստը, որ Սալմանասար I-ը ստիպված էր սահմանամերձ մի քանի քաղաքներում նշանակել հատուկ պահակագործեր՝ Ասորեստանի տիրապետության շրջանների վրա նաիրյան հարձակումները կանխելու նպատակով:

Նաիրյան երկրները և դրանց 40 առաջնորդները, որոնք ասորեստանյան արձանագրություններում անվանված են «թագավորներ», հիշատակվում են Սալմանասար I-ից հետո: Թիգլաթպալասար I-ը Նաիրին անվանում է *«ընդարձակ, հպարտկոյություն չճանաչող և անձանոթ երկիր»*:

Ասորեստանյան արքաների արձանագրություններում հիշատակվում են Նաիրիի «անձամեծ քաղաքները», «նրանց հարստությունը», «բազմաթիվ ձիերի, ջորիների,

երինջների երամակները և նրանց երկրագործական անթիվ ունեցվածքը», որոնք խոսում են այդ շրջանում երկրի հզորության և հարստության մասին:

Ասորեստանյան արձանագրություններից տեղեկանում ենք, որ երկու դար անց չորս խոշոր արշավանք է կատարվել Նաիրի երկրի դեմ, ընդ որում՝ այնտեղ ոչ թե խոսվում է մի քանի «երկրների» դաշինքի կամ համադաշնության, այլ մեկ միասնական երկիր-պետության մասին: Հիշատակվում են *«Նաիրի երկրում 250 քաղաք՝ իրենց գորավոր պարիսպներով»*...

Նաիրին որպես մեկ միասնական պետություն է հիշատակվում նաև Սալմանասար III-ի (Ք.ա. IX դար) արձանագրություններում: «Նաիրի» անվամբ են իրենց երկիրը կոչում Վանի թագավորության տիրակալներն ասորերենով գրված իրենց արձանագրություններում:

### Հայկագունների Այրարատյան

**թագավորությունը:** Հայկական լեռնաշխարհում Ք.ա. IX դ. 80-70-ական թթ. հիշատակվող պետական կազմավորումներից կարելի է առանձնացնել երկուսը, հարավում՝ *Նաիրին*, հյուսիսում՝ *Ուրարտուն*: «Ուրարտու» անվանումը «Այրարատ» անվան ասորեստանյան տարբերակն է: Դա Հայաստանի հնագույն անվանումներից է: Ասորա-բաբելյական և Աքեմենյան արքաների արձանագրություններում այն հիշատակվում է մինչև Ք.ա. IV դ. առաջին կեսը:

Ասորեստանյան աղբյուրներում Ուրարտուի՝ անվանապես հիշատակվող առաջին արքան *Արամուն է (Արամու Ուրարտացի)*, որը Ք.ա. 859-843 թթ. ընթացքում քանիցս դիմակայել է ասորեստանյան արշավանքներին: Ք.ա. III-I հազարամյակներում իշխել են Արամ անունով մի քանի հայ արքաներ, որոնք ազգային ավանդության մեջ միավորվել են և Դատմահոր մատյանում տեղ գտել Հայկյան Արամի միասնական կերպարով: Հիշենք, որ Վանա և Ուրմիո լճերի միջև Արամ անունով երկիր էր հիշատակվում դեռևս Ք.ա. XXIII դարում:



Մովսես Խորենացու տեղեկությունների համաձայն՝ Արամը ոչ միայն հերոսաբար հետ է շարտել ասորեստանյան նվաճողներին, այլև հաղթական արշավանքներ է կատարել դեպի Մարաստան (Մեդիա) և Փոքր Ասիա:

Արամու Ուրարտացու գործունեության շնորհիվ Ք. ա. IX դարի առաջին կեսին **Հայկազունների Այրարատյան թագավորությունը** հայտնի էր դարձել Հայկական

լեռնաշխարհի սահմաններից դուրս: Քանի որ «Ուրարտու»-ն դարձել էր Հայաստանի ընդհանրական անվանում, ասորեստանյան աղբյուրները շարունակում են այդ անունով կոչել նաև Ք.ա. 830-ական թվականներից ողջ լեռնաշխարհն աստիճանաբար իր իշխանության ներքո միավորած Նաիրի թագավորությունը, որի նոր հիմնված մայրաքաղաքը Տուշպա-Վանն էր:

### **Հարցեր և առաջադրանքներ**

1. Ի՞նչ գիտեք Ք. ա. XX–XVIII դդ. մետաղի առևտրի մայրուղու մասին:
2. Որտեղ և երբ է ստեղծվել Միտաննի թագավորությունը: Ո՞ր աղբյուրներից ենք իմանում Հայաստանի մասին: Ինչպիսի՞ ընթացք ունեցավ խեղճերի հետ հայասացիների հակամարտությունը:
3. Ո՞ր երկրի արքաներն են պարբերաբար արշավել Նաիրյան երկրների դեմ: Ի՞նչ փաստեր են վկայում Նաիրյան երկրների ուժի մասին:
4. Ո՞ր ժամանակաշրջանում է ձևավորվել Հայկազունների Այրարատյան թագավորությունը: Բացատրե՛ք «Ուրարտու» անվանումը: Ք. ա. IX դ. կեսերին Հայաստանում ինչ թագավորություններ կային: Ի՞նչ տեղեկություններ կան Արամու թագավորի մասին:

## **ԼՐԱՑՈՒՑԻՉ ՆՅՈՒԹ**

### **Հարված Նարամսինի քնազներից**

Քանի որ երբևէ՝ մարդկության արարումից ի վեր, ոչ մի թագավոր չէր նվաճել Արմանումն ու Էրլան,

Ներգայն\* (իր) զենքով ճանապարհ բացեց Նարամսինի՝ հզորի համար և տվեց նրան Արման(ում)ն ու Էրլան:

Եվ նա տվեց նրան Ամանտը՝ Մայրիների լեռը, ու Վերին ծովը...

\* Ներգայը միջագետքյան դիցաբանության անդրաշխարհի աստվածն էր:

Թեմա 1. ՎԱՆԻ ՀԱՄԱՀԱՅԿԱԿԱՆ ԹԱԳԱՎՈՐՈՒԹՅՈՒՆԸ

§ 1. ՎԱՆԻ ԹԱԳԱՎՈՐՈՒԹՅԱՆ ԿԱԶՄԱՎՈՐՈՒՄՆ ՈՒ ՀԶՈՐԱՅՈՒՄԸ:  
ԱՐԳԻՇԵՏԻ I

Տուշպա (Տոսպ, Վան) մայրաքաղաքի հիմնումը: Հայկական լեռնաշխարհի տարածքում Ք.ա. 830-ական թվականներին նկատելի են մի քանի հիմնական կենտրոններ, որոնց շուրջ համախմբված են համադաշնություններ կազմած մանր պետական կազմավորումները: Դրանցից ամենամեծը Արարատյան դաշտում, Սևանա լճի ավազանում, Սյունիքում և հարակից շրջաններում տարածվող *էթիունի* երկրի համադաշնությունն էր: Դա փաստորեն *Հայկազունների Արարատյան* (Արարատյան) թագավորությունն էր՝ իր համադաշնությամբ:

Լեռնաշխարհի հյուսիսարևմտյան շրջաններում ուրվագծվում է *Դիասուխի* (Տայք) շուրջ կազմավորված մյուս համադաշնությունը: Երրորդ խոշոր համադաշնությունը կազմվել էր հարավում՝ *Վանի* շուրջը, որի հիմքի վրա էլ քարձրացավ Վանի համահայկական հզոր թագավորությունը:

Ք.ա. IX դարի 80-70-ական թթ. Հայկական լեռնաշխարհի հարավում *Նաիրյան երկրների* փոխարեն հիշատակվում է մեկ միասնական *Նաիրի* պետական կազմավորումը: Ք. ա. մոտ 830-ական թթ. Տուշպա (Տոսպ, Վան) մայրաքաղաքն է հիմնադրում *Սարգուրի I-ը* (Ք.ա. մոտ 835-825 թթ.): Ասորերեն գրված Տուշպայի հիմնադրման արձանագրություններում նա իրեն կոչում է «Նաիրի երկրի արքա» և ներկայանում «*մեծ արքա, հզոր արքա, փեղեկների արքա, արքաների արքա...*» տիտղոսաշարով:

Ասորեստանյան աղբյուրներում թագավորությունը կոչվում է Ուրարտու, իսկ տեղական արձանագրություններում՝ *Նաիրի* և *Քիսայնի*: Վերջինս կապվում է Վանի անվան հետ, այդ պատճառով էլ գիտու-

թյան մեջ թագավորությունը հայտնի է նաև որպես Վանի թագավորություն: Աստվածաշնչում այն հիշատակվում է «Արարատյան թագավորություն» անվամբ:

Սարգուրի I-ը ասորեստանյան աղբյուրներում հիշատակվում է մեկ անգամ՝ Ք.ա. 833 թ., Սալմանասար III-ի զորքերին դիմակայելու անշուքությամբ: Այդ ժամանակ Վանի թագավորությունը տարածվում էր ոչ միայն Վանա լճի ավազանում, այլև Հայկական Տավրոսից հարավ՝ Տիգրիսի վերին հովտում:

**Իշպուինիի գահակալությունը:**

Ք.ա. մոտ 825-810 թթ. Տուշպա-Վանի տիրակալ է դառնում Սարգուրի I-ի որդի *Իշպուինի* արքան: Վանի թագավորության հզորացման և տարածաշրջանային տերություն դառնալու գործում կարևոր դեր են խաղում Իշպուինիի օրոք սկսված և Մենուայի գահակալության ընթացքում շարունակված քարեփոխումները:

Իշպուինիի գահակալության առաջին շրջանում անցկացված քարեփոխումները կապված էին միայն նրա անվան հետ, իսկ երկրորդ շրջանում հեղինակակից է հանդես գալիս նրա որդի Մենուան, ինչը երևում է նրանց համատեղ կանգնեցրած արձանագրություններից: Եթե գրային քարեփոխումը՝ տեղական սեպագրի ստեղծումը, տեղի է ունեցել Իշպուինիի կատարման սկզբնական շրջանում, ապա կրոնական քարեփոխումը՝ ողջ թագավորության համար *միասնական դիցարանի* (պանթեոնի) ստեղծումով, կատարվել է նրա գահակալության երկրորդ շրջանում: Դրանով է պայմանավորված, որ դիցարանի արձանագրումը «Խաղյան դարպասի»





Տուշպա-Վանի հիմնադրման արձանագրությունը

վրա, որին հետագայում մեր ժողովուրդը կոչեց «Մհերի դուռ», կատարվել է երկուսի անունով: Դիցարանում միավորված էին նախկին Նաիրյան համադաշնության երկրների աստվածությունները:

Իշպուհնիի օրոք սկսվեցին և Մենուայի օրոք շարունակվեցին ռազմական ոլորտի բարեփոխումները: Նախկին դաշնային աշխարհագրորդ փոխարինվեց *արհեստագործ կանոնավոր քանակով*, որը բաժանված էր ըստ գորատեսակների:

Դրանց շնորհիվ Իշպուհնին արձանագրեց առաջին խոշոր հաջողությունները Ք.ա. 820-ական թթ. վերջին՝ Ուրմիո լճի ավազանի հարավում ընդլայնելով թագավորությունը և ներառելով *Արդինի-Մուսասիր երկիրը*: Իշպուհնին այնուհետև արշավանքներ ձեռնարկեց դեպի Արածանիի ակունքների և Արաքսի վերին հոսանքի շրջանները, ռազմերթեր կատարեց դեպի Սյունիք, Արաքսի հովտով դեպի արևելք, ինչպես նաև Ուրմիո լճի ավազանով դեպի հարավ՝ մինչև Պարսուա երկիրը:

**Թագավորության հզորացումը Մենուայի գահակալության շրջանում:** Մենուայի միանձնյա կառավարման շրջանում (Ք.ա. մոտ 810-786 թթ.) Վանի թագավորությունը աննախադեպ վերելք է ապրում: Երկիրը տնտեսապես հզորացնելու համար նա կատարում է բազմաթիվ գործեր, որոնցից հատկապես նշանավոր է 72 կմ երկարությամբ «Մենուայի ջրանցքի» կառուցումը, որն օգտագործվում է մինչ օրս:

Մենուայի առաջին քայլերից մեկն է լի-

նում Հայկական Պար լեռնաշղթայի արևելյան հատվածում ամրապնդվելը: Այս տարածքի նվաճումից հետո էլ հիմնվում է ռազմավարական խոշոր հենակետ՝ *Մենուսխինիլիս*:

Պետության հյուսիսարևմտյան սահմաններն ամրապնդելու նպատակով Մենուան արշավում է ընդդեմ Դիաուխի-Դալանի (Տայք) երկրի:

Հարավարևմտյան ուղղությամբ նրա քանակը հաղթարշավով հասնում է մինչև Կումենու և Ասորեստան: Մեկ այլ արշավանք է իրականացնում Ալգի (Աղձնիք) երկրի ուղղությամբ և իր հսկողության տակ է վերցնում Հայկական Տավրոսի կենտրոնական հատվածի լեռնանցքները:

Արևմտյան ուղղությամբ Մենուայի քանակն առաջին անգամ դուրս է գալիս Արևմտյան Եփրատի բնագիծ՝ սպառնալով անդրեփրատյան պետություններին: Դրանցից *Մելիպուայի* (Մելիդ, Մալաթիա) արքան խուսափում է առձակատումից՝ պարտավորվելով Մենուային վճարել հարկեր:

1 Ք.ա. IX դարի վերջին մերձուրմյան ավազանում ձեռք են բերվում ռազմավարական առումով կարևոր նշանակություն ունեցող տարածքներ: *Մանայի* թագավորությունը լիովին ընդունում է Մենուայի գերիշխանությունը:

Վանի քանակը շարունակում է հաղթարշավը Ուրմիայից հարավ-արևելք ընկած տարածքներում՝ հասնելով մինչև Դիալա գետի ավազան:

Ասորեստանի փորձերը՝ ինչ-որ կերպ կասեցնելու Վանի թագավորության առաջխաղացումը Ք.ա. 791 թ., ավարտվում են անհաջողությամբ:

Մենուան հատուկ ուշադրություն դարձրեց ռազմական շինարարությանը: Հիմնվում են մի քանի ամրոցներ:

Այսպիսով՝ Մենուայի հաղթարշավների շնորհիվ Հայկական լեռնաշխարհի հիմնական մասը միավորվում է մեկ կենտրոնացված պետության մեջ, իսկ հյուսիսային շրջանների իշխանությունները, թեպետ չեն մտնում Վանի տերության մեջ, բայց, ընդունելով նրա գերիշխանությունը, հարկատու




են դառնում: Վանի տիրակալն իր գերիշխանությունն է հաստատում Ուրմիո լճի ավազանից շատ հարավ և եփրատից արևմուտք, վերահսկողություն է սահմանում Ջազրոսյան լեռներով դեպի արևելք և դեպի Փոքր Ասիա տանող ռազմավարական ուղիների վրա: Մենուան առաջին մարտավարական հաղթանակներն է տանում տարածաշրջանի խոշորագույն պետության՝ Ասորեստանի նկատմամբ և **Վանի թագավորությունը վերածում գերզեկության:**

**Արգիշտի I:** Արգիշտի I-ի գահակալության տարիներին (Ք.ա. 786-764 թթ.) Վանի թագավորությունը հասնում է հզորության գագաթնակետին: Նրա գահակալության հենց երկրորդ տարին (Ք.ա. 785 թ.) խիստ հազեցած էր արտաքին ձեռնարկումներով: Նախ նա կատարում է ռազմա-



Արգիշտի I-ի բրոնզե աղապարտը

վարական անհրաժեշտությանը պայմանավորված կարևոր արշավանք դեպի Դիաուխի, ապա Էթիունյան միության և հարևան մի քանի երկրների դեմ: Այնուհետև Արգիշ-





տին հասնում է Կարսի սարահարթ, որից հետո արշավում Ջարախա (Ջավախք):

Ք.ա. 784 թվին Արգիշտի I-ի հյուսիսային արշավանքները շարունակվում են: Նա իր տերությանն է միացնում **Արիփանի** երկիրը (հետագայի Աբեղեանք գավառը), գրավում Էթիունյան միության մաս կազմող **Վեդուրի-Էթիունի** («Ջրային Էթիունի») երկրամասը Սևանա լճի ավազանում, նաև այլ փոքր իշխանություններ:

Մեկ այլ արշավանքով ամրապնդվում են Վանի թագավորության դիրքերը Ուրմիո լճից հարավ-արևմուտք՝ Մեծ Ջարի միջին հոսանքի շրջանում:

Իր թագավորության չորրորդ տարում (Ք.ա. 783 թ.) Արգիշտին խոշոր արշավանք է ձեռնարկում դեպի արևմուտք՝ Փոքր Ասիայի տարածք: Նա կրկին գրավում է Մելիտեան ու այլ երկրներ՝ վերադառնալով տասնյակ հազարավոր ռազմագերիներով և մեծ ռազմավարով:

**Ք.ա. 782 թ.** Վանի գործերը նախ գրավում են Էթիունյան միության մաս կազմող **Կեխունի** (Գեղունի) «ծովային գավառը» Սևանա լճի ավազանի հյուսիսում, ապա շարունակում հաղթարշավը դեպի **Ալիշուու**՝ Աղստևի հովիտ: Հիմնադրվում է Էրեբունի ամրոցը: Այնուհետև արշավանքը շարունակվում է դեպի հյուսիս-արևելք՝ մինչև հետագա Գուգարաց աշխարհի Տաշիր գավառի տարածքը:

Արգիշտին Ք.ա. 781 թ. ոչ միայն պարտության մատնեց ասորեստանյան գործերին, այլև շարունակեց հարձակումը դեպի հարավ՝ Ջագրոսյան լեռներով հասնելով մինչև **Պարսուս** (հետագայի Պարսք) և **Բաբելոնի** երկիր, որը ձգվում էր մինչև Պարսից ծոց: Դրանով Արգիշտին շրջափակման մեջ է վերցնում Ասորեստանը երեք կողմից՝ հյուսիսից, արևելքից և հարավից:

Այսպիսով՝ **Ք.ա. 786-781 թթ.** Արգիշտի I-ի առաջնորդությամբ **սրելոծվում է Վանի աշխարհակալությունը:**

Դրանից հետո ևս շարունակվեցին Արգիշտի I-ի հաղթարշավները: Մասնավորապես Ուրմիո լճից հարավ տեղի ունեցան ռազմական բախումներ, իսկ

Ք.ա. 781-778 թթ. ընդդեմ Ասորեստանի տեղի ունեցավ հաղթական պատերազմ:

Ք.ա. 779 թ. Արգիշտին մի հեռավոր արշավանքից հետո հասնում է Հյուսիսային ծովակի ավազանը:

Բազմաթիվ արշավանքներով ուղեկցվող արտաքին քաղաքականությունն Արգիշտին շարունակեց վարել նաև հետագա տարիներին: Այսպիսով՝ հայոց մեծ տիրակալ Արգիշտի I-ի օրոք Բիայնիլի-Ուրարտու-Արարատ թագավորությունը հասավ աննախադեպ հաջողությունների՝ վերածվելով Առաջավոր Ասիայի հզորագույն ուժի:

**Արգիշտի I-ի տերության և ազդեցության ոլորտների աշխարհագրությունը:** Արգիշտի I-ի բուն թագավորությունը ձգվում էր Ուրմիայի ավազանի հարավից մինչև Ջավախք, Սևանա լճի ավազանից և Կուր գետից մինչև անդրեփրատյան աջափնյա շրջաններ (ներառյալ Մելիտեա և Թաքալ երկրները), Մասիուս և Կորդվաց լեռներից մինչև Ճորոխի ավազան:

Նրա գերիշխանության սահմաններն ավելի լայնածավալ էին. դրանք ընդգրկում էին Փոքր Ասիայի արևելյան պետությունները և մերձուրմյան ավազանի մի քանի երկրներ, իսկ հարավում՝ մինչև Պարսից ծոց՝ Բաբելոնիան ներառյալ:

Արգիշտի I-ի հեռավոր արշավանքներից ամենանշանավորը թերևս Բաբելոնիայի նվաճումն էր: Վանի թագավորության՝ Առաջավոր Ասիայի հզորագույն տերություն դառնալը փաստագրված է նաև նրա գլխավոր մրցակից Ասորեստանի գործերի գերագույն հրամանատարի խոստովանության մեջ, համաձայն որի՝ հայոց մեծ տիրակալի «անունն անգամ ահարկու է որպես ծանր հողը, նրա ուժերը մեծաքանակ են»...

Արգիշտի I-ի ստեղծած տերության ազդեցության ոլորտների պատկերը համայնվում է հնագիտական պեղումներից հայտնաբերված փաստերի ուսումնասիրության շնորհիվ: Նրա անվամբ սեպագիր արձանագրությամբ սաղավարտ է գտնվել Հյուսիսային Կովկասից, որը ներկայումս պահվում է Բեռլինի Առաջավորասիական թան-

գարանում: Համանման սաղավարտներ են հայտնաբերվել նաև Արխագիայից, Օսիայից և Թոնոքից: Հնագիտական փաստերը

վկայում են Արգիշտի I-ի՝ մինչև Հյուսիսային Կովկաս տարածված ռազմաքաղաքական ազդեցության ոլորտի մասին:

### Տարզեր և տառադրանքներ

1. Ինչ խոշոր համադաշնություններ էին ձևավորվել Հայկական լեռնաշխարհի տարածքում: Ինչո՞ւ են Ուրարտուն անվանում նաև Վանի թագավորություն:
2. Ինչ բարեփոխումներ է իրականացրել Իշպուհնի արքան: Բազմական ոլորտում ինչ բարեփոխումներ իրականացրին Իշպուհնի և Մենուա արքաները:
3. Ինչ հաջողություններ արձանագրվեցին Մենուայի կառավարման տարիներին: Շինարարական ինչ աշխատանքներ կատարեց Մենուան:
4. Ո՞ր արքայի օրոք է Վանի թագավորությունը հասել հզորության գագաթնակետին: Արգիշտին ինչ շինարարական աշխատանքներ ձեռնարկեց:

## § 2. ՎԱՆԻ ՏԵՐՈՒԹՅՈՒՆԸ ՍԱՐԴՈՒՐԻ II-Ի ԵՎ ՆՐԱ ՀԱՋՈՐԴՆԵՐԻ ՕՐՈՔ: ԹԱԳԱՎՈՐՈՒԹՅԱՆ ԱՆԿՈՒՄԸ

**Սարդուրի II. Չորս ծովերի տերությունը:** Վանի թագավորության հզորությունը շարունակվում է *Սարդուրի II-ի* օրոք (Ք.ա. 764–735 թթ.): Նա առաջին խոշոր արշավանքն ուղղում է Մելիտեա պետության դեմ, որի արքան առիաված էր ներկայանալ Սարդուրիին և պարտավորվել վճարել հարկեր:

Այնուհետև նա արշավում է Սևանա լճի ավազան, ապա հարավ՝ Արմե և Ուրմե երկրներ: Նա արշավում է Մանա երկրի վրայով հարավ՝ կրկնելով հոր՝ Արգիշտի I-ի արշավանքը Ասորեստանի արևելքով դեպի Բաբելոն: Հայաստանյան բանակը մտնում է Բաբելոնիա՝ նվաճելով ու ավերելով երեք ամրոց և մոտ երկու տասնյակ քաղաքներ, տանելով զրեթե քառասուն հազար ռազմագերի և հարուստ ավար: Բաբելոնիայի վերանվաճումով հայոց աշխարհակալության հարավային սահմանը կրկին հասնում է Պարսից ծոց:

Ք.ա. 740–ական թթ. Սարդուրի II-ը երկու արշավանք է ձեռնարկում դեպի հյուսիս՝ *Կուլխա*՝ կոլխերի երկիրը՝ հունական աղբյուրների Կոլխիդան, որը ձգվում էր մինչև Սև ծովի ափերը:

Հաջորդ տարի Սարդուրին հասնում է նոր հաջողության. դուրս է գալիս Միջերկրական ծովի արևելյան ավազան:

Դեպի հարավ՝ մինչև Բաբելոն արշավանքները կրեք կողմից շրջափակում էին Ասորեստանը, իսկ Սիրիայի տարածքով և Եփրատի ավազանով Բաբելոն հասնելով՝ կիրականանար Ասորեստանի լիակատար շրջափակումը:

Սարդուրի II-ի կառավարման շրջանում նկատվում է շատ կարևոր անցում տերության կառավարման ոլորտում. նա սկսում է վերացնել կախյալ (կամ «դաշնակից» համարվող) թագավորությունները՝ վերածելով պետության վարչական միավորների, դրանով իսկ համադաշնային կառավարման համակարգից անցում կատարելով կենտրոնացված պետության:

Ամփոփելով Սարդուրի II-ի կառավարման ժամանակաշրջանի ընդհանուր պատկերը՝ տեսնում ենք, որ նրա գահակալության շրջանում է Վանի տերությունն ունեցել տարածքային ամենամեծ աճը:

Նրա տերությունը հյուսիսում հասնում է Սև ծով, հյուսիս–արևելքում՝ Կուր գետ, արևելքում՝ Կասպից ծով, արևմուտքում՝ Փոքր Ասիայի կենտրոնական շրջան, հարավում՝ Բաբելոնով՝ Պարսից ծոց և հարավ–արևմուտքում՝ Միջերկրական ծով:



## **Ասորեստանի դիրքերի ամրապնդումը:**

Լիակատար շրջափակումից և ոչնչացումից խուսափելու նպատակով Ասորեստանը լուրջ քայլեր ձեռնարկեց: Ք.ա. 743 թ. Թիգլաթպալասար III-ը կարողացավ կանեցնել Վանի տերության՝ Եփրատի հովտով դեպի Բաբելոն շարժվող զորքերը: Ութ տարի անց՝ Ք.ա. 735 թ., Թիգլաթպալասար III-ն ի վիճակի եղավ արշավանք ձեռնարկելու դեպի Տուշպա (Վան): Մայրաքաղաքը գրավել նրան, իհարկե, չհաջողվեց, սակայն դրանով Ասորեստանը վերականգնեց իր դիրքերը՝ կրկին դառնալով Վանի տերության գլխավոր մրցակիցն Առաջավոր Ասիայում:

Սարգուրի II-ի որդի **Ռուսա I-ը** (Ք.ա. 735 – մոտ 710-ական թթ.) գահ բարձրացավ ղժվարին մի շրջանում: Նա կատարեց պետական համակարգի և քանակի բարեփոխումներ:

Ռուսա I-ն արշավանքներ ձեռնարկեց դեպի Սևանա լճի ավազան՝ այնտեղ վերակառուցելով երկու խոշոր ամրոցներ և անվանակոչելով Խաղդի և Թեյշերա զերագույն աստվածների անուններով: Դրանից հետո Ռուսան ուշադրությունը կենտրոնացրեց մերձուրմյան ավազանին, հատկապես Արդինի-Մուսասիրին: Նա գահընկեց արեց իշխանությանը տիրացած ասորամետ դրածոյին և գահին վերահաստատեց իր վստահելի կառավարչին: Արդինի-Մուսասիրը Խաղդիի պաշտամունքի գլխավոր կենտրոնն էր, նրա «սրբազան քաղաքը»:

Վերականգնվեցին Վանի տերության դիրքերը նաև Աղձնիքի տարածքում:

Մերձուրմյան ավազանում իր դիրքերը վերականգնելուն ուղղված քայլերը հանգեցրին Ասորեստանի նոր արքա Սարգոն II-ի հետ քախմանը Ք.ա. 719 թ.: Վերջինս անհաջողություն կրեց: Զարգացնելով հաջողությունը՝ Ռուսա I-ն արշավեց դեպի արևելք՝ նվաճելով մինչև Կասպից ծով ընկած նոր տարածքներ:

Ք.ա. 716 թ. Մանայի համար Ասորեստանի և Ուրարտուի պայքարը վերածվեց վճռական պատերազմի: Սակայն նույն տարվա աշնանը հյուսիսից անակնկալ հայտնվեցին

կիմերների քոչվոր ցեղերը՝ ապատակելով Վանի թագավորության տարածքները: Երկիրը հայտնվեց երկու ձակառով հարձակվող թշնամիների օղակում. Ռուսա I-ն անհաջողություններ կրեց:

Օգտվելով դրանից՝ Ք.ա. 714 թ. գարնանը Սարգոն II-ն արշավեց Վանի թագավորության դեմ: Նա չունեցավ առանձնապես մեծ հաջողություններ, սակայն վերադարձին մտավ Արդինի-Մուսասիր և թալանեց Խաղդիի գլխավոր տաճարը: Իրոն հերոսություն ներկայացվող այս քայլը իրականում պարզ սրբապղծություն էր, քանի որ Արդինի-Մուսասիրը քաց սրբավայր էր, և ասորեստանցիները ևս գալիս էին այնտեղ պաշտամունքի:

Դատելով փաստերից՝ Ռուսա I-ին շուտով հաջողվել է հետ նվաճել Արդինի-Մուսասիրը:

Ք.ա. 743-713 թթ. մղած երեսնամյա պայքարի արդյունքում Ասորեստանին հաջողվեց վերականգնել իր դիրքերը՝ կրկին դառնալով Առաջավոր Ասիայի տերություններից մեկը:

## **Վանի թագավորությունը VIII դարի վերջին և VII դարի առաջին կեսին:**

Ռուսա I-ին հաջորդում է նրա որդի Արգիշտի II-ը: Վանի թագավորության համար այդ ժամանակ հյուսիսում հայտնվել էր լուրջ թշնամի՝ կիմերների ցեղը, իր հերթին Ասորեստանն էլ Փոքր Ասիայում ձեռք էր բերել նոր հակառակորդ: Վտանգավոր հակառակորդների հայտնվելու արդյունքում մերձեցում է նկատվում Ասորեստանի և Վանի թագավորության հարաբերություններում: Բարիդրացիական էին հարաբերություններն Ասորեստանի նոր գահակալ Սինաքերիթի (Սենեքերիմի) հետ: Այս պայմաններում Արգիշտի II-ը գեներալ ուղղում է արևելք՝ Արաքսի հարավով հասնելով մինչև Կասպից ծով: Նվաճված տարածքներում արքան հիմնադրում է երկու խոշոր ամրոց՝ Խաղդի աստծո և իր անուններով:

Բիայնիլի-Ուրարտու-Արարատի վերջին ականավոր տիրակալը դարձավ **Ռուսա II-ը** (Ք.ա. մոտ 685-645 թթ.)՝ Արգիշտի II-ի որդին:

Նա շարունակեց կառավարման համակարգի բարեփոխումը՝ համադաշնությունների համակարգից անցումը գերկենտրոնացված պետական կառավարման մոդելին: Զարկ տրվեց քաղաքաշինությանը, հիմնվեցին կամ վերակառուցվեցին բազմաթիվ ամրոցներ: Անցկացվեցին նոր ջրանցքներ, զարգացան արհեստներն ու առևտուրը:

Ք.ա. 660-ական թթ. սկզբին կրկին սրվում են հարաբերությունները Ուրարտուի և Ատրեստանի միջև: Այդ ժամանակաշրջանի ատրեստանյան մի քանի աղբյուրներ վկայում են Վանի տերությունից ապաստող պատնալիքի մասին: Վանի տիրակալը հիշատակվում է կիմերների հետ Ատրեստանի դեմ թշնամական գործողություններ ծրագրելիս:

Հայկական լեռնաշխարհի հյուսիսային և հյուսիսարևմտյան շրջաններում հաստատված կիմերները դեռևս Ք.ա. 715-714 թթ. թշնամական արշավանքներ էին ձեռնարկել Վանի տերության դեմ՝ դրանով նաև նպաստելով վերջինիս թշնամի Ատրեստանի քաղաքականությանը: Հատկանշական է, որ Ռուսա II-ը կիմերների դեմ ռազմական պայքար չի սկսում, այլ դիմում է դիվանագիտական հնարքի: Նրան հաջողվում է բարեկամական և դաշնակցային հարաբերություններ հաստատել կիմերների հետ և նպաստել նրանց՝ Փոքր Ասիայի արևելք տեղափոխվելուն:

Ք.ա. 650-ական թթ. առաջին կեսին տեղի են ունենում ռազմական քախումներ Ատրեստանի և Վանի թագավորության միջև: Ուրարտուի դեմ ռազմական գործողություններ սկսեցին հյուսիսից հայտնված նոր հակառակորդները՝ սկյութները: Ատ-

րեստանի և Վանի թագավորության պատերազմն ավարտվել է նրանց միջև խաղաղության և բարեկամության պայմանագրով:

### **Թագավորության անկումը:**

Ռուսա II-ին հաջորդել են եւ մի քանի թագավորներ, որոնց ժամանակ պետությունը թուլացել էր: Վերջին հստակ թվագրվող արքան **Սադրուհի III-ն** է, որն ատրեստանյան արձանագրություններում հիշատակվում է Ք.ա. 643 թ.:

Համեմատաբար լուսարանված է Էրիմենայի որդի Ռուսա III-ի իշխանության շրջանը, որից մեզ հասած արձանագրությունները հայտնաբերվել են Վանա լճի արևելյան շրջանների և Արարատյան դաշտի հնավայրերից:

Վանի արքայատոհմի իշխանությունն աստիճանաբար թուլանում էր: Պետության անկմանը նպաստեցին նաև հյուսիսից ապատակող սկյութական ցեղերը: Թե երբ է անկում ապրել Վանի թագավորությունը, ստույգ հայտնի չէ: Հիմքեր կան կարծելու, որ Վանի արքայատոհմից իշխանության անցումը հաջորդ արքայատոհմին կատարվել է Ք.ա. VII դ. վերջին՝ առանց լուրջ պատերազմական գործողությունների, պայատական հեղաշրջման ճանապարհով:

Հայկական լեռնաշխարհի հարավ-արևմտյան մասում Ք.ա. VII դարում ձևավորվել էր նոր հայկական մեծ իշխանություն՝ Հայկազունների գլխավորությամբ: Պարույր Հայկազունուն էլ վիճակված էր Ք.ա. 612 թ. հռչակել նոր թագավորություն:

Վանի տերությունը կարևոր դեր է խաղացել հայոց և համաշխարհային քաղաքակրթության պատմության մեջ:

### **Հարցեր և առաջադրանքներ**

1. Սարդուրի II-ը ինչ նոր քաղաքներ հիմնադրեց: Մինչև ո՞ր էին ձգվում հայոց տերության սահմանները նրա օրոք:
2. Ի՞նչ հետևանքներ ունեցավ ասուրա-ուրարտական քախումը Ռուսա I-ի օրոք:
3. Ո՞վ էր Ուրարտուի վերջին ականավոր տիրակալը: Ներկայացրե՞ք Ռուսա II-ի ձեռնարկած արշավանքների ուղղությունները: Ռուսա II-ը ինչպե՞ս է կարգավորում փոխհարաբերությունները կիմերների հետ:
4. Վերհանե՞ք Վանի թագավորության անկման պատճառները:



### § 3. ՎԱՆԻ ԹԱԳԱՎՈՐՈՒԹՅԱՆ ՏՆՏԵՍՈՒԹՅՈՒՆԸ, ՊԵՏԱԿԱՆ ԿԱՐԳԸ ԵՎ ԲԱՆԱԿԸ

**Գյուղատնտեսությունը և արհեստները:** Պետության հզորությունը և ռազմաքաղաքական հաջողությունները մեծապես պայմանավորված էին տնտեսության զարգացման բարձր մակարդակով: Վանի թագավորությունը մեծ հաջողությունների հասավ գյուղատնտեսության և արհեստների զարգացման գործում: Կարևոր նվաճումներից էր ռոռզման ջրանցքաշինական ցանցի ստեղծումը, որը նպաստեց գյուղատնտեսության ծաղկմանը: Բացի Մենուայի (Շամիրամի) 72 կմ երկարություն ունեցող ջրանցքից, Տուշպա-Վան քաղաքից ոչ հեռու կառուցվել են 25 կմ երկարություն ունեցող *Ռուսայի ջրանցքը* և *«Ռուսայի ծով»* կոչված ջրամբարը: Երևանում գտնվող *Թեյշեբախի* (Կարմիր բլուր) ամրոցի մոտ մինչ օրս պահպանվել է մի ջրանցք, որը Հրազդանից թունելի միջով ջուր է մատակարարել Արարատյան դաշտին:

Լեռնային ու նախալեռնային շրջաններում զարգացած էր անասնապահությունը: Զարգանում էին արհեստներն ու առևտուրը: Ծաղկում էր ապրում ամբողջ տնտեսությունը:

Տնտեսության վերելքը զգալիորեն խթանվեց երկրի հարուստ մետաղահանքերի բուռն շահագործմամբ և մետաղյա գործիքների լայն օգտագործմամբ: Մետաղագործության հիման վրա զարգացան դարբնությունը, զինագործությունը, ոսկերչությունն ու արծաթագործությունը:

Վանի թագավորությունում մեծապես օգտագործվում էր ստրկական ուժը, սակայն հիմնական արտադրող ուժը երկրագործ ու անասնապահ ազատ բնակչությունն էր:

**Քաղաքաշինությունը:** Վանի տիրակալներն առաջնահերթ տեղ էին հատկացնում ամրոցաշինությանն ու երկրի պաշտպանական համակարգի կատարելագործմանը: Մեծ թվով բերդ-քաղաքներ են կառուցվել ողջ տերության տարածքում, ինչի

մեկնարկը կարելի է համարել Սարգուրի I-ի կողմից մայրաքաղաք Տուշպայի կառուցումը:

Մենուայի օրոք ավարտվում են Տուշպայի պաշտպանական կառույցները, Մասիսի ստորոտում՝ Արաքսի աջ կողմում, կառուցվում է Մենուայիների քաղաքը, տասնյակ ամրոցներ՝ պետության կենտրոնական շրջաններում, Ուրմիտ լճի ափերին՝ ռազմական հենակետերի մի հզոր շղթա:


Արգիշտի I-ը զարկ տվեց քաղաքաշինությանը՝ ստեղծելով այնպիսի խոշոր վարչատնտեսական կենտրոններ, ինչպիսիք էին Էրեբունին, Արգիշտիխինիլին՝ Արարատյան դաշտում, մեկ այլ Արգիշտիխինիլի՝ Մուշի շրջանում:

Սարգուրի II-ը շարունակեց երկրի լայնածավալ քաղաքաշինությունը՝ հիմնադրելով Տուշպայից ոչ հեռու գտնվող *Սարգուրիխինիլին* (Հայկաբերդ, Աստվածաշեն):

Ռուսա I-ը Սևանա լճի ավազանում վերակառուցեց երկու խոշոր բերդ-ամրոց՝ դրանք անվանակոչելով Խալդի և Թեյշեբա աստվածների անուններով:

Ռուսա II-ն իշխանության առաջին իսկ տարում հիմնադրում է Թեյշեբախի քաղաքը: Հիմնվում, վերակառուցվում և ընդարձակվում են բազմաթիվ ամրոցներ ու քաղաքներ:

Բերդ-քաղաքների բարձրադիր մասերում կառուցվում էր 2-3 շարք պարիսպներով պատված հզոր միջնաբերդ-ամրոցը: Միջնաբերդում կամ ամրոցում բնակվում էր կառավարիչը՝ իր սպասավորներով և զինվորներով: Միջնաբերդի շուրջը փոփած քաղաքը մեծ մասամբ նույնպես պարսպապատում էին: Քաղաքները կառուցապատվում էին հատուկ նախագծով, որի արդյունքում նրանք ունեին ուղիղ և զուգահեռ փողոցներ: Այդ մասում կային նաև արհեստանոցներ ու մառաններ: Արհեստավորների մեծ մասը բնակվում էր պարսպապատ քաղաքի տարածքում: Քաղաքային բնակելի



Մուսասիրի տաճարի պատկերը և վերակազմությունը



տները բազմատեսակ էին՝ խրճիթներից սկսած, մինչև ընդարձակ բնակարաններից բաղկացած շենքերը:

Միջնաբերդում պարտադիր լինում էր գերագույն աստծո, նաև տեղական աստվածության տաճար(ներ)ը: Վանի թագավորության տաճարները մի քանի տեսակ էին: Մեկը Արդինի-Մուսասիրի հայտնի տաճարն էր, որի միայն պատկերն է մեզ հասել: Տաճարների այս ոճը հետագայում տարածում գտավ ամբողջ աշխարհում: Այդ ոճի հիանալի նմուշներից է Գառնիի հեթանոսական տաճարը Հայաստանում: Ուրարտական տաճարի մյուս տեսակը կոչվում է «Աստծո դարպաս»:

**Պետական կարգը: Հայկական պետականության զարգացումը:** Վանի տիրությունը փաստորեն ծնունդ առավ Նաիրյան համադաշնությունից: Համադաշնությունների համակարգը քնորոշ էր Հայկական լեռնաշխարհին՝ սկսած Ք.ա. III հազարամյակից, հիշենք 17 երկրների դաշինքը Ք.ա. XXIII-XXII դդ. և Նաիրյան երկրների համադաշնությունները Ք.ա. II հազարամյակում:

Վանի թագավորությունը, ստեղծվելով որպես Հայաստանի հարավային իշխանությունների համադաշնություն, կարևորագույն դեր խաղաց հայկական պետականության պատմության մեջ: Հենց այս թագավորության ժամանակաշրջանում էր, որ տեղի ունեցավ դարակազմիկ փոփոխությունը հայոց պետականության պատմու-

թյան մեջ՝ բազմաթիվ իշխանությունների *համադաշնությունից անցումը կենտրոնացված պետության:* Այս երևույթը տեղի ունեցավ Ք.ա. VIII-VII դարերում:

Պետության կառավարման ոլորտում շատ կարևոր այդ անցումը նկատվում է Սարգուրի II-ի կառավարման շրջանում, երբ նա սկսում է վերացնել կախյալ (նաև «դաշնակից» համարվող) թագավորություններն ու իշխանությունները՝ վերածելով դրանք պետության վարչական միավորների:

Ռուսա I-ը շարունակեց քայլերը գերկենտրոնացված պետություն ստեղծելու ճանապարհին: Ռուսա II-ի օրոք այս գործընթացը լիովին ավարտվեց: Ստեղծվեց կոտ համակարգով կենտրոնացված միապետություն:

Վանի թագավորությունը *հինարևելյան Կիսիի բազարձակ միապետություն էր:* Պետության գլուխ կանգնած թագավորի իշխանությունն անսահմանափակ էր և ժառանգական՝ հորից ավագ որդուն: Նրա ձեռքում էին կենտրոնացված երկրի գերագույն իշխանությունը, դատավարությունը, զինված ուժերի հրամանատարությունը և այլն: Թագավորը համարվում էր գերագույն աստված Խաղիի ներկայացուցիչը երկրի վրա և իր բոլոր գործերը կատարում էր նրա անունից:

Թագավորին կից գործում էր *Ավագների խորհուրդը*, որի մեջ մտնողները համարվում էին արքայի «խորհրդականներ»:

Վարչական առումով պետությունը բաժանվում էր խոշոր մարզերի, որոնք կառա-





Վահան և սաղավարտ՝  
Սարգսրի II-ի արձանագրություններով

վարվում էին արքունի կառավարիչների կողմից: Նվաճված երկրներում իշխանությունը կարող էր թողնվել նախկին թագավորին կամ ցեղապետին, որը պարտավորվում էր հարկ վճարել և իր զորքով մասնակցել Վանի տիրակալի արշավանքներին:

Արձանագրություններում հիշատակվում են մի շարք գործակալությունների անվանումներ՝ «աշխարհակալ», «գավառակալ», «սահմանապահ կուսակալ» և այլն: Մեծ թիվ էին կազմում պետական համակարգի պաշտոնությունն ու սպասարկու անձնակազմը. օրինակ՝ Տուշպայի մոտ գտնվող Ռոսասիսիլի քաղաքի արքունի պալատը սպասարկող անձնակազմը բաղկացած էր 5507 հոգուց (նրանցից 119-ը գրագիրներ էին և ենթարկվում էին «հաշվի մարդուն»):

**Բանակը:** Կառավարման համակարգին զուգահեռ բարեփոխումներ իրականացվեցին նաև բանակում: Դեռևս Իշպուհնիի և Մենուայի օրոք սկսվել էր դաշնային զորաջոկատների և աշխարհագրորի փոխարինումն արհեստավարժ զինվորականությանը: Նրանց ստեղծած արհեստավարժ բանակի կազմում Ռուսա I-ի օրոք առանձնացվեց «արքայական գունդը» (հեծյալ զորամիավորումներից բաղկացած ընտրյալ ուժեր), ձևավորվեցին «մարզային զորքերը»:

Զինված ուժերի կորիզը կազմում էր ար-

քունի մշտական զորաբանակը, որը խաղաղ պայմաններում տեղակայվում էր արքունական բերդերում, ամրոցներում և սահմանային զորանոցներում: Պատերազմների ժամանակ արքունի զորաբանակին միանում էին իշխանությունների զորամասերը, դաշնակից երկրների զինված ուժերը, իսկ անհրաժեշտության դեպքում՝ նաև աշխարհագրային զնդերը:

Բանակը կազմված էր հետևակից, հեծելազորից և մարտակառքերից: Այն բաժանված էր 3-հազարանոց զնդերի, որոնք իրենց հերթին կազմված էին 50-ական զինվորից բաղկացած վաշտերից:

Տերության ամենամեծ ընդարձակման տարիներին՝ Սարգսրի II-ի օրոք, երբ սահմանները ձգվում էին չորս ծովերի միջև, «Սարգսրյան տարեգրության» համաձայն՝ զինված ուժերի ընդհանուր թիվը շուրջ 350 հազար էր: Բնականաբար, այս թվի մեջ ներառված են նաև նվաճված ու հարկատու երկրների զինված ուժերը:

Մարտիկները զինված էին բրոնզե և երկաթե սրերով, դաշույններով, նիզակներով, տեգերով, կացիններով, գուրգերով, պարաստիկներով, լայնալիճ աղեղներով և 36 նետ տարողությամբ կապարձներով: Հատկանշական է, որ Սարգսր II-ի Ք.ա. 714 թ. արշավանքի ժամանակ միայն Արդիսի-Մուսասիրի տաճարին կից զինանոցից ասորեստանցիները թալանել են 305 հազար թուր, 25 հազար վահան, 1500 նիզակ և այլն:

Զորքի գերագույն հրամանատարն արքան էր: Պատերազմի ժամանակ նրան օգնում էին առաջին և երկրորդ սպարապետերը: Հիշատակվում են գնդապետեր, հարյուրապետեր, հիսնապետեր և տասնապետեր:

Հեծելակային, հետևակային և մարտակառքային ուժերով համալրված զորաբանակը ստորաբաժանվում էր ըստ զինվածության և մարտական հմտությունների՝ սակրավորների, սուսերավորների, նիզակավորների, աղեղնավորների, հետախույզների և այլն:

Արքաների կողմից կազմակերպվում

էին զինախաղեր և մրցություններ, որոնցից երկուսի մասին մեզ են հասել գրավոր վկայություններ Մենուայի և Արգիշտի II-ի թողած արձանագրություններում:

Սարգոն II-ի վկայությամբ՝ Ուրարտուի գորաքանակում օգտագործում էին երաժշտական փողային գործիքներ և թմբուկներ՝ իրենց մարտիկներին ոգևորելու և հակառակորդին ահաբեկելու նպատակով: Նույն աղբյուրի համաձայն՝ Ուրարտուի բերդապահները խարույկի ազդանշաններով հեռավոր տարածություններից միմյանց հա-

ղորդում էին թշնամու զորքերի տեղաշարժերի մասին:

Պատերազմը Վանի թագավորության համար ստրուկների ձեռքբերման հիմնական աղբյուրն էր: Միայն Արգիշտի I և Սարդուրի II արքաների օրոք նվաճված երկրներից բերվել են կես միլիոնից ավելի ռազմագերի-ստրուկներ: Ստրուկներն աշխատում էին քաղաքների ու ամրոցների, տաճարների, ջրանցքների ու ձանապարհների կառուցման ու նորոգման վրա:

### Հարցեր և ստուգադրանքներ

1. Տևտեսության դր ձյուդերը զարգացում ապրեցին Ուրարտուում: Ի՞նչն էր նպաստում տնտեսության վերելքին:
2. Պաշտպանական նպատակով ինչ քաղաքներ են կառուցվել Վանի թագավորությունում:
3. Ե՞րբ հայոց մեջ տեղի ունեցավ անցումը համադաշնությունից կենտրոնացված պետության: Ներկայացրե՞ք Վանի թագավորության պետական համակարգը: Վարչական ինչ բաժանման էր ենթարկված Վանի թագավորությունը:
4. Ո՞ր արքան առանձնացրեց «արքայական գունդը»: Ներկայացրե՞ք ուրարտական քանակի կազմը: Ի՞նչպիսին էր քանակի սպառազինությունը:

## ԼՐԱՑՈՒՑԻՉ ՆՅՈՒԹԵՐ

### ***Սարդուրի I-ի ասուրերեն արձանագրությունը Տուշպա մայրաքաղաքի հիմնադրման մասին***

«Սարդուրիի արձանագրությունը՝ որդու Լութիարիի, մեծ արքայի, հզոր արքայի, տիեզերքի արքայի, Նահրիի արքայի, որին հավասարը չկա, զարմանահրաշ հովվի, (որ) չի վախենում կռվից, արքայի, որ ենթարկում է անհնազանդներին: Սարդուրին՝ որդին Լութիարիի, արքան (է) արքաների, որը րոյր արքաներից հարկ վերցրեց: Սարդուրին՝ որդին Լութիարիի, ասում է այսպես.— Ես քարերն այս Ավիոնու (քաղաքի) միջից բերեցի, ես պարիսպն այս կառուցեցի»:

### ***Մենուայի արձանագրությունը ջրանցքի կառուցման մասին***

«Խալդյան զորությամբ Մենուա Իշպուինորդին այս ջրանցքը անցկացրեց: «Մենուայի ջրանցք» (է) անունը: Խալդյան մեծությամբ Մենուան արքա (է) հզոր, արքա մեծ, արքա Բիայնիլի (երկրի), տերը Տուշպա քաղաքի»:



## ԹԵՄԱ 2. ՀԱՅԿԱԶՈՒՆ-ԵՐՎԱՆԴԱԿԱՆՆԵՐԻ ԹԱԳԱՎՈՐՈՒԹՅՈՒՆԸ

### § 1. ՀԱՅԱՍՏԱՆԸ Ք.Ա. VII ԴԱՐԱՎԵՐՁԻՑ ՄԻՆԶԵՎ Ք.Ա. 330-ԱՎԱՆ ԹՎԱԿԱՆՆԵՐԸ

Սկայորդի և Պարույր Հայկազուններ: Մովսես Խորենացու հաղորդման համաձայն՝ *Ք. ա. VII դարի սուսջին կեսին լեռնաշխարհի հարավ-արևմուտքում վերականգնվել էր Հայկազունների տոհմի իշխանությունը՝ Սկայորդու գլխավորությամբ: Այն համապատասխանում է սեպագիր աղբյուրների Արմե-Ճուրրիս պետական կազմավորմանը:*

Ք.ա. 681 թ. Ասորեստանի Սենեբերիմ (Սինաբերիթ) արքայի որդիներ Մարասարը (Մանասարը) և Ադրամելեթը սպանում են իրենց հորը և փախչում Հայաստան: Նրանց ապաստան է տալիս Սկայորդին՝ քնակեցնելով Ասորեստանի սահմանակցությամբ:

Ըստ Պատմահոր հաղորդման՝ Սկայորդու որդի Պարույրը միավորեց Վանա լճից մինչև Եփրատ ընկած ողջ տարածքը և դաշինք կնքեց Մարաստանի (Մեդիա) ու Բաբելոնի հետ ընդդեմ Ասորեստանի: Ք.ա. 612 թ. դաշնակից զորքերը գրավեցին Ասորեստանի մայրաքաղաք Նինվեն: Դրանից հետո Պարույր Նահապետը թագադրվեց Մարաստանի արքայի կողմից և ձանաչվեց *Հայաստանի թագավոր*: Երբ Ասորեստանը վերջնականապես ոչնչացնելու նպատակով դաշնակից զորքերը Ք.ա. 609 թ. Վանի շրջանով արշավում էին դեպի Ասորեստանի վերջին հենակետ Կարքեմիշ քաղաքը, այդ ժամանակ Վանն արդեն դաշնակիցների, այսինքն՝ Պարույրի իշխանության տակ էր:

**Հայկազուն-Երվանդականների թագավորությունը Ք.ա. VI դարում:** Ք.ա. 580-570-ական թթ. Պարույրի հաջորդներից նշանավոր դարձավ Երվանդ I Սակավակյացը, որի անունով էլ Հայկազունների մի ձյուղը համարվող արքայատոհմը ստացել է *Երվանդական, Երվանդ-*

*յան* կամ *Երվանդունի* անվանումը: Երվանդ Սակավակյացի օրոք հայոց թագավորությունն ուներ 40-հազարանոց հետևակ և 8 հազար հեծյալ զորք, որն այն ժամանակներում մեծ ուժ էր: Թագավորության սահմանները հյուսիս-արևելքում հասնում էին Կուր գետ, հյուսիս-արևմուտքում՝ Սև ծով, արևելքում՝ Մարաստան, իսկ հարավում՝ Հյուսիսային Միջագետք: Դրանք, փաստորեն, համապատասխանում էին Վանի թագավորության սահմաններին:

Երվանդ Սակավակյացը, Մարաստանի արքա Կիաքսարի դեմ պատերազմում անհաջողություն կրելով, պառպանել էր իր թագավորությունը, սակայն ստիպված ձանաչել էր մարական գերիշխանությունը: Կարճ ժամանակ անց՝ արդեն Ադրահակի օրոք, ևս ապստամբում է Մարաստանի դեմ: Ապստամբությունը ձախողվում է, և մարական արքունիքի ծուղակն է ընկնում հայոց արքայական ընտանիքը: Այն հարցին, թե որն էր նրա ապստամբության դրդապատճառը, հայոց արքան հպարտորեն պատասխանում է. «*Ես ազատության էի ձգտում, քանզի լավ էի համարում, որ ինքս ազատ լինեմ և որդիներիս ազատություն թողնեմ*»:

Մարաստանի գերիշխանությունը վերացվեց Ք.ա. VI դարի կեսին, երբ Երվանդ I-ի որդի Տիգրան Երվանդյանը պարսից արքա Կյուրոս Մեծի հետ միացյալ ուժերով ապստամբեց Մարաստանի դեմ:

Տիգրանը սկզբում դաշնակցային հարաբերություններ ուներ Մարաստանի արքա Ադրահակի հետ և իր քույր Տիգրանուհուն կնության էր տվել նրան: Հետագայում, երբ պարզ է դառնում, որ Ադրահակը փորձում է այդ ամուսնությունն օգտագործել քաղաքական նկատառումներով, Տիգրանը պատերազմի է ելնում Մարաստանի դեմ՝ դաշնակից ունենալով պարսից արքա

Կյուրոսին, որն ապստամբել էր Ադախակի դեմ և ձգտում էր խորտակել մարական թագավորությունը:

Ըստ հույն պատմիչ Քսենոփոնի՝ Տիգրան Երվանդյանը մտերիմ հարաբերություններ ուներ պարսից արքա Կյուրոս II Մեծի հետ: Նրանք որսընկերներ էին եղել դեռ պատանի հասակում:

Մարաստանի դեմ ապստամբությունը սկսվեց **Ք.ա. 553 թվականին**, այն գլխավորում էր Կյուրոս Մեծը: Տիգրանը նրա գլխավոր դաշնակիցն էր, որի իշխանությունը, բուն Հայաստանից բացի, տարածվում էր նաև Կապադովկիայի, Վրաստանի և Ադվանքի վրա: Ըստ հայկական ավանդության՝ հենց Տիգրանն էլ վճռական պայքարում սպանեց Մարաստանի արքա Ադախակին:

Կյուրոս Մեծի ստեղծած Աքեմենյան աշխարհակալության սահմանները Միջերկրական ծովից և Եգիպտոսից ձգվում էին մինչև Հնդկաստան: Հայաստանի տիրակալ **Տիգրան Երվանդյանը Ք.ա. 538 թ.** դաշնակից զորքերի գլուխ անցած՝ **գրավեց Բաբելոնը**, որից հետո, հայոց արքա ինեելուց բացի, դարձավ նաև Կյուրոսի տերության արևմտյան կեսի փոխարքան: Մովսես Խորենացին այսպես է ընդհանրացնում Տիգրան I Երվանդյանի գահակալությունը. «*Սա մեր թագավորներից ամենահզորը և ամենախոհեմն էր և նրանց բոլորից քաջ: Նա Կյուրոսին աջակից եղավ Մարաց իշխանությունը փառալելու... և մեր բնակության սահմաններն ընդարձակելով՝ հասցրեց մինչև հին բնակության սահմանների ծայրերը*»:

Հայաստանն արտոնյալ դիրք ուներ տերության մեջ: Կյուրոս II Մեծը գոհվում է Ք.ա. 529 թ., որին հաջորդում է որդին՝ Կամբիզը: Նրա օրոք ևս պահպանվում են Հայաստանի և Աքեմենյան Պարսկաստանի դաշնակցային հարաբերությունները: Տիգրան Երվանդյանը մահանում է Ք.ա. 524 թ.: Այնուհետև գահն անցնում է նրա երեք որդիներից Վահագնին:

## Բեհիսթունյան արձանագրությունը

**Հայաստանի և հայերի մասին:** Կամբիզի անսպասելի մահվանից հետո սկսվում են գահակալական կռիվներ, որոնք ի վերջո ավարտվում են Դարեհ I-ի (Ք.ա. 522–486 թթ.) հաղթանակով: Երբ Դարեհը հաստատվում է գահին, տերության ժողովուրդներն ապստամբում են Աքեմենյանների տիրապետության դեմ: Դարեհի իշխանության իրավակալությունը չի ձանաչում Հայաստանը:

Դարեհը ստիպված իր իշխանության առաջին տարիներն անցկացնում է՝ ապստամբություններ ճնշելով և հակառակորդներին ոչնչացնելով: Այդ իրադարձությունների մասին է պատմում նրա թողած Բեհիսթունյան եռալեզու արձանագրությունը:

Արձանագրության պարսկերեն բաժնում Հայաստանը կոչվում է **Արմինա**, էլամերենում՝ **Տարմինույա**, բաբելերենում՝ **Ուրարտու**: Հայաստանը շարունակում է «Ուրարտու» կոչվել նաև ավելի ուշ՝ Ք.ա. IV դ. ինչը մեկ անգամ ևս ցույց է տալիս, որ «Ուրարտուն» հայկական պետության անվանումներից մեկն էր:

Ք. ա. 522–521 թթ. Դարեհը բազմաթիվ արշավանքներ է ձեռնարկում՝ վերանվաճելու իր իշխանությունը չընդունող երկրները: Բեհիսթունյան արձանագրության սկզբում Հայաստանը չի հիշատակվում ապստամբած երկրների շարքում, ինչը ցույց է տալիս, որ վերջինս լիովին անկախ էր:

Ամենամեծ փորձությունները Դարեհ I-ին սպասում էին Հայաստանում: Եթե մյուս երկրները նա կարողանում էր նվաճել մեկ արշավանքով, ապա դեպի Հայաստան պահանջվում է հինգ արշավանք:

Հայաստանի դեմ արշավանքը Դարեհը նախ հանձնարարել էր իր մերձավորներից ծագումով հայ մի զորավարի՝ Դադարշիշին: Վերջինիս երեք անհաջող արշավանքներից հետո Դարեհը Հայաստան է ուղարկում պարսիկ զորավար Վահուսթասյին: Նա հայերի հետ առաջին ընդհարումն ունենում է Տյուսիսային Միջագետքում: Անհաջողության մատնված պարսիկները ստիպված էին իրենց հաջորդ՝ հինգերորդ արշավանքն իրականացնել Հայաստանի դեմ: Եվ





միայն այդ արշավանքից հետո են հայերն ընդունում Դարեհի գերիշխանությունը:

Նույն արձանագրության համաձայն՝ Դարեհի դեմ Բաբելոնում բարձրացած ապստամբությունը ղեկավարում էր «*Հայաստանի Արախան՝ Խաղիպասի որդին*»:

Ք.ա. 521 թ. Հայաստանը ձևաչափում է Արեւմեայանների գերիշխանությունը, սակայն պարսիկները ևս, իրենց հերթին, ստիպված գնում են գիջումների: *Հայաստանում շարունակում են իշխել Երվանդականները, որոնք հարում էին սեփական դրամ և վայելում լիակապար ներքին ինքնավարություն:*

**Հայաստանը Արեւմեայան տերության կազմում:** Ապստամբությունների ճնշումից հետո՝ Ք. ա. 520 թ., Արեւմեայան տերությունը քաժանվում է 20 մեծ վարչական միավորների՝ *սատրապությունների*: Հայաստանը կազմում է XIII սատրապությունը: Հայաստանի կառավարիչ-սատրապները Հայկազուն-Երվանդական տոհմի ներկայացուցիչներն էին և շարունակում էին կարևոր դիրք գրավել Արեւմեայան տերության մեջ՝ երբեմն ազգակցական, խնա-

միական սերտ կապեր ունենալով պարսից արքայից արքայի հետ:

Հայաստանը՝ որպես սատրապություն, Արեւմեայան տերության կազմում մնաց մինչև Ք. ա. 331 թվականը: Այդ ժամանակաշրջանի մասին մեր տվյալները խիստ սակավաթիվ են:

Ուշագրավ տեղեկություններ է հաղորդում հույն գրողվար և պատմիչ *Բանտոնը*, որը Ք.ա. 401 թ. անցել է Հայաստանի տարածքով: Արեւմեայան տիրակալ Արտաքսերքսես II-ի դեմ ապստամբում է նրա եղբայր Կյուրոս Կրտսերը, սակայն գահին տիրանալու համար բավարար ուժ չունենալով՝ 10-հազարանոց բանակ է վարձում հույներից: Օգնական վարձկանները հասան մինչև Միջագետք, սակայն ավագ եղբոր դեմ ապստամբած Կյուրոս Կրտսերը սպանվեց, ապստամբությունը ճնշվեց, և թշնամական շրջափակման մեջ հայտնված հունական բանակին անհրաժեշտ էր ժամ առաջ դուրս պրծնել շրջափակումից ու հասնել հայրենի երկիր: Դրա համար ընտրվեց ամենահարմար երթուղին՝ Միջագետքից Հայաստանի տարածքով դեպի Սև ծովի ափը, իսկ այնտեղից նավերով՝ Հունաստան: Այդ բանակի

հրամանատարն էր Քսենոփոնը, ով, Կորդ-վաց աշխարհից մինչև Սև ծովի ափն անցնելով, նկարագրեց իր ճանապարհին տեսածն «Անարասիս» (հունարեն՝ «Տասը հազարի նահանջը») աշխատության մեջ:

Քսենոփոնը տեղեկացնում է, որ այդ ժամանակ Հայաստանի սատրապն էր *Օրոնսուրը* (Երվանդ II-ը), որն ամուսնացած էր Աքեմենյան տիրակալ Արտաքսերքսես II-ի դստեր հետ և բարձր դիրք էր զբաղում տերության մեջ: Երվանդ II-ը հատել է սեփական պատկերով ոսկեդրամ, որը հասել է մեզ: Երվանդ II-ի մասին վերջին տեղեկությունները վերաբերում են Ք.ա. 360-ական թվականներին: Դրանց համաձայն՝ նա գլխավորել է Աքեմենյանների դեմ բարձրացած մի քանի սատրապների ապստամբությունը, բայց անհաջողություն կրելով՝ ապաստանել է Հունաստանում և այնտեղ անցկացրել կյանքի վերջին տարիները:

Հայաստանի արևմտյան մասն ուներ իր կառավարիչը՝ Տիրիբբազ անունով, որը ենթարկվում էր Երվանդ II-ին: Ամեն գյուղ ուներ իր գյուղապետը:

Քսենոփոնը նկարագրում է Հայաստանը՝ որպես շատ հարուստ, բարեկեցիկ և հյուրընկալ ժողովուրդ ունեցող երկիր: Նա նշում է, որ չկար մի տուն, որտեղ իրենց չհյուրասիրեին բազմապիսի խմիչքներով ու մսեղեն կերակուրներով, հույն պատմիչն առաջին անգամ այստեղ է տեսել գարնեջուրը, որը նկարագրում է որպես «գարունց պարրասպիված գինի, որի երեսին լողում էին գարու հաղիկներ»...

Երվանդ II-ից հետո մեր տեղեկությունները կրկին խիստ սակավաթիվ են դառնում: Հայտնի է, որ Աքեմենյան վերջին տիրակալ Դարեոս III Կողոմանոսը նախքան Աքեմենյան տիրակալ դառնալը եղել է Հայաստանի սատրապը և հայոց գահի վրա կրել «Արտաշատ» անվանումը: Ք.ա. 336 թ. նա դառնում է ողջ Աքեմենյան տերության տիրակալը, իսկ Հայաստանի սատրապ է դառնում Հայկազուն-Երվանդունիների տոհմի ներկայացուցիչ *Երվանդ* (Օրոնտես) *III-ը*, որին էլ վիճակված էր վերականգնել Հայաստանի անկախությունը:



Աքեմենյան Քսերքսես արքայի արձանագրությունը Վանի ժայռին, Ք.ա. V դ.

**Տարզեր և առաջադրանքներ**

1. Էրբ է վերականգնվել Հայկազունների տոհմի իշխանությունը, ում գլխավորությամբ, ինչ տարածք էր այն զբաղեցնում:
2. Ներկայացրեք Երվանդ Սակավակյաց և Տիգրան I Երվանդյան արքաների գահակալության շրջանները:
3. Ի՞նչ գիտեք Բեհիսթունյան արձանագրության մասին: Ի՞նչ անուններով է հիշատակվում Հայաստանը:
4. Ի՞նչ գիտեք Աքեմենյան տերության XIII սատրապության մասին: Ո՞վ էր Քսենոփոնը, ինչ տեղեկություններ է հաղորդում Հայաստանի մասին:



Ալեքսանդր Մակեդոնացու արշավանքները և Հայաստանի անկախության վերականգնումը: Մակեդոնիայում Փիլիպոս II արքայի սպանությունից հետո գահ է բարձրանում որդին՝ քսանամյա Ալեքսանդրը (Ալեքսանդր Մեծ կամ Ալեքսանդր Մակեդոնացի, Ք.ա. 336-323 թթ.): Նրան վիճակված էր դառնալ համաշխարհային պատմության նշանավոր և առեղծվածային դեմքերից մեկը:

Ք.ա. 334 թ. մակեդոնա-հունական զորքերն Ալեքսանդրի գլխավորությամբ անցնում են Հելլեսպոնտոսը և շուտով մի քանի ձակատամարտերում պարտության մատնում պարսից Աքեմենյան վերջին տիրակալ Դարեհ III-ին:

Ամենավճռական ձակատամարտը տեղի է ունենում Ասորեստանի հյուսիսում՝ *Գավգամելայի մոտ, Ք.ա. 331 թ. հոկտեմբերի 1-ին*: Հայերն առաջնորդում էին աքեմենյան զորքի աջ թևը՝ Օրոնտես-Երվանդ III-ի և Փոքր Հայքի կառավարիչ Միթրաուստեսի գլխավորությամբ:

Մարտը սկսվում է առափոտյան և շարունակվում ամբողջ օրը: Ուշ երեկոյան, չզիմանալով մակեդոնական զորքի ճնշմանը, աքեմենյան զորքերը սկսում են անկազմակերպ նահանջը, որը վերածվում է կենտրոնի և ձախ թևի խուճապահար փախուստի: Դարեհը կրկին փախուստի է դիմում:

Մակեդոնացին սկսում է հետապնդել Դարեհին, ինչը, սակայն, ձախողվում է աքեմենյան բանակի աջ թևի հերոսական գործողությունների հետևանքով, իսկ ինչպես նշվել է, աջ թևի վճռորոշ ուժը հայկական զորքն էր: Հունա-մակեդոնական զորքի ձախ թևի հրամանատարն օգնություն է խնդրում Ալեքսանդրից, որը հարկադրված է լինում դադարեցնել Դարեհի հետապնդումը և թիկունքից հարձակվում է հակառակորդ բանակի աջ թևի վրա: Աջ թևի զորամասերին առաջնորդող հայոց այրուձին «արագ երթով նահանջի» հրաման է ստանում և դուրս գալով ձակատամարտից՝ վերադառնում է Հայաստան:

Հայկական զորքերի վճռական մասնակցությունը Գավգամելայի ձակատամարտին ևս նպաստեց, որ Դարեհ III-ը խուսափի գերի ընկնելուց:

Արժանապատվորեն հայրենիք վերադարձած հայկական զորքերը Գավգամելայի ձակատամարտից հետո՝ Ք.ա. 331 թ., *վերականգնում են Հայաստանի անկախությունը*՝ Օրոնտես-Երվանդ III-ը՝ Մեծ Հայքում իսկ Միթրաուստեսը՝ Փոքր Հայքում: Հայերի օրինակին են հետևում նաև այլ երկրներ:

Մակեդոնական և հայկական զորքերի հաջորդ րախումը տեղի է ունենում 2-3 տարի անց, երբ Ալեքսանդրի զորաբանակներից մեկը, Մենոն զորավարի գլխավորությամբ, ուղարկվեց Բարձր Հայքի ոսկու հանքերի շրջանը, որը թանկարժեք մետաղների արդյունահանմամբ հռչակված էր դեռևս Ք.ա. III հազարամյակից: Ինչպես վկայում է հույն մատենագիր Ստրաբոնը, հայերը ոչնչացնում են նրա բանակը, իսկ զորավարին «խեղդամահ անում»: Դրանից հետո Ալեքսանդրը նոր զորք չուղարկեց Հայաստան:

Կարճ ժամանակ անց Դարեհ III-ը սպանվեց իր մերձավորների կողմից: Աքեմենյան տերությունն անկում ապրեց, իսկ Մակեդոնացին շարունակեց արշավանքը դեպի Միջին Ասիա և Հնդկաստան՝ ստեղծելով աննախադեպ հսկայածավալ մի աշխարհակալություն, որի մայրաքաղաքն էր *Բաբելոնը*: Ալեքսանդրը մահանում է Ք.ա. 323 թվականին՝ 33 տարեկան հասակում: Նրա արշավանքներով Առաջավոր Ասիայում սկզբնավորվում է *հելլենիզմի՝ հունականության դարաշրջանը*: Հայաստանն այդ դարաշրջան մտավ լիակատար անկախությամբ:

Ալեքսանդրի մահվանից ընդամենը ութսուներեք տարի անց հունարենով գրի առնվեց Ալեքսանդրի վիպերգը: Այն պարունակում է ուշագրավ տեղեկություններ, որտեղ Հայաստանը նշվում է որպես անմահության երկիր:





**Հայկական թագավորությունները և Սելևկյան տերությունը:** Հունական արքյորները, մանրամասն թվարկելով Ալեքսանդր Մեծի հպատակեցրած երկրները, Հայաստանը չեն հիշատակում դրանց շարքում: Հայաստանն աննվաճ մնաց նաև Մակեդոնացու մահվանից հետո: Ք.ա. 301 թ. Մակեդոնացու տերությունը քաժանվեց մի քանի մասերի, որոնցից ամենախոշորը Հայաստանին տահմանակցող *Սելևկյան փերսությունն էր:*

Մինչև Ք.ա. III դ. վերջը Հայաստանը կարողանում է ոչ միայն պահպանել իր անկախությունը, այլև հակադրվել տարածաշրջանի գերտերությանը՝ Սելևկյաններին: Հայաստանին տիրելու այդ տերության բազմաթիվ փորձերն ապարդյուն են անցնում, քանի որ Մեծ և Փոքր Հայքերը գործում էին միասնաբար:

*Ք.ա. մոտ 260-240 թթ.* իշխած հայոց արքա **Շամ (Սամու)** երվանդականը կառուցեց Կոմմագենեի *Սամուսար* (Շամշատ) մայրաքաղաքը և հասեց դրամներ, որոնք մեզ հասած առաջին հայկական արքայական դրամներն են:

Ք.ա. մոտ 240 թ. Շամին հաջորդեց նրա որդի **Արշանը**, որը կառուցեց *Արշամաշար* քաղաքը Ծոփքում և Արսամեա անունով երկու քաղաք Կոմմագենեում: Արշամի մասին տեղեկանում ենք, որ նա այնքան հզոր էր, որ կարողացել էր ապաստան տալ սելևկյան տիրակալի դեմ ապստամբած նրա եղբորը:

Ք.ա. III դարի վերջին նպաստավոր պայմաններ ստեղծվեցին Սելևկյանների վաղեմի ծրագրի իրագործման համար: Սելևկյան արքա Անտիոքոս III-ի զորքերը հայազգի զորավարներ *Արտաշեսի* և *Ջարնիի* գլխավորությամբ *Ք.ա. 201 թ.* արշավեցին Հայաստանի դեմ: *Երվանդ IV Վերջինը* (*Ք.ա. մոտ 220-201 թթ.*) զոհվեց մայրաքաղաք Երվանդաշատի պաշտպանության ժամանակ: Այնուհետև գրավվեց Մեծ Հայքի հոգևոր կենտրոն *Քազարանը*, որտեղ սպանվեց երկրի գերագույն քուրմ Երվազը՝ Երվանդ արքայի եղբայրը: Դրանով Ք.ա. 201 թ. Մեծ Հայքում վերջ դրվեց Հայկազունների Երվանդական ճյուղի իշխանությանը:

### **Հարզնր և ստաջադրանքներ**

1. Ո՞վ էր Ալեքսանդր Մակեդոնացին. ինչ րնթացք ունեցավ նրա Արևելյան արշավանքը: Ի՞նչ մասնակցություն ունեցան հայերը Գավգամելայի ճակատամարտին: Ի՞նչ է հելլենիզմը:
2. Հիմնավորո՞ք, որ Մակեդոնացին Հայաստանը չի կարողացել նվաճել: Ի՞նչը նպաստեց Սելևկյանների՝ Հայաստանը գրավելու ծրագրի իրականացմանը:

## **§ 3. ՀԱՅԿԱԶՈՒՆ-ԵՐՎԱՆԴԱԿԱՆՆԵՐԻ ԹԱԳԱՎՈՐՈՒԹՅԱՆ ՏՆՏԵՍՈՒԹՅՈՒՆՆ ՈՒ ՊԵՏԱԿԱՆ ԿԱՐԳԸ**

**Գյուղատնտեսությունը, արհեստագործությունը, առևտուրը:** Թագավորությունը մեծ հաջողությունների հասավ գյուղատնտեսության և արհեստների զարգացման ասպարեզում: Երկրագործության համար նպաստավոր պայմաններ կային *Այրարապյան, Շիրակի, Տարոնի, Քազրևանդի, Բասնի դաշրերում, Վանի ափագանում* և մեծաքանակ գետահովիտներում: Շարունակում էր գործել դեռ Վանի թագավորության ժամանակ

ստեղծված ջրանցքների մեծ ցանցը: Զարգանում էին հացահատիկների մշակությունը, այգեգործությունն ու խաղողագործությունը:

Լեռնային ու նախալեռնային շրջանները հիանալի հնարավորություն էին տալիս անասնապահության և անասնաբուծության զարգացման համար: Անասնապահության և երկրագործության զարգացումը նաև խթանում էր արհեստների ու առևտրի զարգացմանը:

Հույն պատմիչ և գորավար Քսենոփոնը նկարագրում է Հայաստանը՝ որպես գյուղատնտեսական ապրանքներով բացառիկ հարուստ երկիր, որի բնակիչներն «ունենին անհրաժեշտ բոլոր տեսակի պարենի և բարիքների առաքություն, մորթելու անասուններ, հաց, անուշահոտ հին գինիներ, չամիչ, ամեն տեսակի ընդդեմ»։ Հույն պատմիչին հիացրել է հայերի բացառիկ հյուրասիրությունը։

Սկսած Ք.ա. IV–III հազարամյակներից՝ Հայաստանի տնտեսության մեջ առանցքային էր *մարտաձուլության* դերը։ Շարունակվում էր երկրի հարուստ մետաղահանքերի շահագործումն ու մետաղագործիքների լայն կիրառումը։ Զարգացման բարձր մակարդակի վրա էին դարձնությունը, գինագործությունը, ոսկերչությունն ու արծաթագործությունը, որոնց վկայությունները պեղումներից հայտնաբերված բարձրարվեստ նմուշներն են։

Ք.ա. VI–III դարերի Հայաստանի տնտեսության մեջ կարևոր դեր էր խաղում ներքին և արտաքին առևտուրը։ Հայտնի է, որ Աբեմենյան շրջանի սատրապներն ունեին սեփական դրամ հատելու իրավունք։ Մեզ են հասել երվանդ (Օրոնտես) II–ի և Տիրիբազի հատած սատրապական դրամները (Ք.ա. V–IV դդ.)։

Հայաստանով էին անցնում ժամանակի միջազգային նշանակության մի քանի առևտրական ճանապարհներ։ Աբեմենյան արքաները ստեղծել էին Հին աշխարհի մեծագույն մայրուղիներից մեկը՝ 2400 կմ երկարությամբ «Արքայական ճանապարհը», որը ձգվում էր պարսից տերության մայրաքաղաքից մինչև Էգեյան ծով։ «Արքայական ճանապարհի» 15 կայարաններից բաղկացած մի մեծ հատված (մոտ 330 կմ) անցնում էր Հայաստանի հարավ–արևմուտքով, ինչը միջազգային առևտրին անմիջականորեն մասնակցելու բացառիկ հնարավորություն էր։

Միջազգային առևտրին Հայաստանի մասնակցության ջրային ճանապարհի մասին է վկայում հույն նշանավոր պատմիչ Հերոդոտոսը (Ք.ա. V դար)։ Ըստ նրա հաղորդ-

ման՝ առևտուրը Հայաստանի և Միջագետքի միջև կատարվում էր Եփրատ գետով, «Այժմ ես կպատմեմ այն մասին, ինչն ինձ այս քաղաքից (Բաբելոնից) հեռու թվում է ամենագարմանային։ Նավերը, որոնցով նավում են գետն ի վար՝ դեպի Բաբելոն, կլոր են և ամբողջովին կաշեպատ։ Արմենիայում, որը Ասորեստանից վերև է, նրանք կտրում են ոռննիներ, որոնցով պատրաստում են նավի կողերը և դրանք պատում կավե ծածկով, նավի հատակի նման... Այդ նավերը պատրաստում են և շատ մեծ, և առավել փոքր։ Դրանցից ամենամեծերն ունեն հինգ հազար տաղանդ տարողություն»։

Հայկազուն–Երվանդականների ժամանակաշրջանի հնավայրերի պեղումներից հայտնաբերվել են օտար ծագումով առարկաներ, որոնք ներմուծված են այլ երկրներից՝ մետաքս, բամբակ, համեմունքներ, թանկարժեք քարեր, պակկյա անոթներ և այլն։ Փոխարենն արտահանվել են մետաղներ, արհեստագործական արտադրանք, գինիներ, ներկեր, կաշի, բուրդ, նոսրյակներ, ջրիներ և այլն։

**Քաղաքները։** Հայկազուն–Երվանդականների պետության մայրաքաղաք հռչակվեց *Արմավիրը*։ Վանի թագավորության շրջանից շարունակում էին կարևորություն ունենալ *Վանք, Էրեբունին* և այլ քաղաքներ։ Վանի թագավորության քաղաքները ծանր հարված ստացան կիմերական և սկյութական արշավանքների ժամանակ։

Այս ժամանակաշրջանում կառուցվեցին նոր քաղաքներ, որոնցից հատկապես նշանավոր էին Արաքսի և Ախուրյանի խառնարանի մոտ Երվանդ IV–ի (Ք.ա. մոտ 220–201 թթ.) կառուցած *Երվանդաշար մայրաքաղաքը*, Ախուրյանի ափին գտնվող *Քազարան արքայաքաղաքը*, որը երկրի հոգևոր կենտրոնն էր՝ քրմապետի նստավայրը։

Քաղաքների գլխավոր հատվածը վեր խոյացող միջնաբերդն էր, որի շուրջը տարածվում էր բուն քաղաքը, որը, որպես կանոն, պարսպապատ էր։ Կենտրոնական դիրք էր զբաղվում քաղաքի հովանավոր աստծու տաճարը։ Քաղաքների հիմնական





Էլամերեն սեպագիր սալիկ Արմավիրից.  
Ք.ա. V–IV դդ.

րնակչությունը կազմում էին առևտրականներն ու արհեստավորները, ինչի շնորհիվ քաղաքները դրամական շրջանառության կենտրոններ էին և առանցքային նշանակություն ունեին արքունիքի տնտեսության համար: Քաղաքային համայնքները պետությունից լայն ինքնավարություն էին ստանում և ազատված էին որոշ հարկերից:

**Պետական կարգը:** Հայկազուն-Երվանդականների թագավորությունն իր կառավարման համակարգը ժառանգություն ստացավ Վանի թագավորությունից: Ք.ա. VII–VI դդ. երկրի արքան կրում էր «*Տառոց թագավոր*» տիտղոսը: Արքան երկրի գերագույն տերն էր, զորքերի գլխավոր հրամանատարը, նրա իրավասություններն էին պատերազմ հայտարարելը, այլ երկրների հետ պայմանագրեր կնքելը, նոր քաղաքներ ու ամրոցներ հիմնադրելը և դրանք անվանակոչելը:

Արքայից հետո երկրի կարևորագույն դեմքը, փաստորեն, քրմապետն էր, ով, հոգևոր գերագույն առաջնորդը լինելուց բացի, նաև երկրի Մեծ դատավորն էր և արքայի գլխավոր խորհրդականը: Կարևորագույն այդ պաշտոնը արքայական ընտանիքի ձեռքում էր:

Արքան երկիրը ղեկավարում էր արքունիքի և արքունի գործակալների միջոցով: Հիշատակվում են գորավար–սպարապետներ, արքունի հացարարներ, մատուակներ, դպրատուն և դպիրներ: Երվանդականների կառավարման համակարգը հիմնական գծերով նման է եղել Վանի թագա-

վորության և իրեն հաջորդած Արտաշեսյանների ու Արշակունիների կառավարման համակարգերին:

Ք. ա. 521–331 թթ. Հայաստանում շարունակում էին իշխել Հայկազուն-Երվանդականները, որոնք ենթարկվում էին Աքեմենյաններին՝ սատրապի կարգավիճակով: Հայաստանի արևմտյան մասն ուներ իր կառավարիչը (հյուպարքոս), որը ենթարկվում էր սատրապին: Ամեն գյուղ ուներ իր գյուղապետը:

**Թագավորության տարածքը, վարչական բաժանումը և բանակը:** Հայկազուն-Երվանդականների թագավորությունը, փաստորեն, Վանի թագավորությունից ժառանգեց ոչ միայն կառավարման համակարգը, այլև տարածքը: Թագավորության սահմանները հյուսիս–արևելքում հասնում էին Կուր գետ, հյուսիս–արևմուտքում՝ Սև ծով, արևելքում հասնում էին Մարաստան, իսկ հարավում՝ Հյուսիսային Միջագետք:

Դարեհ I-ի կողմից նվաճվելուց հետո՝ Ք.ա. 520 թ., Հայաստանը կազմեց Աքեմենյան տերության քսան սատրապություններից մեկը՝ XIII-ը: Ք.ա. V դարավերջին հույն պատմիչ Քսենոփոնը սատրապական Հայաստանի կազմում հիշատակում է առանձին ուրվագծվող, սակայն կենտրոնական իշխանությանը ենթակա Արևմտյան Հայաստանը:

Առաջին անգամ Ք.ա. IV դարում Գավգամելայի ճակատամարտի առնչությամբ Հայաստանի տարածքում հիշատակվում են Մեծ և Փոքր Հայքերը՝ որպես առանձին վարչական միավորներ, որոնք անկախ թագավորություններ հռչակվեցին այդ ճակատամարտից հետո (Ք.ա. 331 թ.):

Հայկազուն-Երվանդականների օրոք ռազմադաշտ դուրս քերվող հայոց բանակի թիվը 48 հազար էր (8 հազար հեծելազոր և 40 հազար հետևակ): Ամրոց հայկական գիևտի թիվը, քանակաբար, պետք է ավելին լիներ, քանի որ ռազմադաշտ դուրս քերվող զորքից բացի, մեծ քաղաքներում և ամրոցներում մշտապես մնում էին կայազորեր:

Շեծելագորը, որը բանակի գլխավոր հարկաձային ուժն էր, համալրվում էր

ազատների դասի ներկայացուցիչներով: Նրանք զինված էին նիզակներով, սրերով, վահաններով, նետ ու աղեղներով: Հետևակը կազմում էր բանակի մեծ մասը և քաղկացած էր նետաձիգներից, նիզակակիրներից, սակրավորներից ու տեզակիր-

ներից: Պատերազմի ժամանակ, անհրաժեշտության դեպքում, բանակը կարող էր համալրվել աշխարհագորային զորամասերով, որոնք հավաքագրվում էին ազատ համայնական գյուղացիներից, և որոնց առաջնորդում էին զավառակալ իշխանները:

### **Հարցեր և առաջադրանքներ**

1. Հայկազուն-Երվանդականների օրոք գյուղատնտեսության դր ճյուղերն էին զարգացած: Նշե՛ք փաստեր, որոնք վկայում են, որ Հայաստանում զարգացած էր ներքին և արտաքին առևտուրը:
2. Ի՞նչ նշանավոր քաղաքներ կային Երվանդականների օրոք: Ներկայացրե՛ք քաղաքի կառուցվածքն ու նշանակությունը:
3. Կառավարման ինչ համակարգ ուներ Հայկազուն-Երվանդականների պետությունը: Ո՞ւմ օգնությամբ էր արքան իրականացնում կառավարումը:
4. Որո՞նք էին հայոց թագավորության սահմանները: Ներկայացրե՛ք հայկական բանակը, ինչ զորատեսակներից էր այն քաղկացած, ինչպե՞ս էր հավաքագրվում և համալրվում:

## **ԼՐԱՑՈՒՑԻՉ ՆՅՈՒԹԵՐ**

### **Քսենոփոնը Հայաստանի մասին (հարվածներ «Անարատի» գրքից)**

Ջորավարները որոշեցին, որ պետք է իջնել լեռների միջով դեպի կարդուխների երկիր\*<sup>\*</sup>, քանզի ասել էին, թե նրանց երկրով անցնելուց հետո կհասնեն Արմենիա, որին իշխում էր Օրոնտեսը,\*\* և որը մեծ էր ու հարուստ...

Տներն այստեղ գեղեցիկոր էին, մուսքը՝ ինչպես ջրիորի քերան, իսկ ներքևի մասն՝ ընդարձակ: Մինչդեռ անասունների համար մուսքը փորված էր (հողի մեջ), մարդիկ ցած էին իջնում աստիճաններով... Այնտեղ կային նաև ցորեն ու գարի և ընդհանր և կավանթների մեջ զարուց պատրաստված զինի, որի երեսին լողում էին զարու հատիկներ... այն շատ թունդ էր, կթե ջուր չխառնեին, իսկ սովոր մարդու համար շատ օխորժելի ընպելիք էր...

Խելիխոսիսն ու Քսենոփոնը փոխադարձաբար իրար ողջունելուց հետո սկսեցին միասին հարցափորձել գեղջավազին պարսկերեն խոսող թարգմանի միջոցով, թե այդ ինչ երկիր էր: Նա ասաց, թե Արմենիան է:

\* Այսինքն՝ Կորդվաց աշխարհը:

\*\* Խոսքը Երվանդ II-ի մասին է:

### **Սիրարձոնը Փոքր Հայքի թագավորության մասին**

Փոքր Հայքը քավական բարեբեր երկիր է: Այն ևս, ինչպես Սոփենեն (Շոփքը), միշտ կառավարել են իշխանները, որոնք մերթ եղել են մյուս հայոց\* բարեկամ, մերթ էլ՝ իրենց գործերը վարել ինքնուրույն: Նրանց հպատակվել էին խաղայներն ու տիրարենները, այնպես որ, իրենց իշխանությունը տարածել էին մինչև Տրապեզունտ և Փառնակիա:

\* Նկատի ունի Մեծ Հայքը:



# Թեմա 3. Մեծ ՀԱՅԹԻ ԱՐՏԱՇԵՍՅԱԼՆԵՐԻ ԹԱԳԱՎՈՐՈՒԹՅՈՒՆԸ

## § 1. ՆՈՐ ՀԱՐՍՏՈՒԹՅԱՆ ՀԻՄՆՈՒՄԸ: ԱՐՏԱՇԵՍ I

**Արտաշես I-ի գահակալումը:** Ք.ա. III դ. վերջերին Սելևկյաններին կարճ ժամանակով հաջողվեց իրենց գերիշխանությունը հաստատել հայկական չորս թագավորությունների վրա: Մեծ Հայքում Ք. ա. 201 թ. սելևկյան կառավարիչ էր նշանակվել հայ մեծատոհմիկ Արտաշեսը, իսկ Ծոփքում՝ Զարեհը:

Սելևկյաններն ընդարձակ ծրագրեր էին մշակել Փոքր Ասիան ամբողջությամբ գրավելու ուղղությամբ: Տարածաշրջանի նկատմամբ իր հավակնություններն ուներ նաև Հռոմեական Հանրապետությունը: Այսպիսով՝ կողմերի միջև գինված ընդհարումն անխուսափելի էր: Նրանց միջև վճռական ձակառամարտը տեղի ունեցավ **Ք.ա. 190 թ. Մազինեսիս** քաղաքի մոտ: Հռոմեացիները համոզիչ հաղթանակ տարան Սելևկյան Անտիոքոս III թագավորի մեծաքանակ զորքերի նկատմամբ: Երկու տարի անց՝ **Ք.ա. 188 թ.**, կողմերի միջև կնքվեց **Ապամեայի հաշտության պայմանագիրը**, որով փոխվեց ուժերի հարաբերակցությունը Արևելքում և շրջադարձային եղավ համաշխարհային պատմության մեջ: **Ք.ա. 189 թ. անկախ հռչակվեցին Մեծ Հայքը, Փոքր Հայքը, Ծոփքը և Կոմմագենին:** Հայկական անկախության կերտողներ դարձան Մեծ Հայքում մեծատոհմիկ գորավար Արտաշեսը, Ծոփքում՝ Զարեհը:

Արտաշեսը Հին աշխարհի ականավոր ռազմական ու քաղաքական գործիչներից է: Նա ունեցել է միջազգային մեծ ձանաչում և հեղինակություն: Արտաշեսի մասին տեղեկություններ են պահպանվել հայկական, հունահռոմեական, վրացական սկզբնաղբյուրներում, արամեատառ վիմագիր արձանագրություններում:

Արտաշեսը ծնվել է մոտ Ք. ա. 230 թ. մեծատոհմիկ Զարեհի ընտանիքում: Մագնեսիայի ձակառամարտից հետո հռչակելով Հայաստանի անկախությունը՝ դարձել

է նրա թագավորն ու հիմք դրել նոր՝ Արտաշեսյան արքայատանը: Թագավոր հռչակվելուց հետո իրեն կոչել է Երվանդական արքայատան շտապիղ:

### **Հայկական հողերի վերամիավորումը:**

Արտաշեսի՝ գահ բարձրանալու պահին Մեծ Հայքի թագավորության տարածքը պարփակված էր միայն կենտրոնական նահանգների սահմաններում: Հայկական մի շարք երկրամասեր գրավել էին հարևան երկրները՝ Մարաստանը, Վիրքը, Պոնտոսը, Սելևկյան տերությունը և այլ երկրներ: Արտաշեսն իր առջև խնդիր է դնում իրականացնելու հայրենիքի վերամիավորման կարևորագույն ծրագիրը:

Հույն աշխարհագետ Ստրաբոնը մանրամասն տեղեկություններ է հաղորդում Արտաշեսի այդ միավորիչ գործունեության մասին. իր թագավորության սկզբում արշավում է դեպի արևելք և հասնում Կասպից ծովի ափերը, որի շնորհիվ Մեծ Հայքին են միացվում **Փայրակարանը** և **Կասպեից** երկիրը: Այնուհետև արշավում է դեպի հյուսիս, որտեղ հարևան Վիրքը գավթել էր հայկական **Գուգարը** նահանգը: Արտաշեսի հանձնարարությամբ Սմբատ Բագրատունի գորավարը ջախջախում է վրացական բանակը և վերադարձնում գավթած տարածքները: Վրացական աղբյուրը հավաստում է, որ վրացիները պարտավորվում են «դրամ հատել Արտաշես արքայի պատկերով» և անհրաժեշտության դեպքում նրան զորք տրամադրել: Արևմուտքում Արտաշեսը Մեծ Հայքին է վերադարձրել **Կարնո երկիրը, Եկեղիք** ու **Դերջան գավառները**, իսկ հարավում՝ Սելևկյան Անտիոքոս IV-ի դեմ մղված երկարատև ու համառ կռիվներից հետո՝ **Տնորիք երկրամասը:**

Մեծ Հայքին նաև Ծոփքի և Կոմմագենի հայկական թագավորությունները

միավորելու Արտաշեսի ջանքերն այդ ժամանակ հաջողություն չունեցան:

Արտաշեսի միավորիչ գործունեության շնորհիվ հայկական տարածքների մեծ մասը, ինչպես նախորդ համահայկական թագավորությունների ժամանակ, վերամիավորվեց մեկ ընդհանուր պետության մեջ: Պատահական չէ, որ դեպքերի ժամանակակից հույն պատմագիր Պոլիբիոսը Արտաշեսին անվանում է «Արմենիայի մեծագույն մասի տիրակալ», իսկ Ստրաբոնը հավաստում է, թե «Հայաստանն... աճել է Արտաշեսի ջանքերով...», և ուստի այստեղ բոլորը միավեցու են», այսինքն՝ հայալեզու:

Հայկական երկրամասերի վերամիավորումը ունեցավ ազգային-քաղաքական կարևոր նշանակություն:

**Մեծ Հայքի միջազգային հեղինակության աճը:** Արտաշեսի օրոք Մեծ Հայքը դարձավ Առաջավոր Ասիայի ազդեցիկ պետություններից մեկը: Այսպես, երբ **Ք.ա. 183-179 թթ.** պատերազմ բռնկվեց Փոքր Ասիայում մի կողմից՝ Պոնտոսի ու Փոքր Հայքի, իսկ մյուս կողմից՝ Կապադովկիայի, Բյուրանիայի ու նրանց դաշնակիցների միջև, Արտաշես I-ը, պահպանելով չեզոքություն, ակտիվորեն ներազդեց կողմերի վրա, և կնքվեց հաշտության պայմանագիր: Դիվանագիտական նուրբ ու ճշգրիտ քայլերով Արտաշեսը կարողացավ պայմանագրում հատուկ կետ մտցնել, որով Պոնտոսի հաշվին ընդարձակվեց Փոքր Հայքի տարածքը: Դա, անշուշտ, հետագայում Փոքր Հայքն իր թագավորությանը միացնելու հենահար քայլ էր:


Արտաշեսը **Ք.ա. 165 թ.** վճռական հակահարված տվեց Սելևկյան Աստիոքոս IV-ին, որը փորձում էր Հայաստանը ենթարկել Սելևկյանների գերիշխանությանը: Արտաշեսը շարունակեց քայլերը Մերձավոր Արևելքում այդ պետության դիրքերը թուլացնելու ուղղությամբ: Այդ նպատակով նա օժանդակեց Մարաստանի սելևկյան սատրապ Տիմարքոսի ապստամբությանը (**Ք.ա. 162-160 թթ.**), որը զգալիորեն թուլացրեց Սելևկյան տերության հիմքերը:

**Արտաշատ մայրաքաղաքի հիմնադրումը:** Արտաշեսի ջանքերով Հայաստանը դարձավ ընդարձակ և ուժեղ պետություն, որը, բնականաբար, կարիք էր զգում նաև ներքին լայն բարեփոխումների: Արտաշեսն անհապաղ ձեռնամուխ է լինում տնտեսության, մշակույթի, ռազմական, վարչաքաղաքական և այլ բնագավառներում բարեփոխումների իրականացմանը:

Արտաշեսի վերափոխիչ գործունեության մեջ կարևոր տեղ է զբաղում Արտաշատ մայրաքաղաքի հիմնադրումը: Արևելքում տարածված սովորույթ էր, երբ նոր արքայատոհմը, գահ բարձրանալով, նոր մայրաքաղաք էր կառուցում: **Արտաշատը** կառուցվել է մոտ **Ք.ա. 185 թ.** Արարատյան դաշտում՝ Երասխ և Մեծամոր գետերի ջրկիցում: Մովսես Խորենացին այդ մասին վկայում է. «*Արտաշեսը գնում է այն տեղը, որտեղ Երասխը և Մեծամորը խառնվում են, և այնտեղ, բոլորը հավանելով, քաղաք է շինում և իր անունով կոչում է Արտաշատ*»: Իսկ **Ք. հ. I դարում** ապրած հույն պատմիչ Պլուտարքոսը հավաստիացնում է, թե Արտաշատի տեղանքն ընտրել է Կարթագենի հռչակավոր զորավար Հաննիբալը, որն այդ ժամանակ քաղաքական ապաստան էր գտել Հայաստանում: Արտաշեսի առաջարկությամբ Հաննիբալը գլխավորել է քաղաքի շինարարական աշխատանքները, որոնք ընթացել են նախապես կազմված հատակագծով. «Կառուցվեց մեծ և շատ գեղեցիկ մի քաղաք, որին թագավորը տվեց իր անունը և այն հռչակեց Հայաստանի քաղաքամայր»:

Եվ իրոք, հնագիտական պեղումները, որ ընթանում են ներկայիս Խոր վիրապի շրջակայքում, ցույց տվեցին, որ քաղաքը կառուցվել է հատակագծով: Արտաշատը շրջափակված է եղել բարձր, հզոր պարիսպներով, խրամով և պատվարով: Քաղաքի անառիկ դիրքը նկատի ունենալով՝ հունահռոմեական պատմիչներն այն անվանել են «*Հայկական Կարթագեն*»: Մայրաքաղաքը բնակեցնելու համար այստեղ են տեղափոխել Երվանդաշատի, Արմավիրի բնակչության և ռազմական արշավանք-





Արտաշատ մայրաքաղաքի հնավայրը

ների ժամանակ գերեվարվածների մի մասին: Արտաշատը կառուցվել է առևտրական նշանավոր տարանցիկ մայրուղիների խաչմերուկում, և պատահական չէ, որ այն շուտով դարձել է Առաջավոր Ասիայի քաղաքական, տնտեսական ու մշակութային կարևորագույն կենտրոններից մեկը:

Արտաշեսը կառուցել է նաև այլ քաղաքներ՝ Ջարեհավան, Ջարիշատ և այլն: Վերջիններս անվանվել են ի պատիվ Արտաշեսի հոր՝ Ջարեհի:

**Հողային բարեփոխումը:** Արտաշեսի օրոք խիստ սրվել էին հողի մասնավոր սեփականատերերի և գյուղական համայնականների միջև հակասությունները: Ազարակատերերն անարգել զավթում էին համայնական հողերն ու գյուղացիներին գրկում իրենց գոյությունը պահպանելու միակ միջոցից: Բնականաբար, հողագուրկ գյուղացին այլևս չէր կարող հարկ վճարել պետությանը, դեռ ավելին՝ շահագրգռված չէր զինվորագրվել բանակին: Համայնական հողերի հետագա և անզուսպ յուրացումը տեղիք էր տալիս զինված ընդհարումների: Պետությունը չէր կարող անտարբեր դիտ-

ողի դերում լինել: Մոտ *Ք.ա. 180 թ.* Արտաշեսը հրապարակում է հրամանագիր՝ *հողային բարեփոխման* վերաբերյալ: Դրա համաձայն՝ մասնավոր հողային տնտեսությունների (ագարակներ) տահմանները հստակորեն տահմանազատվում են համայնքին պատկանող հողերից: Այս հրամանագիրը մի կողմից՝ օրինականացնում էր ազարակատերերի մինչ այդ կատարած զավթումները, իսկ մյուս կողմից՝ պահպանում էր համայնքային սեփականությունը: Հողային բարեփոխման վերաբերյալ Պատմահայրը վկայում է, թե «Արտաշեսը հրամայել է որոշել գյուղերի և ազարակների սահմանները..., կոփել է տվել քառակուսի քարեր և տնկել հողի մեջ»: Սահմանաքարերից շուրջ քսանը, որ ունեն Արտաշեսի անունով արամեերեն արձանագրություններ, հայտնաբերվել են Հայաստանի տարբեր շրջաններում: Դրանցից մի քանիսն այժմ ցուցադրվում են Հայաստանի պատմության պետական թանգարանում:

**Ռազմավարչական և այլ բարեփոխումներ:** Արտաշեսի բարեփոխումներից առավել կարևորներից է *ռազմականը:*





Նրա օրոք ստեղծվեց հայկական կանոնավոր ու լավ զինված բանակ: Հայրենիքի սահմանների պաշտպանությունը պատշաճ կազմակերպելու համար նա ստեղծեց **չորս զորավարություններ**: «Արտաշեսը, — գրում է Մովսես Խորենացին, — զորքի իշխանությունն էլ չորս մասի է բաժանում. արևելյան կողմի զորքը թողնում է (իր որդի) Արտավազդին, արևմտյանը տալիս է (իր որդի) Տիրանին, հարավայինը վստահում է (իր զորավար) Սմբատին, իսկ հյուսիսայինը՝ (իր որդի) Զարեհին»:



Արտաշատ մայրաքաղաքի դրամ

Երկրի կառավարումը դյուրացնելու նպատակով Արտաշեսն այն բաժանեց **120 գավառների**, որ հունահռոմեական հեղինակներն անվանում են **սորաարեզհաներ**, իսկ դրանց կառավարիչներին՝ ստրատեգոսներ:

Կարգավորվել են նաև արքունի գործակալությունները, որոնցից կարևորագույնները՝ **սպարապետությունը** և **հագարսպետությունը**, հանձնվել են արքայի մերձավորներին:

Հարևան հելլենիստական պետությունների օրինակով Արտաշեսը սահմանել է նաև թագավորի և նրա նախնիների պաշտամունքը: Արտաշատում կառուցել է **Հայոց աշխարհի հովանավոր Անահիտը սարխածուհու փաճարը**, որտեղ կանգնեցվել են թագավորի նախնիների արձանները: Տաճարներ են կառուցվել նաև Հայաստանի այլ քաղաքներում: Նման ձեռնարկները պետք է ժողովրդի աչքում բարձրացնեին թագավորական իշխանության հեղինակությունը:

Արտաշեսը կարգադրել է ճշգրտել հայկական օրացույցը, հստակեցնել տոմարը, կազմակերպել նավագնացություն լճերի և

նավարկելի գետերի վրա: Նա իրականացրել է նաև այլ բարեփոխումներ:

Կատարած բազմաթիվ նշանավոր գործերի համար դեռ իր կենդանության ժամանակ Արտաշեսն աստվածացվել է. նա մեծարվել է **«Բարի»**, **«Բարեպաշտ»**, **«Աշխարհակալ»** տիտղոսներով: Նրա մասին ժողովուրդը ստեղծել է երգեր, վեպեր, որոնց մի մասը գրի է առել Մովսես Խորենացին և ի պահպանություն թողել սերունդներին («Արտաշես և Մաթենիկ», «Արտաշես և Արտավազդ» և այլն): Այդ երգերում գովերգվել են նրա իմաստությունը, բազույթությունը, շինարարական գործունեությունը, շեշտվել է նրա անհուն սերը հայրենիքի նկատմամբ: Արտաշեսի հանդեպ ժողովրդի սերն արտահայտվել է նաև նրանով, որ հետագայում հայերն իրենց սիրելի թագավորներին տվել են «Արտաշես» պատվատիտղոսը (Զենոն, Տրդատ I և այլք):

Արտաշեսը մահացել է շուրջ Ք.ա. 160 թվականին՝ 70 տարեկան հասակում:

### **Տարցիք և առաջադրանքներ**

1. Ի՞նչ հետևանքներ ունեցան Մագնեսիայի ճակատամարտը և Ալամեայի հաշտության պայմանագիրը Հայաստանի համար:
2. Բ՛լ էր Արտաշես I-ը: Ներկայացրե՛ք Արտաշես I-ի միավորիչ գործունեությունը:
3. Ի՞նչ դիրքորոշում ուներ Արտաշես I-ը և ի՞նչ քաղաքականություն էր վարում տարածաշրջանում՝ Ք.ա. 183–179 թթ. ընթացքում պատերազմի հետ կապված:
4. Համառոտ ներկայացրե՛ք Արտաշես I-ի իրականացրած բարեփոխումները և վերհանելը դրանց նշանակությունը:
5. Հիմնավորե՛ք, որ Արտաշեսը ռազմական ու քաղաքական նշանավոր գործիչ էր:

**Տիգրան II-ի գահակալությունը:** Արտաշես I-ը իր հաջորդներին թողել էր տնտեսապես բարգավաճ, հարուստ և ռազմապես հզոր երկիր: Նրան հաջորդել է որդին՝ Արտավազդ I-ը (Ք.ա. 160–115 թթ.), որը թագավորում էր խաղաղությամբ: Ք.ա. II դ. վերջին Հայաստանը ենթարկվում է հետզհետե հզորացող հարևան Պարթևստանի Միհրդատ II թագավորի հարձակումներին: Թեև հայկական քանակը կարողանում է հետ շարտել պարթևներին և պահպանել Հայաստանի անկախությունը, սակայն անժառանգ Արտավազդը ստիպված է լինում իր եղբորորդուն՝ Տիգրանին (ապագա Տիգրան II Մեծը), պատանդ տալ պարթևներին: Արքայազն Տիգրանը ծնվել էր մոտ Ք.ա. 140 թվականին: Նա Հայաստան վերադառնալու հնարավորություն ստանում է հոր՝ Տիգրան I-ի (Ք.ա. 115–95 թթ.) մահից հետո, երբ արդեն 45 տարեկան էր: Ազատության գինը Մեծ Հայքի հարավ-արևելքում գտնվող «Յոթանասուն հովիտներ» կոչված տարածքի գիջումն էր Միհրդատ II-ին: Հունահռոմական սկզբնաղբյուրները վկայում են, որ Տիգրանը թագադրվել է Աղձնիքի նշանավոր սրբավայրերից մեկում, ուր հետագայում կառուցվել է Տիգրանակերտ քաղաքը:

**Տիգրան II-ը (Ք.ա. 95–55 թթ.)** շարունակել է իր պապի՝ Արտաշես I-ի միավորիչ գործունեությունը: **Ք.ա. 94 թ.** նրա քանակը մտնում է **Ծոփք:** Ռազմական ընդհարման ժամանակ սպանվում է տեղի թագավորը՝ Արտանեսը: Ծոփքի վերամիավորումով Մեծ Հայքը դուրս է գալիս Արևմտյան Եփրատի ափերը, որից այն կողմ տարածվում էր Կապադովկիայի թագավորությունը:

**Հայ-պոնտական դաշինքը և Կապադովկիայի նվաճումը:** Հայկական պետության ներուժն ու ռազմական հզորությունը թույլ էին տալիս լուծելու նաև ռազմավարական բարդ խնդիրներ, որոնք բխում էին Հայաստանի ազգային-պետա-

կան շահերից: Ծոփքից հետո օրակարգի հարց է դառնում Մեծ Հայքի հարավ-արևմտյան սահմանային նահանգ-Կորդուքի և Եփրատից արևմուտք ու Սև ծով ձգվող Փոքր Հայքի միավորումը: **Կորդուքի** միացումը տեղի է ունենում նույն **Ք.ա. 94 թվականին:** Ի տարբերություն Ծոփքի՝ տեղի թագավորը մնում է գահին՝ պարտավորվելով կատարել վասալական տարբեր պարտականություններ:

Ավելի բարդ էր Փոքր Հայքի հարցը: Հայկական այս թագավորությունը դեռևս Ք. ա. II2 թ. ռազմակալվել էր հարևան Պոնտոսի կողմից: Վերջինս Փոքր Ասիայի հզոր պետություններից էր, ուներ լավ վարձեցված ու մարտունակ քանակ: Բնականաբար, Փոքր Հայքի միավորման հարցը կարելի էր լուծել միայն ընդդեմ Պոնտոսի ռազմական քախման միջոցով: Դա շատ լավ էր հասկանում նաև Պոնտոսի թագավոր **Միհրդատ VI Եվպատորը:** Վերջինս Փոքր Ասիայի բոլոր երկրները գրավելու և մի մեծ հեղինակական պետություն ստեղծելու ծրագիր ուներ: Այդ ծրագրի գլխավոր խոչընդոտը Հռոմն էր: Եվ պատահական չէ, որ Միհրդատ Եվպատորը որոշեց դաշնակցել Տիգրան II-ի հետ:


Տիգրանը Հռոմի հետ որևէ վիճելի խնդիր չուներ: Սակայն Միհրդատ Պոնտացու հետ դաշինքը կնպաստեր Մեծ Հայքի աշխարհակալական ծրագրերի իրագործմանը: Ուստի Միհրդատը և Տիգրան II-ը արագ համաձայնության եկան միմյանց հետ: Բնականաբար, Փոքր Հայքի հարցը մղվեց հետին պլան:

**Ք.ա. 94 թ. Արգաշար** ժամանեցին պոնտական քանազնացիները: Կնքվեց **հայ-պոնտական պայմանագիր**, որի համաձայն՝

1. Հայաստանը գործողությունների ազատություն էր ստանում հյուսիսում, հարավում և արևելքում, իսկ Պոնտոսը՝ արևմուտքում:
2. Կողմերը միացյալ ուժերով հարձակվելու էին Կապադովկիայի վրա, որի



# ՏԻԳՐԱՆ ԱՐԵՎԻ ՏԵՐՐԻՏՈՐԻԱԸ





Տիգրան II Մեծի դրամը

տարածքը պետք է ստանար Պոնտոսը, իսկ շարժական գույքն ու բնակչությունը՝ Հայաստանը:

3. Դաշինքն ամրապնդելու նպատակով Միհրդատն իր դուստր Կլեոպատրային կնության էր տալիս Տիգրան II-ին:

Հավատարիմ հայ-պոնտական դաշինքին՝ Ք.ա. 93 թ. հայկական զորքերը ներխուժում են Կապադոկիա և գրավում այն: Տեղի գահընկեց թագավորն ապավինում է Հռոմի օգնությանը: Ք.ա. 92 թ. հռոմեական քանակը նշանավոր զորավար Մուլլայի

հրամանատարությամբ մտնում է Կապադոկիա, և հայկական զորքը թողնում է այդ երկրի տարածքը: Սակայն Տիգրանն այստեղ ձեռք է բերում հսկայական ավար և մեծ թվով զերիներ:

Նույն ժամանակներին է վերաբերում նաև հյուսիսային և հյուսիսարևելյան հարևան երկրների՝ Վիրքի և Աղվանքի հպատակեցումը: Տիգրանը հեռատեսորեն երկու երկրների թագավորներին էլ թողնում է գահին՝ ստիպելով նրանց ընդունել իր գերիշխանությունը:

### Հայ-պարթևական պատերազմը:

Տիգրան II-ի աննախընթաց հաջողություններն ու ռազմական ծրագրերը, հայ-պոնտական դաշինքը ստիպում են Հռոմին մերձեցման եզրեր փնտրել Պարթևստանի հետ: Ք.ա. 92 թ. սկսվում են հռոմեա-պարթևական բանակցություններ, որոնք ավարտվում են Հայաստանի դեմ ուղղված պայմանագրի կնքմամբ: Հռոմի և Պարթևստանի միջև սահմանային գետ է ձանաչվում Եփրատը:

Ք.ա. 88 թ. մահացավ Պարթևստանի Միհրդատ II թագավորը, և գահ բարձրացավ Գողերձ II-ը: Հաջորդ տարի հայկական քանակը ներխուժեց Պարթևստանի



Արցախի Տիգրանակերտի պեղված հատվածներից



դաշնակից Մարաստան, որը գրավվեց առանց դժվարության: Տեղի Միհրդատ թագավորը հավատարմության երդում տվեց հայոց թագավորին և փոխարենը հետ ստացավ ոչ միայն թագը, այլև ամուսնացավ Տիգրան II-ի դստեր հետ:

Շարժվելով հարավ-արևելք՝ հայկական բանակը գլխովին ջախջախեց պարթևների զորքը, գրավեց թագավորանիստ Էկբատանը: Գողթերձ II-ը ստիպված էր հաշտություն խնդրել, որը կնքվեց նույն՝ Բ.ա. 87 թվականին: Այս պայմանագրի համաձայն՝

1. Պարթևստանը վերադարձնում էր Հայաստանից խլված 70 հովիտները:
2. Հօգուտ Հայաստանի՝ պարթևները հրաժարվում էին Մարաստանից և Հյուսիսային Միջագետքից:
3. Պարթևների արքան կորցնում էր «արքայից արքա» տիտղոսը, որն այսուհետև կրելու էին Տիգրանն ու նրա հաջորդները:

Այս պայմանագրով պարթևները փաստորեն ճանաչում էին Հայաստանի գերիշխանությունը: Այնուհետև Տիգրանը Հայկական թագավորությանն է միացնում պայմանագրով իրեն անցած Ադիաբենեն, Միգդոնիան և Օսրոյենեն:

**Ատրիքի գրավումը:** Նշված իրադարձությունների ժամանակ երբեմնի հզոր Սելևկյան թագավորությունն ապրում էր խոր ճգնաժամ: Չկարողանալով հաղթահարել այդ ճգնաժամը՝ երկրի ավագանին ելքը տեսնում էր արտաքին որևէ հզոր տիրակալի իշխանությունն ընդունելու մեջ: Հնարավոր թեկնածուներն էին Եգիպտոսի Պտղոմեոս IX, Պոնտոսի Միհրդատ VI Եվկատոր և Հայոց Տիգրան II թագավորները:

Այն բանից հետո, երբ Տիգրանը գրավեց Հյուսիսային Միջագետքը, Հայկական տերությունն ընդհուպ սահմանակցեց Սելևկյան պետությանը: Դժվար չէր կռահել Տիգրանի հաջորդ քայլը: Սելևկյան ավագանին ևս դա շատ լավ էր հասկանում և, բնականաբար, որոշում ընդունեց Տիգրանին հրավիրել՝ բազմելու սելևկյան գահին: Տիգրանի առավելությունն այլ թեկնածու-

ներից, ըստ պատմիչի խոսքերի, «ռազմական հզոր ուժ ունենալու մեջ» էր:

**Բ. ա. 84 թ.** հայկական բանակներն առանց դիմադրության մտան **Ատրիք:** Երկրի մայրաքաղաք **Ատրիքը** լայնորեն քացեց իր դարպասները հայոց արքայի առջև: Տիգրանը բազմեց Սելևկյանների գահին ու այստեղ խաղաղությամբ իշխեց **17 փարի:** Հայկական բանակը միաժամանակ գրավեց նաև **Կոննազենեն, Դաշուսին Կիլիկիան** և **Փյունիկիան:** Մեծ Հայքի գերիշխանությունն ընդունեցին նաև հարևան **Հրեասպանք,** Կարմիր ծովի ափին ապրող **արաբական ցեղերը,** արաբական **Նաբաթես** թագավորությունը և մի քանի այլ երկրներ ու ժողովուրդներ:

Հայկական բանակը **Բ.ա. 71 թ.** բավականին դժվարությամբ կարողացավ գրավել Միջերկրական ծովի ափին գտնվող, Եգիպտոսին սահմանակից **Պրդոմայիս** քաղաքը: Այստեղ գերի վերցվեց Սելևկյան Սելենե թագուհին, որը հետագայում մահապատժի ենթարկվեց:

Այսպիսով՝ Հայաստանը դուրս եկավ և ամրապնդվեց Միջերկրական ծովի արևելյան ափերին, որը զարգացման լայն հեռանկարներ էր բացում: Մյուս կողմից Հայկական տերության սահմանները հասան Եգիպտոս, որը նույնպես հայտնվեց Տիգրան II-ի հետաքրքրությունների կիզակետում: Դրա ապացույցն է այն, որ Պտղոմեոս XII-ը Եգիպտոսում գահ բարձրացավ Տիգրան II-ի օժանդակությամբ:

**Տերության տարածքը, բնույթը, բնակչությունը:** Տիգրան Մեծի նվաճումների հետևանքով Առաջավոր Ասիայի քաղաքական քարտեզը փոխվեց: Նախորդ գերտերությունները՝ Սելևկյան Ատրիքն ու Պարթևստանը, իրենց դիրքերն ու տարածաշրջանում խաղացած դերը զիջեցին Հայկական տերությանը: Վերջինս տարածվում էր Եգիպտոսից և Կարմիր ծովի ափերից մինչև Կովկասյան Մեծ լեռները, Միջերկրական ծովից մինչև Կասպից ծով:

Հայկական տերությունը բազմազգ երկիր էր: Ինչպես հույն պատմիչն է հավաս-

տում Տիգրան II-ի տերության մեջ խոսում էին 15-ից ավելի լեզուներով: Այն կազմված էր *երևք կարգի* հասովածներից: *Առաջինը* բուն հայկական հողերն էին (Մեծ Հայք, Կոմմագենե)՝ շուրջ 360 հազ. քառ. կմ տարածքով: *Երկրորդը* հպատակ թագավորություններն էին՝ Վիրք, Աղվանք, Մարաստան, Ադիարենե, Օսրոյենե, Պալմիրա, Փյունիկիա, Ասորիք, Կիլիկիա՝ շուրջ 400 հազ. քառ. կմ տարածքով: *Երրորդը* Հայաստանի քաղաքական ազդեցության ոլորտում գտնվող երկրներն էին՝ Պարթևստան, Նաբաթեա, Հրեաստան, Ամողարյայի ստորին ավազանի սկյութական ցեղերը, Պարսից ծոցի և Կարմիր ծովի ափերին բնակվող արաբները՝ շուրջ 2 մլն քառ. կմ տարածքով:

Այսպիսով՝ Տիգրան II-ը դարձավ Առաջավոր Ասիայի մեծագույն մասի տիրակալը: *Հայոց տերության տարածքը, ենթակա երկրներով հանդերձ, կազմում էր շուրջ 3 մլն քառ. կմ, որը գերազանցում էր Մեծ Հայքի տարածքը տասն անգամ:*

Հայկական տերությունը հեյլենիստական պետություն էր՝ նման Ալեքսանդր Մակեդոնացու և Սելևկյանների տերություններին: Այն զարգացման ամենատարբեր աստիճանների վրա գտնվող երկրների մի ամբողջություն էր: Տերության միջուկը, բնականաբար, կազմում էր Մեծ Հայքը, որտեղ ապրում էր հայ ժողովրդի հիմնական զանգվածը, գտնվում էին տերության քաղաքական ու տնտեսական նշանավոր կենտրոնները:

Տերության տնտեսապես ամենազարգացած շրջանը Ասորիքն էր՝ իր Անտիոք մայրաքաղաքով: Միջազգային տարանցիկ առևտրի կենտրոններ էին Փյունիկիայի քաղաքները: Հարուստ և հռչակավոր էին Դամասկոսը, Հալեպը, ինչպես նաև Կիլիկիայի Տարսոն, Ադանա և այլ քաղաքներ: Տիգրան II-ն Ասորիքի թագավորական իշխանությունը կենտրոնացրեց իր ձեռքում: Այդ երկիրը կառավարվում էր հատուկ փոխարքայի կողմից, որի նստավայրը Անտիոքն էր: Այստեղ փոխարքա-կառավարիչ նշանակվեց Տիգրանի մերձավորագույն զինակիցներից *Բագարապը*: Տիգրանի

կրտսեր եղբայր *Գուրապը* նշանակվեց Հյուսիսային Միջագետքի փոխարքա, որի նստավայրը Մծբին քաղաքն էր: Այս երկրամասը երկրագործության և արհեստագործության նշանավոր կենտրոններից էր և լիովին բավարարում էր տերության հացահատիկի պահանջարկը:

Հպատակ կամ ենթակա երկրները պարտավոր էին հարկ վճարել և զորք տրամադրել:

Հսկայական տերության ծայրամասերը կենտրոնի հետ կապելու համար Տիգրան II-ը զարկ է տվել ճանապարհաշինությանը, որի շնորհիվ ստեղծվել է կենտրոնական ամուր հաղորդակցական կապ: Նա կառուցել է *«Մերունի պողոտան»*, որ միմյանց հետ կապում էր տերության երևք մայրաքաղաքները՝ *Արտաշատը, Տիգրանակերտը և Անտիոքը*:

**Տիգրանակերտի կառուցումը:** Տիգրան Մեծի գործունեությունը նշանավորվել է նաև աշխույժ քաղաքաշինությամբ: Քաղաքները նպաստելու էին արհեստների ու առևտրի զարգացմանը, արմատավորելու էին հեյլենիստական մշակույթը, որն էլ իր հերթին գաղափարական գեներալու հայկական հասարակության առաջընթացի համար:

Տիգրանի նվաճումներից և Հայկական տերության կազմավորումից հետո Արտաշատն այլևս չէր կարող կատարել մայրաքաղաքի դեր, քանզի մնացել էր տերության ծայր հյուսիսում, իսկ Անտիոքն էլ բուն հայկական տարածքներից դուրս էր և ուներ գերազանցապես օտար բնակչություն: Ահա թե ինչու նոր մայրաքաղաքի կառուցումը դարձել էր օրակարգի հարց: *Տիգրանակերտը կառուցվել է Ք. ա. 80-70-ական թվականներին Աղանիք նահանգում՝ Արևմտյան Տիգրիսի ձախակողմյան վտակներից մեկի ափին: «Նոր մայրաքաղաքը բնակեցնելու համար,— ինչպես գրում է հույն պատմիչը,— Տիգրանն այստեղ հրավիրում է հայերից լավագույններին և տպանում է բռնագրավել այն ամենը, ինչ իրենց հետ Տիգրանակերտը չէին տանելու»:* Ահա թե ինչու հա-



յոց մեծամեծերը, ցանկանալով հաճոյանալ արքային, միմյանց հետ մրցում էին քաղաքի շինության ու ընդարձակման համար:

Մայրաքաղաքի բնակչությունը համայնելու համար Տիգրան Մեծը նվաճված երկրների քաղաքային բնակչության մի մասը բռնագաղթեցրել է Հայաստան: Միայն Կապադովկիայից Հայաստան է տեղափոխվել 300 հազար մարդ, 100 հազար էլ՝ Կիլիկիայի 12 քաղաքներից: Հայաստան տեղափոխված այդ ամբողջ բնակչությունը բնակեցվել է Տիգրանակերտում, ինչպես նաև Արտաշատ, Երվանդաշատ, Վան, Արմավիր և այլ քաղաքներում: Կարճ ժամանակամիջոցում կառուցվում է մեծ ու գեղեցիկ մի քաղաք, որն ուներ շուրջ

120 հազար բնակչություն: Պլուտարքոսը վկայում է, որ Տիգրանակերտը մեծ և շքեղ քաղաք էր, որն ուներ արքունի պալատ, դիվանատուն և թատրոն, «այն լի էր գանձերով և աստվածներին նվիրաբերված թանկարժեք ընծաներով»: Մայրաքաղաքից թիչ հեռավորության վրա կառուցվել է ամրոց, որն ունեցել է Տիգրանակերտի մատուցյնքը պաշտպանելու նշանակություն:

Կարճ ժամանակամիջոցում Տիգրանակերտը դարձել է Մերձավոր Արևելքի արհեստագործության, առևտրի ու մշակույթի մարդաշատ կենտրոններից մեկը:

Տիգրանն իր անունով քաղաքներ է հիմնադրում նաև այլ վայրերում, այդ թվում՝ Արցախում:

### Հարցեր և առաջադրանքներ

1. Ովքեր են հաջորդել Արտաշես I-ին: Երբ է թագավորել Տիգրան II-ը: Ի՞նչ նշանակություն ունեցավ Ծոփքի գրավումը:
2. Որո՞նք էին Տիգրան II-ի և Միհրդատ II-ի մերձեցման պատճառները: Ներկայացրե՛ք հայ-պոնտական պայմանագրի բովանդակությունը:
3. Ի՞նչ ավարտ ունեցավ Պարթևստանի դեմ Տիգրան II-ի պատերազմը:
4. Հիմնավորե՛ք Տիգրանի առավելությունները սելևկյան գահի մյուս թեկնածուների նկատմամբ: Երբ Տիգրանը տիրացավ սելևկյան գահին:
5. Ներկայացրե՛ք Հայկական տերության տարածքը, բնույթը, կառուցվածքը: Երբ և ինչո՞ւ Տիգրանը ձեռնամուխ եղավ նոր մայրաքաղաքի կառուցմանը: Նկարագրե՛ք մայրաքաղաք Տիգրանակերտը:

Մայրաքաղաք Տիգրանակերտի աշտարակներից



### § 3. ՌԱԶՄԱԲԱՂԱԲԱԿԱՆ ՆՈՐ ԻՐԱԴԻՈՒԹՅՈՒՆԸ ԱՌԱՋԱՎՈՐ ԱՄԻԱՅՈՒՄ

**Հոռմեա-պոնտական հակամարտությունը:** Ք.ա. I դարի սկզբներին Հոռմեական Հանրապետությունը հզորացել էր և ձգտում էր համաշխարհային տիրապետության: Հոռմի անմիջական ծրագրերի մեջ էր մտնում Փոքր Ասիայի գավառները: Այստեղ գերիշխանության էր ձգտում նաև Միհրդատ VI Եվպատորը: Կողմերի միջև բախումը դարձել էր անխուսափելի:

Հոռմեա-պոնտական պատերազմների ընթացքում (Ք. ա. 89-71 թթ.) Տիգրան II-ը զբաղված էր սեփական ռազմավարական ծրագրերի իրականացմամբ: Սակայն Հոռմը երբեք չէր կարող հաշտվել այն իրողության հետ, որ Հայկական տերությունը դուրս էր եկել Միջերկրական ծով և ընդհուպ մոտեցել Եգիպտոսի սահմաններին: Բացի այդ, հզոր Հայաստանի գոյությունն իսկ Հոռմի առջև փակում էր դեպի Արևելք տանող բոլոր ճանապարհները: Ուստի հասկանալի է, որ Հոռմը վաղ թե ուշ բախվելու էր Արևելքին տիրող Հայկական տերության հետ:

Ահա թե ինչու Հոռմը սկսում է լրջորեն նախապատրաստվել Հայաստանի դեմ պատերազմի: Հայ-հոռմեական ռազմական բախմանը նպաստեց նաև պարտություն կրած Միհրդատ Պոնտացու փախուստը Հայաստան: Տիգրանը քաղաքական ապաստան շնորհեց բոլորի կողմից լքված Միհրդատ Պոնտացուն՝ դրանով իր ցույց դնելով իր քարձր քարոյականությունն ու արժանապատվությունը և, միաժամանակ, իր արքայական հպարտությունն ու արիությունը:

Հոռմեական զորավար **Լուկիոս Լուկուրաց**, հետապնդելով Միհրդատին, մոտեցավ Հայաստանի սահմաններին և կանգ առավ: Նա չհամարձակվեց անցնել Եփրատը, որ բացահայտ պատերազմ կնշանակեր, այլ Տիգրանի մոտ դեսպան ուղարկեց՝ պահանջելով «Հոռմեական ժողովրդի դեբերիմ թշնամի Միհրդատին»: Տիգրանը կտրականապես մերժեց հոռմեացիների պահանջը՝ ասելով. «Ես Միհրդատին չեմ

*հանձնի, իսկ եթե հոռմեացիները պարերազմ սկսեն, ապա... հակահարված կրամ կրանց»:* Հասկանալի է, որ եթե Տիգրանը հանձներ Միհրդատին, միևնույն է, չէր խուսափի պատերազմից, քանի որ այդ հարցը սոսկ առիթ էր և ոչ թե պատճառ:

**Հայ-հոռմեական պատերազմի առաջին փուլը:** Ք.ա. 69 թ. զարնանը հոռմեական բանակն անցավ սահմանային Եփրատ գետը և մտավ Հայաստան: Սկսվեց *հայ-հոռմեական պատերազմը:* Պատերազմն ընթացավ երկու փուլով՝ 1) Ք.ա. 69-67 թթ. և 2) Ք.ա. 66 թ.:

Լուկուլոսը մշակել էր կայծակնային պատերազմի ծրագիր, որի համաձայն՝ հանկարծակի հարձակմամբ շեշտակի հարվածներ հասցնելով՝ պետք է պարտության մատներ հայկական քանակին: Նա առանց որևէ դժվարության ռազմակալեց Ծոփքը և սրընթաց շարժվեց Աղձնիք՝ գրավելու **Տիգրանակերտը:** Սակայն Տիգրանակերտի կայազորը, զորավար Մանկայոսի հրամանատարությամբ հմտորեն պաշտպանելով քաղաքը, հետ շարժեց հոռմեական զորիները: Լուկուլոսը ստիպված էր քաղաքը պաշարել: Անցնում էին ամիսները, իսկ մայրաքաղաքը շարունակում էր դիմադրել: Կայծակնային պատերազմի՝ Լուկուլոսի ծրագիրը տապալվեց:

Հոռմեական բանակի ներխուժման պահին Տիգրանն Արտաշատում էր: Հայկական զորքերի գլխավոր ուժերը, որոնք ձամբարել էին Պաղեստինում, մինչ կհասնեին Հայաստան, Տիգրանը Լուկուլոսի դեմ ուղարկեց **Մեհրուժան** զորավարի՝ 3 հազար հեծյալներից բաղկացած զորաջոկատը: Հոռմեական գերակշիռ ուժերի հետ ընդհարման ժամանակ երկարատև ռազմերթից հոգնած հեծելազորը պարտվեց, իսկ Մեհրուժանը զոհվեց:

Միայն սեպտեմբերի կեսերին Տիգրանի գլխավորած հայկական բանակը մոտեցավ պաշարված Տիգրանակերտին: Այստեղ էին



արքայի ընտանիքը, մերձավորները, գանձերը: Հայկական հրամանատարությունը ծրագրեց և իրականացրեց մի հանդուգն հարձակում, որի ընթացքում մի զորամաս գիշերային հանկարծակի գրոհով ներխուժեց քաղաք և այստեղից դուրս բերեց արքայի ընտանիքն ու գանձերի մի մասը:

Կողմերը նախապատրաստվում են վճռական ճակատամարտի: Հայկական զինված ուժերի թվաքանակը մոտ 70-80 հազար էր: Բուն հռոմեական բանակն ունեցել է 22 հազար զինվոր և դրանից ավելի դաշնակցային զորամասեր, միասին՝ շուրջ 50 հազար զինվոր:

Ճակատամարտը սկսվեց *Ք.ա. 69 թ. հոկտեմբերի 6-ի* վաղ առավոտյան և նույն օրն էլ ավարտվեց: Հայկական զինված ուժերը երկարատև ռազմերթից հետո հանգստի կարիք ունեին: Լուկուլլոսը նրանց զրկեց այդ հնարավորությունից: Ենթարկվելով երկուստեք հարձակման (թիկունքից և ձակատից) և տալով զգալի կորուստներ՝ հայկական բանակը ստիպված էր նահանջել: Քիչ չէին նաև հռոմեացիների կորուստները:

Ճակատամարտի ելքը վճռեց նաև Տիգրանակերտի ճակատագիրը: Քաղաքը պաշտպանող օտար վարձկանները, կաշառվելով Լուկուլլոսի կողմից, հոկտեմբերի վերջերին դարպասները բացեցին հռոմեացիների առջև: Փաստորեն քաղաքը զրավվեց ստոր դավաճանության արդյունքում: Նորակառույց քաղաքը բարբարոսաբար ավերվեց ու թալանվեց:

**Արաձանիի ճակատամարտը:** Տիգրանը չվիստվեց, չկորցրեց հավատը հաղթանակի նկատմամբ: Նա ձեռնամուխ եղավ բանակը կարգի բերելու, նոր զորամասեր հավաքագրելու և վարժեցնելու գործին: Դեռ ավելին՝ հայկական 10-հազարանոց մի զորամասով նա Միհրդատին ուղարկեց Դոնտոս՝ այստեղ տեղակայված հռոմեական կայազորերի դեմ մարտնչելու և ռազմական գործողությունների ձակատն ընդարձակելու հեռազնա մտադրությամբ, որը նրան լիովին հաջողվեց: Հայաստանի տնտեսական կա-

րողություններն ու մարդկային պաշարները հնարավոր դարձրին ընդամենը մի քանի ամսվա ընթացքում միանգամայն նոր բանակի ստեղծումը, որն իր մարտարվեստով շուտով գերազանցեց հռոմեացիներին:

Իսկ Լուկուլլոսը Տիգրանակերտը գրավելուց հետո չհամարձակվեց շարունակել ռազմական գործողությունները և ծանր կորուստներ կրած հռոմեական լեգեոնները տեղափոխեց հարավ՝ Կորդոքսի տաք շրջաններում ձմեռելու և ուժերը վերականգնելու նպատակով: Հարաբերական այս դադարից օգտվեց հայկական կողմը:

Ք. ա. 68 թ. գարնանը Լուկուլլոսի բանակը դուրս եկավ Կորդոքսից և անցնելով Հայկական Տավրոսը՝ Արաձանի գետի ափերով շարժվեց դեպի Արտաշատ: Խուսափելով գլխավոր ճակատամարտից՝ Տիգրան II-ը, որքան հնարավոր է, Լուկուլլոսին ներքաշում էր երկրի խորքերը՝ կտրելով թիկունքից և մատակարարումներից: Միաժամանակ հանկարծակի, այդ թվում՝ գիշերային հանդուգն հարձակումներով հայերը ջլատում էին հակառակորդի ուժերը՝ նրանց պատճառելով նշանակալի կորուստներ: Տիգրանի այս մարտավարությունը լիովին արդարացրեց իրեն: Հռոմեական բանակը կորցրել էր մարտունակությունն ու կարգապահությունը:

**Սևաբլենքերի 22-ին** հռոմեական բանակը մոտեցավ *Արաձանիի գեղանցին*: Առջևում Հայկական Պար լեռնաշղթան էր, իսկ նրանից քիչ այն կողմ Արտաշատն էր: Այս վճռական պահին էլ հայկական բանակն անցավ շեշտակի հարձակման: Արաձանիի ճակատամարտում հռոմեական բանակը լիակատար պարտություն կրեց: Հույն պատմիչ *Դիոն Կասիոսը* վկայում է, որ «*հայերը, ներսահարելով հռոմեացիներին, շարժվեցին իսկույն պահանցին, իսկ շարժ շարժերին էլ փրակորեցին*»:

*Այնժամ Լուկուլլոսը, քանզի շարերը փրակորվել էին, և մի մասն էլ մահանում էր, իսկ հաշմվածները հեծեծում էին, և միաժամանակ պարենանթերքը պակասում էր, նահանջեց*»: Արաձանիից հետո Լուկուլլոսը ստիպված էր թողնել Հայաստանի սահմանները, Կորդոքսն ու Հյուսիսային Միջա-

գետքը: Իսկ Միհրդատ Եվպատորը սկսել էր Պոնտոսի ազատագրումը:

Լուկուլլոսի պարտության հետևանքով վերականգնվեց Հայկական տերության հեղինակությունը: Արդեն Ք.ա. 67 թ. կեսերին հայկական քանակները ազատագրեցին Ծոփքը, ներխուժեցին Կապադովկիա: **Պոնտոսի Ջեղա** քաղաքի մոտ հայ-պոնտական ուժերը փայլուն հաղթանակ տարան հռոմեացիների նկատմամբ: Հայկական զերիշխանությունը վերականգնվեց Ասորիքում և Միջերկրական ծովի ափերին:

Այսպիսով՝ Հռոմի առաջին գրոհը դեպի Հայաստան լիովին ձախողվեց, իսկ Լուկուլլոսը պաշտոնանկ արվեց: Արևելքում հռոմեական զորքերի նոր գլխավոր հրամանատար նշանակվեց Գնեոս Պոմպեոսը:

**Հայ-հռոմեական պատերազմի երկրորդ փուլը:** Պոմպեոսը Արևելք ժամանեց Ք.ա. 66 թ. գարնանը: Նա պարթևներին առաջարկեց ընդդեմ Հայաստանի կնքել ռազմական համագործակցության պայմանագիր՝ խոստանալով Տիգրանի պարտության դեպքում նրանց վերադարձնել Մարաստանը, Հյուսիսային Միջագետքն ու Կորդոբը: Պարթևները համաձայնեցին: Այնուհետև Պոմպեոսը ռազմական գործողություններ սկսեց Միհրդատ Պոնտացու դեմ, պարտության մատնեց նրան և ռազմակալեց Պոնտոսը: Միհրդատ Եվպատորը նահանջեց իր տերության հյուսիսային երկրամասերը, որտեղ էլ Ք.ա. 63 թ. ինքնասպանությամբ վերջ տվեց կյանքին:

Ջրկված լինելով իր գլխավոր դաշնակցից՝ հայոց թագավորը հայտնվեց Պարթևտանի և Հռոմի ռազմական սպառնալիքի առջև: Նման պայմաններում պետք էր գործել չափազանց զգույշ և ձգձգիտ: Հավատարիմ Ք.ա. 66 թ. հռոմեա-պարթևական համաձայնագրի ոգուն՝ պարթևների թագավոր Հրահատ III-ը մտավ Հայաստան և պաշարեց Արտաշատը: Ստեղծված իրադրությունում Տիգրան II-ը ստիպված եղավ հայկական զորքը դուրս բերել Կապադովկիայից և վերադառնալ Հայաստան: Տիգրանն արագ ռազմերթով հակա-

հարված տվեց պարթևներին, որոնք ստիպված էին նահանջել իրենց երկիրը: Հենց այս պահին էլ Հայաստան ներխուժեց Պոմպեոսի հռոմեական քանակը:

Հայոց ավագանու մեջ տարաձայնություններ էին խմորվում Հայաստանի հետագա քայլերի շուրջ: Վտանգված էր հայկական պետականության գոյությունը: Թագաժառանգ Տիգրան Կրտսերը նախ գնաց պարթևների թագավոր Հրահատ III-ի մոտ, որն ի դեմս նրա գտավ դաշնակից և իր դատերը կնության տվեց նրան: Սակայն, անհաջողության մատնվելով, Տիգրան Կրտսերը ներկայացավ Պոմպեոսին և առաջարկեց իր ծառայությունները՝ հայ-հռոմեական հաշտության քանակցություններ սկսելու համար:

Նման ռազմաքաղաքական քարոզ իրավիճակում անհրաժեշտ էր ոչ կենսական խնդիրներում գնալ զիջումների գլխավորը՝ պետական անկախությունը պահպանելու համար:

**Արտաշատի պայմանագիրը:** Ք.ա. 66 թ. սեպտեմբերին Պոմպեոսի զորքը մոտեցավ Արտաշատին և քանակեց քաղաքից ոչ հեռու: Անմիջապես սկսվեցին հայ-հռոմեական քանակցությունները: Նախապես կայացած պայմանավորվածության համաձայն՝ Տիգրան II-ը ժամանեց Պոմպեոսի ճամբար, որտեղ արժանացավ պատշաճ ու հարգալից ընդունելության, ինչպես գրում է Պլուտարքոսը. «**Հռոմեացիները նրան ողջունեցին արքայապսեղ**»: Ըստ հաշտության պայմանագրի՝

1. Հօգուտ Հռոմեական Հանրապետության՝ Մեծ Հայքը հրաժարվում էր Ասորիքից, Փյունիկիայից, Պաղեստինից և Կիլիկիայից, այսինքն՝ Միջերկրական ծովի առափնյա երկրներից.
2. Հայկական պետությունը պահպանում էր իր նվաճումները Հյուսիսային Միջագետքում.
3. Հայաստանից անջատվելու էին Ծոփքն ու Կորդոբը, այստեղ թագավոր էր հաստատվում Տիգրան Կրտսերը՝ պայմանով, որ Տիգրան II-ի մահից հետո դրանք միավորվելու էին Մեծ



Հայքի հետ որպես մեկ պետություն՝

Տիգրան Կրտսերի գահակալությամբ.

4. Մեծ Հայքը Հռոմին պետք է վճարեր 6 հազար տաղանդ ռազմատուգանք.

5. Հայաստանը հայտարարվում էր «Հռոմեական ժողովրդի բարեկամ և դաշնակից»:

Հատկանշական է, որ ռազմատուգանքի գումարը վճարվելու էր Ծոփքի արքայական գանձարաններից, որոնք իրավականորեն արդեն պատկանում էին Տիգրան Կրտսերին: Հասկանալով իր վիճակի անհեթեթությունը՝ Տիգրան Կրտսերն ընդվզեց Պոմպեոսի դեմ և վիրավորեց նրա արժանապատվությունը: Ի պատասխան այդ հանդուգն ելույթի՝ Պոմպեոսի կարգադրությամբ Տիգրան Կրտսերը ձերբակալվեց և ընտանիքի հետ գերեվարվեց Հռոմ:

Հռոմի դաշնակից պարթևները չստացան Պոմպեոսի խոստացած Հյուսիսային Միջագետքն ու Կորդոբը: Ավելին՝ Պոմպեոսը ճանաչեց Տիգրան Մեծի «արքայից արքա» տիտղոսը, որ, օգտվելով Հայաստանի ժամանակավոր ղեկավարություններից, պարթևներն իրենց էին վերադարձրել: Արևելքում ուժերի հավասարակշռությունը պահանջում էր պաշտպանել Տիգրան II-ին:

Կնքված պայմանագիրը դիվանագիտական հաջողություն էր Հայաստանի համար: Ամենակարևորը՝ Հայաստանը պահպանում էր իր տարածքային ամբողջականությունը, պետական անկախությունը՝ հայ ժողովրդի հարատևման այդ կարևորագույն նրաշխիքը:

**Տիգրան Մեծը՝ սերունդների հիշողության մեջ:** Տիգրան II-ի կյանքի վերջին տասը տարիները Հայաստանի համար խաղաղության ու տնտեսական բարգավաճման տարիներ էին:

Տիգրան Մեծը հայերի մեջ հերոսացվել է և ժողովրդական գրույցներում վերածվել դյուցազնական կերպարի: Նրա կյանքի ու գործի հիանալի նկարագրությունը փոխանցվել է սերնդից սերունդ, գովերգվել են նրա մարդկային ու արքայական առաքինությունները: Տիգրան Մեծից ավելի քան 500 տարի անց Մովսես Խորենացին նրան դնում է հայերի ամենանշանավոր նախնիների կողքին: Անգամ հոռմեացի պատմիչներն էին ստիպված խոստովանել, որ հանձին Տիգրանի՝ Հռոմը գործ է ունեցել «վսևմ քաջությանը օժտված հակառակորդի հետ»: Իսկ մեկ այլ պատմիչ էլ նրան անվանել է «մեծագույն թագավոր, որ տիրակալում էր մեծ փառքով»:

Հետաքրքրական է, որ եվրոպական օպերային երաժշտության պատմությունն արձանագրել է Տիգրան Մեծին նվիրված ավելի քան 20 օպերա՝ իտալերեն, իսպաներեն, գերմաներեն, ռուսերեն:

Հայ անվանի պատմաբան Նիկողայոս Ադոնցը դիպուկ է քննադատել Տիգրան II-ին. «Տիգրան Մեծն իր արժանավոր տեղն է զբաղեցնում Արևելքում երբևէ իշխած տիրակալների շարքում: Նա արժանացել է «Մեծ» տիտղոսին՝ պարվավոր մի կոչման, որը պարսությունը հազվադեպ է շնորհում իր ընտրյալ ղեկավարարներին»:

### Հարգելի և առաջադրանքներ

1. Որո՞նք էին հայ-հոռմեական պատերազմի պատճառները և առիթը:
2. Ի՞նչ մարտավարություն ընտրեցին կողմերը Տիգրանակերտի ճակատամարտից հետո: Ներկայացրե՞ք Արածանիի ճակատամարտը: Ինչպե՞ս ավարտվեց հայ-հոռմեական պատերազմի առաջին փուլը:
3. Ո՞վ փոխարինեց Լուկոլլոսին, և ինչ քայլեր նա ձեռնարկեց: Ի՞նչ ավարտ ունեցավ Միհրդատ եվպատրի պայքարը: Ներքաղաքական ինչ իրավիճակ էր Հայաստանում: Ինչո՞ւ Տիգրան Մեծը զիջումների գնաց:
4. Երբ և ինչ պայմաններով կնքվեց Արտաշատի պայմանագիրը: Ինչո՞ւ Հռոմը պաշտպանեց Տիգրան Մեծին:

## § 4. ՀԱՅԱՍՏԱՆԻ ՊԱՅՔԱՐՆ ԸՆԴԴԵՄ ՀՈՌՄԻ ԾԱՎԱԼԱՊԱՇՏ ՔԱՂԱՔԱԿԱՆՈՒԹՅԱՆ: ԱՐՏԱՎԱԶԴ II

### Արտավազդ II-ի գահակալությունը:

Արտաշատի պայմանագրի կնքումից հետո Տիգրան II Մեծը գահակալեց ևս տասը տարի: Տիգրան Մեծը թագաժառանգ Արտավազդին թողեց մի ընդարձակածավալ երկիր՝ զարգացած տնտեսությամբ ու հզոր բանակով: Տիգրան Մեծի կյանքի վերջին շրջանում Արտավազդը եղել է նրա գահակիցը, որն օգնել է պատկանելի տարիք ունեցող հորը կառավարելու երկիրը: Թագաժառանգը փայլուն կրթություն ստացած, բազմակողմանի զարգացած, հունարենին գիտակ մտավորական անձնավորություն էր, ձկուն դիվանագետ, իրատես քաղաքագետ ու ռազմական գործիչ:

**Արտավազդ II-ը (Ք.ա. 55-34 թթ.)** գահ բարձրացավ միջազգային չափազանց բարդ իրադրության պայմաններում: Նրան մեծ հմտություն էր անհրաժեշտ տարածաշրջանի երկու տերությունների՝ Հռոմեական Հանրապետության և Պարթևական թագավորության միջև մրցակցության պայմաններում կողմնորոշվելու համար: Մեծ Հայքի դիրքորոշումից էր կախված, թե որ տերությունը տիրապետող դիրք կստանար տարածաշրջանում: Ստեղծված ռազմաքաղաքական իրադրության պայմաններում Արտավազդ II-ն ավելի հաճախ հակվում էր դեպի Պարթևստանը՝ ձգտելով պահպանել Հայաստանի՝ տարածաշրջանի հզոր պետության կարգավիճակը:

**Հռոմեա-պարթևական պատերազմը և Հայաստանը:** Հռոմում սկսված ներքաղաքական պայքարն ավարտվեց Ք.ա. 60 թ.: Հանրապետության երեք ակառավոր գործիչներ՝ Գնեոս Պոմպեոսը, Հուլիոս Կեսարն ու Մարկոս Կրասոսը, ստեղծեցին մի դաշինք, որը հայտնի է **Առաջին տռապետություն** անունով: Եռապետներից Կրասոսը ստացավ Արևելքը և Պարթևստանի դեմ արշավելու հրամանատարությունը:

**Ք.ա. 54 թ. գարնանը** հռոմեական 50-հազարանոց բանակը **Կրասոսի** հրա-



Արտավազդ II-ի հատած դրամը

մանատարությամբ ժամանեց **Ասորիք**: Նա ծրագրել էր ջախջախել պարթևներին և հասնել Հնդկաստան: Այդ պատերազմում Կրասոսը որոշակի հույսեր էր կապում Հայաստանի հետ:

Արտավազդի և Կրասոսի հանդիպումը տեղի ունեցավ Ք.ա. 54 թ. գարնանն Ասորիքում: Արտավազդը Կրասոսին խոստացավ տրամադրել 16-հազարանոց այրումի և 24-հազարանոց հետևակ (ընդամենը՝ 40 հազար զինվոր): Սա պատկանելի ռազմական օգնություն էր: Միաժամանակ հայոց արքան առաջարկում էր պարթևների դեմ ռազմերթը կազմակերպել ոչ թե Ասորիքի անապատներով, այլ Հայաստանի հարավային տարածքով: Նման դեպքում լեռնային տարածքը կզրկեր պարթևական հեծելազորին իր առավելությունից: Սակայն Կրասոսը կտրականապես մերժեց Արտավազդի այս խելամիտ առաջարկությունը և ընտրեց ռազմերթի թեև կարճ, սակայն վտանգավոր ուղին:

Արտավազդի և Կրասոսի ռազմական ուժերի միավորումը պարթևներին հաջողության հեռանկարի որևէ հնարավորություն չէր տալիս: Անհրաժեշտ էր ամեն կերպ թույլ չտալ նման միավորում: Ուստի պարթևների թագավոր Օրոդես II-ի գլխավորած ուժերը հարձակվեցին Հայաստանի սահմանամերձ տարածքների վրա:



Արտավազըն այլևս չէր կարող օգնական ուժեր ուղարկել Կրասոսին, ինչի մասին անհապաղ տեղեկացրեց հռոմեացիներին: Կրասոսը դա ընկալեց որպես դավաճանություն և հոխորտանքով հայտարարեց, թե պարթևներին ջախջախելուց հետո ինքն անպայման պատժելու է Արտավազընին: Նման վերաբերմունքի պայմաններում, բնականաբար, Արտավազը II-ը պետք է փոխեր իր քաղաքական ուղղվածությունը և դաշինք առաջարկեր Օրոդես II-ին, որն այն ընդունեց սիրահոժար: **Հայ-պարթևական պայմանագիրը կնքվեց Ք.ա. 54 թ. վերջերին Արպաշատում:** Դաշինքն ամրապնդվեց հայոց թագավորի քրոջ և պարթևների թագաժառանգ Բակուրի ամուսնությամբ:

Կրասոսը, չփոխելով մարտավարությունը, Ք.ա. 53 թ. գարնանն անցավ Եփրատը և սկսեց իր արշավանքը դեպի Պարթևստան: Չոր, տափաստանային կլիման, անսովոր շոգերն ու հիվանդությունները քարոյալքել էին հռոմեական զինվորներին: Սակայն Կրասոսը համառորեն շարունակում էր առաջխաղացումը:

**Ք.ա. 53 թ. մայիսի 6-ին Խառան քաղաքից** ոչ հեռու տեղի ունեցած ճակատամարտում պարթև զորավար Սուրենը հանկարծակի ու շեշտակի հարվածով գլխովին ջախջախեց հռոմեական բանակին: Սպանվածների թիվն անցնում էր 20 հազարից, իսկ գերիներինը՝ 10 հազարից: Սպանվեցին Կրասոսն ու իր որդին: Սուրենը Կրասոսի գլուխն ուղարկեց Հայաստան, որտեղ այդ ժամանակ հյուրընկալվել էր Օրոդես II-ը՝ պարթև մեծամեծերի հետ: Խնջույքից հետո դերասանները հանդիսականների ուշադրությանն էին ներկայացնում հույն հեղինակ Էվրիպիդեսի «Բաբոսուհիներ» ողբերգությունը: Դերասան Յասոն Տրալլացին բեմ է դուրս գալիս Կրասոսի կտրված գլխով: Տեսարանը ցնծության աղաղակներով ընդունվում է հանդիսականների կողմից:

**Անտոնիոսի արշավանքները:** Կրասոսի պարտության հետևանքով Հռոմի դիրքերն Արևելքում հիմնովին սասանվե-

ցին: Օգտագործելով պատեհ առիթը՝ պարթևական զինված ուժերը **թագաժառանգ Բակուրի** հրամանատարությամբ անցան լայնածավալ հարձակման և հռոմեացիներին դուրս մղեցին Ասորիքից, Փյունիկիայից, Պաղեստինից, Հրեաստանից և Կիլիկիայից: Պարթևներին օժանդակում էին հայկական զորամասերը՝ **Վասակ զորավարի** գլխավորությամբ:

Պարթևների հաջողությունները ստիպեցին Հռոմի քաղաքական շրջաններին հարթել ներքին ձգնաժամը: Ք.ա. 43 թ. կազմակերպվեց **Երկրորդ տրապեզությունը:** Եռապետերից Անտոնիոսը ստացավ Արևելքը: Դեպքերը սկսեցին զարգանալ ոչ ի նպաստ հայերի: Խզվեց հայ-պարթևական դաշինքը: Սպասվող հռոմեա-պարթևական ռազմական բախման ժամանակ Հայաստանի համար այլևս հնարավոր չէր լինի պահպանել չեզոքություն:

Ի վերջո եկավ պատերազմի պահը: Դեպի Պարթևստան մեծ արշավանքի նախապատրաստություններ տեսնելուց հետո՝ **Ք.ա. 36 թ., Անտոնիոսն անձամբ ժամանեց Արևելք:** Նա իր տրամադրության տակ ուներ 100-հազարանոց բանակ և 300 սայլերի վրա բարձեց պաշարողական տեխնիկա: Ամբողջ այս ուժը կենտրոնացվել էր Կարին գավառում, որտեղից էլ սկսվեց արշավանքը: Արտավազը հռոմեացիներին տրամադրել էր ընդամենը 13-հազարանոց մի զորամաս:

Հայաստանի տարածքով Անտոնիոսը մտավ **Արրպապական** և շարժվեց այդ երկրի մայրաքաղաք **Փրասապա:** Այդ պահին Անտոնիոսը կատարում է ճակատագրական սխալ: Մասնատելով բանակը՝ նա իր հիմնական ուժերը նետում է Փրասապայի դեմ: Գումակը բավականին հեռավորությունից դանդաղ հետևում էր առաջապահ զորամասերին: Ուստի պահապան զորամասը ոչինչ չկարողացավ անել, երբ պարթևները հանկարծակի գրոհով շրջապատեցին գումակը: Պաշարողական մեքենաները ջարդուփշուր արվեցին ու այրվեցին: Հռոմեացիները միայն Փրասապայի պարիսպների տակ ունեցան 20 հազար սպանված: Անտոնիոսը



րունեց հետդարձի ճանապարհը: Ավելի վաղ, հրաժարվելով ռազմական հետագա գործողություններին մասնակցելուց, իր գործատու Հայաստան էր վերադարձել Արտավազդ II-ը: Հետագայում Անտոնիոսը հայոց արքային է համարել իր բոլոր դժբախտությունների պատճառը:

Ք.ա. 36 թ. աշնանը հսկայական կորուստներով հռոմեական բանակը նահանջեց դեպի Հայաստան: Անընդհատ հարձակումներով պարթևներն ուժասպառ արեցին հակառակորդին: Նահանջի 27-րդ օրը հռոմեացիները վերջապես հասան Արաքսին: Նրանց ընդհանուր կորուստը կազմում էր 44 հազար զինվոր:

Արտավազդ II-ը պատշաճ ու հոգատար վերաբերմունք ցույց տվեց պարտվածներին՝ փրկելով շատերի կյանքը: Թեև Անտոնիոսը ցանկանում էր վրեժխնդիր լինել Արտավազդից, սակայն պահն անպատեհ էր, և նա շտապեց բանակը դուրս բերել Հայաստանից ու մեկնել Եգիպտոս՝ իր կնոջ՝ այնտեղի թագուհի Կլեոպատրայի մոտ: Արդեն Ալեքսանդրիայից Հոմի Ծերակոյտին ուղարկված պաշտոնական զեկուցագրում Անտոնիոսն իր ապաշնորհությունն ու մեղքը թաքցնելու նպատակով ռազմական վիթխարի ծախսերն ու մարդկային ահռելի կորուստները բացատրում էր իբրև թե՛ հայոց թագավորի դավաճանությամբ:

Իր վարկաբեկված հեղինակությունը վերականգնելու նպատակով նա ծրագրում է գրավել և կողոպտել Հայաստանը: Դիմելով խորամանկության՝ նախ փորձում է Արտավազդին ծուղակը գցել: Անտոնիոսը հայոց արքային հրավիրում է Ալեքսանդրիա՝ իբր պարթևների դեմ հաջորդ տարի ձեռնարկելիք արշավանքի ծրագիրը քննարկելու: Արտավազդը մերժում է այդ հրավերը: Այնժամ Անտոնիոսը հատուկ խնամախոսներ է ուղարկում Արտաշատ՝ Արտավազդին հրավիրելով Ալեքսանդրիա՝ հայոց արքայադստեր և իր ու Կլեոպատրայի որդի Ալեքսանդրի ամուսնության հարցը քննարկելու:

Մերժում ստանալով՝ Անտոնիոսը 60-հազարանոց բանակով *Ք.ա. 34 թ. աւ-*



Կլեոպատրա, Եգիպտոսի թագուհի

*սանն* արշավում է Հայաստան և ուղղվում դեպի Արտաշատ: Ցանկանալով երկիրը գերծ պահել ավերածություններից ու զոհերից՝ Արտավազդ II-ը որոշում է բանակցել հռոմեական եռապետի հետ: Անշուշտ, դա ազնիվ, ինքնազոհ, սակայն միամիտ քայլ էր: Բանակցությունների ընթացքում Արտավազդն իր ընտանիքի հետ ձերբակալվում է, ապա շրթայակապ ուղարկվում Ալեքսանդրիա: Անտոնիոսի այս տմարդի քայլը դատապարտել են անգամ իրենք՝ հռոմեացիները: Հայաստանում թողնելով հռոմեական կայազոր՝ Անտոնիոսը թալանում է արքունի գանձերը, հսկայական ավարով ու գերիններով վերադառնում Եգիպտոս: Հայոց թագաժառանգ Արտաշեսը հանդուգն հարձակմամբ փորձում է ազատել գերի արքային ու իր հարազատներին, սակայն, ապարդյուն: Դարտություն կրելով՝ Արտաշեսն ապաստան գտավ պարթևների մոտ:

Ալեքսանդրիայում Անտոնիոսը կազմակերպում է հաղթահանդես, որի ընթացքում հայոց արքան ու իր ընտանիքի անդամները, ոսկե շրթաններով շրթայված, անցնում



են քաղաքի փողոցներով: Հոսմեացի գորավարը նրանց հորդորում է ներում հայցել, խոնարհվել Կլեոպատրային և նրան մեծարանքի խոսքեր շոայել: Սակայն հայոց արքան ու թագուհին, նրանց զավակներն անցնում են հպարտ ու արժանապատիվ, և ինչպես գրում է ժամանակակից հույն պատմիչը. «Տոյց են տալիս իրենց ոգու արիությունը»: Հայերի նման կեցվածքը մեծ տպավորություն է թողել, իսկ գայրացած Կլեոպատրան, չներելով նրանց, կարգադրել է զնդան նետել:

Եռապետեր Անտոնիոսի ու Օկտավիանոսի միջև վճռական ճակատամարտը տեղի է ունենում Ք.ա. 31 թ. սեպտեմբերի 2-ին

**Ալեցիոմի** իրվանդանից ոչ հեռու: Այստեղ Անտոնիոսը լիակատար պարտություն է կրում և փախչում Ալեքսանդրիա: Քիչ անց՝ հոկտեմբերին, Կլեոպատրայի կարգադրությամբ Արտավազդ II-ը մահապատժի է ենթարկվում: Իրենք էլ՝ Անտոնիոսն ու Կլեոպատրան, շուտով ինքնասպանությամբ վերջ են տալիս իրենց կյանքին:

**Արտավազդ II-ի** կյանքն ու նահատակությունը, անմնացորդ հայրենանվեր գործունեությունը նրա համար ապահովել են բացառիկ պատվավոր տեղ հայոց բազմադարյան պատմության մեջ: Պատահական չէ, որ դեռևս իր կենդանության օրոք նա հռչակվել է «**Աստվածային**» պատվանունով:

### Հարցեր և առաջադրանքներ

1. Երբ և ինչպես էր փոխվել ուժերի հարաբերակցությունը Առաջավոր Ասիայում: Ինչ քաղաքականություն էր վարում Հայաստանը. ճիշտ էր արդյոք այն:
2. Ներկայացրեք Կրասոսի պարթևական արշավանքը: Ինչ դիրքորոշում ուներ Արտավազդ II-ը: Ինչ ավարտ ունեցավ արշավանքը:
3. Երբ է կազմավորվել Երկրորդ եռապետությունը, ովքեր էին անդամները: Ներկայացրեք Անտոնիոսի պարթևական և հայկական արշավանքների ընթացքը և արդյունքները:
4. Բնութագրեք Արտավազդ II-ին:

## § 5. ԱՐՏԱՇԵՍՅԱՆ ԹԱԳԱՎՈՐՈՒԹՅԱՆ ԱՆԿՈՒՄԸ

**Արտաշես II:** Հայ ժողովուրդը երիտասարդ ու եռանդուն թագաժառանգի՝ Արտաշեսի գլխավորությամբ ոտքի կանգնեց հոռոմեական զավթիչների դեմ: Երկրում սկսվեցին զանգվածային հակահոռոմեական զինված ելույթներ, որոնք ձնվեցին անասելի դաժանությամբ: Արտաշեսը ստիպված էր իր զորքերով հեռանալ Պարթևստան:

Հռոմի ծավալվելը դեպի Արևելք և Հայաստանի ռազմակալումը կտրուկ փոխեցին քաղաքական իրադրությունն Առաջավոր Ասիայում: Պարթևները հիանալի էին գիտակցում, որ Հայաստանից հետո իրենք են լինելու Հռոմի հաջորդ թիրախը, հանգամանք, որ ստիպել է Հրահատ IV-ին փոխել իր վերաբերմունքը Հայաստանի

հանդեպ: Արդյունքում նա ոչ միայն քաղաքական ապաստան է շնորհել հայոց թագաժառանգին և իր դստերը կնության տվել նրան, այլև ռազմական զգալի օգնություն տրամադրել:

Այդ պայքարն ավելի արդյունավետ դարձավ **Ալեցիոմի** ճակատամարտից հետո: Հայ-պարթևական միացյալ բանակը Արտաշեսի գլխավորությամբ մտավ Հայաստան և մի քանի ճակատամարտերում պարտության մատնելով հոռոմեական լեգեոններին՝ նրանց դուրս շարտեց երկրից: Այս հաղթանակների շնորհիվ **Արտաշեսն Արտաշատում** մեծ հանդիսավորությամբ **օծվեց հայոց թագավոր** (Ք.ա. 30-20 թթ.):

Ինչպես ցույց տվեցին հետագա իրադարձությունները, նոր թագավորը վառ ան-





Տիգրան IV-ի դրամը  
Դարձերեսին՝ Տիգրանի քույր Էրատուն

հատականություն էր: Ստանալով հոր՝ Արտավազդ II-ի մահապատժի լուրը՝ Արտաշեսը կարգադրում է սրի քաշել Հայաստանում գտնվող բոլոր հռոմեացիներին, որը ցնցող տպավորություն է թողել Հռոմում:

Երիտասարդ ու եռանդուն թագավորը պատերազմում է Հռոմի դաշնակից Ատրպատականի թագավորության հետ և պարտության մատնում հակառակորդին: Այդ երկիրը միացվում է Հայոց թագավորությանը, իսկ թագավորն էլ գերի է վերցվում: Պատահական չէ, որ Արտաշես II-ի դրամների վրա դրոշմված է մեծադիրը՝ «Արքայից արքա» մակագրությունը:

Արտաշես II-ի շեշտված հակահռոմեական դիրքորոշումը և հատկապես դաշինքը Պարթևստանի հետ մեծապես հակասում էին Հռոմի արևելյան քաղաքականության շահերին, խոչընդոտում նրա գավթողական ծրագրերին: Նման պայմաններում Հռոմը չէր կարող հանդուրժել ինքնուրույն և անցանկալի հայոց թագավորին, մանավանդ որ կարելի էր նրա փոխարեն գահ բարձրացնել Հռոմում գտնվող կրտսեր եղբորը՝ Տիգրանին: Ահա այս խնդրի լուծումն է իր առջև դրել Օկտավիանոսը, որը Ք.ա. 27 թվականից պաշտոնապես իրեն հայտարարել է Օգոստոս («Սրբազան») և հիմք դրել կայսերական վարչակարգին:

Օկտավիանոս Օգոստոսը ջանք չի խնայում հռոմեական գերիշխանությունն ու ազդեցությունը Առաջավոր Ասիայում հաստատելու ուղղությամբ: Դա, բնականաբար, հնարավոր էր միայն Արտաշես II-ին սպարեզից հեռացնելու ճանապարհով: Արդեն Ք.ա. 20 թ. հռոմեական բանակը կանգնած էր Հայաստանի սահմանագլխին: Հենց այդ ժամանակ էլ **Արարաշարում դավադրարար պայանվում է Արարաշես II-ը:**

Ստանալով Արտաշես II-ի սպանության լուրը՝ հռոմեական զորքն անարգել մտնում է Հայաստան և շարժվում դեպի Արտաշատ: Հռոմեացիներն իրենց հետ բերում էին Հայաստանի նոր թագավորին՝ Արտաշեսի կրտսեր եղբայր Տիգրանին:

**Վերջին Արտաշեսյանները:** Արտաշատից ոչ հեռու բանակած հռոմեական ճամբարում հայոց թագավորական իշխանության պատվանշանները դրվեցին **Տիգրան III-ի (Ք.ա. 20-8 թթ.)** գլխին: Այս իրադարձությունը Հռոմում դիտվել է իբրև իրենց իշխանության հաստատում Հայաստանում: Եվ պատահական չէ, որ հենց այդ շրջանում Հռոմում թողարկվել են դրամներ՝ «Հայաստանը նվաճված» մակագրությամբ: Հայաստանը թուլացնելու նպատակով նրանից անջատվեց Ատրպատականը, և այստեղ թագավոր կարգվեց Հռոմի կամակատար Արիոբարզանեսը:

Գահակալման վերջին շրջանում Տիգրան III-ը ձերբազատվեց Հռոմի միջամտություններից և մերձենալով Պարթևստանին՝ սկսեց վարել ինքնուրույն քաղաքականություն: Ապացույցը պահլավերեն մակագրությամբ նրա դրամների թողարկումն էր:

Տիգրան III-ի մահից հետո, առանց Հռոմի հետ համաձայնեցնելու, գահ բարձրացավ նրա որդին՝ **Տիգրան IV-ը (Ք.ա. 8-5 թթ.)**, որը թագավորեց որպես անկախ ու ինքնիշխան թագավոր: Հռոմում սա ընկալվեց որպես իրենց տիրապետության դեմ ապստամբություն: Դեպքերի ժամանակակից հռոմեական պատմիչն այդ կապակցությամբ շեշտել է, թե՛ «Արևելքում իրենց ամենից շատ հոգսեր պատճառել են հայերը»:



Ք.ա. 5 թ. Օգոստոսը մեծ բանակով Հայաստան է ուղարկում իր որդեգիր Գայոս Կեսարին, որը, գահընկեց անելով Տիգրան IV-ին, թագավոր է հայտարարում նրա հորեղորր՝ Արտավազդ III-ին (Ք.ա. 5-2 թթ.): 25 տարի Հռոմում ապրած, դաստիարակված և հայ իրականությունից խորթացած այս թագավորը երկիրը կառավարում էր հռոմեական օրենքներով և զբաղվում անզուսպ թալանով: Չհանդուրժելով այս վիճակը՝ հայերը Տիգրան IV-ի գլխավորությամբ Ք.ա. 2 թ. ապստամբում են Հռոմի թեկնածուի դեմ և երկրից դուրս վտարում նրան ու օժանդակող զորամասերը: Կրկին գահ է բարձրանում Տիգրան IV-ը, այս անգամ բրոջ՝ *Էրաստոյի* հետ միասին (Ք.ա. 2 - Ք.ա. 1 թթ.): Տիգրան IV-ի դրամների վրա սա պատկերված է Արտաշեսյանների ավանդական թագով, իսկ դրամի հա-

կառակ կողմում էրատոն է՝ վարսերը գլխի շուրջը հավաքած՝ «Էրատոն՝ Տիգրան արքայի քույրը» հունարեն մակագրությամբ:

Սակայն Տիգրան IV-ին վիճակված չէր երկար կառավարել: Ք.հ. 1 թ. նախակովկասյան տափաստաններից Մեծ Հայքի տարածք ներխուժած սարմատական քոչվոր ցեղերի դեմ ճակատամարտում նա զոհվում է: Ինչպես պատկերավոր արձանագրել է Տակիտոսը՝ «Հայերը մնացին առանց թագավորի, անտերուն»:

Վերջին Արտաշեսյան Տիգրան IV-ի սպանությամբ Հայաստանի առջև ծառայալ նոր արքայատոհմ հաստատելու խնդիրը: Թեև այն առաջին հերթին ներքին խնդիր էր, սակայն անմիջապես ձեռք բերեց միջազգային քաղաքական հնչեղություն՝ դառնալով Հռոմի և Պարթևստանի հակամարտության և մրցակցության գլխավոր առարկան:

### Հարցեր և առաջադրանքներ

1. Ներքաղաքական ինչ իրավիճակ էր Հայաստանում Արտավազդ II-ի և նրա ընտանիքի գերեվարությունից հետո:
2. Ինչ քաղաքականություն էր վարում Արտաշես II-ը: Ինչո՞ւ էր Հռոմը ջանում ապարեզից հեռացնել Արտաշես II-ին:
3. Ինչ քաղաքականություն էր վարում Տիգրան III-ը:
4. Ներկայացրե՞ք Հայաստանի ներքաղաքական և արտաքին քաղաքական դրությունը վերջին Արտաշեսյանների օրոք:

## Թեմա 4. ՄԵԾ ՀԱՅՔԻ ԱՐՇԱԿՈՒՆՅԱՑ ԹԱԳԱՎՈՐՈՒԹՅՈՒՆԸ I-III ԴԱՐԵՐՈՒՄ

### § 1. ՀԱՅԱՍՏԱՆԸ ԵՎ ՀՌՈՄԻ ՈՒ ՊԱՐԹԵՎՍՏԱՆԻ ՄՐՑԱԿՑՈՒԹՅՈՒՆԸ

**Մեծ Հայքի թագավորությունը դրածո թագավորների օրոք:** Տիգրան IV-ի մահից հետո Արտաշեսյանների արքայատոհմն այլևս շարունակություն չունեցավ: Հռոմը Հայաստանում գահ էր բարձրացնում Արտաշեսյան արքայատոհմի հետ հեռավոր արյունակցական կապ ունեցող անձանց, որոնց տրվում էին «Արտաշես»

կամ «Տիգրան» դինաստիական անուններ, և որոնք հավատարմության երդում էին տալիս իրենց հովանավոր կայսրին:

Օգոստոսի հեռագնա ծրագրի համաձայն՝ Հայաստանի թագավոր է նշանակվում Ատրպատական-Մարաստանի արքա Արիոբարզանեսը, որը հավանաբար մայրական կողմից ուներ Արտաշեսյան ծա-



գում: Այդ քայլով Հոռմը, ընդդեմ իր մշտական ախոյան Պարթևստանի, Արևելքում *ձեռք էր բերում Հայաստան-Ատրպատական միացյալ և ուժեղ թագավորություն*: Սակայն Արիորարգանեսի՝ Հայաստանի թագավոր նշանակվելը տեղիք տվեց բուն ապստամբական ելույթների, որոնք **2 թ.** վերածվեցին *հակահռոմեական հուժկու ապստամբության*: Այն ճնշելու համար Հայաստան ժամանեց հռոմեական զորքը: Հերոսական ու համառ դիմադրությամբ հատկապես աչքի ընկավ *Արրազկես* ամրոցը: Իսկ այն բանից հետո, երբ վերջապես հսկայական զոհերի գնով ամրոցը գրավվեց, և կողմերի միջև սկսվեցին բանակցություններ, բերդապահ Ադդոնը անսպասելիորեն դաշունահարեց հռոմեացի զորավարին, իսկ ինքն էլ ինքնասպան եղավ:

Ճնշելով ապստամբությունը՝ հռոմեացիները Հայաստանում թագավոր հռչակեցին նախ՝ Արիորարգանեսին (2-4 թթ.), ապա՝ նրա որդուն՝ Արտավազդ IV-ին (4-6 թթ.): Սակայն սրանք զոհ գնացին հայերի կազմակերպած դավադրություններին: Այս անգամ դարձյալ Օգոստոսի հանձնարարությամբ Հայաստան ժամանեց հայկական գահի նոր թեկնածուն՝ Հրեաստանի թագավորի թոռը՝ Տիգրան V-ը, որն իգական գծով Արտաշեսյան շառավիղ էր: Հայոց այս «նոր թագավորը» գահակալեց ընդամենը մի քանի ամիս և գահընկեց եղավ հայերի ապստամբության հետևանքով:

Ընդդիմանալով Հռոմի կողմից Հայաստանում թագավոր նշանակվելու կարգին՝ հայերը գահ բարձրացրին Տիգրան IV-ի քրոջը՝ *Էրապոյին* (6-12 թթ.), իսկ այնուհետև՝ Պարթևստանի երբեմնի թագավոր *Վոնոն Արշակունուն* (12-16 թթ.): Ինչպես էրատոն, այնպես էլ Վոնոնը չճանաչվեցին Հռոմի կողմից:

18 թ. հայերի համաձայնությամբ և Հռոմի օժանդակությամբ պոնտական արքայազն *Ջենոնը* Արտաշատում թագադրվեց Մեծ Հայքի թագավոր (18-34 թթ.): Նոր թագավորը լայն ժողովրդականություն էր վայելում հայ ավազանու շրջանում: Նա

մեծացել և դաստիարակվել էր հայերի մեջ, ուստի ոչ միայն յուրացրել էր տեղի լեզուն և սովորույթները, այլև վարում էր Հայաստանի պետական շահերից բխող քաղաքականություն: Եվ պատահական չէ, որ հայերը նրան տվել են դինաստիական Արտաշես անունը: Հռոմեական պատմիչ Տակիտոսի պատկերավոր արտահայտությամբ՝ «Ջենոնի գլխին թագ դրվելուն պես արքային պաշտած հայերի քազմությունը ողջունեց նրան՝ իբրև Արտաշեսի»: Ջենոն-Արտաշեսը միակն է առաջին դարի սկզբներին Հայաստանում գահակալած թագավորներից, որը գահընկեց չեղավ հայերի կողմից և մահացավ իր քնական մահով:

Ջենոն-Արտաշեսից հետո Հոռմը հայոց գահը հանձնեց վրաց արքայազն Միիրդատ Իբերացուն (35-37 թթ.): Նրա գահակալումը Հայաստանում նշանավորվեց ապարապետ *Գիսակ Դինսարյանի* գլխավորած հակահռոմեական հուժկու ապստամբությամբ, որի շնորհիվ Միիրդատը դուրս վոնդվեց, իսկ երկիրն էլ մինչև 43 թ. լիովին վերականգնեց իր անկախությունը: Հայ ժողովրդի շարունակական ու հերոսական պայքարը Հռոմի դեմ, նրա ազատատենչ ոգին արտահայտվել են հռոմեական նշանավոր բանաստեղծ Վերգիլիոսի հետևյալ դիպուկ այլաբանության մեջ՝ «կամուրջներ չհանդուրժող Արաքս», այսինքն՝ օտար տիրապետությունը չհանդուրժող Հայաստան:

Բայց Հոռմը շարունակեց նույն քաղաքականությունը: *Այդ ընթացքում գահակալած Սանաարուկ I-ից* հետո Հռոմի համաձայնությամբ Հայաստանում կրկին թագավոր նշանակվեց Միիրդատը: 51 թ. հայոց գահը բռնազավթեց վերջինիս եղբորորդին՝ *Տուազամիզդը*՝ նախապես սպանելով հորեղբորը և նրա ամբողջ ընտանիքին:

Նման դաժան իրականությունն է ստիպել հայերին փնտրել այլընտրանքային դաշնակցություն: Այդ ժամանակ է, որ Պարթևստանը սկսում է ձեռք բերել իր նախկին հզորությունը: Հայաստանը կանգնած էր երկընտրանքի առջև՝ Հռոմ, թե՛ Պարթևստան:



**Հայաստանը և հոռմեա-պարթևական հակամարտությունը:** Հայաստանում հոռմեա-պարթևական մրցակցության հետևանքով քաղաքականապես անկայուն վիճակ էր ստեղծվել, ինչը սպառնում էր երկրի անվտանգությանը: Հայոց գահին ամրանալու՝ Հռադամիզդի ճիզերն անհաջողության էին դատապարտված, բանգի նա իր հանցավոր գործողություններով ատելի էր հայ ժողովրդին: Իսկ հոռմեացիներն էլ, ձևացնելով, թե հավանություն չեն տալիս ոճրագործությանը, պահանջում էին, որ վրաց արքա Փարսմանը հեռանա Հայաստանից՝ իր հետ տանելով Հռադամիզդին: Կապաղովկիայի հոռմեական կուսակալը ներխուժում է Հայաստան, ավերածություններ պատճառում երկրին, սակայն հայերից հուժկու հարված ստանալով՝ գնում է Հռադամիզդի մոտ: Նրանից կաշառվելով՝ հոռմեական կուսակալը Հռադամիզդին անօրինաբար թագադրում է Արտաշատում: Շուտով հոռմեական կուսակալն իր հրամանատարությունից կարգադրություն է ստանում հեռանալու Հայաստանից՝ պարթևների հետ պատերազմից խուսափելու համար:

Պարթևստանում գահ է բարձրանում **Վաղարշ I Արշակունին (51-80 թթ.)**, որն իր թագավորությունում գահակալական կրիվներին վերջ տալու և Հռոմի նվաճումներին դիմակայելիս դաշնակից երկրների զինակցություն ստեղծելու նպատակով որոշում է իր եղբայրներին բազմեցնել Հայաստանի և Ատրպատականի գահերին: Նա առանց դժվարության դա իրագործում է Ատրպատականում, որտեղ թագավորեցնում է Բակուրին: Հայաստանում Վաղարշի ծրագրի իրագործման համար նպաստավոր իրավիճակ էր ստեղծվել, հայերը ցանկանում էին ազատվել իրենց համար ատելի դարձած Հռադամիզդից և ընդհանրապես հոռմեական որևէ միջամտությունից: Հայոց ավագանին անայլայլ ընտրում է Պարթևստանի առաջարկությունը. չէ որ պարթևները չէին սպառնում հայկական պետականության գոյությանը, կենցաղով, բարբերով, սովորույթներով մոտ էին հայերին և համատեղ

ուժերով կարող էին հակահարված տալ Հռոմի ծավալապաշտությանն Արևելքում: Ստեղծվում է հայ-պարթևական զինակցություն ընդդեմ Հռոմի և նրա վրացի դրածոյի:

**52 թ. Վաղարշը և Տրդատը** պարթևական զորքով մտնում են Հայաստան, դուրս վնդդում Հռադամիզդին ու նրա մերձավորներին: Արտաշատ մայրաքաղաքը և Տիգրանակերտը բացում են իրենց դռները նրանց առջև: Սակայն ցրտաշունչ ձմռան և պարթևական զորքում սկսված հիվանդությունների հետևանքով պարթևական զորքը հեռանում է երկրից: Հռադամիզդը կատաղած վերադառնում է Արտաշատ և որոշում հաշվեհարդար տեսնել հայ քնակչության հետ: Սակայն զինված ժողովուրդը շրջապատում է պալատը, և Հռադամիզդն իր կնոջ հետ փախուստի է դիմում՝ ապավինելով իրենց ձիերի արագությանը:

Հայ-պարթևական միացյալ ուժերի գլուխն անցած՝ **Տրդատը գալիս է Արարատը և նստում հայոց գահին:** Սակայն մինչ վերջնականապես հայոց արքա հաստատվելը նրան մեծ փորձություններ էին սպասում:

**Տասնամյա պատերազմը, Հռանդեայի պայմանագիրը:** Հայաստանում տեղի ունեցող իրադարձությունները Հռոմում դիտվեցին որպես կայսրության՝ Արևելքում վարած քաղաքականության խոշոր պարտություն:

Հռոմի Ներոն կայսեր (54-68 թթ.) հրամանով Արևելք է գալիս հոռմեական զորավար Կորբուլոնը: Սկսվում է տասնամյա **հոռմեա-պարթևական պայտերազմը (54-64 թթ.):** Կայսրության փոքրասիական նահանգներից զորահավաք կատարելով՝ Կորբուլոնը համալրում է հոռմեական արևելյան լեգեոնները: Այդ բոլոր ուժերը տեղակայվում են Մեծ Հայքի արևմտյան սահմանի՝ Եփրատի երկայնքով, և գետի վրա կամուրջներ են զգվում գետանցման նպատակով: Ի թիվս այլոց՝ հյուսիսից Կորբուլոնին դաշնակցում էր վրաց Փարսման թագավորը, որը հոռմեացիներին իր հավատարմությունը ցույց տալու համար սպանել էր իր որդուն՝ Հռադամիզդին:

Հոմեական լրտեսական ցանցին հաջողվել էր Պարթևստանում ներքին խռովություններ հրահրել, ինչը ստիպում է Վաղարշին իր հիմնական ուժերը հեռացնել Հայաստանից: Կորբուլոնը մեծաքանակ լեգեոններով 58 թ. ներխուժում է Մեծ Հայքի թագավորություն:

Տրդատը, իր հետ եղած ուժերը քավարար չհամարելով, աշխատում է խուսափել Կորբուլոնի հետ ուղղակի բախումից և առանձին վայրերում դիմադրական գործողություններ է վարում, մինչ Վաղարշը օգնության կգար: Իր հերթին Կորբուլոնը, ձգտելով թուլացնել երկրի պաշտպանական ուժերը, սկսում է ավերել իր ճանապարհին հանդիպող ամրոցները, շարժվում է Արտաշատի ուղղությամբ: Տրդատը փորձում է դիմադրություն կազմակերպել, սակայն իր գորաջոկատի փոքրաթիվ լինելու հետևանքով հեռանում է Ատրպատական՝ իր եղբոր՝ Բակուրի մոտ:

Կորբուլոնը մտնում է Արտաշատ և քանդում քաղաքը: Հոմեացիների վայրագությունը սաստկացնում է հայ ժողովրդի գայլույթը, և գավթիչներին ցույց տրվող դիմադրությունը ստանում է համընդհանուր բնույթ:

59 թ. դեպի Տիգրանակերտ շարժվող Կորբուլոնի զորքը ճանապարհին հանդիպում է հայ հայրենասերների դիմադրությանը: Երբ հոմեացիները ճամբար էին խիել Տարոն գավառում, մի խիզախ հայ ազնվական փորձում է սպանել Կորբուլոնին, սակայն վերջինիս վրանի մոտ հոմեական պահակազորը նրան բռնում է, և նա հերոսաբար նահատակվում է:

Հոմեացիներն ուժգին դիմադրության են հանդիպում Լեգարդա ամրոցի մոտ, որտեղ փակվել էին հայկական ուժերը: Նրանք ամրոցից խիզախորեն գրոհում էին թշնամու դիրքերի վրա: Սակայն ուժերն անհավասար էին. Կորբուլոնը կարողանում է գրավել ամրոցը: Այդ նույն ժամանակ Տրդատը, անցնելով մարերի տարածքով, մտնում է Հայաստան: Նրա դեմ Կորբուլոնը մի զորամաս է ուղարկում, ապա անձամբ շարժվում իր հիմնական ուժերով: Պատերազմի այս փուլում երկրին մեծ ավե-



Տրդատ I Արշակունի

րածություններ են պատճառվում, Տրդատը ստիպված կրկին նահանջում է:

Հայաստանի համար այդ ծանր պահին Ներոնը հայոց գահին է բարձրացնում Կապադովկիայի թագավորական ընտանիքից *Տիգրան VI-ին* (60 թ.), ինչը նույնպես մեծ դժգոհություն է առաջացնում երկրում: Ավելին՝ Տիգրան VI-ը հարձակվում է Ադիաբենեի վրա:

Վաղարշը Տրդատին թագադրում է և, զորք հատկացնելով, ուղարկում է Հայաստան՝ դուրս վտարելու հոմեական դրածոյին: Ինքը նույնպես շարժվում է ընդդեմ հոմեական լեգեոնների:

Կորբուլոնը շտապում է Տիգրան VI-ին օգնության ուղարկելու երկու լեգեոն՝ միևնույն ժամանակ պատվիրելով չշտապել և հանդարտություն պահպանել: Նա Ներոնին խնդրում է իր փոխարեն Հայաստան ուղարկել այլ զորավարի, քանի որ Վաղարշի հարձակումը սպառնում էր հոմեական Սիրիա (Ասորիք) նահանգին: Իսկ Տիգրան VI-ը, խուսափելով պարթևների և նրանց միացած ադիաբենցիների հարձակումից, փակվում է Տիգրանակերտում՝ ապավինելով քաղաքում գտնվող հոմեական կայազորի պաշտպանությանը:

Մծբինում հոմեա-պարթևական բանակցությունների արդյունքում զինադադար է կնքվում: Կորբուլոնը փորձության



չնթարկվելու համար Տիգրանակերտից դուրս է բերում հոռմեական զորամասը, որի հետ հեռանում է նաև գահընկեց արված Տիգրան VI-ը: Կորբույունը ձմեռում է Կապադովկիայի սահմանում և այնտեղից անցնում իր հրամանատարությանը հանձնված Սիրիա նահանգը: Բանակցությունների արդյունքում Վաղարշի՝ Հոռմուղարկած դեսպանների առաջարկը՝ պայմանագիր կնքել և Տրդատին ձանաչել թագավոր, Ներոն կայսրը մերժում է: Վաղարշը վերսկսում է ռազմական գործողությունները:

**61 թ.** Արևելք է ուղարկվում *Պետրոս* զորավարը, որը, գալով Կապադովկիա, պետք է հետևեր Հայաստանի գործերին: Նա հաջորդ տարում մտնում է Հայաստան և շարժվում դեպի Տիգրանակերտ: Անցնելով Արածանի գետը՝ հոռմեական զորքը

բանակ է դնում *Հուանդեա (Եսանդ)* կոչվող վայրում: Հայ-պարթևական զորքը, ջախջախելով Հայկական Տավրոսի լեռնանցքներում տեղակայված հոռմեական կայազորերը, շրջապատում է Պետոսի ճամբարը: Տեղի ունեցած ճակատամարտում հոռմեացիները մեծ կորուստներ են կրում: Պետոսը հաշտություն է խնդրում: Հաղթողները զինաթափում և ծաղրուծանակի են ենթարկում հոռմեական զորքին, որին ստիպում են ծնկաչոք անցնել նիզակներով պատրաստված «լծի» տակով, ինչը մեծագույն խայտառակություն էր հոռմեական անպարտելի համարվող բանակի համար:

Պարտված Պետոսը կեղծ լուր է ուղարկում Հոռմ, թե Արևելքում իրավիճակը չի փոխվել: Այնինչ Ներոնը տեղեկացել էր, որ հոռմեական լեզեռնները, պարտություն կրելով, հեռացել էին Հայաստանից:

### Հարցեր և առաջադրանքներ

1. Ինչ քաղաքականություն էր վարում Հոռմը Հայաստանում Արտաշեսյան արքայատոհմի վերացումից հետո: Ներկայացրե՞ք Հայաստանի ներքաղաքական իրադրությունը դրա՞ծ թագավորների օրոք:
2. Ինչո՞ւ հայոց ավագանին ընտրեց պարթևամետ քաղաքականություն: Արդյո՞ք ճիշտ ընտրություն էր դա:
3. Ինչպե՞ս արձագանքեց Հոռմը Հայաստանում տեղի ունեցած գահակալական փոփոխությանը:
4. Ներկայացրե՞ք տասնամյա պատերազմի ընթացքը: Արդարացվա՞ծ էր արդյոք Արտաշատի ավերումը հոռմեացիների կողմից:

## § 2. ՄԵԾ ՀԱՅՔԻ ԹԱԳԱՎՈՐՈՒԹՅՈՒՆՈՒՄ ԱՐՇԱԿՈՒՆԻՆԵՐԻ ԳԱՀԱԿԱՆՈՒՄԸ

**Տրդատ I Արշակունին՝ Մեծ Հայքի թագավոր:** Ներոն կայսրը, ձգտելով փրկել Հոռմի հեղինակությունը, 63 թ. Վաղարշ I-ին հայտնում է, որ եթե Տրդատն անձամբ մեկնի Հոռմ և թագը ստանա իրենից, ապա ինքը կձանաչի նրան Հայաստանի թագավոր: **64 թ.** Հայաստան է գալիս Կորբույունը և բանակցություններ վարում Վաղարշի ու Տրդատի հետ: Նրանք ընդունում են Ներոնի առաջարկը՝ պահանջելով, որ խաղաղության *պայմանագիր*

*ը* կնքվի *Հուանդեայում*՝ հոռմեացիների պարտության վայրում: Ի նշանավորումն հաշտության՝ Հուանդեայում Տրդատը թագը հանում և դնում է հոռմեական զորքի բերած՝ Ներոնի արձանի մոտ՝ այն կայսեր ձեռքից Հոռմում ստանալու պայմանով:

65 թ. Տրդատը մեծ շքամբով՝ իր ընտանիքով և 3000 հայ ու պարթև հեծյալներով, ուղևորվում է Հոռմ: Ուղևորության հսկայական ծախսերը հոգում էր կայսերական գանձարանը: Ճանապարհին ընկած



քնակավայրերի քնակիչները նրանց ընդունում էին մեծ խանդավառությամբ: Հռոմում Ներոնը Տրդատի պատվին կազմակերպում է տոնահանդեսներ և հանդիսավորությամբ թագադրում, ապա մեծ գումար և արհեստավորներ է տալիս՝ Կորբուլոնի կողմից ավերված Արտաշատը վերականգնելու համար: Տրդատ I-ը հաջորդ տարի վերադառնում է Հայաստան: **Տրդատ I-ի** գահակալության ընթացքում (66-88 թթ.) միջազգային ասպարեզում Հայաստանի վիճակը կայունանում է: Վերականգնվում է Արտաշատ մայրաքաղաքը: Տրդատը կառուցապատում է հինավուրց Գառնու ամրոցը՝ իր շինություններով և Արեգ-Միհրի տաճարով:

Տրդատ I-ի թագավորության վեցերորդ տարում (72 թ.) Մեծ Հայքի թագավորության խաղաղ կյանքն ընդհատվեց հյուսիսից՝ Կովկասից, ալանների ներխուժման հետևանքով: Տրդատ I-ը ալանների դեմ ռազմերթի ելավ, սակայն կովի ժամանակ ալաններից մեկը պարան գցեց նրա վրա՝ փորձելով գերեվարել: Տրդատին հաջողվեց իր սրով կտրել պարանը և խուսափել վտանգից: Ալանները դուրս վտարվեցին երկրից:

**Սանատրուկ II:** Տրդատ I-ին հաջորդում է **Սանատրուկ II-ը** (88-110 թթ.): Նրա մասին հույն պատմիչ Արիանոսը գրել է. «Հայոց թագավոր Սանատրուկն ուներ միջակ հասակ, քայց հակված էր դեպի ամեն մի մեծ քան և մանտվանդ դեպի պարերազմական գործերը: Նա հավարարիմ պահապան էր արդարադարության և իր կենցաղավարության մեջ զուսպ էր, նաև չարիավոր ու ողջամիտ էր, ինչպես լավագույնները՝ հույների և հռոմայեցիների մեջ»:

Սանատրուկն իր աթոռանիստն էր դարձրել նոր հիմնադրված **Մծուքք** քաղաքը՝ Արածանիի ափին՝ Մշո դաշտում: Այստեղով անցնում էր Տիգրանակերտից Արտաշատ գնացող առևտրական և ռազմական կարևոր նշանակության ճանապարհը: Սանատրուկը մահանում է 110 թ.: Նրա գերեզմանը Բարձր Հայքի Դարանաղի գավառի Անի բերդում էր: Երկու հարյուր հիսուն տարի անց, երբ պարսից արքա Շա-

պուհ II-ի զորքերը ներխուժել էին Անի բերդը և թալանելու նպատակով ավերել էին Արշակունիների գերեզմանները, չէին կարողացել քանդել Սանատրուկի հսկայաշեն և ամրապինդ շիրիմը:

Հռոմեա-պարթևական պայմանավորվածությամբ որոշվեց, որ պարթև Արշակունիները պետք է ստանային Հռոմի համաձայնությունը՝ իրենց տոհմից նոր թեկնածուին հայոց գահին նստեցնելու համար: Երկու տերությունների միջև հարաբերությունները խիստ սրվում էին, երբ որևէ կողմը, խախտելով Հռանդեսայի դաշնագրի պայմանը, հայոց գահին էր դնում իր թեկնածուին: Նման իրավիճակ ստեղծվեց Սանատրուկից հետո՝ մինչև 117 թ.:

**Վաղարշապատ մայրաքաղաքի հիմնադրումը:** Հայոց նոր թագավոր հռչակված **Վաղարշ I-ի** (117-140 թթ.) օրոք Արարատյան դաշտում՝ Շրեշ բլրի վրա տարածվող նախկին Վարդգեսավան գյուղաքաղաքը զարգանում և վերածվում է մի մեծ քաղաքի: Թագավորը քաղաքը շրջապատում է ամուր պարիսպներով և իր անունով կոչում **Վաղարշապատ** (կոչվում էր նաև «Նոր քաղաք»): Այն դառնում է Արշակունյաց թագավորության երկրորդ մայրաքաղաքը:

Վաղարշ I-ից հետո Հայաստանի թագավոր է նշանակվում Հռոմի Ծերակույտի անդամ **Սոհեմոսը**՝ Արշակունյաց շառավղից: Նրա կյանքի որոշ դրվագներ նմանվում են Մովսես Խորենացու նկարագրած Տիգրան Վերջինի ժամանակաշրջանին, ուստի պատմագրության մեջ ընդունված է համարել, որ Սոհեմոսը հայտնի էր նաև Տիգրան անունով: Հռոմի քաղաքականությունը պարթևները համարում են Հռանդեսայի պայմանագրի խախտում և կոիվներ են մղում կայսրության դեմ: Այդ իրավիճակում Սոհեմոսը դուրս է վտարվում Հայաստանից: **161 թ.** հայոց գահը հանձնվում է **Բակուր Արշակունուն**, որին, սակայն, հռոմեացիները գահընկեց են անում և տանում Հռոմ (163 թ.): Հռոմեացիները հայոց գահին կրկին բարձրացնում են Սոհեմոս-Տիգրանին (164-185 թթ.):



**Մեծ Հայքում Արշակունիների ժառանգական իշխանության հաստատումը:** Հռոմում կայսերական գահի համար մղված պայքարի խառնաշփոթում Մեծ Հայքում գահակալում է **Վաղարշ II-ը (185-198 թթ.):** Հայաստանն այդ ժամանակաշրջանում անկախացել էր և չեզոքություն էր պահպանում Հռոմում տեղի ունեցող գահակալական կոիվների նկատմամբ: Երբ կայսերական գահի թեկնածուներից Նիգերը (Ասորիքում) նրանից օգնություն է խնդրում ընդդեմ Սևերոսի, հայոց թագավորը պատասխանում է, որ ինքը ոչ մեկին չի օգնելու: Սակայն, եթե որևէ մեկն իր վրա հարձակվի, ինքը պատրաստ է երկիրը պաշտպանելու: Կիլիկիայում՝ Իսոսի մոտ տեղի ունեցած ձակառամարտում Նիգերը սպանվում է: Սևերոսը, գալով Միջագետք, շտապում է հաշվեհարդար տեսնել նրա կողմնակիցների հետ: Չեզոքություն պահպանած հայոց թագավոր Վաղարշ II-ը բանակցությունների միջոցով հաշտություն է կնքում հռոմեական նոր կայսր Սեպտիմիոս Սևերոսի հետ:

Վաղարշ II-ի հետադարձ և հմուտ քաղաքականության շնորհիվ կայսեր հետ կնքված պայմանագրով հռոմեական լեգեոնները հեռացվում են Հայաստանից: Վաղարշ II-ը շարունակում է Վաղարշապատի կառուցապատումը: Հռոմեական կայսրը պարտավորվել էր գումար վճարել հայոց այրուձիհն, որը հյուսիսում իրականացնում էր Կովկասյան լեռնանցքների և մերձակա տարածքների պաշտպանությունը լեռնական ցեղերի հարձակումներից: Հենց

նրանց դեմ մղված պայքարում էլ զոհվում է Վաղարշը:

Վաղարշ II-ի օրոք Հայաստանն այնքան է հզորանում, որ հայ Արշակունիների թագավորական իշխանությունը դառնում է ժառանգական:

Վաղարշ II-ին հաջորդած որդին՝ **Խոսրով I-ը (198-215 թթ.),** հայոց գործով արշավում է Կովկասի լեռնական ցեղերի դեմ ձգտելով առնել իր հոր մահվան վրեժը:


Պարթևական թագավորության թուլացումից օգտվեցին թե՛ Հռոմը և թե՛ պատմության ասպարեզ մտնող Սասանյանները: Սեպտիմիոս Սևերոսի որդին՝ Կարակալյան, կայսր դառնալով, երազում էր նվաճել Առաջավոր Ասիայի երկրները: Նա 215 թ. խաբեությամբ իր մոտ՝ Ասորիք է հրավիրում Խոսրով I-ին և ձերբակալում է նրան: Այս նենգ արարքը զայրույթ է առաջացնում Հայաստանում, ուր թագավոր է հռչակվում Խոսրովի որդին՝ **Տրդատ II-ը (216-252 թթ.),** որի գլխավորությամբ հայերը ջախջախում և Հայաստանից դուրս են վտարում Կարակալյայի ուղարկած զորքը:

Այդ ժամանակ բանտարկության մեջ մահանում է Խոսրով I-ը, և նրա որդուն՝ Տրդատ II-ին, որն արդեն գահակալում էր Մեծ Հայքում, հռոմեական կայսր Մակրինոսը թագ է ուղարկում: Ի նշանավորումն հայ-հռոմեական դաշինքի վերականգնման՝ կայսրը Տրդատին վերադարձնում է Հայաստանից տարված նրա մորը՝ թագուհուն, ավարը և այն կալվածքները (Կապադովկիայում), որոնք ստացել էր դեռևս Խոսրով I-ը:

### **Հարցեր և առաջադրանքներ**

1. Ինչո՞ւ Տրդատն ու Վաղարշ I-ը պնդեցին, որ հաշտության պայմանագիրը կնքվի Հռանդեայում: Որտե՞ղ և ե՞րբ թագադրվեց Տրդատը: Ներկայացրե՞ք նրա գահակալման շրջանը:
2. Ինչպե՞ս էր քննադատում հույն պատմիչ Արիանոսը Սանատրուկ II-ին: Ո՞ր քաղաքը նա քննարկեց որպես գահանիստ. ինչո՞ւ:
3. Ինչո՞վ է նշանավորվել Վաղարշ I-ի գործունեությունը: Որո՞նք էին նրանից հետո Մեծ Հայքում իրավիճակի փոփոխման պատճառները:
4. Ե՞րբ է գահակալել Վաղարշ II-ը: Ո՞ր թագավորից է սկսվել Արշակունիների ժառանգական իշխանությունը: Ներկայացրե՞ք Խոսրով I-ի գահակալությունը:

ՀԱՅԱՍՏԱՆԸ Ք. Հ. I- II ԴԱՐՆԵՐՈՒՄ





Հայ-պարսկական և հայ-հոռմեական հարաբերությունները: Պարսկաստանում գահակալական կոիվներ են սկսվում թագավորող պարթև Արշակունիների և Պարսք նահանգի Սասանյան տոհմի ներկայացուցիչ Արտաշիրի միջև: Սասանյանների ռազմամուլ հարստության գահակալները, ձգտելով վերականգնել Աքեմենյան Պարսկաստանի նախկին հզորությունը, տարածաշրջանում մի քանի դար վարեցին ծավալապաշտ քաղաքականություն:

Մեծ Հայքի հայ Արշակունիները հավատարիմ էին մնացել իրենց դաշնակից պարթև Արշակունիներին, ուստի Սասանյանները թշնամական դիրք էին բռնել հայերի նկատմամբ:

Ի պաշտպանություն պարթև Արշակունիների՝ *Տրդատ II-ը* արշավանքներ ձեռնարկեց Պարսկաստանում 226 թ. գահին տիրացած Սասանյան արքայատոհմի դեմ՝ հասնելով մինչև *Տիգրոս*: Մովսես Խորենացին պատմում է. «Հայոց թագավորը վերադարձավ մեծ հաղթությամբ, շար ավարով ու ցնձայից ուրախությամբ, նա վերադարձավ Հայաստան՝ Արարար գավառը՝ Վաղարշապատ քաղաքը, եկավ մեծ ուրախությամբ, բարի անունով ու շար ավարով»:

Տրդատ II-ի գլխավորած պայքարը Սասանյանների դեմ, չնայած որոշակի հաջողություններին, չփրկեց պարթև Արշակունիներին:

Արտաշիրի որդու՝ Շապուհ I-ի օրոք՝ Սասանյան Իրանի հզորացման և Հռոմեական կայսրության թուլացման ժամանակաշրջանում, Հայաստանը գերծ է մնում ռազմական գործողություններից:

III դ. կեսերին, երբ Հռոմը ներքին խռովությունների հետևանքով չէր կարող զբաղվել արևելյան գործերով, Շապուհ I-ը գրոհում է Տրդատ II-ի թագավորության վրա: Հայոց արքան, որ ավելի քան երկու տասնամյակ դիմակայել էր Սասանյանների ոտնձգություններին, ստիպված էր հեռանալ Հռոմեական կայսրության սահմաննե-

րը (252 թ.): Տրդատ II-ին հաջորդած Արտավազդից հետո հայոց գահն անցնում է *Խոսրով II-ին*:

260-ական թթ. կեսերից Սասանյանները փորձել են հայոց գահին հաջորդաբար բազմեցնել իրենց մի քանի թագածառանգների, որոնք այնուհետև գահակալել են Պարսկաստանում:

Հայաստանում ստեղծված խառնաշփոթ իրավիճակը Մովսես Խորենացին (այդ օտար գահակալների ժամանակների միափյուսմամբ) բնութագրել է որպես «ժամանակ անիշխանության»՝ նշելով, որ «մեր երկիրը կառավարեց... պարսիկ գործակալների միջոցով... քսանվեց տարի» սասանյան արքա Շապուհ I-ի որդին՝ Որմիզդ-Արտաշիրը: Հայաստանի գահը 260-ական թթ. կեսերից զավթել էր Որմիզդ-Արտաշիրը (հետագայում՝ սասանյան արքա): Հայաստանում Սասանյաններն իրենց զավթումները դյուրացնելու նպատակով պարսից կրոնական սպասավորների՝ մոզերի միջոցով ձգտում էին հայերին բռնի ուժով պարտադրել Պարսկաստանում պետական կրոն հռչակված զրադաշտականությունը (մազդեզականություն):

Հայաստան ուղարկված Անակ Պարթևի երկու զավակներից կրտսերին՝ *Գրիգորին*, ըստ ավանդության՝ դայակները հասցրել էին Մաժակ-Կեսարիա, որտեղ էլ նա մկրտվել և քրիստոնեական դաստիարակություն էր ստացել: Իսկ Խոսրով II-ի որդուն՝ *Տրդատին*, դայակները փախցրել էին «կայսեր արքունիք»: Հռոմեական կայսրությունում գտնվելիս Տրդատը *հաղթել էր օլիմպիական խաղերում* և մեծ սխրագործություններ կատարել մարտի դաշտում: Դրանցից առավել նշանավորն էր 276 թ. հռոմեական կայսեր փոխարեն գոթերի իշխանի հետ ունեցած նրա հաղթական մենամարտը:

Տրդատին մեծ պատիվների են արժանացնում, պարգևներ տալիս, թագ դնում գլխին և ծիրանի պատմուճաններով զարդարում: Հռոմեական օգնական զորքով կայսր Տրդատին ուղարկում է Հայոց աշխարհ:

**Տրդատ III Մեծի գահակալումը:** Մծբինի հաշտությունը: Տրդատը հաստատվում է հայ Արշակունիների գահին 287 թ.: Այդ ժամանակ սրվել էին պարսկա-հռոմեական հարաբերությունները: Սասանյանները չէին ձանաչում Տրդատի գահակալությունը: 296 թ. պարսից արքա Ներսեհը պատերազմ է սկսում Հռոմի դեմ: Տեղի ունեցած ճակատամարտում հռոմեական բանակը պարտություն է կրում: Պատերազմական գործողությունները տեղափոխվում են Հայաստան: 297 թ. Ներսեհը, պարսից բանակով ասպատակելով երկիրը, հասնում է Բասեն գավառը և ձամբար դնում Ոսիա գյուղում: Լուսաբացին տեղի ունեցած ճակատամարտում հայ-հռոմեական միացյալ ուժերը ջախջախում են պարսից թագավորի զորքերը: Ներսեհը պարտվում է և փախուստի դիմում: Նա ստիպված էր հաշտություն խնդրել և տարածքային զիջումներ կատարել Հյուսիսային Միջագետքում:

**298 թ. Մծբինում** կնքված հռոմեա-պարսկական **40-ամյա խաղաղության պայմանագրով** Ներսեհը ձանաչում է Մեծ Հայքի թագավորության անկախությունը: **Տրդատ III-ը**, 298 թ. վերջնականապես հաստատվելով Մեծ Հայքի թագավորության գահին, վերականգնում է անկախ Հայոց աշխարհի ամբողջականությունը և սկսում է զբաղվել երկրի հզորացմամբ ու շենացմամբ:

**Պետական կարգը Արշակունիների օրոք:** Հայ ազնվականության համաձայնությամբ և աջակցությամբ հայոց գահին պարթև Արշակունիների մի ճյուղի հաստատումով և ժամանակի ընթացքում ժառանգական հայկական արքայատոհմ դառնալով՝ հայոց պետական համակարգը շարունակեց հայկական պետականության՝ հազարամյակների խորքից եկող ավանդույթները:

Տրդատ I Արշակունու ժամանակներից պետական կարգը շարունակում էր մնալ **միապետական:** Երկրի կառավարման բոլորը գլխավորում էր թագավորը, որի իշխանությունն անասիմանափակ էր: Հայոց արքային էին ենթարկվում դեռևս նախորդ

դարաշրջաններում առաջացած արքունի գործակալությունները, որոնց միջոցով նա կառավարում էր երկրի տնտեսությունը և շինարարությունը, ռազմական պաշտպանությունը, դատական և այլ բնագավառներին վերաբերող գործերը: Մեծ Հայքի թագավորության վարչական բաժանումն ավանդաբար համապատասխանում էր աշխարհների՝ նահանգների՝ բնականից գավառաբաժանման վրա հիմնված պետական, մասնատիրական և համայնքային սեփականատիրությանը գերագույն տիրոջ՝ թագավորի տնօրինությամբ:

**Տնտեսության զարգացումը: Բնակչությունը, քաղաքները և գյուղական բնակավայրերը:** Արշակունիների գահակալության առաջին հարյուրամյակները նշանավորվեցին տնտեսության վերելքով: Հատկապես նշանակալից տեղաշարժեր եղան Տրդատ I, Սանատրուկ II և Վաղարշ թագավորների օրոք:

Տրդատ I-ը շինարարական մեծ աշխատանքներ էր կատարել՝ զարկ տալով հատկապես քաղաքային և տաճարային տնտեսությունների զարգացմանը: Դրա վկայությունն են հռոմեացիների կողմից ավերված Արտաշատի վերականգնումը, հնուց գոյություն ունեցող Գառնի ամրոցում շինարարական աշխատանքները (որոնք հետագայում շարունակել է Տրդատ III-ը) և հատկապես Արեգակի տաճարի կառուցումը, ինչի մասին վկայում է Գառնիում Տրդատի թողած հունարեն արձանագրությունը:

Սանատրուկ թագավորի օրոք մեծ ուշադրություն էր դարձվում առևտրական կապերի զարգացմանը: Հայաստանն արտաքին աշխարհի հետ կապող մայրուղու վրա կառուցված Մծուրք քաղաքն այդ մասին է վկայում: Նմանապես քաղաքաշինության մեծագույն վատուակ ունի հայոց արքա Վաղարշ I-ը, որը հիմնեց Վաղարշապատ մայրաքաղաքը: Վաղարշապատի աշխատանքները շարունակվեցին նաև հետագայում: Միևնույն ժամանակ հինավուրց Արտաշատը շարունակում էր մնալ որպես մայրաքաղաք: Հայաստանի մյուս քաղաք-



ներից շատերը՝ Վան, Երվանդաշատ, Զարեհավան, Զարիշատ, Կարին, Մուշ, Արձեշ և այլն, պահպանում էին իրենց տնտեսական, մշակութային և արհեստների կենտրոն լինելու նշանակությունը:

Հայաստանը պահպանում էր իր **սագաբնակչության միաբարր ժողովրդագրական կազմը**: Միջազգային ասպարեզում առևտրական և մշակութային շփումները փոխհարստացնում էին մշակութային կյանքը: Քաղաքներում՝ հայկական բնակչության կողքին, օտարների առանձին խմբեր էին (հույներ, ասորիներ, իրանցի-

ներ և այլն) ապրում, որոնք հիմնականում զբաղվում էին առևտրով: Խաղաղ ժամանակաշրջաններում քաղաքային կյանքը բնորոշվում էր մշակութային և առևտրատնտեսական վերելքով:

Հայաստանում զարգացած էր գյուղատնտեսությունը (երկրագործություն, այգեգործություն, մեղվաբուծություն, անասնապահություն և այլն), ուստի բնակչության մեծ մասը ապրում էր գյուղերում, որտեղ հիմնականում պահպանվում էր համայնքային կյանքը:

### Հարցեր և առաջադրանքներ

1. III դարի առաջին կեսի հռոմեա-պարսկական և հայ-պարսկական հակամարտություններն ինչ փոփոխություններ մտցրին Առաջավոր Ասիայում:
2. Ինչո՞ւ էր Տրդատ II-ը արշավել Պարսկաստան, ինչով՞ ավարտվեց այն: Ինչպե՞ս է բնութագրում Մովսես Խորենացին III դարի երկրորդ կեսին Հայաստանում տիրող վիճակը: Երբ Տրդատ III-ը հաստատվեց հայոց գահին: Երբ կնքվեց Սծրինի հաշտության պայմանագիրը, վեր հանե՞ք դրա նշանակությունը Հայաստանի համար:
3. Ներկայացրե՞ք Մեծ Հայքի պետական կարգը Արշակունիների օրոք:
4. Տնտեսական ինչ առաջընթաց ունեցավ Հայաստանը Արշակունիների օրոք: Նշե՞ք այդ ժամանակաշրջանի մեծ քաղաքները: Ներկայացրե՞ք բնակչության կազմը:



Գառնիի հեթանոսական տաճարը

Թեմա 1. ՀԱՅԿԱԿԱՆ ՄՇԱԿՈՒՅԹԸ Բ.Ա. IX–Բ.Ա. III  
ԴԱՐԵՐՈՒՄ

§ 1. ՆՅՈՒԹԱԿԱՆ ՄՇԱԿՈՒՅԹԸ (Բ.Ա. IX – Բ. Ա. VII ԴԱՐԵՐ)

Մշակույթի զարգացման պատմական պայմանները: Բ.ա. IX դ. համահայկական Վանի թագավորության ստեղծումով Հայաստանը և հայ ժողովուրդը թևակոխեցին պատմության զարգացման որակապես նոր շրջան: Վերջինս բնորոշվում է մի շարք նվաճումներով: Դրանց թվում առավել կարևոր են զարգացած պետական կառուցվածքը, կրոնական համակարգը, տնտեսական կյանքի բարձր մակարդակը, կազմակերպված ոռոգման համակարգը, գրային զարգացած համակարգը, ճարտարապետության, այդ թվում՝ քաղաքաշինության բարձր մակարդակը:

Ճարտարապետություն: Վանի թագավորության հուշարձանների հնագիտական կյուրը հնարավորություն է ընձեռում համակցելու այս շրջանի ճարտարապետության և շինարարական տեխնիկայի առանձնահատկությունները: Քաղաքները հիմնականում փոված էին բարձր բլուրների շուրջը, որոնց գագաթներին վեր էին խոյանում պարսպապատ աշտարակներով միջնաբերդերը: Այստեղ կա-

Պրոնզե ցիկ Արամուսից, Բ.ա. VIII դ.



Որմանակարներ, Էրեբունի, Բ.ա. VIII դ.

ռուցվել են ջրմուղներ, ջրամբարներ, կամուրջներ, այգիներ ու քաղնիքներ, պալատներ և տաճարներ:

Վանի թագավորությունում կային թագավորանիստ, վարչատնտեսական, ռազմական, ինչպես նաև պաշտամունքային նշանակության քաղաքներ: Թագավորանիստ քաղաքների թվին էին պատկանում *Արգաշկուն, Տուշպան, Ռուսասիսիսին*: Քաղաքներն իրենց միջնաբերդի շուրջն ունեին մի միասնական տնտեսական միավորում կազմող քազմաթիվ քնակատեղիներ: Ուրարտական վարչատնտեսական խոշոր կենտրոններն էին *Արգիշտիսիսին, Թեյշեբասինին, Օշականը, Արամուսը* և այլն: Ռազմական հենակետային քաղաքները ևս կարևոր նշանակություն ունեին ժամանակի քաղաքաշինական համակարգում: Ստեղծվեցին յուրահատուկ կառույցներ՝ գորանոցներ, ախոռներ, լճակներ, քերդեր, ռազմական ճամբարներ: Բերդերն ունեին մինչև 18 մ բարձրության 2–3 շարք պարիսպներ՝ իրենց աշտարակներով և տեղ–տեղ էլ իրենց առջևում արված խրամատներով:






Հայտնի էին պետության դիցարանի գերագույն երրորդության *խաղիի, Թեյշեբայի* և *Շիվինիի* պաշտամունքային կենտրոնները: Գերագույն աստվածության խաղիի պաշտամունքային կենտրոնը Մուսասիր քաղաքն էր կամ Արդիինն: Թեյշեբա աստվածության պաշտամունքի կենտրոնը Կումենու քաղաքն էր՝ Վանա լճից հարավ-արևելք: Շիվինիի պաշտամունքի կենտրոնը մայրաքաղաք Տուշպան էր:

Վանի թագավորության քնակարանային ճարտարապետության մասին առաջին տեղեկությունները պահպանվել են Մ. հոբրենացու մոտ և վերաբերում են Տուշպային: Վերջինս, ըստ Պատմահոր հաղորդումների, բավականին մեծ, քարեկարգ, անառիկ մի բերդաքաղաք էր՝ բազմաթիվ երկհարկ և եռահարկ շենքերով: Բազմաթիվ շենքեր են կառուցվել Կարմիր բլուրի, Արագածի միջնաբերդերում: Սեպագիր արձանագրություններում պալատները հաճախ հիշատակվում են պաշտամունքային կառույցների հետ մեկտեղ:

Խոշոր տաճարներն ընդարձակ համալիրներ էին, որտեղ պաշտամունքային կառույցները միավորվում էին աշխարհիկ, տնտեսական, արտադրական ու պահեստային շենքերի հետ:

Վիմափոր կառույցները կազմել են շինարվեստի մի զգալի մասը: Այս կառույցներն ունեին նույնիսկ իրենց հովանավոր աստվածությունը՝ Աիրահինն: Դրանց թվին են պատկանում ժայռափոր սանդուղքները, խորշերը, պաշտամունքային և դամբարանային կարիքներին նվիրված արհեստական քարայրները, թունելները և այլն: Վիմափոր կառույցների առավել նշանակալից հուշարձանները Վան քաղաքի միջնաբերդի շրջակայքում էին:

Ջրանցքաշինությունը գտնվում էր կենտրոնական իշխանության հսկողության ներքո: Այս իմաստով հատկապես հայտնի են Մենուա և Ռուսա արքաների ջրանցքները, որոնք Հին աշխարհի բացառիկ կոթողներից են: Վանի թագավորության շինարվեստը հետագայում մեծ ազդեցություն ունեցավ փոքրասիական և հատկա-



Արգիշտիսի միջնաբերդի մասը և պարիսպները. Ք.ա. 776 թ. «Արականությունը» և «Նախադարանի»

պես իրանական (աքեմենյան) կառուցողական ավանդույթների վրա:

**Մետաղագործություն:** Վանի թագավորության մետաղամշակման մասին հիշատակվում է Սարգոն II-ի տեքստերում: Նրա զորքերը Մուսասիրում գրավել են 2 տոննա ոսկի, 5 տոննա արծաթ և ավելի քան 100 տոննա պղնձե, երկաթե իրեր: Կարմիր բլուրի մի կացարանից գտնվել է դրան բրոնզե փական, որի վրա պահպանվել է «Ռուսա Արգիշտիի որդի, Թեյշեբաինի քաղաքի ամրոցը» սեպագիր արձանագրությունը:

Մետաղամշակումը լայն կիրառում ուներ նաև *զինքի* և *զինամթերքի արտադրության* ասպարեզում: Հարձակողական և պաշտպանական զենքը կազմված էր տարբեր ձևերի նիզակներից, դաշույններից, թրերից, կացիներից, գուրգերից: Գտնվել են նաև ոսկուց և արծաթից օրինակներ:

Վանի թագավորության քանակի զինորների զրահը և հանդերձանքը կազմված են եղել մի քանի տեսակներից: Դատելով *Բալախարյան* դարպասների վրա եղած պատկերներից՝ *Արամու* թագավորի զինվորները հանդես են գալիս երկար, մինչև ձևերը հասնող գոտեկապ վերնաշապիկներով, գլխներին կատարավոր սաղավարտներով, փոքրիկ վահաններով, զինված են կարճ թրերով և նետ ու աղեղով: Այս նկարագրությունից պարզորեն նկատվում է, որ այստեղ պատկերված են թեթև հետևակի մարտիկները: Ծանր հետևակի սպառազինությունը կազմված էր նաև տարբեր տիպի զրահաշապիկներից, խո-

շոր մարտական վահաններից և բրոնզե գոտիներից: Վերջիններս նախշագարդ են, և բազմաթիվ նմուշներ պահվում են Մյունխենի, Նյու Յորքի թանգարաններում:

**Խնցեղործություն և քարե գտածոներ:** Ժամանակի խնցեղործ վարպետները պատրաստել են հազարավոր խնցանոթներ, որոնք ունեն բազմաբնույթ կարմրավուն, սև, դեղնավուն մակերես և կիրառական բազմաբնույթ նշանակություն:

Թաղումներից հայտնաբերված անոթների շարքում հանդիպում են սափորների, կարասների, կճուճների խմբեր, որոնք իրենց վրա ունեն անցքեր:

Քարի մշակումը Ուրարտուում բարձր զարգացման էր հասել: Քարը լայնորեն օգտագործվում էր կենցաղում: Գետաքարերից ու տուֆից պատրաստվում էին ծակիչներ, քերիչներ և այլ գործիքներ:

Քարի «փափուկ» տեսակից պատրաստում էին տարբեր ձևերի և չափերի տաշտեր, պանիր քանելու խոշոր ձագարներ, խողովակներ և այլն: Քարը լայնորեն օգտագործվում էր մետաղաձուլման ժամանակ. պատրաստվում էին տարբեր ձուլակաղապարներ և գործիքներ:

Առավել քարդ էր արվեստում քարի օգտագործումը. քարից պատրաստում էին տարբեր քանդակներ: Դրանց թվին են պատկանում տեղական քանդակագործների՝ տուֆից պատրաստած քարե արձանները:

Առավել հետաքրքիր են կնիքները, որոնց վրա պատկերված են հարուստ տեսարաններ՝ կենաց ծառեր, սայլեր և մարտակառքեր, թագավորներ և քրմեր, պալատական տեսարաններ, առյուծներ: Ոչ պակաս տարածում ունեն տարբեր ձևերի և չափերի քարե ուլունքները, որոնց գերակշռող մասը գերազանց հղկված է:

**Որմնանկարչություն:** Այս շրջանի որմնանկարչությանը բնորոշ է պաշտամունքային, կրոնական և աշխարհիկ բնույթը: Դրանք զարդարել են տաճարների, պալատների և այլ շինությունների պատերը:

Որմնանկարչությունը հիմնականում ներկայացված է *Կարմիր բլուրի, Ոսկեբլուրի* և *Էրեբունու* նյութերով: Ինչպես ցույց են տալիս Էրեբունու որմնանկարների պահպանված մնացորդները, պալատի կենտրոնական հատվածի բոլոր պատերի պատկերներն իրենց հորինվածքային կառուցվածքով ունեցել են միասնական եզրագարդ՝ կազմված մի քանի շերտերից: Դրանց եզրանախշերին վարդյակներ են՝ արմավենիներով, աստիճանավոր աշտարակներ, սրբազան ծառեր՝ նրանց մոտ կանգնած աստվածներով և պտուղների պատկերով:

Փայտամշակումը և ոսկորի փորագրման արվեստը Վանի թագավորությունում նույնպես բարձր զարգացում ապրեցին:

### Շարքեր և ստույգայիններ

1. Ինչ մշակույթ ձևավորվեց Վանի թագավորության շրջանում:
2. Ճարտարապետական ֆնչ կառուցվածք ունեին Վանի համահայկական թագավորության քաղաքները: Ինչ առանձնահատկություն ունեին վարչատնտեսական կենտրոնները: Թվե՞ք մի քանի այդպիսի քաղաքներ: Շինարարության ո՞ր ճյուղերն էին զարգացած:
3. Այս շրջանում մետաղամշակման ո՞ր ճյուղերն էին զարգացած: Ինչպիսիք էր Վանի թագավորության քանակի զինվորների սպառազինությունը:
4. Քարի ո՞ր տեսակներն են օգտագործել ուրարտացիները: Ինչ բնույթ ունեն որմնանկարչությունը: Որտեղ են հայտնաբերվել որմնանկարների նմուշներ:



## § 2. ՎԱՆԻ ԹԱԳԱՎՈՐՈՒԹՅԱՆ ՀՈԳԵՎՈՐ ՄՇԱԿՈՒՅԹԸ

**Համահայկական առաջին թագավորության պետական կրոնը:** Վանի թագավորության կրոնն ուսումնասիրելու համար կան երկու հիմնական աղբյուրներ՝ սեպագիր արձանագրությունները և պատկերագարող հուշարձանները:


Սեպագիր արձանագրությունների հաղորդած տեղեկությունները սահմանափակ են. դրանցում հայտնվում են աստվածների անունները, պատմվում է տաճարների կառուցման մասին, և թվարկվում են զոհաբերությունները:

Բուն կրոնական բնույթի այնպիսի տեքստեր, ինչպիսիք են առասպելները, աղոթքները, մոգական հմայությունները, համարյա թե հայտնի չեն: Պաշտամունքային առարկաներն ու պատկերները լրացնում են գրավոր աղբյուրների տեղեկությունները:

**Վանի թագավորության դիցարանում կենտրոնական տեղ է գրավում Խալդի աստվածը:** Նա գերիշխող դիրք ուներ դիցարանում և համարվում էր Երկրի ու թագավորի հովանավոր աստվածը:

Սեպագիր արձանագրություններում, որոնք պատմում են տաճարների շինարարության և նախատեսվող զոհաբերությունների մասին, Խալդիից հետո հիշատակվում են

Մհերի դուռը



**Թեյշերա** և **Շիվինի** աստվածները: Նրան միասին առանձնանում են մյուս աստվածների շարքից և կազմում են աստվածների գերագույն երրորդությունը: Խալդին պատկերվում էր ռազմիկի կերպարանքով: Նա օրհնում էր թագավորին արշավանքի մեկնելիս օգնում նրան հաղթելու թշնամուն: Խալդի աստծու կինը դիցարանի գլխավոր աստվածուհի Արուբանին էր: **Մհերի դուռն** արձանագրությունում թվարկվում են Վանի թագավորության աստվածների անունները և նրանց մատուցվող զոհաբերությունները (ցուլեր, կովեր, ոչխարներ, այծեր, գեներ, գինի և այլն): Աստվածները պատկերվում էին մարդու կերպարանքով, սակայն կարելի է հանդիպել նաև կենդանիների ու թռչուններին բնորոշ առանձին բաղադրիչների:

Վանի արքաների յուրաքանչյուր արշավանք սկսվում էր արարողությամբ, որի ժամանակ արքան աղոթքով դիմում էր Խալդիին, Թեյշերային, Շիվինիին և մյուս աստվածություններին՝ բարձրաձայն հայտարարելով արշավանքի ուղղությունը և նպատակը, խնդրելով նրանցից հովանավորություն՝ գործն իր նպատակին հասցնելու համար: Արշավանքի ավարտից հետո հաղթանակած բանակը վերադառնում էր Տուշպա: Արքան Խալդի աստծո տաճարում (նրան ձոնված կոթողի կամ որմնախորշի առջև) բարձրաձայն գեկուցում էր կատարված արշավանքի արդյունքների մասին և հաղթանակը ձոնում Խալդիին: Արքայի խոսքը արձանագրվում էր քարի վրա:

**Երկրագործական-եղանակային և թաղման ծեսերը:** Այս ծեսերի կարգի ու անցկացման ժամանակի մասին տվյալներ կան Մհերի դուռն արձանագրությունում: Այստեղ հիշատակված են տարվա ընթացքում կատարվելիք երեք տոնակատարությունները՝ կապված այգեգործական աշխատանքների համապատասխան փուլերի հետ: **Առաջին փոնը** անցկացվում էր խաղողուտի էտումից հետո: Խաղողի որթի էտումը Հայաստանում սկսվում է մարտ ամսի

վերջին տասնօրյակին և ավարտվում՝ ապրիլ ամսվա առաջին կեսին:

Այս ժամանակ Հայաստանում նշվում էր *Քարեկենդանի օրոնք* (տոնվում էր մարտ ամսին, տևում էր 1-2 շաբաթ)՝ կապված Նոր տարվա գալստյան հետ:

«Արևի (Շիվինիի) ամսին» էր կարգադրվում զոհեր մատուցել պետության բոլոր աստվածություններին ու «սրբություններին»: Վանի թագավորության «Արևի ամիսը» համապատասխանել է մարտին: Այս առումով ուշագրավ է, որ Բուն հայոց տոմարում ևս մարտ ամիսը ձևավորված էր արևին և կոչվում էր Արեգ («Արևի ամիս»):

Ժամանակի պատկերացումների համաձայն՝ մարդու մահվանից հետո նրա հոգին շարունակում է գոյատևել՝ տեղափոխվելով այս աշխարհից մյուսը: Այդ մասին է վկայում «Հոգիներ տեղափոխող աստծո» պաշտամունքի գոյությունը պետության դիցարանում:

Ուրարտում կար ժայռափոր դամբարաններում մահացածին թաղելու սովորույթը: Նման գերեզմաններում, որոնք կազմված էին լինում մի քանի սրահներից, դրվել են արքաների ու ազնվականների աճյունները՝ իրենց հագուստով, գեներով, զարդերով ու կատարված զոհաբերություններով: Ժայռափոր դամբարաններ են Վանա ժայռին փորված կառույցները:

Կնիքների վրա կան կենաց ծառի պաշտամունքի հետ կապված արարողությունները պատկերող փորագրություններ: Հետաքրքիր է, որ այդ արարողություններին մասնակցել է նաև արքան՝ *այրուծի* ուղեկցությամբ: Վերջինս, ինչպես ենթադրվում է, պահվել է տաճարներում *ոբայես սուրբ կենդանի*:

### **Վանի թագավորության գիրը:**

Վանի թագավորության գիրը նպաստեց գիտելիքների տարածմանը: Հատկապես շինարվեստում կիրառվող քարոց ու ձգրիտ հաշվարկներն ու չափումները խթանեցին ամրոցների, քերդերի, ջրանցքների, քաղաքների կառուցմանը: Մաթեմատիկական, երկրաչափական, աստղագիտական հաշվարկները լայն



Արուրանի աստվածուհի, բրոնզ, Ք.ա. VIII-VII դդ.:

տարածում ունեցան Վանի թագավորության տնտեսության մեջ:

Վանի թագավորության սեպագրի լեզվի («ուրարտերենի» կամ «րիայներենի») ուսումնասիրության համար հիմնական նյութ են ծառայում տեղական արձանագրությունները: Լրացուցիչ տեղեկություններ կարելի է քաղել ասորեստանյան աղբյուրներից, որտեղ զգալի թվով հատուկ անուններ են վկայված: Որոշակի օգնություն են ցույց տալիս խուտիերենի տվյալները:

Վանի թագավորության շրջանից պահպանվել են ավելի քան 1000 *սեպագիր արձանագրություններ*, որոնք գրված են քարի, մետաղյա իրերի և կավե ալիլիկների վրա: Գրում էին ձախից աջ, առանց քանոնաչափման: Սեպագիր արձանագրությունները միատիպ են և մեծ մասամբ հաղորդում են թագավորների ձեռնարկած արշավանքների, շինարարական աշխատանքների, ձոնման ծեսերի մասին:

Թագավորությունում տարածում ստացած սեպագիր դպրությունը Ք.ա. IX դ. ընդօրինակվել է Ասորեստանից: Ընդ որում փոխ են առնվել ոչ միայն բոլոր նշանները, այլև վերցվածն էլ պարզեցվել է: Մեզ հասած հնագույն արձանագրությունները թվագրվում են *Ք.ա. IX դ. 30-ական* թվականներով և պատկանում են Սարգուրի I-ի կառավարման ժամանակահատվածին:



Դրանք կազմված են ասուրերենով: Մակայն արդեն հաջորդ թագավորը՝ Իշպուինին, և նրա ժառանգներն իրենց վիճակի հաղորդումները կատարում էին տեղական լեզվով:

Առանձին սեպագիր նշաններով արտահայտվել են ձայնավորները, երկձայն և եռաձայն վանկերը: Գաղափարագրերն արտահայտել են ամբողջական բառեր ու հասկացություններ: Դրանց մի տարատեսակն են սահմանիչները (դետերմինատիվներ), որոնց շնորհիվ տարբերակվում են հատուկ անունները: Օրինակ՝ ձշգրտորեն նշվում է՝ «ժողովուրդ», թե՛ «երկիր» է ենթադրվում որոշակի անվան ներքո:

Օտար միջավայրից փոխառված լինելու հետևանքով Վանի թագավորության սեպագիր դպրությունը ճշտորեն չի հաղորդել տեղական լեզվի հնչյունական համակարգը: Ուստի դժվար է որոշել, թե իր ժամանակին ինչպես են արտասանել սեպագիր արձանագրություններում վկայված բառերը, ինչը և զգալիորեն դժվարացնում է լեզվի ուսումնասիրությունը:

Հայտնի են քառապաշարային քնույթի

քազմաթիվ ընդհանրություններ և նույնություններ արդի հայերենի հետ (Տուշպա – Տուսպ, Արիյանի – Արեղեանք, Ջարախա – Ջավախք, Ծույուկի – Ծղուկ, Ծուփա – Ծուփք և այլն):

Վանի թագավորության գրագիրները թողել են նաև *մեհենագրային (հիկուզիֆային)* արձանագրություններ: Մեհենագրային համակարգն ունի քնիկ տեղական ծագում և սերում է Հայաստանի նախնադարյան ժայռապատկերներից: Այն բաղկացած է շուրջ *երեք հարյուր նշաններից*, որոնք գրվել են աջից ձախ, հորիզոնական գրության դեպքում՝ վերից վար՝ առանց քառանջատման: Մեզ են հասել ավելի քան *1500 մեհենագրային արձանագրություններ և մեմանշաններ*: Վերծանության առաջին արդյունքների հիման վրա ենթադրվում է, որ մեհենագրային համակարգի լեզուն եղել է հնագույն հայերենը:

Վանի թագավորության հզոր և կատարյալ մշակույթն իր քազմաքնույթ ազդեցությունն է տարածել Հայաստանից դուրս՝ հասնելով Իրան, Կովկաս, Հունաստան և այլ երկրներ:

### Հարցեր և առաջադրանքներ

1. Ի՞նչ հիմնական աղբյուրներից են ձևավորվել Վանի թագավորության՝ կրոնի մասին պատկերացումները: Ո՞ր աստվածներն են կազմում Վանի թագավորության դիցարանի գլխավոր եռյակը:
2. Վանի թագավորության որ ծեսերի մասին կան տեղեկություններ:
3. Ո՞ր գիտություններն էին զարգացած Վանի թագավորությունում:
4. Բացի սեպագրից, ուրիշ ի՞նչ գիր է կիրառվել Վանի թագավորությունում: Քանի սեպագիր և քանի մեհենագիր արձանագրություն է պահպանվել Վանի թագավորության դարաշրջանից: Ի՞նչ լեզուներով էին դրանք գրված:

## § 3. ՀԱՅԿԱԶՈՒՆ-ԵՐՎԱՆԴՈՒՆՆԵՐԻ ԺԱՄԱՆԱԿԱՇՐՋԱՆԻ ՄՇԱԿՈՒՅԹԸ

Քաղաքաշինություն, ճարտարապետություն: Ք.ա. VI–III դարերը Հայաստանի տնտեսական և քաղաքական զարգացման նոր շրջափուլ են կազմում:

Հայկազուն–Երվանդունիների արքայատոհմի իշխանության ժամանակաշրջանի քնակավայրերի ճարտարապետության մասին կարելի է դատողություններ անել *Էրն-*

*րունիի միջնաբերդում* ծավալված շինարարական գործունեության հիման վրա: Ք.ա. VIII դարի տաճարը հետազայում վերակառուցվել է և վերածվել սյունազարդ դահլիճի: Արմատական վերակառուցման ենթարկվելուց հետո սրբազան կրակի մշտական պահպանման վայրի է վերածվել միջնաբերդի պալատի միջին մասը:

**Արմավիր քաղաքը:** Արարատյան դաշտի արևմտյան մասում՝ Արաքսի ձախ ափին, ձգվում է հրաբխային ծագում ունեցող բլուրների մի շարք, որոնցից ամենաբարձրը՝ Արմավիր բլուրը, ունի 76 մ բարձրություն և գագաթի 2 հա հարթ տարածություն: Բլուրը քակեցված է եղել հնագույն ժամանակներից, որն ապացուցվում է թե՛ գրավոր աղբյուրներով, թե՛ հնագիտական պեղումներով:

Արմավիրը պարսպապատելով, կառուցապատելով պալատական, պաշտամունքային, աշխարհիկ և տնտեսական բազմապիսի շինություններով՝ այն վեր է ածվել վարչական, տնտեսական և պաշտամունքային նշանակալի կենտրոնի: Ք.ա. VI դարի սկզբներին՝ Վանի թագավորության անկումից հետո, երկրի արևելյան հատվածում կյանքը չի դադարել: Արմավիրը՝ որպես պաշտամունքային կենտրոն և քակավայր, պահպանել է իր նշանակությունը և Ք.ա. IV դարի վերջում դարձել վերականգնված համահայկական երկրորդ թագավորության մայրաքաղաքը:

**Գյուղական քնակավայրեր:** Դարաշրջանի գյուղական քնակարանների պատկերավոր նկարագրությունը թողել է հույն գորավար և պատմիչ *Քսենոփոն Աթենացին*, որը Ք.ա. 401 թ. անցել է *Հայաստանով*: Հարավային Հայաստանի տները, ի տարբերություն կենտրոնական շրջանների քնակարանների, աշտարակավոր էին, որը պայմանավորված էր պաշտպանական նպատակներով: Այլ էր Հայաստանի կենտրոնի և հյուսիսի գյուղական քնակավայրերի համայնապատկերը: Այս շրջանների քնակավայրերը կիսագետնափոր էին և ունեին երկու մուտք: Մեկով իջնում էին մարդիկ, իսկ երկրորդը նախատեսված էր անասունների համար: Այդ տիպի տները հայկական ժողովրդական քնակարանի՝ գլխատան նախատիպն են ներկայացնում:

**Նյութական մշակույթ, առևտուր:** Պատմաշրջանի նյութական մշակույթը բնութագրում են պեղումներից հայտնա-

բերված նյութերը: Խեցեգործությունը ներկայացված է սափորներով, անոթներով և ըմպանակներով, որոնք իրենց զուգահեռներն ունեն Հայաստանին հարակից ընդարձակ տարածաշրջանում (Փոքր Ասիա, Այսրկովկաս, Իրան) ու կապող օղակ են Վանի թագավորության և հելլենիստական դարաշրջանի կավագործական արտադրանքի միջև: Մետաղագործությունը ներկայացված է գինագործական արտադրանքով և հասարակական զարդերով: Հայաստանում գտնվել են նաև արծաթյա ամանեղենի քազմաթիվ նմուշներ, մասնավորապես այս ժամանակաշրջանում լայն տարածում ստացած պտյակներ: Դրանք եղջյուր հիշեցնող անոթներ են, որոնք ներքևի մասում կենդանակերպ են:

Արհեստագործական արտադրանքի նյութական ձևերը, որոնք հանդիպում են երկրով մեկ, թույլ են տալիս խոսելու զարգացած առևտրական կապերի մասին: Շրջանառության մեջ էին գնեքը, գրահը, խեցեղենի որոշ տեսակներ, զարդեր:

Որոշ տվյալներ կան նաև Ք.ա. VI–III դդ. դրամական շրջանառության վերաբերյալ: Այդ երևույթի իրեղեն ապացույցներն են աթենենյան սիկորը՝ գտնված նախկին Երևանի նահանգում, Միսիանի՝ Ք.ա. VI–III դդ. ատտիկյան չորեքդրամյանը և Էրեբունիում հայտնաբերված՝ Ք.ա. V դարով թվագրվող միլեթյան դրամները:

Հայաստանի արևմտյան մասերն այդ դարերում ընդգրկված էին տարածաշրջանային առևտրի ոլորտը և ավանդական առևտրական ուղիներով կապված էին Միջագետքի ու փոքրասիական շուկաների հետ: Առևտրական կապերի լրացուցիչ վկայությունն է Հերոդոտոսի հաղորդումը Հայաստանից գինի արտահանելու մասին:

**Հայոց հին հավատալիքները:** Հնագույն ժամանակներից են սկզբնավորվում բնության անշունչ առարկաների և երևույթների ոգեղենացումը, դրանց և մարդու, ինչպես նաև կենդանիների միջև պատկերացվող խորհրդավոր կապերի, փոխադարձ կերպարանափոխումների հավա-





Արձաթի գավաթ. Քարաշամբ,  
Ք.ա. XXII-XXI դդ.

տալիքը: Այդ շրջանին են վերաբերում հայոց մեջ գոյատևող լեռների, ժայռերի, ջրի, հրի, երկնքի ու երկնային լուսատուների, մթնոլորտային երևույթների անձնավորման, կենդանիներին ու թռչուններին մարդկային հատկանիշների վերագրման, դրանց պաշտամունքի փաստերը հավաստող առասպելական գրույցներն ու հավատալիքները: Հայոց լեռներն անձնավորվել են եղբայրների, Մասիսն ու Արագածը՝ քույրերի, Անդոկը, Մարութասարը, Մոավ լեռը՝ մարդակերպ հսկաների, Տավրոսն ու Ջագրոսը՝ ցուլի և վիշապի կերպարներում:

Մարդիկ իրենց տոհմի կամ ցեղի ծագումը կապում են կենդանիների, քույսերի, երբեմն էլ քնության առարկաների՝ տոտեմական հավատալիքների ու տոտեմական նախնիների պաշտամունքի հետ: Դրանց վերապրուկներն են հայոց մեջ Երվանդի և Երվազի ցլային, Սանասարի և Բաղդասարի ջրային, Արծրունիների արծվային սերման մասին առասպելական գրույցները:

Բնության տարրերից հայոց մեջ հատուկ պաշտամունքի առարկաներ են եղել *կրակը, ջուրը, ժայռերը*, քույսերից՝ որոշ ծառեր ու ծաղկատեսակներ, որոնց պաշտամունքի հիշատակը պահպանվել է ան-

գամ ուշ ավանդության մեջ: *Օջախը* հենց տան կրակարանն է (*ընտրանիքի խորհրդանիշ*)՝ թոնիրը, ուր մշտավառ, անթեղված էր պահվում կրակը: *Թունիրն ընտրանիքի մեծագույն սրբալիայն էր*: Նրա կողքին էին կատարվում ծիսարնտանեկան արարողությունները (կնունք, ամուսնություն): Առավել ուշ շրջանում կրակի պաշտամունքը մտնում է պաշտոնական կրոնական համակարգի մեջ, դառնում հայ հեթանոսական կրոնի կարևոր բաղադրիչ: Կրակի պաշտամունքատեղին՝ քազինը, կոչվում էր *հուր-քակ*, դրա վերապրուկներից են Մեհեկան (արդի փետրվար) ամսի կեսերին Տրնդեզի ծիսական խարույկը վառելու և դրան առնչվող սրբազան արարողությունները:

Ջրի պաշտամունքի հետքերը պահպանվել են հրաշագործ ձկների մասին պատմվող առասպելական գրույցներում: Ջրակունքների կամ արհեստական ոռոգման առուների մոտ կանգնեցվել են ձկնակերպ «*Վիշապ*» քարակոթողներ: Ջրի հետ է կապվում նաև քույսերի, հատկապես ծառերի, բուժիչ խոտերի ու ծաղիկների, ինչպես նաև հացաքույսերի պաշտամունքը: Պաշտվող ծառերից են սոսին, որի սաղարթների ստափյունից հնում Արձավիրի քրմերը գուշակություններ էին կատարում: Ծառերն ունեցել են իրենց հատուկ նվիրական օրը՝ *Ծաղկազարդը* (ժող. լեզվում՝ Ծաղկազարդար), իսկ ջուրն ու ծաղիկները՝ իրենց տոնը՝ *Համբարձումը* (ժող. լեզվում՝ Ծաղկամոր տոն), որոնք երկուսն էլ հետագայում հարմարեցվեցին քրիստոնեական տոնացույցին:

**Առասպելները:** Առասպելներն ու վիպական գրույթները արժեքավոր աղբյուր են հայերի վաղնջական հավատալիքները և հնագույն աստվածների դիցարանը հետազոտելու համար: Առասպելներն արտացոլում են ժողովրդի աշխարհայացքը, պատկերացումները քնության, հասարակության մասին և հնագույն գրականության ուշագրավ տեսակներից են:

Հայկական ամենանշանավոր առասպելներից է *Հայկի և Բելի մասին գրույցը*:

Որոշ տարբերություններով այն ավանդված է Մ. Խորենացու «Հայոց պատմությունում» և Անանուն պատմիչի երկում, որը, որպես ներածություն, կցված է Սեբեոսի «Պատմությանը»: Նրա արձագանքներն առկա են նաև Անանիա Ճիրակացու աշխատություններում: Այստեղ Հայկը հանդես է գալիս որպես ազատասեր ու ըմբոստ հսկա, որը մերժում է հնագանդվել բռնակալ Բելին և հեռանալով Բաբելոնից՝ հաստատվում է Հայքում: Ճակատամարտում սպանելով իր դեմ արշաված Բելին՝ Հայկը հաստատում է իր երկրի անկախությունը: Հայկի անունից երկիրը կոչվում է Հայք:

Արոհիչյալ պատմական երկերում ամբողջական ձևով պատմվում է նաև *Արա Գեղեցիկի և Շամիրամի աստապեղը*: Այն այնպիսի լայն տարածում է ունեցել, որ նրա որոշ հատվածներ արտացոլվել են նաև անտիկ հեղինակների երկերում, մասնավորապես նշանավոր Պլատոնի «Հանրապետություն» աշխատությունում: Մ. Խորենացին ավանդել է նաև *Արամի, Տոբ և Ազեղի* առասպելները:

Հայոց պատմության հնագույն դրվագները ներկայացված են հին հայկական ժողովրդական վեպում: Այն պատմում է պատմական անցուղարձի մասին, սակայն ժամանակագրական մեծ շեղումներով և հաճախ միահյուսված առասպելների հետ: Հնագույններից է Տիգրան Երվանդյանի և Ադահակի վեպը, որը առասպելախառն հիշողություն է հայերի ու մարերի փոխհարաբերությունների մասին:

**Դիցարանը:** Հայկական դիցարանը զարգացման, համակարգման, աստվածությունների պաշտամունքի կանոնադրման տր աստիճան է թևակոխում համահայկական պետականությունների ամրապնդման ժամանակաշրջանում: Հին ընդհանուր հնդեվրոպական և ցեղային աստվածությունները շարունակում են գոյատևել ազգային ավանդության մեջ նոր մակարդակով՝ իբրև յուրային վիպականացած պատմական հերոսներ, ցեղային նախնիներ (Թորգոմ, Տոբ, Հայկ, Արամ, Արա, Տիգրան

Երվանդյան), իսկ նրանց դիվական հակառակորդները՝ իբրև օտար բռնակալներ (Բել, Նեբրովթ, Շամիրամ, Ադահակ):

**Հայոց հնագույն աստվածը Հայկն էր**, որի պաշտամունքի արմատները հասնում են մինչև տոհմատիրական հասարակության ժամանակները: Հայկը նախապես հանդես է եկել որպես հսկա որսորդ: Նրա անունով էլ կոչվեց Օրիոնի համաստեղությունը: Հայկը խորհրդանշել է հայ ժողովրդի պայքարը օտար բռնակալության դեմ՝ հանուն իր ազատության և անկախության:

Հայերի **Տոբ** աստծու պաշտամունքը տարածված է եղել նաև փոքրասիական մի շարք ժողովուրդների շրջանում: Խեթական թագավորությունում նա հայտնի էր Տարբու անունով և կարևոր տեղ էր զբաղեցնում դիցարանում: Մ. Խորենացու ավանդած առասպելում Տոբը կոչվում է Անգեղ, այսինքն՝ «Տգեղ», բայց «Անգեղյա» հնագույն ժամանակներում նշանակել է «Անգեղի սերնդից», Անգեղտուն գավառից: Անգեղը ևս հայկական հնագույն աստվածների թվին է պատկանում, իսկ նրա անունը տոտեմական ծագում ունի և կապված է անգղ թռչունի հետ:

Պաշտամունքային արձանիկ





**Արան** տեղական ծագում ունեցող հնագույն աստված է: Նախապես նրա պաշտամունքն կապված է եղել երկրագործության, ցանքի և զարնան աճող բուսականության հետ: Մեղնող ու հարություն առնող աստվածների պաշտամունքը լայնորեն տարածված էր Հին Արևելքում, և Արայի կերպարն իր զուգահեռներն ունի հնագույն շատ ժողովուրդների դիցարանում:

Մի շարք աստվածությունների պաշտամունքը, որի մասին մենք տեղեկություններ ունենք, սկսվել է հնագույն շրջանում, բայց տարածում է ստացել Հայաստանում պատմության հետագա շրջաններում: Դրանցից են Անահիտը, Արամազդը, Միիրը, Տիրը և ուրիշ աստվածներ:

### Հարցեր և առաջադրանքներ

1. Ինչ փոփոխություններ են տեղի ունեցել Ք. ա. VI-III դարերում Հայաստանում: Որտեղ են հայտնաբերվել այդ դարաշրջանի քնակապարեր: Որտեղ է գտնվել Արամավիր քաղաքը:
2. Ք.ա. VI-III դարերի նյութական մշակույթի ինչ նմուշներ են հայտնաբերվել: Ք.ա. VI-III դարերի առևտրական կապերի մասին ինչ վիպություններ կան:
3. Ինչ տոներ են եղել՝ նվիրված ծառերին, ջրին և ծաղիկներին: Քրիստոնեական ո՞ր տոներին են դրանք հարմարեցված:
4. Ինչ են իրենցից ներկայացնում առասպելները և հին հայկական ժողովրդական վեպը:
5. Ներկայացրե՞ք հայոց հին դիցարանը: Հայոց դիցարանի աստվածներն ինչ համարժեքներ ունեն այլ ժողովուրդների դիցարաններում:

## Թեմա 2. ՀԱՅԿԱԿԱՆ ՍՇԱԿՈՒՅՅՈՒՆ ՀԵԼԼԵՆԻՉՄԻ ԴԱՐԱՇՐՋԱՆՈՒՄ

### § 1. ՀԵԼԼԵՆԻՍՏԱԿԱՆ ԴԱՐԱՇՐՋԱՆԸ ԵՎ ՀԱՅԱՍՏԱՆԸ

**Հայկական մշակույթի զարգացման առանձնահատկությունները:** Հայաստանը, պայմանավորված իր աշխարհագրական դիրքով, խաչմերուկ և կապող օղակ է եղել Արևելքի ու Արևմուտքի միջև: Արդյունքում հայ մշակույթը մշտապես փոխազդել է այլոց մշակույթների հետ՝ պահպանելով իր ինքնատիպությունը և եզակիությունը:

Հայկական մշակութային աշխարհին միշտ քնորոշ է եղել արտաքին աշխարհի և նորամուծությունների նկատմամբ բաց լինելը: Ընդ որում՝ ներմուծված երևույթը հայկական միջավայրին հարմարեցվելուց և յուրացվելուց հետո իր արժանի տեղն է գրավել ազգային մշակույթի ավանդական արժեքների կողքին:

Փոխազդման երևույթին ականատես

ենք լինում Վանի թագավորության շրջանում և ավելի մեծ չափով՝ Ք.ա. III դարից, երբ Հայաստանում սկսվում է **հելլենիստական ժամանակաշրջանը**, որը տևում է վեց դար՝ մինչև քրիստոնեության պետական կրոն հռչակելը:

Այս ժամանակաշրջանում և դրանից հետո հայկական մշակույթի պատմության մեջ տեղի ունեցավ շրջադարձ դեպի արևմուտք՝ ի տարբերություն նախորդ դարաշրջանների, երբ հայկական մշակութային աշխարհն ավելի զարգանում էր՝ կապված արևելյան միջավայրի հետ: Ընդ որում, եթե հելլենիզմի դարաշրջանում հայոց ազգային մշակույթն առնչվում էր հունահռոմեական աշխարհի հետ, ապա IV-V դարերից սկսած՝ հայկա-

կան քրիստոնեական մշակույթն ավելի հարողականից դարձավ միջերկրածովյան քրիստոնեական աշխարհի մշակույթին: Հետագայում արևմտյան (եվրոպական) քաղաքակրթության հետ շփումներն ավելի խորացան, և ոչ պատահականորեն հայերին երբեմն կոչում էին «Ասիայի եվրոպացիներ»...

Արտաքին աշխարհի հետ հարաբերվելու դրական հատկանիշը երբեք չլքեց մեր ժողովրդին, անգամ հայոց թագավորության անկումից դարեր անց, երբ շատ հայեր օտար երկրներում հաստատված գաղթավայրերում զբաղվում էին վաճառականությամբ:

Այսպիսով՝ հայ մշակույթը, որն անցել է հազարամյակների ճանապարհ, բացառիկ դերակատարում է ունեցել մեր ժողովրդի կյանքում՝ ծառայելով և՛ իբրև ազգապահպանման միջոց, և՛ իբրև շրջակա աշխարհի հետ հաղորդակցության լեզու:

**Շեյնենիստական դարաշրջանը և Հայաստանը:** Ալեքսանդր Մակեդոնացու արշավանքներով, ինչպես գիտեք, սկսվեց հելլենիզմի (հունականության) դարաշրջանը: Հելլենական մշակույթը թափանցեց Հին Արևելքի երկրներ, իսկ Արևմուտքում ծանոթացան արևելյան մշակութային նվաճումներին: Տեղական մշակույթները սերտաձեցին և միաձուլվեցին հունական դասական մշակույթի հետ: *Երկու մշակութային շերտերի համաձուլվածք լինելով էլ պայմանավորված է փարբեր երկրների հելլենիստական մշակույթների փարբերությունը:*

Հայկական հելլենիզմի պատմությունն ընդունված է բաժանել *երկու փուլի:* Առաջինն ընդունված է կոչել «բուն հելլենիստական» ժամանակաշրջան, որում հատկապես նշանակալի դեր խաղացին Արտաշեսյան արքաների ձեռնարկումները: Երկրորդ փուլն ընդգրկում է մեր թվարկության I-III դարերը և ընդունված է համարել «ուշ հելլենիզմի» դարաշրջան:

Շեյնենիզմի ժամանակաշրջանում Հայաստանում ակնառու է մշակույթի երկու հիմնական շերտ: Առաջինն ավանդական, տեղական մշակութային շերտն էր, որը

տարածված էր սովորական ժողովրդի, հատկապես գյուղական բնակչության շրջանում: Երկրորդը հելլենիստական շերտն էր, որի կրողները գլխավորապես վերին խավերի և քաղաքային ազատ բնակչության ներկայացուցիչներն էին:

Թե՛ հելլենիստական մշակույթը և թե՛ հունարենը Հայաստանում տարածում գտան գերազանցապես արքունիքում և ավագանու շրջանում: Հասարակ ժողովրդի մեջ այն գրեթե տարածում չունեցավ: Հելլենիզմի դարաշրջանը հարստացրեց մեր ազգային մշակույթը:

**Հայոց դիցաշխարհը և կրոնական պատկերացումները:** Ինչպես Վանի թագավորության օրոք, այս ժամանակաշրջանում ևս դիցարանը ղեկավարում է աստվածների գերագույն եղյակը, սակայն այլ կազմով՝ հայր *Արամազդը*, մայր դիցուհի *Անահիտը* և քաջն *Վահագը*: Աստվածային գերագույն եղյակի պաշտամունքը բնիկ հնդեվրոպական երևույթ է և հայոց մեջ ունի վաղնջական ակունքներ:

Դիցարանի գլուխ կանգնած էր հայր աստված Արամազդը՝ արարիչը երկրի և երկնքի, մարդկանց բարօրություն, լիություն և արիություն շնորհողը: Արամազդի պաշտամունքին նվիրված էին բազմաթիվ տաճարներ ամբողջ Հայաստանում: Նրա պաշտամունքի գլխավոր կենտրոնը Բարձր Հայք նահանգի Դարանաղյաց գավառի Անի ամրոցում էր: Մատենագրական տեղեկություններից հայտնի է, որ այստեղ էին հուղարկավորվում հայոց արքաները:

Մայր դիցուհի Անահիտը հայոց դիցարանում մայրության, պողաբերության ու արգասավորության դիցուհին էր, «*մեր ազգի փառքն ու կենսաբուն*»: Նրան մեծարում էին «*Ռակեմայր*» տիտղոսով: Պաշտամունքի գլխավոր կենտրոնը Բարձր Հայք նահանգի Եկեղյաց գավառի Երիզա (Երզնկա) ավանն էր: Եկեղյաց գավառը Անահիտ դիցամոր պաշտամունքի շնորհիվ կոչվում էր նաև «Անահտական»: Կային բազմաթիվ այլ կենտրոններ ևս, հատկապես նշանավոր էր Արտաշատում գտնվող Անահտական տաճարը:





Արամազդ գերագույն աստծո արձանի գլուխը Նեմրոսի սրբափայրում



Վահագն աստծո արձանի գլուխը Նեմրոսի սրբափայրում

Հին հայոց մեջ առավել սիրված աստվածներից էր Վահագնը՝ ռազմի, քաջության և անպրոպի աստվածը: Ըստ մի մատենագրական տեղեկության՝ Վահագնը հնում պաշտվել է որպես արեգակի աստված: Վահագնի գլխավոր մեծիանը Տուրուրերան (Տարնո աշխարհ) նահանգում էր՝ Աշտիշատում: Մովսես Խորենացու գրառման շնորհիվ մեզ է հասել Վահագնի ծննդյան օրհներգը, որ ոչ միայն հայ, այլև համաաշխարհային գրականության գլուխգործոցներից է.

*Երկներ երկին, երկներ երկիր,  
Երկներ և ծովն ծիրանի,  
Երկն ի ծովուն ուներ և զկարմրիկն  
եղեգնիկ.*

*Ընդ եղեգան փող ծուխ երաներ,  
Ընդ եղեգան փող բոց երաներ,  
Եւ ի բոցոյն վազեր խարտեաշ  
պարաննեկիկ.*

*Նա հուր հեր ուներ,  
Ապա թէ բոց ուներ մորուս,  
Եւ աշկունքն էին արեգակունք:*

Գլխավոր աստվածություններից էր **Աստղիկը**՝ երկնային լույսի, սիրո և գեղեցկության դիցուհին, որին էլ նվիրված է Վարդավառի տոնը: Համարվել է Վահագնի կինը կամ սիրուհին, և Աշտիշատում գտնվող նրա մեծիանը կոչվում էր «Սենյակ

Վահագնի»: Ըստ ավանդության՝ Աստղիկ դիցուհին սիրում էր լողալ Մեղրագետում, իսկ հայոց քաջերը քարձրանում էին լեռները՝ հիանալու նրա գեղեցկությամբ: Նրանց աչքերից ծածկվելու համար Աստղիկը լեռները պատում էր մշուշով, և այդ պատճառով էլ տարածքը կոչվեց Մուշ և Մշո դաշտ:

Սիրված դիցուհի էր **Նանն**՝ քնտանեկան հովանավորը: Ըստ որոշ ուսումնասիրողների՝ վաղ ժամանակներում եղել է նաև ռազմի դիցուհի: Նրա պաշտամունքի գլխավոր կենտրոնը Բարձր Հայքի Դարա-նաղյաց գավառի Թիլ ավանում էր:

Հայոց մեջ մշտապես սիրելի աստվածներից էր **Արեգ-Միհրը**՝ արևի, լույսի, կրակի և արդարության աստվածը: Ըստ հայոց հավատքի՝ Արեգակի սրտում ապրում էին 365 սրբեր, որոնցից յուրաքանչյուրը տարվա մեկ օրը արդարությունն էր պահպանում Երկրի վրա: Այդ սրբերը վկայակոչվում էին չարը խափանելու նպատակով: Ավանդության համաձայն՝ Արեգակը մշտամանուկ է, որն ամեն երեկո սուզվում և ամեն առավոտ դուրս է գալիս Վանա լճից, որի կապույտ ջրերի խորքում էր նրա ոսկյա ննջարանը: Արևի պաշտամունքի գլխավոր կենտրոնը եղել է Բարձր Հայքի Երնջակ գավառի Բագառիճ ավանում: Արևի պաշտամունքի վայրեր կային գրեթե բոլոր գավառներում:

**Տիգր** դպրության աստվածն էր: Նա համարվել է Արամազդի քարտուղարը, գրի ու գրականության, արվեստի և գիտության



Անահիտ աստվածուհու գլուխը. Ք.ա. II-I դդ., Լոնդոն, Բրիտանական թանգարան

հովանավոր աստվածը: Պաշտամունքի գլխավոր կենտրոնը Արտաշատի մոտ՝ Երազամույն կոչված վայրում էր:

Հայերն աշխարհի հազվագյուտ ժողովուրդներից են, որ երկրպագել են հյուրընկալության հատուկ աստծո՝ **Վասապուրի:** Հյուրընկալության հազարամյակների ավանդույթն այսօր էլ խիստ կենսունակ է հայոց մեջ:

Հելլենիզմի դարաշրջանում հայկական աստվածությունները համադրվել են հունականների հետ (Արամազդ-Ջևս, Ասահիտ-Արտեմիս, Վահագն-Հերակլես, Աստղիկ-Ափրդիտե, Արեգ-Միհր-Հելիոս, Տիր-Ապոլոն և այլն): Սակայն օտար աստվածությունների ոչ անունները, ոչ էլ պաշտամունքը չարմատավորվեցին հայ ժողովրդի մեջ և շուտով մոռացվեցին:

Հայաստանում տարածում չի ունեցել նաև պարսից կրոնը՝ գրադաշտականությունը: Վերջինս դուալիստական (երկմիասնական) կրոն էր, այսինքն՝ այս կրոնի հետևորդները հավատում էին, որ գոյություն ունեն համազոր երկու գերագույն աստվածներ՝ չար և բարի: Հայերը երբեք չեն ունեցել չար աստված: Հայոց դիցամտածողության մեջ չար ուժերը ոգիների մակարդակից վեր չեն դասվել:

Դեռևս վաղնջական ժամանակներում ձևավորված կրոնական վաղագույն ըմբռումները՝ քնապաշտությունը, ոգեպաշտությունը, հմայական մոգությունը, շարունակում էին գոյատևել նաև հելլենիստական դարաշրջանում:

Հայոց նախաքրիստոնեական կրոնի ուսումնասիրության առումով մեծ արժեք ունի հայկական տոմարը: Հայոց աստվածների և նշանավոր սրբավայրերի անուններով են կոչվել հայոց օրանուններից շատերը:

Ի մի բերելով հայոց հին հավատքի մասին մեր գիտելիքները՝ կարելի է առանձնացնել դրա բնորոշ գծերը:

ա) Հայոց դիցարաններին միշտ բնորոշ է եղել միակենտրոնությունը՝ Արարիչ գերագույն աստծո գլխավորությամբ:

բ) Հայոց դիցարանը բաղկացած էր ազգակից աստվածներից (ինչպես հունական Օլիմպոսը), այսինքն՝ դիցարանը ներկայանում էր իբրև աստվածային ընտանիք, ինչով ընդգծվում էր ընտանիքի դերը երկրի ու ժողովրդի կյանքում:

գ) Հայոց դիցարանները ղեկավարվում էին գերագույն եռյակի կողմից: Դա հայ իրականության մեջ հեշտացրեց քրիստոնեության ընկալումը, քանի որ հին աստվածների գերագույն եռյակի երեք անձերը (Հայր աստված, Մայր դիցուհի, Որդի աստված, որն արեգակնային քնույթ ուներ) քրիստոնեության մեջ փոխարինվեցին Սուրբ երրորդությամբ՝ Հայր Աստված, Սուրբ Հոգի և Որդի Աստված՝ Հիսուս Քրիստոս:

դ) Մեր հին հավատքում չկան չար կամ չարագործ աստվածներ, չար ուժերը ոգիների մակարդակից չեն բարձրացվել:

ե) Մեծարվել են լույսը, ընտանիքը, գիտությունները, արվեստներն ու ամենայն բարին:

### **Հարցեր և առաջադրանքներ**

1. Ո՞րն է հայկական մշակույթի գլխավոր առանձնահատկությունը: Ինչո՞ւ են հայերին երբեմն անվանում «Ասիայի եվրոպացիներ»:
2. Ե՞րբ է սկզբնավորվել հելլենիզմը: Ինչո՞վ է պայմանավորված տարբեր երկրների հելլենիստական մշակույթների տարբերությունը: Ի՞նչ փուլերի է բաժանվում հայկական հելլենիզմը:
3. Ո՞վ էր գլխավորում հայոց դիցարանը, որտե՞ղ էր նրա պաշտամունքի գլխավոր կենտրոնը: Ո՞րն է եղել Անահիտի պաշտամունքի գլխավոր կենտրոնը: Վահագնին նվիրված ինչ ստեղծագործություն է պահպանվել: Ի՞նչ ավանդագրույց է պահպանվել Աստղիկ դիցուհու մասին: Նշե՛ք հայոց դիցարանի մյուս աստվածներին և նրանց պաշտամունքային կենտրոնները:
4. Հելլենիստական շրջանում կրոնական ինչ ըմբռումներ էին պահպանվել նախորդ շրջանից: Չար ուժերի նկատմամբ ինչ վերաբերմունք են ունեցել հայերը:



## § 2. ԳԻՐԸ, ՊԱՏՄԱԳՐՈՒԹՅՈՒՆԸ, ԳՐԱԿԱՆՈՒԹՅՈՒՆԸ ԵՎ ՏՈՄԱՐԸ

Հայ էին դպրությունը, հայկական մեհենագրությունը և օտար գրահամակարգերի կիրառումը: Հելլենիստական դարաշրջանի Հայաստանի հնավայրերից հայտնաբերվել են մեծ թվով արձանագրություններ: Այդ շրջանում Հայաստանում առկա գրավոր մշակույթի մասին պահպանվել են նաև մատենագրական տեղեկություններ: Դրանք վկայում են, որ Հայաստանում շարունակել են կիրառել տեղական մեհենագրությունը հայոց լեզվով: Օգտագործել են նաև օտար ծագում ունեցող այբուբեններ, որոնք ներմուծվել էին մեր նախնիների կողմից և կիրառվում էին մեհենագրությանը զուգահեռ:

Հայկական *մեհենագրությունը* զարգացման բարձր մակարդակի է հասել Վանի թագավորության ժամանակաշրջանում, երբ գրային համակարգը բաղկացած էր շուրջ 300 մեհենանշաններից (հիերոգլիֆներից): Մեհենագրության լեզուն հնագույն հայերենն է:

Ք.ա. VI դարից մինչև քրիստոնեության ընդունումն ընկած ժամանակաշրջանը պետական գրագրության մեջ օգտագործվել են օտար այբուբեններ, իսկ հայալեզու մեհենագրերի կիրառությունը սահմանափակվել է հիմնականում մեծիաններում: Դրա պատճառն այն է, որ մեհենագրային համակարգը բաղկացած էր շուրջ 300 նշաններից և չվերածվեց այբուբենի, մինչդեռ օտար ծագում ունեցող այբուբենները բաղկացած էին 22 (արամեական, պաղա-վական, ասորական) կամ 24 (հունական) տառերից և ավելի գործնական էին ամենօրյա կիրառության համար:

Քրիստոնեության ընդունումից առաջ հայալեզու նշանագրերի կիրառության մասին է վկայում *հույն պարմիչ Փիլոսոփոստը (II–III դդ.), ըստ որի՝ հայոց Արշակ I արքայի օրոք (34–35 թթ.) կիրառվել է հայալեզու և հայագիր դպրություն:*

Մեկ այլ հույն մատենագիր 234–235 թթ. գրված «Ժամանակագրություն» աշխատության էջերում հայերին հիշատակում է *սե-*



Ապարանի հունարեն արձանագրությունը

*փական դպրություն ունեցող* ժողովուրդների շարքում:

Նույնպիսի վկայություններ են պահպանվել *Ազաթանզեղոսի* «Հայոց պատմության» էջերում, որոնցից տեղեկանում ենք հայալեզու նշանագրության գոյության մասին: Նա հաղորդում է նաև քացառիկ կարևոր տեղեկություն այն մասին, որ նա խաբրիստոնեական Հայաստանում պաշտվել է դպրության հատուկ աստված՝ Տիրը: Հասկանալի է, որ սեփական գիր ու դպրություն չունեցող ժողովուրդը չէր կարող պաշտել դպրության աստծո:

Մովսես Խորենացին հաղորդում է, որ II–III դարերում *Դարանադրաց Անի ամրոցում* գոյություն է ունեցել *մեհենական պարանագրության արխիվ*, որից ասորի մատենագիր Բարդաժանը թարգմանություններ է կատարել ասորերեն ու հունարեն (նշանակում է՝ դրանք գրված էին հայերեն):

Գևորգ Ասորին, որն ասորական մատենագրության ակնառու դեմքերից է, գրում է, որ Գրիգոր Լուսավորիչը «տղայության հասակում» Հայաստանում սովորել է հայոց գիրն ու լեզուն:

Քրիստոնեության՝ պետական կրոն հռչակումով նախորդ կրոնի հետ *արգելվեց հայկական մեհենագրության գործածությունը:*

Ք.ա. III դարից սկսած՝ Հայաստանում *կիրառվում է հունարենը՝* իր այբուբենով:

Հունարեն արձանագրություններից կարևոր են հատկապես Արմավիրից հայտնաբերված յոթ հատվածները, որոնցում առկա են ողբերգությունների հատվածներ:

Տրդատ I-ից մեզ են հասել Գառնիի և Ապարանի հունարեն արձանագրությունները, որոնցից առաջինի մասին արդեն խոսվել է: Երկրորդն արձանագրված թագավորական պարզևագիր է, որով Մեծ Հայքի արքան Գնթունյաց տոհմին է շնորհում Նիզ գավառը (ներկայիս Ապարանի շրջանի տարածքը):


Ամենայն հավանականությամբ Տրդատ III-ի կառավարման մինչքրիստոնեական շրջանում (287-301 թթ.) է գրվել Տիգրանակերտի հունարեն մեծ արձանագրությունը, որից հատվածներ են պահպանվել պարսպի մեջ պահպանված ութ մեծ քարերի վրա:

Հունարենով մակագրություններ կան նաև հայոց արքայական դրամների մեծ մասի վրա, որոնք թվագրվում են Ք.ա. III-I դարերով:

Հունարենը հելլենիստական շրջանից հետո՝ IV դարում, լայն կիրառություն է ստանում Հայաստանում հատկապես քրիստոնեության քարոզչության նպատակով:

Հայաստանից հայտնաբերված *սպասմական այբուբենով* (22 *պատ. աջից ձախ գրություն*) արձանագրությունները թվագրվում են Ք.ա. II-ից մինչև Ք.հ. II դարերով: Սևանա լճի ավազանից, Սիսիանի, Սպիտակի և Դիլիջանի շրջաններից հայտնաբերվել են մեկ տասնյակից ավելի արամեաստառ քարագիր կոթողները, որոնք ընդունված է համարել սահմանաքարեր: Արամեաստառ գրություններ են պահպանվել նաև արծաթե ու լազուրիտե թասերի, կնքադրոշմների և դրամների վրա:

Քրիստոնեության պետականացումից հետո արքունի գրագրության, հոգևոր քարոզչության և ուսման ասպարեզներում Տրդատ III-ի հրամանով հունարենին զուգահեռ *կիրսումել է ասորերենը*: 387 թ. Հայաստանի բաժանումից հետո Արևելյան Հայաստանում արքունի գրագրության մեջ գործածվում է *պահլավերենը* (միջին պարսկերենը): Թե՛ ասորական և թե՛ պահ-



Հատված Խորխորյան տարեգրությունից

լավական գրերի հիմքում ընկած է արամեական այբուբենը:

Հայկական լեռնաշխարհի տարբեր հնավայրերից գտնված օտար գրավոր հուշարձանների մեջ մեծ թիվ են կազմում լատիներեն արձանագրությունները, որոնք թողել են հռոմեացիները:

Հազարամյակների ընթացքում Հայկական լեռնաշխարհում ստեղծված գրավոր մշակույթը չէր կարող անհետևանք կորչել, և մաշտոցյան դպրության կատարելությունը պայմանավորված էր նաև նախամաշտոցյան շրջանում արմատավորված գրային մտածողությամբ: Հայտնի է, որ բազմաթիվ հայ և օտարագգի հայագետներ Աստվածաշնչի հայերեն թարգմանությունը քնորոշել են որպես «թարգմանությունների թագուհի», ինչն անհնարին էր առանց երկարատև գրավոր մշակույթի առկայության: Հայտնի է նաև, որ քանավոր լեզվի, ասենք՝ քարթառի բառապաշարը սովորաբար չի անցնում 7-8 հազարից, իսկ գրավոր լեզվի բառա-



պաշարը երբեմն մի քանի տասնյակ անգամ ավելի է լինում: Գրաքարում ավանդված բառապաշարն անցնում է 60 հազարից: Այսինքն՝ գրաքարի բառապաշարը ևս վկայում է հոգուտ հայերենի՝ նախամաշտոցյան շրջանում երկարատև գրավոր մշակման ենթարկված լինելու մասին:

Հայ պատմիչները վկայում են նաև 22 տառից բաղկացած «Դանիելյան գրերի» մասին:

**Պատմագրությունը և գրականությունը:** Հայաստանի վաղ պետական կազմավորումներն ունեցել են արքունի գրագրություն, հետևաբար նաև արքայական գրագրության արխիվներ: Մեզ հասած՝ պատմագիտական արժեք ներկայացնող առաջին արձանագրությունները Հայաստանում Վանի թագավորության դարաշրջանից են:

Մեզ են հասել մի շարք տեղեկություններ հետուրարտական ժամանակաշրջանում գոյություն ունեցած մեհենական պատմագրության արխիվների մասին: Դրանցից կարևորագույնը գերագույն աստված Արամագղի պաշտամունքի գլխավոր կենտրոն Դարանաղյաց Անիի մեհենական արխիվն է, որից հունարեն և ասորերեն թարգմանություններ է կատարել II-III դդ. ասորի մատենագիր **Բարդուժանը**: Մովսես Խորենացու հաղորդմամբ՝ մեհենական պատմություններն ի մի են բերվել **Մար Աբաս Կապինայի, Օղյունայքանի** և այլոց երկերում: Իսկ Արտաշեսի որդի **Վրույրին** Պատմահայրը հիշատակում է իբրև «այր իմնարուն և բանասարեղծ»:

Տիգրան Մեծի կյանքի ու գործունեության մասին հայոց արքունիքում աշխատություն է գրել **Մեթրոդորոս Սկեփասացին**: Տիգրան Մեծի կյանքին է նվիրված եղել **Անֆիկարոնս Աթենացու** «Մեծ մարդկանց մասին» վերնագրով աշխատության մի ամբողջ գլուխ. դժբախտաբար, այն մեզ չի հասել:

**Աբրահամագղ II-ը** հիշատակվում է որպես ողբերգությունների, ճատերի և պատմական երկերի հեղինակ, որոնք տարածում են գտել նաև Հայաստանի սահմաններից դուրս:



Ժայռապատկեր. աստղային քարոեզ Սևաբից

Մովսես Խորենացին հաղորդում է **չորս մասից բաղկացած Հայկազունների պարսմության** մասին:

**Տոմարը և օրացույցը:** Վաղագույն տիեզերագիտական գիտելիքները Հայկական լեռնաշխարհում հայտնի են դեռևս քարի դարի վերջին փուլում փորագրված ժայռապատկերներից: **Ժայռապարկեր-օրացույցներից** շատերը դեռևս լիովին չեն ուսումնասիրվել և կարող են նոր ու զարմանալի բացահայտումներ բերել ոչ միայն հայ, այլև համաշխարհային գիտությանը: Հնագիտական հուշարձանների վրա հանդիպում են աստղագիտական պատկերացումների դրսևորումներ, որոնց վերլուծությունը ցույց է տալիս, որ Հայկական լեռնաշխարհում դեռևս վաղնջական ժամանակներում կիրառվել են լուսնային, լուսնաարեգակնային և արեգակնային օրացույցներ:

*Վանի թագավորությունում նույնպես կիրառվել է արեգակնային օրացույց:*

Հայկական արեգակնային օրացույցը, որի հիմնումը ավանդաբար կապվել է Հայկ նահապետի անվան հետ, բաղկացած է եղել 365 օրից՝ տասներկու 30-օրյա և մեկ տոնական 5-օրյա (Ավելյաց) ամիսներից: Առանձին անուններ կրել են և ամիսները, և օրերը, և օրվա ժամերը: Օրը բաժանված է

եղել 24 ժամերի, որոնցից 12-ը՝ ցերեկա-  
յին, 12-ը՝ գիշերային:

Մովսես Խորենացին տեղեկացնում է,  
որ Արտաշես I-ը, ի թիվս բազում այլ  
բարեփոխումների, բարեկարգել և ճշգրտել  
է օրացույցը:

Հետագայում հայերը գործածել են արե-  
զակնային օրացույցի հիմքով տոմարական  
համակարգեր, որոնցից առավել նշանա-  
վոր են *Հայոց Մեծ թվականը* (սկզբնավոր-  
վել է Ք.հ. 552 թ.) և *Հայոց Փոքր թվականը*  
(սկզբնավորվել է 1084 թ.):

### Հարգեր և ատաշադրանքներ

1. Քանի՞ մեհենանշաններից էր բաղկացած Վանի թագավորության մեհենազրու-  
թյունը: Ինչո՞ւ մեհենազրության կիրառությունը սահմանափակվեց միայն մեհրան-  
ներով:
2. Հիմնավորե՞ք, որ քրիստոնեության ընդունումից առաջ կիրառվել են հայալեզու  
նշանագրեր: Հայոց արքաների թողած արձանազրությունները ինչ լեզուներով են  
գրված: Քրիստոնեության ընդունումից հետո ո՞ր լեզուներն էին կիրառվում Հա-  
յաստանում:
3. Ըստ Մովսես Խորենացու՝ ովքե՞ր են ի մի բերել մեհենական պատմությունները:
4. Ինչ օրացույցներ են կիրառվել Հայաստանում վաղնջական ժամանակներում:  
Ներկայացրե՞ք հայկական արեզակնային օրացույցը:

## § 3. ԺՈՂՈՎՐԴԱԿԱՆ ԲԱՆԱՀՅՈՒՍՈՒԹՅՈՒՆԸ ԵՎ ԹԱՏՐՈՆԸ

### **Ժողովրդական բանահյուսությունը:**

Դեռևս վաղնջական ժամանակներում  
ստեղծված դիցավեպերը և ասքերը շարու-  
ակում էին պատմվել, երգվել ու քննակա-  
նացվել հելլենիստական շրջանի Հայաս-  
տանում: Այս ժամանակաշրջանում հայկա-  
կան վիպասքերի հիմքում ընկած են հիմ-  
նականում պատմական իրական եղելու-  
թյունները: Դրանցում մեծարվում և փառա-  
բանվում են սիրված արքաներն ու հերոս-  
ները, որոնց ընդհանուր բնութագրող գծե-  
րը բարեպաշտությունն ու հայրենապաշ-  
տությունն են: Վիպասքերը չափազանց  
սիրված են եղել հասարակության բոլոր  
խավերի շրջանում:


Հելլենիստական ժամանակաշրջանում  
հայկական բանահյուսությունը հարստա-  
ցավ «Երվանդ և Արտաշես», «Արտաշես և  
Սաթենիկ», «Արտաշես և Արտավազդ» և  
այլ ասքերով: Դրանց մեծագույն մասը  
գրառվել և մեզ է հասել Պատմահայր Մով-  
սես Խորենացու «Հայոց պատմության»  
էջերում: Պատմահայրը շատ հաճախ վե-  
րապատմում է դրանց բովանդակությունը՝

կատարելով բառացի մեջբերումներ ու  
տալով մեկնաբանություններ:

*Արտաշեսի վեպը:* Առավել սիրված է եղել  
Արտաշեսի վեպը, որի առանձին դրվագներ  
ներկայացվել են վիպասքերի տեսքով: Ար-  
տաշես արքայի մանկության և գահակա-  
լության մասին է պատմում «Երվանդ և Ար-  
տաշես» վիպասքը: Վեպում Արտաշեսը  
ներկայանում է որպես երկիրը միավորող և  
շենացնող արքա: «Արտաշես և Սաթենիկ»  
վիպասքի համաձայն՝ հյուսիսից ալաննե-  
րի (ներկայիս օսերի նախնիների) հրոսա-  
կախմբերը արշավում են Հայաստան, սա-  
կայն պարտություն են կրում: Գերի է ընկ-  
նում ալանների թագածառանգը: Այննաց  
արքայադուստրը՝ գեղանի Սաթենիկը,  
Կուր գետի հանդիպակաց ափից Արտա-  
շեսի խնդրում է ազատ արձակել իր եղբորը:

Արտաշեսը սիրահարվում է ալանաց  
հրաշագեղ արքայադստերն ու ամուսնու-  
թյան առաջարկ անում: Սաթենիկի հորից  
մերժում ստանալով՝ նա խնդիրը լուծում է  
հայկական սովորույթի համաձայն՝ քաջին  
վայել պատվախնդրությամբ. Արտաշեսն





Պատկերներ բրոնզյա գոտիների վրա

անցնում է գետը, պարանով գերում Սաթենիկին և փախցնում:

Հայոց արքան ամուսնանում է ալանաց արքայադստեր հետ. տեղի է ունենում արքայական շքեղ հարսանիք.

*Տեղ ոսկի փեղայրի ի փեռայութեանն  
Արքաշխի,*

*Տեղայր մարգարիս ի հարսնութեանն  
Սաթինկանն:*

Արքայի վրա ոսկի (իմա՝ ոսկեդրամներ), իսկ հարսի վրա մարգարիտ շաղ տալու սովորությունը խորհրդանշել է բարեբերության մաղթանքը նորապսակներին:

Արտաշեսը բառատունմեկ տարի իշխելուց հետո՝ սկզբում՝ որպես ստրատեգոս, ապա՝ թագավոր, մահանում է:

Արտաշեսը թաղվում է ոսկյա դագաղով, նրա թաղումը վերածվում է համաժողովրդական սգո արարողության:

*Արտավազդի վեպը:* Արտաշեսի վեպի շարունակությունն է նրա որդու՝ Արտավազդի վեպը: Դրանում պատմվում է, որ Արտաշեսի հուղարկավորության ժամանակ շատերն ինքնասպան էին լինում սիրելի թագավորի հետ: Այս բոլորը տեսնելով թագաժառանգ Արտավազդը, նախանձելով հոր փառքին, դժգոհում է: Արտաշեսի ոգին անիծում է նախանձ և փառասեր որդուն. որսի ժամանակ քաջքերը բռնում են Արտավազդին և շղթայելով արգելափակում Մասիսի վիհում գտնվող քարանձավում: Առասպելի տարբերակներից մեկում նշվում է, որ Արտավազդը վերածվել էր չար ոգու,

ուստի քաջքերը պահում էին նրան, որ դուրս չգա և չկործանի աշխարհը:

Վիպասքերից քացի, շարունակում էին ժողովրդի մեջ երգվել աշխատանքային, սիրային երգեր և այլ բանավոր ստեղծագործություններ:

**Թատրոնը:** Հելլենիզմի դարաշրջանում Հայաստանի մշակութային կյանքը նշանավորվում է երկու տեսակի թատրոնների առկայությամբ: Առաջինը, որ սկզբնավորվել է վաղնջական ժամանակներում, հայալեզու **ժողովրդական թատրոնն էր:** Մովսես Խորենացին տեղեկացնում է, որ ժողովրդական թատրոնը բեմականացումների (ցույցերի) և պարերի միջոցով, որոնք ուղեկցվում էին փանդիոնների (փանդիոնը հնագույն հայկական լարային գործիք է) նվագակցությամբ, ներկայացնում էր հայկական հնագույն ասքերը («Գողթան երգերը»):

Թատերական ներկայացման տեսարաններ կան Վանի թագավորության կիրառական արվեստի նմուշների (մասնավորապես՝ գոտիների) վրա: Դրանք եւ տեղական թատերական ավանդույթների վկայություններ են:

Ի տարբերություն տեղական հայալեզու ժողովրդական թատրոնի՝ հելլենիստական դարաշրջանում Հայաստանում սկսում են գործել **հունալեզու թատրոնները**, որոնք գործել են հիմնականում վերնախավի համար: Հայտնի է, որ նման թատրոններ էին գործում **Տիգրանակերպում** և **Արպաշարում:** Թատրոնները կառուցված էին հունական բացօթյա ամֆիթատրոնների օրինակով և ի վիճակի էին տեղավորելու մի քանի հազար հանդիսա-



Բակուր արքայի արծաթե թասը՝ հունարեն արձանագրությամբ

տես: Դրանցում բեմականացվում էին ինչպես հոյն, այնպես էլ հայ հեղինակների գործերը: Մասնավորապես հայտնի է, որ Ք.ա. 53 թ. Արտաշատում բեմադրվել է Էվրիպիդեսի «Բաքսուսիներ» ողբերգությունը:

Պլուտարքոս պատմիչի (I-II դդ.) վկայությամբ՝ հենց Արտավազդ II արքայի գրած ողբերգությունները նրա մահվանից մեկուկես դար անց էլ հայտնի էին հռոմեացի ընթերցասերներին:

Ուշ հելլենիստական շրջանի թատերական կյանքի քացառիկ վկայություն է Բակուր արքայի (160-ական թթ.) հունարեն արձանագրությամբ արծաթե թասը, որը հարուստ և ճղի ձևավորված է թատերական տեսարաններով:

### Հարցեր և առաջադրանքներ

1. Ի՞նչ էին նկարագրում հելլենիստական շրջանի հայկական վիպասքերը: Ի՞նչ նորասեր ստեղծվեցին այդ շրջանում:
2. Ներկայացրե՛ք Արտաշեսի մասին վիպասքերը: Վիպասքերում նկարագրված ո՞ր սովորույթներն են պահպանվել մինչև մեր օրերը: Ի՞նչ է նկարագրված Արտավազդի մասին վկայում:
3. Հելլենիստական շրջանում Հայաստանում ինչ տեսակի թատրոններ էին գործում: Ի՞նչ էր ներկայացնում ժողովրդական թատրոնը: Ի՞նչ թատրոններ էին գործում վերնախավի համար, որտեղ կային այդպիսի թատրոններ: Ո՞վ է վկայել, որ Արտավազդ II-ը գրել է տարբեր ժանրերի երկեր:

## § 4. ԱՐՎԵՍԸ: ԱԶԳԱՅԻՆ ԱՐԺԵՀԱՄԱԿԱՐԳԸ ԵՎ ՀԻՆ ՀԱՅԱՍՏԱՆԻ ԲԱՂԱԲԱԿՐԹԱԿԱՆ ՆՎԱՃՈՒՄՆԵՐԸ

**Շինարարության զարգացումը և ճարտարապետությունը:** Հայկական ճարտարապետությունը հելլենիզմի դարաշրջանից առաջ արդեն անցել էր հազարամյակների ճանապարհ: Հելլենիստական ժամանակաշրջանում կառուցվեցին մեծ թվով նոր քաղաքներ, ամրոցներ, պալատներ, տաճարներ, դամբարաններ, հասարակական և այլ շինություններ, վերակառուցվեցին հին քաղաքները:

Նորակառուց քաղաքներից նշանավոր էր Երվանդ IV-ի հիմնադրած մայրաքաղաք **Երվանդաշատը:** Երվանդաշատից հետո Երվանդ IV-ն Ախուրյան գետի ափին կառուցեց **Բագարան արքայաիր-քաղաքը՝** Արմավիրից այնտեղ փոխադրելով աստ-

վածների արձանները, դարձնելով այն թագավորության հոգևոր կենտրոնը: Դրանից հետո Երվանդ IV-ը կառուցեց նաև **«գեղեցիկ և շքեղ հորինվածքով» Երվանդակերտ դատարաները,** որի մասին Պատմահայրը խոսում է մեծ հիացմունքով:

**Արտաշատ** մայրաքաղաքը հիմնադրվել է Արաքս և Մեծամոր գետերի միախառնման վայրում, ինչը երեք կողմից անմատչելի էր դարձնում քաղաքը: Չորրորդ կողմից Արտաշատը պաշտպանված էր պարսիսկյան խրամով:

Արտաշատի վերջին տարիների պեղումների քացառիկ հայտնաբերումներից էին Արեգ-Միիրի տաճարը և խճանկարազարդ հասարակական բաղնիքը, ինչն ընդհան-



բապես հազվագյուտ հանդիպող երևույթ է ողջ աշխարհում: Արտաշատի պեղումներից հայտնաբերվել են նաև մարմարե և կավե արձաններ, զինատեսակներ, աշխատանքային գործիքներ, թանկարժեք մետաղներից և քարերից պատրաստված զարդեր և այլն:

Ժամանակի՝ աշխարհի մեծագույն քաղաքներից էր **Տիգրանակերտը**: Տերության ստեղծումից հետո Տիգրան Մեծը նոր մայրաքաղաք Տիգրանակերտը կառուցեց այն վայրում, որտեղ թագադրվել էր Ք.ա. 95 թ.՝ պատանդությունից վերադառնալիս: Ահա թե ինչպես է ներկայացնում հայոց մեծ մայրաքաղաքը Ապպիանոս պատմիչը. «*Նա քաղաքը շրջապարեց 50 կանգուն բարձրության պարիսպով, որի հատարության մեջ կային ձիերի բազմաթիվ ախոռներ: Քաղաքի արվարձանում նա կառուցեց պալատ՝ ընդարձակ զբոսայգիներով, որաարեղերով և լճերով: Մերձակայքում նա բարձրացրեց նաև հզոր մի բերդ*»: Տիգրանակերտի մեծության և շքեղության մասին վկայում են նաև Պլուտարքոսը, Ստրաբոնը և այլ մատենագիրներ:

Ուշ հելլենիզմի շրջանի քաղաքաշինությունը համեմատաբար քիչ է ուսումնասիրված: Մասնակի պեղումներ են կատարվել **Վաղարշապատում**: Մայր տաճար Ս. Էջմիածնի և Հոփսիսի մեկնքի տարածքներում հայտնաբերվել են հելլենիստական շրջանին բնորոշ կառույցների հետքեր:

**Նեմրոսի արքայայրն ու Գառնիի հուշարձանախումբը**: Պահպանված ճարտարապետական կոթողային հուշարձաններից հատկապես աչքի է ընկնում **Կոմնագենի Նեմրոս լեռան արքայայրը**: Նեմրոս լեռը Հայկական կամ Արևելյան Տավրոսի լեռնաշղթայում է (չլիոթել Վանա լճի արևմուտքում բարձրացող Նեմրոս լեռան հետ): Սրբավայրը կառուցված է թագավորության բարձրագույն կետում՝ 2100 մետր բարձրության վրա, ընդ որում՝ այլ վայրից քերված քարերով: Բլուրի երկու կողմերում՝ արևելքում և արևմուտքում, կառուցված են նույնակերպ արձանախմբեր, որոնք պատկերում են աստվածներին, արքային և նրա նախնիներին, թագավորության զինա-



Գառնիի քաղնիքի խճանկար. III դ. վերջ, հատված

նշանները՝ առյուծ և արծիվ, նաև արքայի հորոսկոպը՝ առյուծի քանդակով:

Հուշարձանախմբի կենտրոնական հորինվածքը մարդակերպ արձաններ են՝ նստած դիրքով: Կենտրոնում Արամազդն է՝ 9 մ բարձրությամբ, նրա աջ և ձախ կողմերում բարձրանում են մայր դիցուհու, Վահագն-Հերակլեսի, Միիր-Ապոլոնի և սրբավայրը կառուցող Անտիոքոս I Երվանդունու արձանները (բոլորն էլ՝ 8 մ բարձրությամբ): Ի դեպ՝ Անտիոքոս I-ը թագավոր է հռչակվել Ք.ա. 70 թվականին՝ թագադրվելով Տիգրան Մեծի կողմից «Տիգրանյան» կամ «Հայկական» թագով:

Ուշ հելլենիստական ժամանակաշրջանի ճարտարապետության սքանչելի նմուշներ են **Գառնիի ամրոցը** և **Սրեզ-Միհրի** պաշտամունքին նվիրված **դամապրը**: Գառնին առաջին անգամ հիշատակվում է դեռևս Արգիշտի I-ի կողմից (նրա թողած սեպագիր արձանագրությունն այժմ պահպանվում է տաճարից մի քանի մետր դեպի աջ): Մեծ Հայքում Արշակունյաց թագավորության հիմնադիր Տրդատ I-ը 76 թ. կառուցում է հզոր մի ամրոց՝ թողնելով այդ մասին հուևարեն արձանագրություն:

Ամրոցը կառուցվել է եռանկյունաձև



Նեմրուքի սրբավայրի արևմտյան հարթակը

հրվանդանի վրա, որի երկու կողմերը պաշտպանված են քնական ուղղաձիգ ժայռերով:

Ամրոցի ներսում պահպանվել են մի քանի ճարտարապետական կառույցներ, որոնցից հեյլենիստական դարաշրջանին են պատկանում տաճարը և արքունի քաղնիքը:

Տաճարը չորս կողմից շրջապատված է 24 սյուներով, որոնք խորհրդանշում էին օրվա 24 ժամերը: Այն կառուցվել է երկթեք տանիքով, եռանկյունաձև ճակատամասով, ուղղանկյուն հատակագծով սյունազարդ տաճարների ոճով, որի նախօրինակը համաշխարհային պատմության մեջ, ինչպես արդեն նշվել է, Արդինի-Մուսասիրում հայդիի գլխավոր տաճարն էր:

Գաննիի արքունի քաղնիքի հանդերձարանի հատակը պատված է առասպելադիցաբանական բովանդակությամբ խճանկարով և հունարեն գրություններով, որոնք խորհրդանշում են կյանքի սկզբնավորումը օվկիանոսից ու ծովից (ըստ հին հունական պատկերացումների) և հարատևությունը սիրո շնորհիվ:

**Քանդակագործությունը և կիրառական արվեստը:** Նեմրուք լեռան սրբավայրում եզակի կատարողականությամբ

են քանդակված ինչպես աստվածների 8-9-մետրանոց արձանները, այնպես էլ աստվածների, արքայական նախնիների ու սրբավայրը կառուցող Անտիոքոս Երվանդունու քանդակները՝ ուղղահայաց կանգնեցված քարասալերին, թագավորության զինանշանները՝ առյուծ և արծիվ, արքայի հորոսկոպը՝ առյուծի քանդակով:

Իրենց բարձր արվեստով առանձնանում են Արտաշատից գտնված կնոջ մարմարյա արձանը, մոր և մանկան արձանիկն Արմավիրից: Դեռևս XIX դարում Արևմտյան Հայաստանի Սատաղ քաղաքի մերձակայքից գտնվել և Բրիտանական թանգարան (Լոնդոն) էր տեղափոխվել Անահիտ դիցուհու քրոնգաձույլ արձանի գլուխը, որտեղ էլ մինչև օրս այն պահվում է:

Արվեստի եզակի նմուշներ են Արտաշեսյան դարաշրջանի *մեդալիոնները*, որոնց մեջ առանձնանում են Միսիանից գտնված արծվի ու հաղթանակի դիցուհու պատկերներով մեդալիոնները:

Արքայական շատ *դրամներ* արվեստի իսկական գործեր են: Հատկապես առանձնանում են Տիգրան Մեծի և Արտավազդ II-ի դրամները, որոնց վրա նշվել են արքաների անունները և տիտղոսները՝



հունարեն գրությամբ, իսկ հակառակ երեսին պատկերվել են աստվածներ, կենդանիներ և այլն: Առանձին դրամ է թողարկել նաև Արտաշատ մայրաքաղաքը. դրամի մի երեսին պատկերված էր աստվածամայր Անահիտը՝ մայրաքաղաքի հովանավորը, մյուսին՝ դափնեպսակ պարզած Հաղթանակի թևավոր դիցուհին, և շրջագծով՝ «Արտաշատ մայրաքաղաք» հունարեն մակագրությունը:

### **Ազգային արժեքային համակարգը:**

Ազգային արժեքային համակարգի ձևավորումը տևում է դարեր, ընդ որում՝ պատմության ընթացքում այն կարող է կրել որոշակի փոփոխություններ:

Հայաստանում քրիստոնեության ընդունման նախօրյակին ակնհայտ է կայացած մի արժեհամակարգ:

Հայկական ազգային արժեհամակարգում առանցքային է եղել և մնում է **սրբազան հայրենիքի պաշտամունքը**: Այստեղ հայոց հայրենիքը հոգևոր մեծ խորհուրդ ունեցող մի երկիր է, որը մեծարվել է ոչ միայն իր քնակիչների, այլև հարևան ժողովուրդների կողմից: Մեզ հասած հինարևելյան աղբյուրների տեղեկությունների համաձայն՝ նախքան մարդու արարումը Հայկական լեռնաշխարհը եղել է աստվածների քնակության վայր, ուր հիմնվել է դրախտը, և որում արարվել են առաջին մարդիկ: Նույն այդ տարածքը Համաշխարհային ջրհեղեղից հետո դարձել է մարդկության վերածննդի երկիրը, ուր կնքվել է Աստծո և մարդկանց միջև հավիտենական ուխտը: Հայոց լեռնաշխարհը հայտնի է եղել «ամմախության երկիր», «աստվածային սուրբ օրինաց երկիր», «աստվածների կաճառ», «եղեմ» և այլ պատվանուններով ու մակդիրներով:

Ազգային կարևորագույն արժեք է համարվել **հայկական պետականությունը**, որի գոյությունը մեր նախնիները պայմանավորել են հայրենի աստվածների ու պետության կապով: Պետական իշխանությունը ճանաչվել է աստվածատեղծ, պետության գլուխ կանգնած արքաները՝ աստվածագուն:

Ազգային գաղափարախոսական կարևոր հիմնադրույթ էր մեր նախնիների՝ **աստվածընտրյալ ժողովուրդ լինելու** մասին պատկերացումը: Ընդ որում՝ ի տարբերություն այլ ժողովուրդների, որոնք իրենք իրենց են համարում այդպիսին, մեր նախնիներին աստվածընտրյալ են համարում օտարները:

Ազգային արժեհամակարգի կարևորագույն բաղադրիչ էր **հայոց հին հավաքը**:

Թերթելով հայ և օտար մատենագրության էջերը՝ գտնում ենք մեր նախնյաց գաղափարախոսական մեկ այլ կարևոր հիմնադրույթ՝ **ազգի ազատության բացարձակ ըմբռնումը**: Հայն իր երկրի ու ժողովրդի ազատությունը դարձրել է բացարձակ արժեք: Հայկ նահապետը մերժում է համընդհանուր գերիշխանության հասած Բելի առաջարկը՝ արտոնյալ պայմաններով ապրելու իր տերության սահմաններում, և քնակվում է իր հայրերի երկրում: Արամ նահապետը «յալ էր համարում հայրենիքի համար մեռնել, քան զհանել, թե ինչպես օրարացեղ ազգերը ոչնակոխ են անում իր հայրենիքի սահմանները, և օրարները զիրում են իր արյունակից հարազատների վրա»: Իսկ հույն պատմիչ Քսենոփոնի (Ք.ա. V-IV դդ.) հաղորդման համաձայն՝ հայոց արքան, որը հարկատու էր միայն Մարաստանին, ապստամբել էր վերջինիս դեմ՝ պատճառաբանելով, որ ինքը նախընտրում է իր և որդիների ազատությունը:

Ահա այսպիսի վեհ գաղափարներ են քնկած եղել հայոց ազգային արժեքային համակարգի հիմքում, որը ձևավորվել էր հին շրջանում:

**Հին Հայաստանի քաղաքակրթական նվաճումները**: Հելլենիստական դարաշրջանում հայ մշակույթին շարունակում են քնորոշ լինել **երկու գլխավոր գծերը՝ սեփական արժեքների պահպանումը և արդաքին աշխարհից դրակրանի ու ուսանելի ներմուծումը**: Այս շրջանում ավելի շատ են ներմուծված տարրերը: Սակայն հայ մշակույթի առանձնահատկության համաձայն՝ ներմուծվածը հայկական միջավայրին



Մոր և մանկան նախաքրիստոնեական արձանիկ Արմավիրից

հարմարեցվելուց և յուրացվելուց հետո արժանի տեղ է գրավել ավանդական արժեքների կողքին:

Ասվածի լավագույն ապացույց կարելի է համարել *Կոմնագենեի Նեմրոս լեռան սրբավայրը*, որտեղ միախյուսվել են հայկական և հունահռոմեական ճարտարա-

պետության ավանդույթները: Արդյունքում ստեղծվել է համաշխարհային մշակույթի բացառիկ մի հուշարձան, որն այսօր էլ զարմացնում ու հիացնում է իր մտահղացումներով՝ իրավամբ համարվելով *Հին աշխարհի ութերորդ հրաշալիքը*:

Համաշխարհային նշանակության արվեստի գործերի հավակնություն կարող են ունենալ այս ժամանակաշրջանի հայկական հնավայրերից գտնված բազմաթիվ արձանիկները:

Ուշագրավ է, որ Արմավիրից հայտնաբերված քնագրերում առկա է Ք.ա. II–I դարերի պատմական րովանդակությամբ պոեմի կամ ողբերգության հատված, այն դեպքում, երբ Հռոմում պատմական կերպարները գրական ստեղծագործություններում հայտնվում են միայն Քրիստոսի ծննդյան I դարում:

Հելլենիստական դարաշրջանի հայ մշակույթն ուշագրավ երևույթ է համաշխարհային մշակույթի տեսանկյունից նաև այն իմաստով, որ պահպանելով և հարստացնելով սեփական մշակույթը՝ հայ ժողովուրդը հենց դրանով կարևոր ավանդ է ներդրել մշակույթի համաշխարհային գանձարանում:

*Հայկական հելլենիստական մշակույթը հինք դարձավ վաղ միջնադարի հայ մշակույթի համար՝ շարժառիթներում պարմանավորելով վերջինիս վերելքն ու համաշխարհային նշանակությունը:*

### Հարգեր և առաջադրանքներ

1. Հելլենիստական շրջանում ինչ քաղաքներ կային Հայաստանում: Երբ և որտեղ է կառուցվել Արտաշատը: Ինչո՞ւ Տիգրան Մեծը նոր մայրաքաղաքը կառուցեց իր թագադրման վայրում:
2. Նկարագրե՞ք Նեմրոսի սրբավայրը: Հին աշխարհի ո՞ր կառույցների հետ այն կարելի է համեմատել: Ուշ հելլենիստական շրջանի ճարտարապետական ինչ կառույց է պահպանվել:
3. Քանդակագործության ինչ նմուշներ են գտնվել Կոմնագենեի Երվանդունյաց սրբավայրերում և այլ վայրերում:
4. Ի՞նչն է եղել հայկական ազգային արժեհամակարգի առանցքը. ինչո՞ւ: Նշե՞ք ազգային գաղափարախոսության մյուս կարևոր հիմնադրույթները:
5. Ներկայացրե՞ք Հին Հայաստանի քաղաքակրթական նվաճումները:



**Մովսես Խորենացին  
Արտաշատի կառուցման մասին**

Արտաշեսը գնում է այն տեղը, որտեղ Արաքսը և Մեծամորը խառնվում են, և այնտեղ բլուրը հավանելով՝ քաղաք է շինում և իր անունով կոչում է Արտաշատ: Արաքսն էլ օգնում է նրան անտառի փայտով: Ուստի առանց դժվարության և արագ շինելով՝ այնտեղ մեկյան է կանգնեցնում և Բագարանից այնտեղ է փոխադրում Արտեմիսի\* արձանը և բոլոր հայրենական կուռքերը: Բայց Ապոլոնի\*\* արձանը կանգնեցնում է քաղաքից դուրս՝ ճանապարհին մոտ: Երվանդը քաղաքից դուրս է բերում հրեա գերիներին, որ այնտեղ տարված էին Արմավիրից, և բերում նստեցնում է Արտաշատում: Նաև Երվանդի քաղաքի ամբողջ վայելչությունները, ինչ որ նա փոխադրել էր Արմավիրից, և ինչ որ հենց ինքն էր շինել, բերում է Արտաշատ և ավելի շատ բան էլ իր կողմից շինելով՝ սարքավորում է իբրև արքայանիստ քաղաք:

\* Համադրվել է հայոց մայր դիցուհի Անահիտին:

\*\* Ապոլոնը համապատասխանում է հայոց դպրության, գիտության և արվեստների հովանավոր Տիրին:

**Փիլոսոփայտը (II-III դդ.)  
հայկական գրերով մանյակի մասին**

Պարմուն են նույնպես, որ մի անգամ Պամփյուլիայում բռնվել է մի հովազ, որի ուկյա մանյակի վրա գրված էր հայերեն րատերով հեղեղայլը. «Արշակ թագավոր՝ Նյուսիա ասարծուն», այսինքն՝ Նյուսիա ասարծուն նվեր Արշակ թագավորից: Այս Արշակն\* այն ժամանակ Հայոց թագավորն էր և յուր բռնած հովազը, այդ կենդանու մեծության պարճառով, նվիրել էր Դիոնիստսին\*\*: Դիոնիստսը հնդկական Նյուսիայի պարճառով հնդկացիներից և արևելյան ժողովուրդներից կոչվում էր Նյուստս:

\* Խոսքը Մեծ Հայքի արքա Արշակ I-ի (34-35 թթ.) մասին է:

\*\* Դիոնիստսը, ըստ հին հունական առասպելաբանության, համարվել է Ջևաի որդին, խաղողագործության աստվածը:


**Մովսես Խորենացին Անիի հայկական  
հեթանոսական արխիվի մասին**

Մեզ այս բաները պատմում է Բարդաձանը\*, որ Եղեսիայից էր... Որովհետև նա մեր կողմերը եկավ՝ հուսալով, թե կկարողանա որևէ հետևող գտնել վայրենի հեթանոսներիս մեջ, բայց երբ ընդունելություն չգտավ, մտավ նա Անի ամրոցը, կարդաց մեհենական պատմությունը, որի մեջ՝ նաև թագավորների գործերը: Նա իր կողմից ավելացրեց իր ժամանակի անցքերը, բոլորը թարգմանեց ասորերենի և ապա նրանից՝ հունարենի:

\* Բարդաձանը (154-223 թթ.) ասորի հեղինակ է, համարվում է ասորական քրիստոնեական մատենագրության հիմնադիրներից մեկը:

Բ

ՄԱՍ



ՀԱՅԿԱԿԱՆ ՔԱՂԱՔԱԿՐԹՈՒԹՅՈՒՆԸ  
ՄԻՋԻՆ ԴԱՐԵՐՈՒՄ



Հայոց միջնադարյան պատմությունը, հայ պատմագիտության մեջ ընդունված պարբերացման համաձայն, երեք փուլի է բաժանվում՝ վաղ միջնադար (IV դ.–IX դ. կեսերը), գարգացած միջնադար (IX դ. կեսերից–XIV դ. վերջը), ուշ միջնադար (XV դ.–XVII դ. կեսեր):

Դարեր շարունակ հայ ժողովուրդը դիմակայել է արտաքին վտանգներին ոչ միայն ռազմական ուժով, այլև հոգևոր–մշակութային արժեքներով՝ աշխարհում առաջինը քրիստոնեությունը պետական կրոն հռչակելով (301 թ.) և Մաշտոցյան գրերի գյուտով (405 թ.):

Մեծ Հայքի Արշակունյաց հարստության անկումից հետո (428 թ.) հայ ժողովուրդն աննկուն պայքար մղեց օտար զավթիչների դեմ: Վարդան Մամիկոնյանի (451 թ.), Վահան Մամիկոնյանի (481–484 թթ.), Արտավան Արշակունու (539 թ.) և Վարդան (Կրտսեր) Մամիկոնյանի (571–572 թթ.) ապստամբությունները, ինչպես նաև VII դ. կեսերին արաբների դեմ մղած կռիվներն ու VIII–IX դդ. հակաարաբական ապստամբությունները հայ ազգային–ազատագրական պայքարի հերոսական դրսևորումներն էին: Արդյունքում 885 թ. վերականգնվեց հայկական պետությունը՝ ի դեմս Բագրատունյաց թագավորության:

Հայաստանում 428 թ. հետո պետականության կրողն էր մնում հայոց նախարարական համակարգը: Հայ ժողովրդի ազգային–ազատագրական պայքարի շնորհիվ քարձրացան Մամիկոնյանների գլխավորած Տանուտիրական իշխանապետությունը, Հայոց Արևելից կողմերում՝ Արցախում ու Ոսիքում՝ Վաչագան Բարեպաշտի թագավորությունը (484 թ.–VI դ. առաջին կես), Հայոց անկախ իշխանապետությունը (650–ականների երկրորդ կես–680–ական թթ.), Բագրատունյաց (885–1045 թթ.), Վասպուրականի Արծրունիների (908–1021 թթ.), Կարս–Վանանդի (963–1065 թթ.), Տաշիր–Ձորագետի Կյուրիկյանների (978–1113 թթ.), Սյունիքի (987–1170 թթ.), Փառխտսի (X դ. կես–1044 թ.) թագավորությունները, Խաչենի իշխանությունը (X–XVI դդ.), Ջաբարյանների իշխանապետությունը (XII դ. վերջ–XIII դ. առաջին տասնամյակներ), Կիլիկիայի իշխանապետությունը (1080–1197 թթ.) և թագավորությունը (1198–1375 թթ.), ինչպես նաև հայկական մյուս նշանավոր պետական կազմավորումները:

Ազգային անկախ պետականության պահպանման գաղափարով տոգորված քաղաքակրթական զարգացումներն արգասաբեր էին հայ միջնադարյան մշակույթի բոլոր քնազավառներում:

Հայոց պատմության V դարը, որը նշանավորվել էր հայ գրերի գյուտին հաջորդած գրական արժեքների ստեղծմամբ, անվանվում է Ռսկեդար: Այն քննադատվում է թարգմանական և ինքնուրույն գրականության ստեղծմամբ: Ռսկեդարյան հայ մտավորականները պատմական, փիլիսոփայական, աշխարհագրական, քնագիտական մեծարժեք ժառանգություն են թողել՝ հարստացնելով հայ և համաշխարհային գիտական մտքի շտեմարանը, ինչպես նաև փրկելով կորստից օտար հեղինակների մի շարք երկեր:

Հին և միջին դարերում հայկաբար պաշտպանելով հայրենիքը, պահպանելով ազգային արժեքները և ստեղծելով նորերը՝ հայ ժողովուրդը շարունակեց քաղաքակրթական իր քննադատ արքայական ու իշխանական տների ու Հայ առաքելական եկեղեցու առաջնորդությամբ և հովանավորությամբ:

Վաղ միջնադարից նոր որակներ են գրանցվում հայ մշակույթի, գրականության, գիտության ու կրթության ասպարեզներում: Հայկական ձարտարապետության մեջ ազգային հին սաճարաշինությունը փոխարինած եկեղեցաշինությունը հայրենի ավանդույթների վրա հիմնված նոր ուղղություն էր շինարարական արվեստում: Կերպարվեստի քնազավառում աննախադեպ կատարելության են հասնում խաչքարագործությունը և մանրանկարչությունը: Շարունակում են իրենց վերելքը արհեստագործության հիմնական ճյուղերը (խեցեղագործություն, դարբնություն, զինագործություն, գորգագործություն, ոսկերչություն, քարագործություն, հյուսնություն, ապակեգործություն, կաշեգործություն, ներկարարություն և այլն):

Հայկական մշակույթի՝ քաղաքաշինության, ձարտարապետության, ամրոցաշինության, խաչքարի արվեստի, մանրանկարչության, գորգագործության, երգարվեստի և այլ ասպարեզների, ինչպես նաև գիտության և իրավունքի քնազավառների արգասիքները շարունակաբար հարստացրել են ազգային և համաշխարհային քաղաքակրթության գանձարանը:

**Թեմա 1. ԲՐԻՍՏՈՆԵՈՒԹՅԱՆ ՀՈՉԱԿՈՒՄԸ ՊԵՏԱԿԱՆ  
ԿՐՈՆ: ԱՎԱՏԱՏԻՐՈՒԹՅԱՆ ՀԱՍՏԱՏՈՒՄԸ**

**§ 1. ԲՐԻՍՏՈՆԵՈՒԹՅԱՆ ՀՈՉԱԿՈՒՄԸ ՊԵՏԱԿԱՆ ԿՐՈՆ**

**Հայ առաքելական եկեղեցու հիմնադրումը:** Առաջին դարում հայոց Աբգար և Սանատրուկ I թագավորների օրոք, Քրիստոսի տասներկու աշակերտներից Սր Թադեոս և Սր Բարդուղիմեոս առաքյալների քարոզչությամբ Հայոց աշխարհում ավետվում է քրիստոնեական ուսմունքը: Նրանց կողմից դրվում են **Հայ առաքելական եկեղեցու** հիմքերը: Առաջնորդական արոնները, մինչև Սր Գրիգոր Լուսավորչի կողմից Հայոց եկեղեցական նվիրապետության (քահանայապետություն) հաստատման ժամանակները, **Եղիսիայում, Արփազում և Սյունիքում** էին: Քրիստոնեական համայնքները հայտնի էին Մեծ Հայքում՝ Ծաղկանց լեռներում, Արարատ լեռան շրջակայքում, Սյունյաց Լահանգում՝ Թանահատի վանքի տարածքում և այլ վայրերում, ինչպես նաև Փոքր Հայքում:

**Քաղաքական և կրոնական վիճակի քարոզացումը:** III դ. երկրորդ կեսից քաղաքական և կրոնական իրադարձությունները պայմանավորվել էին Սասանյան Պարսկաստանի նվաճողական քաղաքականության դեմ հայ ժողովրդի դիմակայությամբ: Հայոց գահին Սասանյանները նշանակում էին իրենց թագաժառանգներին: Այդ խառնաշփոթ շրջանում («ժամանակ անիշխանության») գրադաշտական (մագղեզական) մոզերը քանդում էին հայոց հեթանոսական պաշտամունքի շինությունները: Ռոմիզդ-Արտաշիրը հրամայել էր իր սպասավորներին վառել որմզդական հուրը հին հայոց պաշտամունքային կենտրոնում՝ Բագրևանդ գավառի Բագավանի տաճարի մեջ: Հնում հայոց նախնիների պատկերով Արմավիրում կանգնեցված և այնտեղից

Բագարան, այնուհետև Արտաշատ տեղափոխված արձանները նա հրամայում է փշրել, ինչպես նաև՝ Արտաշես I-ի սահմանաքարերի գրությունները փոխել իր անունով: Այսինքն՝ պարսից մոզերը հին հայոց հեթանոսական\* պաշտամունքի տաճարային կենտրոնները այլափոխել կամ ավերածության էին ենթարկել նախքան Հռոմեական կայսրությունից արքայազն Տրդատի և Գրիգորի վերադարձը Հայաստան:

**Տրդատ III Մեծի գահակալության օրոք Սր Գրիգորի գործունեությունը:** Երբ Տրդատը վերադառնում է Հայաստան, նրա մոտ ծառայության է անցնում Գրիգորը: Տրդատը Եկեղյաց գավառում՝ Անահիտ աստվածուհու տաճարում, զոհեր մատուցելիս նկատել էր, որ արարողությանը չի մասնակցում Գրիգորը: Իմանալով, որ նա Անակի որդին է և քրիստոնյա է, Արտաշատ վերադառնալուց հետո արքան հրամայում է Գրիգորին փակել ստորգետնյա բանտում՝ **հոր Վրապում**, որտեղ վերջինս մնում է 13 տարի:

Դիոկղետիանոս կայսեր հետապնդումների հետևանքով Հռոմից Հայաստան էին փախել **Հոխվախնի** և **Գայաննի** գլխավորած քրիստոնյա կույսերը (Հոխվախմյան քույրեր): Տրդատը սիրահարվել էր Հոխվախմեհին, սակայն մերժվել էր նրա կողմից: Այդ հանգամանքը կույսերի նահատակության պատճառ էր դարձել: Այդ ամենը խորապես ցնցել էր Տրդատին, և երբ

\* Ազգային, քանզի «հեթանոս» բառը հունարեն «էթնոս»՝ «ցեղ», «ազգ» բառից է, տարբեր նշանակություն է ունեցել: հին հայոց հավատքի և քրիստոնեական սկզբնական շրջանի առումով հեթանոս նշանակում էր ցեղ, ազգ, միջնադարում ոչ քրիստոնյա, այլակրոն:



վեցերորդ օրը նա ցանկացել էր որսի գնալ, ծանր հիվանդացել էր: Նրա քրոջը՝ Խոսրովիդուխտին, տեսիլք էր երևացել, որով նրան հայտնվել էր, որ Տրդատին և նրա հետ հիվանդացած մարդկանց կարող էր բուժել միայն Գրիգորը: Տրդատի հրամանով նրան Խոր Վիրապից ազատում են: Գրիգորը բոլորին բուժում է ու սկսում քրիստոնեական քարոզչությունը:

Այդ ժամանակ Սբ Գրիգորի կոչով Հռիփ-սիմյան կույսերի վկայարաններն են շինվում: Թագավորը, թագուհին, թագավորի քույրն իրենց օգնականներով մասնակցում են շինարարությանը: Տրդատը յոթնօրյա ճանապարհ է գնում Ազատ Մասիսն ի վեր, որի գլխից հայկաբար վերցնում է ութ անտաշ մեծամեծ բարեր, դնում թիկունքին և բերում ու տեղադրում կույսերի վկայարանների հիմքում: Գրիգորը տեսիլքում հայտնված Միաձևի տեղում ևս կանգնեցնում է փրկչական խաչի նշանը:

Հայոց արքայի և կաթողիկոսի գործունեությամբ ազգային տաճարների վայրերը մաքրվում էին «անիշխանության ժամանակ» պարսից մոզերի կատարած ավերածություններից, և այդ տեղերում քրիստոնեական վկայարանների ու եկեղեցիների հիմքերն էին դրվում:

Տրդատ III Մեծի հրամանով Հայոց աշխարհի բոլոր կողմերից Վաղարշապատ եկած հայոց գործը՝ իր գորավարներով, մեծամեծերը, կուսակալները, գավառապետերը, նախարարները, ազատները, դատավորները Գրիգոր Լուսավորչին կարգում են **եպիսկոպոսապետ** (քահանայապետ): Թագավորի հրովարտակով և հայոց նախարարների ուղեկցությամբ նա մեկնում է Կապադովկիայի Մաժակ (Կեսարիա) քաղաքը, որտեղ Ղևոնդիոսի գլխավորած եպիսկոպոսների ժողովը նրան եպիսկոպոս է ձեռնադրում: Սուրբ Գրիգորը՝ որպես հայոց եպիսկոպոսապետ-կաթողիկոս, վերադառնում է Հայաստան: Տեղեկանալով, որ Գրիգորը Տարոնում է, Տրդատ Մեծը, Աշխեն թագուհին, Խոսրովիդուխտը և հայոց գործը գնում են նրան ընդառաջ, հասնում են **Բագավան**՝ **Նպասր լեռան արորորը**, և մեծ պատիվներով դիմավորում Տարոնից այն-

տեղ եկած կաթողիկոսին: Լուսաբացին Սբ Գրիգորը բոլորին՝ արքունիքին, գործին, ժողովրդին, առաջնորդում է Արածանի ափը և մկրտում: Այսպիսով՝ **301 թ. Հայաստանում, աշխարհում ամառչինը, հռչակվում է պետական կրոն:**

**Հայ առաքելական եկեղեցու նվիրապետության հաստատումը: 303 թ.**

Վաղարշապատում կառուցվում է **Մայր տաճար Ս. Էջմիածինը**: Հաստատվում է Հայաստանյայց առաքելական եկեղեցու նվիրապետությունը՝ Մայր Աթոռի առաջնորդությամբ: Գրիգոր Լուսավորիչը առաջին հերթին եկեղեցու պաշտոնյաներ (քահանաներ, սարկավագներ) է ձեռնադրում Հայաստանի նորակառույց եկեղեցիներում և թեմերում ծառայելու համար: Նրանց թվին էին պատկանում նաև նախկին հայրերը և նրանց զավակները, հատկապես Աղրիանոսի տոհմից: IV դ.-V դ. առաջին կեսին կաթողիկոսական աթոռին հիմնականում նստում էին Սբ Գրիգոր Լուսավորչի տան ներկայացուցիչները, սակայն որոշ ժամանակ կաթողիկոսական աթոռին էին նաև Աղրիանոսի (Մանազկերտցի) տան ներկայացուցիչները:

Սբ Գրիգորը, քարոզչության ու ավետարանության գործը տարածելով Հայաստանում, արևմուտքում հասցնում է սատաղացիների քաղաքից մինչև Խաղտյաց երկիրը՝ Կղարջքի մոտ, իսկ արևելքում՝ ընդհուպ մինչև մագքութների երկիրը, հյուսիսում՝ Ալանաց դոները, արևելքում՝ Կասպից սահմանները, հարավում՝ Կորդոք գավառը, Նոր Շիրական երկիրը և Ատրպատական:

Թագավորի հովանավորությամբ Գրիգոր Լուսավորիչը Հայաստանի քաղաքներում ու գյուղերում եկեղեցիներ է հիմնադրում: Տարոնում նա Քարբե լեռան լանջին դնում է Իննակնյան Ս. Կարապետ, Աշտիշատում՝ Ս. Երրորդություն եկեղեցիների հիմքերը:

**Ազգային և քրիստոնեական արժեքների ներդաշնակումը:** Հնուց եկող շատ տոներ ու ծեսեր Հայաստանում քրիստոնեության ընդունումից հետո ավանդաբար

պահպանվեցին: Ար Գրիգոր Լուսավորիչը դարձավ Հայ առաքելական եկեղեցու տոների կարգավորության հիմնադիրը: Ժամանակի ընթացքում ժողովրդական և ազգային-եկեղեցական տոները՝ Ամանորը, Ս. Ծնունդը, Տրնդեզը (Տյառնընդատաջ), Ս. Սարգիսը, Բարեկենդանը, Ծաղկազարդը, Ս. Զատիկը և այլն, հայ ժողովրդի հոգևոր-մշակութային կյանքում ներդաշնակվեցին:

Ճարտարապետության մեջ նախաքրիստոնեական բազիլիկ և գլխատուն կամ հազարաշեն կոչվող շինությունների համադրմամբ՝ եկեղեցաշինությունը, իսկ քարակորդների օգտագործմամբ՝ խաչքարերի ստեղծումը (խաչի պատկերը հնագույն ժամանակներից հայտնի է Հայկական լեռնաշխարհի ժայռապատկերներում) հայ մշակույթի՝ ազգային-քրիստոնեական հունով ընթանալու արտահայտություններից էին:

**Քրիստոնեության ընդունման պատմական նշանակությունը:** Հայաստանում քրիստոնեությունը պետական կրոն հռչակելը մեծ ազդեցություն ունեցավ հայ ժողովրդի ու պետության, հոգևոր կյանքի ու մշակույթի, գիտության ու աշխարհընկալման հետագա ընթացքի վրա: Դարեր շարունակ հայ ժողովրդի հոգևոր ու գաղափարական առաջնորդն ու պաշտպանն է եղել *Տառնորանյայց առաքիլական սուրբ եկեղեցին*, որի հովանու տակ Մեսրոպ Մաշտոցի, Սահակ Դարբևի, Մովսես Խորենացու, Եղիշեի, Դավիթ Անհաղթի, Անանիա Շիրա-



Տրդատ Գ Մեծ

կացու, Գրիգոր Նարեկացու, Ներսես Շնորհալու, Ներսես Լամբրոնացու, Գրիգոր Տաթևացու և նրանց ժամանակակիցների ու հետևորդների ստեղծագործական ժառանգությունը հոգևոր մեծ լիցք է հաղորդել հայ մշակույթին: *Հայ առաքելական եկեղեցին գիտության և կրթության օրրան է եղել, իսկ պապմության դժնդակ ժամանակներում՝ ազգապահպան հզոր վեմ հայ ժողովրդի համար:*

### Հարգիր և առաջադրանքներ

1. Ընդհանուր գծերով ներկայացրեք հայկական քաղաքակրթությունը միջնադարում. ինչ նոր որակներ այն ունեցավ:
2. Ըստ ավանդության՝ Քրիստոսի որ առաքյալներն են քարոզել Հայաստանում: Որմիզդ-Արտաշիբն ինչ քաղաքականություն էր վարում Հայաստանում:
3. Ինչ գիտեք Տրդատի դարձի և Հռիփսիմյան քույրերի մասին: Քրիստոնեությունը երբ հռչակվեց որպես Հայաստանի պետական կրոն:
4. Նորադարձ քրիստոնյաների հոգևոր պահանջումները քաղաքացու համար ինչ քայլեր ձեռնարկեց Ար Գրիգորը: Վերհիշեք և ներկայացրեք Հայոց եկեղեցու նվիրապետությունը:
5. Ազգային-քրիստոնեական ինչ տոներ գիտեք: Լեռկայացրեք ազգային և քրիստոնեական արժեքների ներդաշնակումը:
6. Քրիստոնեության ընդունումն ինչ պատմական նշանակություն ունեցավ հայ ժողովրդի կյանքում: Ինչ առաքելություն ստանձնեց Հայոց եկեղեցին:



## § 2. ԱՎԱՏԱՏԻՐՈՒԹՅԱՆ ՀԱՍՏԱՏՈՒՄԸ ՀԱՅԱՍՏԱՆՈՒՄ

**Ավատատիրական հարաբերությունների ձևավորումը:** Հայաստանում հին դարերից միջնադարին անցման փուլում հայ Արշակունյաց թագավորության ժամանակաշրջանում, նախարարական համակարգի զարգացումն ընթացավ ավատատիրական (ֆեոդալական) հարաբերությունների ուղիով: *Ավար* բառի հիմքում «ի հախաբ», «հախարարությունը» (ծառայել)» իմաստն է:

Հայաստանում հասարակական հարաբերությունները հնուց զարգանում էին համապետական՝ թագավորական հողատիրության պայմաններում: *Գյուղական համայնքները* հիմնական արտադրող տնտեսություններն էին, որոնք պետության գլխավոր հարկատուն էին: Արտաշես I-ը հողային բարեփոխությամբ ցանկացել էր սահմանազատել մասնավոր համայնքային հողատիրությունը: Մակայն ծառայող ազնվականության մասնատիրական տնտեսությունների՝ *ազարակների* և *դասարակիրաների* ընդլայնումն ի հաշիվ գյուղական համայնքների գնալով խորանում էր՝ սկիզբ դնելով պետական հողատիրության մասնատմանը սեփականատիրական կալվածքների, այսինքն՝ ավատական տնտեսությունների առաջացմանը:

Հին Արևելքի հեղինակալական այն երկրներում և երկրամասերում (Եգիպտոս, Ատրիք, Փոքր Ասիա), որոնք հիմնականում վերածվել էին հողմեական նահանգների, անցումը ավատատիրական հարաբերություններին զգալիորեն դանդաղ էր ընթանում: Հայաստանում ավատատիրական հարաբերությունների հաստատումը տեղի էր ունենում հասարակության քնականոն զարգացման ճանապարհով: Դրանով էլ պայմանավորված էին նոր հասարակական հարաբերությունների առանձնահատկությունները Հայաստանում:

Հայաստանում ավատատիրությունը սերում էր *նահապետական արմարներ ունեցող նախարարական համակարգից*, որը հնուց եկող թագավորական իշխանու-

թյան հետ ամբողջություն էր կազմում: Այդ քնականոն ընթացքը խախտեց օտար տնտեսությունների նվաճողական քաղաքականությունը, ինչը հանգեցրեց հայ Արշակունիների հարստության անկմանը 428 թ.: Եղիշեն նշել է, որ թագավորությունն անցավ հայոց նախարարներին, ինչը վկայում է նախարարական համակարգի՝ պետականության կրողը լինելու մասին:

Հայկական պետականությունը նախարարական համակարգի միջոցով պահպանվեց միջնադարում: Այն իր դրսևորումներն ունեցավ Մեծ Հայքի Հայոց Արևելից կողմերում՝ Վաչագան Բարեպաշտի գլխավորությամբ, Բագրատունիների գլխավորած հայկական թագավորությունների համադաշնության, Զաքարյանների իշխանապետության և Սասունի, Արցախի, Սյունիքի իշխանությունների, Կիլիկիայում՝ Ռուբինյանների, Հեթումյանների, Լուսինյանների պետությունների ձևով և այլն:

**Ավատատիրական հողատիրության ձևերը:** Միջնադարում հողատիրության ձևերը քազմազան էին: Առավել մեծ տեսակարար կշիռ ունեին պետական՝ թագավորական, և ավատական խոշոր հողային տիրույթները:

Մեծ Հայքի *գերագույն պները հայոց թագավորն էր:* Ավատատիրության խորացմամբ թագավորական կամ պետական հողերը մասնատվում էին, ծառայող ազնվականության հողատարածքներն աճում էին, հողի խոշոր սեփականատեր էին դառնում նախարարական ընտանիքները: Տրդատ III Մեծը հողեր շնորհեց նաև եկեղեցուն: Դրանով իսկ եկեղեցին նույնպես դառնում էր հողի սեփականատեր: Եկեղեցուն վճարվում էր բերքի մեկ տասներորդ մասը, որը կոչվում էր տասանորդ:

Հայաստանում հորից որդուն ժառանգաբար անցնող խոշոր մասնավոր հողերը կոչվում էին *հայրենական* կամ *հայրենիք*: Թագավորները հաճախակի հողային շնորհումներ էին կատարում: Պայմանական հո-

դատիրության այս կարգի կալվածքները կոչվում էին *պարգևականք*: Թագավորը տարբեր ծառայությունների համար ցմահ կամ ժառանգաբար այդ կարգի շնորհումներ էր կատարում երկրի ավագանու ներկայացուցիչներին: Եթե ստացողը մահանում էր, ապա կարիք կար նվիրատվությունը վերականգնելու: Իսկ եթե ստացողը դադարեցնում էր ծառայությունը, ապա արքունիքը հետ էր վերցնում այդ կալվածքները:

Հողատիրության մի ուրույն ձև էր *գանձագին* կոչվածը: Գանձագին հողերը մասնավոր էին՝ ենթակա առուվաճառքի: Գանան շնորհիվ իշխաններն ու եկեղեցին ավելացնում էին իրենց կալվածքները:

Ժառանգական նախարարական խոշոր հողատիրության աճի հետևանքով թագավորական հողատիրությունը կրճատվում և աստիճանաբար ամփոփվում էր հայոց թագավորին պատկանող տարածքի՝ Միջնաշխարհում գտնվող ոստանի սահմաններում: Արքունի հողային տիրույթների կենտրոնը Ռատան Հայոց գավառն էր՝ Արտաշատ մայրաքաղաքով: Հնուց այն Հայոց աշխարհի քաղաքական, տնտեսական և մշակութային կենտրոնն էր: Այրարատում՝ արքունի տիրույթներում, ապրում էին թագավորը, թագուհին ու թագածառանգը:

**Ավատատիրական աստիճանակարգը:** Հայաստանում ավատատիրական աստիճանակարգի գլուխ կանգնած էր թագավորը: Դրա հաջորդ աստիճանին աշխարհակալ նախարարներն էին՝ բոլեշխներն ու գործակալները:

Իշխանական համակարգում գործում էր ենթակայության ավատատիրական հետևյալ սկզբունքը՝ *«Իմ վասալի վասալը իմ վասալը չէ»*:

Հայ հասարակությունը կազմված էր բարձր՝ *ազարների*, և ստորին՝ *անազարների* դասերից:

*Ազարների* դասը կազմում էին ազնվականությունը՝ նախարարները՝ աշխարհակալ և աշխարհատեր, գավառակալ և գավառատեր իշխանները, և հոգևորականությունը: Ազատների դասի աշխարհիկ ներ-

կայացուցիչները զինվորական ծառայություն էին կատարում հեծելազորում: Ժամանակի ընթացքում Արշակունյաց շտաբիղներից ձևավորվեց *նաբանիկներ* կոչվող առանձին ազնվական խավը:

Ոչ ազնվական կամ *անազարների* դասին էին պատկանում քաղաքացիները՝ համեմատաբար արտոնյալ վիճակում գտնվող առևտրականներն ու արհեստավորները, շինականները, ինչպես նաև քաղաքային ու գյուղական ուսմիկները, որոնք կարող էին համալրել միայն հետևակը:

**Պետական կառավարման համակարգը:** Հայոց թագավորությունների ժամանակներում արքունիքը մայրաքաղաքում էր: Պետությունը, ինչպես հնում, կառավարում էր արքան՝ իր արքունիքով: Պատերազմ հայտարարելու, հաշտություն կնքելու, արտաքին գործերը վարելու (դեսպանություններ ուղարկելու և ընդունելու, այլ երկրների հետ բանակցելու) գերագույն իրավունքը պատկանում էր թագավորին:

Երկրի կառավարման և պաշտպանության գործում կարևոր նշանակություն ունեին պետական վարչությունները՝ գործակալությունները: Այն գործակալություն տնօրինում էր երկրի կառավարման որոշակի ոլորտ:

*Հազարապետի* գլխավորած գործակալությունը (հազարապետություն) երկրի տնտեսական-հարկային վարչությունն էր՝ միավորելով նաև հանրային աշխատանքների (քաղաքների ամրությունների, ճանապարհների և կամուրջների կառուցում, ջրանցքների անցկացում, անտառատնկումներ և այլն) կամ պետական պարհակների տնօրինությունը:

*Սպարապետության* գործակալությունը գլխավորում էր Մեծ Հայքի զինված ուժերի գլխավոր հրամանատարը՝ հայոց սպարապետը: Թագավորական կամ ոստանիկ այրուձին մշտապես նրա տրամադրության տակ էր, իսկ պատերազմի ժամանակ նրան էին ենթարկվում նախարարների զինված ուժերն ու աշխարհազորը:

*Հայր մարդպետի* գլխավորած մարդպետության գործակալությունը իրականաց-





նում էր արքունի կալվածքների ու գանձարանի հսկողությունը և Արշակունյաց սեպուհների դաստիարակությունը:

*Մաղխազության* վարչությունը գլխավորում էր մաղխազը՝ արքունիքի և թագավորական պահակազորի հրամանատարը:

*Մեծ դարավորը* հնում հայոց քրմապետն էր, IV դարից՝ Հայ առաքելական եկեղեցու առաջնորդը՝ հայոց կաթողիկոսը: Նա հսկում էր ընդունված օրենքները հատկապես ընտանիքի և եկեղեցու իրավունքի բնագավառում:

*Ասպետության* գործակալությունը ղեկավարում էր թագադիր և թագակապ ասպետը, որը պատասխանատու էր պալատական արարողությունների և օտար երկրների ղեկավարների ընդունելության համար:

Գործակալությունների ղեկավարման իրավունքը դարձել էր խոշոր նախարարական տների արտոնությունը, հազարապետությունը՝ Գնունիների, այնուհետև՝ Ամատունիների, սպարապետությունը՝ Մամիկոնյանների, ասպետությունը՝ Բագրատունիների, մարդպետությունը՝ Մարդպետունիների, մաղխազությունը՝ Խորխոռունիների: Պետական կարևոր փաստաթղթեր էին *Գահնամակը* և *Ջորանամակը*, որոնք սահմանում էին հայ նախարարների՝ ազատների և տանուտերերի կարգը՝ ըստ

զբաղեցրած պաշտոնական դիրքի, հզորության ու զորաքանակի:

Գահնամակով սահմանվում էր յուրաքանչյուր նախարարի տեղը արքունիքում, Ավելի ազդեցիկ նախարարները՝ սահմանակալ նահանգների տերերը՝ բղեշխները, նստում էին անմիջապես թագավորի կողքին՝ հատուկ բարձերի վրա:

Երկրի համար առավել կարևոր հարցերը քննարկվում էին աշխարհաժողովում՝ համաժողովրդական ժողովում, որի պարտականությունները IV դ. երկրորդ կեսից աստիճանաբար անցնում են եկեղեցական ժողովին՝ հայոց կաթողիկոսի գլխավորությամբ:

**Բանակը:** Ռազմական արվեստի հազարամյակների փորձ ունեցող հայոց կանոնավոր բանակի թվակազմը 100–120 հազար էր՝ հեծելազոր և հետևակ: Հայոց թագավորը և նախարարները որոշակի թվով հեծելազոր էին պահում: Այդ հեծելազորային ուժերը միավորվելով կազմում էին հայոց այրուձին: Հայոց ամբողջ բանակը հավաքագրվում էր՝ ըստ անհրաժեշտության:

Թագավորի հեծելազորը տեղակայվում էր Հայոց աշխարհի ռազմավարական կարևոր կետերում՝ *Ոսրան Հայոցում* և *բանակ արքունի* կոչված վայրերում:

Թագավորական *նսրանի* պաշտպանությունն իրականացնում էր արքունիքին կից հատուկ հեծյալ ջոկատներից կազմված ուստան այրուծին, որը գլխավորում էին սպարապետը, մաղխազը և մարդպետը: Միևնույն ժամանակ թագավորի անձի պաշտպանությունն ապահովում էր ընտրյալ նեսաձիգներից բաղկացած և մշտապես արքունիքում գտնվող մաղխազական այրուծին:

Թագավորական այրուծին և արքունիքը պահվում էին հիմնականում զանձարանի միջոցներից կատարվող դրամական և քնավթերը նպաստի՝ *ռոձիկի* վճարումներով:

Ջորանամակում բերված նախարարական տների հեծելազորի ընդհանուր թիվը հասնում էր 85 հազարի:

Ըստ իրենց գորքերի քանակի՝ ավագ նախարարները համարվում էին բյուրավորներ (Սյունի, Կաղմեա), այսինքն՝ 10000-ից ավելի զինվորներ ունեցողներ, և հազարավորներ (Գուգարաց, Աղձնյաց, Բզունյաց, Բագրատունի, Խորխոունի և այլք)՝ 1000-4000 հեծյալներ ունեցողներ: Ավելի քիչ հեծելազոր ունեցողները՝ հարյուրավորները, հիսնավորները (Տագրյան, Սողացի, Գուկանն, Պատսպարունի և այլք) և տասնավորներն էին:

Նեո ու աղեղը, նիզակը, վահանը, պարսատիկը, տեգը, սակրը և այլն կազմում էին հայկական քանակի սպառազինությունը: Կարևոր նշանակություն ունեին քարանետ և պարսպակործան (քարան և այլն) գործիքները: Բանակի կազմում կային նաև հետախուզական զորամասեր:

**Բնակչությունը:** Հայաստանը ազգային միատարրությունը պահպանել է նաև միջնադարում: Հայ բնակչությունն ապրում էր քաղաքներում (Արտաշատ, Դվին, Նախիջևան, Երվանդաշատ, Ջարեհավան, Կարին, Խլաթ, Մանազկերտ, Տիգրանակերտ, Վան, Ջարիշատ և այլն) և գյուղերում: Շինականները՝ ազատ և կախյալ գյուղացիները, ունեին որոշ սեփականություն՝ գյուղական համայնքի հողից մասնաբաժին, տուն, գյուղատնտեսական գործիքներ,

անասուններ: Գյուղացու տանն ապրող ընտանիքը կամ գերդաստանը կոչվում էր երդ, որը հարկատու մեկ միավոր էր:

Միջնադարում ևս հիմնական արտադրող զղակը գյուղական համայնքն էր: Տարբեր քաղաքական իրավիճակներում հարկերի ծանրացմամբ կախյալ շինականին լրիվ ընչազրկությունից հաճախ փրկում էր գյուղական համայնքի աջակցությունը: Գյուղական կենցաղում իրենց դերն ունեին նաև արհեստավորները (դարբիններ, քարագործներ, աստաղձագործներ և այլն):

**Քաղաքային կյանքը և միջազգային առևտուրը:** Հայկական քաղաքային բնակչության մի մասը առևտրականներն ու արհեստավորներն էին: Մայրաքաղաքի և այլ խոշոր քաղաքների հետ մեկտեղ արվեստների ու գիտության կենտրոն էին դառնում վանքերը:

Հայաստանով միջազգային ճանապարհների անցնելու հանգամանքով էր պայմանավորված առևտրականների խավի բավականին տարաբնույթ լինելը քաղաքներում: Հայերի կողքին կային պարսիկ, ասորի և այլ ազգերի առևտրականներ, որոնք մասնակցում էին Մետաքսի ճանապարհով կատարվող միջազգային առևտրին: Քարավաններ էին գալիս Չինաստանից, Հնդկաստանից, Իրանից: Չինական մետաքսի հետ մեկտեղ Արևելքից եկող քարավանները բերում էին արևելյան համեմունքներ, մարգարիտ, անգին քարեր և պերձանքի առարկաներ:

Արտաշատ-Սատաղ մեծ և քարեկարգ ճանապարհի վրա էին *Դվինը, Նախիջևանը, Երվանդաշատը, Ջարեհավանը, Կարինը:* Արտաշատ-Տիգրանակերտ ճանապարհին էին *Մանազկերտը և Ջարիշատը:* Տիգրանակերտը Փոքր Ասիայից և Միջագետքից եկող ճանապարհների կենտրոնում էր:

Տնտեսական՝ արհեստագործական և առևտրական կենտրոնի իր կարևոր նշանակությունն էր պահպանում Վանը: Դվինը դարձել էր խոշոր քաղաք՝ 100 հազարի հասնող բնակչությամբ:




Հայաստանի վաղմիջնադարյան առևտրական ճանապարհների մասին մանրամասն տեղեկություններ է պարունակում IV դ. հռոմեական աշխարհագետ Կաստորիոսի կազմած աշխարհագրական քարտեզ-ուղեցույցը, որը կոչվում է *Պետինգերյան քարտեզ*: Հռոմեական կայսրությունում և Հայաստանում գտնվող կայանների միջև ընկած տարածությունը ցույց է տված հռոմեական մղոններով (մոտ 1,5 կմ): Ի թիվս այլ ուղիների՝ այս քարտեզում նշված է Տիգրանակերտն Արտաշատի հետ կապող արքունի պողոտան:

Անանիա Շիրակացու «Մղոնաչափքը» կարևոր սկզբնաղբյուր է Հայաստանի առևտրական մայրուղիների վերաբերյալ: Ըստ «Մղոնաչափքի» տվյալների՝ Դվինից սկիզբ էին առնում վեց մայրուղիներ, որոնք տանում էին դեպի առաջավորասիական երկրների առևտրական կարևոր կենտրոնները:

*Արաշաչափում* տիրող կարգ ու կանոնին հետևում էին թագավորական տնտեսը՝ *շահապը*, և նրա պաշտոնյաները: Նրանք նստում էին քաղաքի միջնաբերդում՝ ղղյակում:

Քաղաքային կյանքում կարևոր դեր էր խաղում շուկան: Քաղաքային պարսպից ներս գտնվող շուկայի տարածքում էին առևտրականների խանութները, արհեստավորների գործատները: Արհեստավոր խավի մի մասը սպասարկում էր արքունիքին, իսկ մյուս մասն իր արհեստագործական արտադրանքով մասնակցում էր քաղաքային և ընդհանրապես երկրի ապրանքաշրջանառության մեջ եղած իրերի պատրաստմանը: Մեծ համբավ էին վայելում հայ ճարտարապետները, շինարար և քարտաշ վարպետները:

*Վաղարշապատում* հայ վարպետները պալատական շինարարության հետ մեկտեղ մասնակցել են նաև քաղաքի պարիսպների կառուցմանը: Թագավորական պալատը միջնաբերդում էր, որտեղից սկսվում էր *նեղքին փողոցը*: Հենց պալատի առջևում կառուցվեց Մայր տաճարը: Քաղաքի արևելյան դարպասից սկսվող ճանապարհը Վա-



Հատված Պետինգերյան քարտեզից

ղարշապատը կապում էր Արտաշատի հետ: Այն կոչվում էր *Արաշաչարի պողոտա*:

Մայրաքաղաքում հայ ազնվականությունն ապրում էր միջնաբերդում գտնվող թագավորական պալատին մոտ թաղամասում: Այստեղ էր նաև թատրոնը, ուր ներկայացվում էին ողբերգություններ, իսկ այլ քաղաքներում թատերականացված խաղերը կազմակերպվում էին հրապարակներում: Առևտրականները և արհեստավորներն ապրում էին քաղաքի որոշակի թաղամասերում:

Քաղաքներում և քաղաքամերձ ավաններում մեծ թիվ էին կազմում ռամիկները: Նրանք հիմնականում զբաղվում էին այգեգործությամբ և հացահատիկի մշակությամբ քաղաքամերձ հողատարածքներում: Մոտակա գյուղերից շինականները շուկա էին բերում գյուղատնտեսական ապրանքներ:

Հայաստանյայց առաքելական եկեղեցու նվիրապետության հաստատմամբ քաղաքների և գյուղերի կենտրոնական բարձրադիր վայրերում եկեղեցիներ էին կառուցվում: Եկեղեցաշինությունը Հայաստանի քաղաքների և գյուղերի հատակա-

գծին նոր բովանդակություն էր հաղորդում: Եկեղեցիներին կից կառուցվում էին ծխական դպրոցներ:

Միջնադարում հայկական քաղաքային

կյանքն առանձնապես մեծ վերելք ապրեց Բագրատունյաց և Կիլիկիայի հայկական թագավորությունների ժամանակներում:

### Հարգեր և առաջադրանքներ

1. Ներկայացրե՛ք ավատատիրական հարաբերությունների առաջացման առանձնահատկությունները Հայաստանում: Հողատիրության ինչ ձևեր կային:
2. Ի՞նչ դասերից էր կազմված ավատատիրական աստիճանակարգը Հայաստանում: Ովքեր էին կազմում ազատների և անազատների դասերը:
3. Ներկայացրե՛ք գործակալությունները և նրանց գործառույթները: Երբ էին հրավիրվում աշխարհաժողովները: Ի՞նչ էին բովանդակում Գահնամակը և Զորանամակը:
4. Ինչպե՞ս էր կազմվում հայոց այրուձին: Ովքեր էին իրականացնում թագավորական ոստանի պաշտպանությունը: Որքան էր հայոց քանակի թիվը:
5. Ովքեր էին շինականները և ինչ սեփականություն ունեին:
6. Ներկայացրե՛ք ամուսնական կարևոր ճանապարհները: Թվարկե՛ք վաղմիջնադարյան Հայաստանի նշանավոր քաղաքներ: Ակարագրե՛ք այդ ժամանակի հայկական քաղաքը:

## Թեմա 2. ԱՐՇԱԿՈՒՆՅԱՑ ԹԱԳԱՎՈՐՈՒԹՅՈՒՆ IV ԴԱՐՈՒՄ ԵՎ V ԴԱՐԻ ՍԿՉԲԻՆ

### § 1. ՊԱՅՔԱՐ ԿԵՆՏՐՈՆԱԿԱՆ ԻՃԵԱՆՈՒԹՅԱՆ ՈՒԺԵՂԱՅՄԱՆ ՀԱՄԱՐ

**Մեծ Հայքի թագավորության վերելքը Տրդատ III Մեծի օրոք:** Տրդատ III-ի օրոք հզորանում են կենտրոնական իշխանությունը և քանակը: Բարձրացվում է պետական վարչությունների՝ գործակալությունների դերը երկրի կառավարման և պաշտպանության գործում: Տրդատ III-ը Օտա Ամատունուն նշանակում է հազարապետ, իսկ Արտավազդ Մանդակունուն՝ սպարապետ: Երկրի տնտեսությունը վերելք է ապրում: Քաղաքական և տնտեսական դրության կայունացմանը զուգընթաց նոր թափ է ստանում առևտուրը, որի գլխավոր կենտրոններն էին Մեծ Հայքում՝ Արտաշատը և Հյուսիսային Միջագետքում՝ Մծբինը:

Տրդատ III-ը քայլեր է ձեռնարկում Հայ եկեղեցուն տնտեսապես ապահովելու նպատակով՝ գյուղական եկեղեցիների քահանաներին բոլոր ազարակ տեղերում տալով չորսական, իսկ ավաններում՝ յոթական ծխի («հող երդոյ») հողաբաժին: Հա-

յոց կաթողիկոս Գրիգոր Լուսավորիչը և Տրդատ թագավորը ձեռնամուխ են լինում կրթության գործին: Հայաստանի զանազան զավատներից հավաքված մանուկների մի մասին տալիս են ասորի դպրության, մյուսներին՝ հելլենական: Նրանց նպատակն էր հայերենի հմուտ թարգմանիչներ պատրաստելը՝ Ավետարանի խոսքը հայերեն քանավոր թարգմանությամբ ժողովրդին մատչելի դարձնելու, ինչպես նաև պետական գործավարության խնդիրը դյուրացնելու համար:

313 թ. Կոստանդիանոս I Մեծ կայսեր համաձայնությամբ ընդունվում է Միլանի հրովարտակը, ըստ որի՝ քրիստոնեությունը Հռոմեական կայսրությունում հռչակվում է որպես ազատ և մյուս կրոններին իրավահավասար կրոն: Մեծ Հայքի թագավորությունը և Հռոմեական կայսրությունը դառնում են դավանակից երկրներ, նրանց միջև հաստատվում են բարիդրացիական հարաբերություններ:



Սր Գրիգորն աշխարհիկ կյանքից առանձնացել և ձգնավորի կյանքով ապրում էր Բարձր Հայքի Դարանաղի գավառի Սեպուի լեռան Մանյա Այրք բարայրում: Տրդատ արքան Գրիգորի որդիների՝ Արթանեսի և Արիստակեսի հետ գնում է այնտեղ: Արքայի խնդրանքով Գրիգորն *Արիստակեսին եպիսկոպոս է ձեռնադրում*: Վերջինս մասնակցում է 325 թ. Նիկեացի առաջին տիեզերական ժողովին, որը սահմանում է «*Հալարտ հանգանակը*»: Արիստակեսը, վերադառնալով Հայաստան, քերում է Նիկեական կանոնները: Սր Գրիգորն այդ կանոններին ավելացնում է իր կանոնախումբը:

Մեծ Հայքի Փայտակարան աշխարհի նույնանուն քաղաքի վերակացունների խնդրանքով Տրդատ թագավորն այդ կողմերի եպիսկոպոս է ձեռնադրում Վրթանեսի որդուն՝ *Գրիգորիսին*: Նրա հոգևոր իշխանության տակ էին *Հայոց Արևելից կողմերը՝ Արցախը, Ուրիքը և Փայտակարան աշխարհը*, ինչպես նաև Հայ առաքելական եկեղեցուն ենթակա *Վիրքի ու Աղվանքի եպիսկոպոսությունները*: Գրիգորիսը բրիտանական քարոզչության ժամանակ դաժանորեն սպանվում է Կասպից ծովի արևմտյան ափին գտնվող մագքթաց երկրի թագավոր Սանեսանի հրամանով: Գրիգորիսի մարմինը նրա հավատակիցները քերում և հողին են հանձնում Արցախի *Անարաս* գյուղում՝ իր պապի՝ Սր Գրիգոր Լուսավորչի կառուցած եկեղեցում:

**Խոսրով III Կոտակի քաղաքականությունը:** Տրդատ Մեծի և նրա որդու՝ *Խոսրով III Կոպակի (330-338 թթ.)* օրոք ամրապնդվում է Հայոց աշխարհի պաշտպանական հզորությունը, տնտեսությունն ու քաղաքաշինությունը վերելք են ապրում:

Ծովիքի վերակացու Արքեղայոսը, որը հայտնի էր քաղմաթիվ անօրեն գործողություններով, նենգորեն սպանում է իրեն հանդիմանող Արիստակես կաթողիկոսին և փախչում կայսրության սահմանները: Արիստակեսի աշակերտները նրա մարմինը հանձնում են հողին Բարձր Հայքի Եկեղյաց գավառի Թիլ ավանում: Հայոց



Սուրբ Գրիգոր Լուսավորիչը մկրտում է Տրդատին:

կաթողիկոս է դառնում նրա ավագ եղբայրը՝ *Արթանես և Պարթևը (333-341 թթ.)*:

Երասխի վտակ Մեծամորի հունը փոխվելու և Արտաշատի մոտակայքում ձահիճներ առաջանալու պատճառով Խոսրովը քարեկարգում է մայրաքաղաքից ոչ հեռու գտնվող *Դվին քաղաքը* և այնտեղ կառուցում արքունի ապարանք: Նրա հրամանով Գառնի ամրոցից մինչև Դվին կաղնու ծառեր են տնկում: Անտառի մի մասը կոչվում էր «*Տաճար մայրի*», իսկ մյուսը՝ «*Խոսրովակերտ*» («Խոսրովի անտառ»), որը մինչև Երասխ էր հասնում: Թագավորը հրամայում է անտառները լցնել կենդանիներով և զազաններով՝ որսի և ժամանցի համար: Դրանք *աշխարհում առաջին արևելաական անզառաններից էին*:

Այս խաղաղ ու քարգավաճ վիճակն ընդհատում է իրեն Արշակունի հորջորջող մագքթաց թագավոր Սանեսանը: 335 թ. նա ներխուժում է Հայաստան և, ավերա-

ծրոյթուններ պատճառելով, հասնում Արարատյան աշխարհի ու գրավում Վաղարշապատը: Հայոց զորավար *Վաչե Մամիկոնյանը* Վաղարշապատից դուրս է վտարում մագքութների խառնիճաղանջ զորքերը, այնուհետև ջախջախում Օշականի Յլու գլոխ լեռան մոտ տեղի ունեցած ճակատամարտում: Սպանված Մանեսանի գլուխը բերում են Խոսրով Կոտակին՝ դրանով լուծելով Գրիգորիսի վրեժը:

**336 թ. Սասանյանների** զորքերը ներխուժում են Հայաստան: Հայոց թագավորը Բզմունիքի Դատաբեն նախարարին հանձնարարել էր դիմակայել պարսից զորքին: Սակայն Դատաբենն անցնում է թշնամու կողմը: Այդ օրհասական պահին հայոց թագավորի դեմ է գործում նաև Աղձնիքի րդեշխ Բակուրը: Հայոց բանակը սպարապետ Վաչե Մամիկոնյանի գլխավորությամբ ջախջախում է թշնամուն: Դատաբենը և Բակուրը մահապատժի են ենթարկվում: **Խոսրով Կոտակի սահմանած օրենքով** աշխարհատեր նախարարները պետք է մնային թագավորի մոտ, և նրանցից ոչ մեկը չպետք է մարտի գնար արքունի զորքի հետ:

Մծրինի պայմանագրի ժամկետը չլրացած՝ 337 թ. Սասանյան արքա **Շապուհ II Երկարակյացը (309-379 թթ.)** պատերազմ է սկսում Հռոմեական կայսրության դեմ: Չկարողանալով գրավել Մծրինը՝ պարսիկները հարձակվում են Հայոց աշխարհի վրա: Վաչե Մամիկոնյանի զորքը դուրս է գալիս թշնամու դեմ: Տեղի ունեցած ճակատամարտում երկու կողմերն էլ մեծ կորուստներ են կրում: Զոհվում են սպարապետ Վաչե Մամիկոնյանը և նրա մի քանի զինակիցները: Սակայն թշնամին դուրս էր չպարտվել երկրից: **Վրթանես կաթողիկոս օրենք է սահմանում՝** ամեն տարի Հայոց աշխարհում Վաչե Մամիկոնյանի և նրա հետ զոհված զինակիցների հիշատակը նշելու և հայրենիքի փրկության համար մղված պայքարում իրենց կյանքը գոհաբերողներին սուրբ նահատակների շարքին դասելու մասին: Հայ եկեղեցին Վրթանես կաթողիկոսի սահմանած այս կարգով հետագայում Վարդան զորավարին և նրա



Խոր Վիրապի վանքը, IV-XVII դդ.

հետ Ավարայրի ճակատամարտում իրենց կյանքը նվիրաբերած հայորդիներին նույնպես դասեց սրբերի շարքին:

Խոսրով թագավորը Վաչե Մամիկոնյանի որդուն՝ Արտավազդին, հանձնում է սպարապետության պաշտոնը: Բայց քանի որ Արտավազդը պատանի էր, մինչև նրա չափահաս դառնալը հայոց զորավարության գործը հանձն են առնում Շիրակի իշխան Արշավիր Կամսարականը և Անդոպկ Սյունին:

**Տիրանի գահակալությունը:** Խոսրով Կոտակի որդուն՝ **Տիրանին (339-350 թթ.)**, Կոտաանդիոս II-ը ձանաչել էր հայոց թագավոր, սակայն կայսրությունում պատանդ էին պահվել Տիրանի մի որդին՝ Տրդատը, և թոռները՝ Գնեղն ու Տիրիթը: Նրանց կյանքը վտանգված էր: Տիրանն ամեն կերպ աշխատում էր երկրի անկախությունը պահպանել՝ խուսափելով հռոմեա-պարսկական հակամարտության մեջ ներքաշվելուց: Վրթանես կաթողիկոսի վախճանից հետո նրա որդին՝ Հուսիկը, կաթողիկոս ձեռնադրվելու համար մեկնել էր Մաժակ-Կեսարիա: Վերադարձին Տափերի կամրջի մոտ նրան դիմավորում է Տիրան արքան: Թագավորն ու կաթողիկոսը հանդիսավորությամբ մտնում են Արտաշատ: Որոշ ժամանակ անց Հուսիկի և Տիրանի միջև հարաբերությունները սրվում են: Կաթողիկոսը հանդիմանում է թագավորին: Երբ Տիրանն իր ուղեկիցների հետ Ծոփքի Բնաբեղ բերդում ցանկանում էր մտնել եկեղեցի, Հուսիկը թույլ չի տալիս և հենց այդտեղ



էլ նահատակվում է: Եպիսկոպոսապետ Է դառնում Փառեն Աշտիշատեցին, այնուհետև՝ Շահակը՝ Աղբիանոսի տոհմից:

Տիրանի հարաբերությունները քարոզին նաև նախարարների հետ: Այդ ամենի հետևանքով մեծ կորուստներ կրեցին Ռշտունյաց և Արծրունյաց տոհմերը, իսկ հայոց գորբերի հրամանատարներ Արտավազդ և Վասակ Մամիկոնյանները հեռացան իրենց տոհմական աշխարհը՝ Տայք:

Հռոմեական կայսրության հետ շարունակվող հակամարտության ընթացքում պարսից արքան ձգտում էր ասպարեզից հեռացնել Հռոմին աջակցող Տիրանին: Այդ ժամանակ Հայաստան եկած՝ Ատրպատականի մարզպան Վարազդ, օգտվելով

ստեղծված իրավիճակից, դավադրարար ձերբակալեց Տիրանին, ածուխով աչքերը դաղեց ու տարավ Շապուհի մոտ: Հայ նախարարները փորձեցին ճանապարհին ազատել հայոց թագավորին, բայց հաջողություն չունեցան: Այնուհետև հայ ավագանին Կոստանդիոս կայսեր մոտ պատգամավորություն ուղարկեց՝ պարսիկների դեմ ռազմական դաշինք կնքելու առաջարկով: Շապուհը, իմանալով այդ մասին, ազատ արձակեց Տիրանին: Սակայն վերջինս, լինելով կույր, հեռացավ պետական գործերից և քնակություն հաստատեց Արագածի լանջերին՝ Կուաշում (Կոշ): Գահ բարձրացավ Տիրանի մյուս որդին՝ **Արշակ II-ը (350-368 թթ.):**

### Հարգելի և առաջադրանքներ

1. Ի՞նչ քայլեր ձեռնարկեց Տրդատ III-ը կենտրոնական իշխանության և քանակի հզորացման ուղղությամբ:
2. Ի՞նչու և որտեղ էր առանձնացել Լուսավորիչը: Հայաստանից ո՞վ մասնակցեց Նիկեայի տիեզերական ժողովին: Ի՞նչ է «Հավատո հանգանակը»: Ո՞վ էր Գրիգորիսը և ի՞նչ գործունեություն էր իրականացնում:
3. Երբ է թագավորել Խոսրով III Կոտակը. ինչպիսին էր Հայաստանը նրա օրոք: Ի՞նչ գործերով է նշանավորվել Խոսրով Կոտակը: Ի՞նչ կանոն սահմանեց Վրթանես հայրապետը: Խոսրով Կոտակն ո՞ւմ շնորհեց սպարապետության պատիվը:
4. Արտաքին ի՞նչ քաղաքականություն էր վարում Տիրանը: Ինչպիսի ավարտվեց արքայի և կաթողիկոսի միջև հակամարտությունը: Ի՞նչ դրսևորում ունեցան թագավորի և նախարարների միջև հարաբերությունները:

## § 2. ԱՐՇԱԿ II ԵՎ ՊԱՊ ԹԱԳԱՎՈՐՆԵՐԻ ՔԱՂԱՔԱԿԱՆՈՒԹՅՈՒՆԸ

**Ներքաղաքական իրավիճակը:** Հռոմեա-պարսկական հակամարտության սրման պայմաններում Հայաստանին ահաբեկելու նպատակով Հռոմում սպանում են Արշակի եղբորը՝ արքայազն Տրդատին: Հուսիկ կաթողիկոսի թոռան՝ **Ներսես Ա Պարթև կաթողիկոսի (353-373 թթ.)** միջնորդությամբ հայրենիք են վերադառնում մյուս պատանդները՝ Տիրիթն ու Գնելը: Վերջիններիս ազատ արձակելով՝ կայսրը նպատակ ուներ նաև, անհրաժեշտության դեպքում, նրանց օգտագործելու: Արշակի դեմ հայոց գահը հանձնելով նրանցից մեկին:

Գնելն ամուսնանում է Անդովկ Սյունու աղջկա՝ Փառանձեմի հետ: Տիրիթը, որ նույնպես սիրում էր Փառանձեմին, Արշակին տրամադրում է Գնելի դեմ՝ արքային հավաստիացնելով, թե նա ցանկանում է դավադրորեն դառնալ հայոց թագավոր: Գնելին մահապատժի են ենթարկում: Արշակը, իմանալով, որ Տիրիթն իրեն խաբել է, նրան նույնպես մահապատժի է ենթարկում, այնուհետև ամուսնանում Փառանձեմի հետ:

Արքունիքի և նախարարական տների միջև աճող լարվածությունը սպանում էր երկրի ներքին կայունությանը: 354 թ. **Տայրն**

գալտի Աշրիշապ գյուղում գտնվող Մայր եկեղեցում Ներսես Ա-ն հրավիրում է *Հայ եկեղեցու ասաջին ժողովը*, որն ընդունում է հոգևոր և աշխարհիկ կյանքին առնչվող կանոններ: Որոշվում է կառուցել վանքեր, դպրոցներ, հիվանդանոցներ, իջևանատներ, աղքատանոցներ: Ժողովի սահմանած կանոնը հայոց թագավորին ու մեծամեծերին պատվիրում էր գթասիրտ լինել իրենց ծառաների և ստորադրյալների նկատմամբ, սիրել նրանց՝ որպես իրենց ընտանիքի անդամների, անօրեն կերպով և չափազանց մեծ հարկերով չենդել հասարակ ժողովրդին: Ծառաներին էլ պատվիրում էր հնազանդ ու հավատարիմ մնալ իրենց տերերին: Աշտիշատի կանոններով արգելվում են հեթանոսական շատ սովորույթներ՝ բազմակնությունը, մահացածների վրա անվայելույ լացը, հարրեցողությունը և այլն:

Արշակ II-ն ուժեղ անձնավորություն էր և հաստատակամորեն ինքնուրույն քաղաքականություն էր վարում: Թագավորական իշխանության ամրապնդման և նախարարական կենտրոնախույս տրամադրությունները զսպելու նպատակով նա սկսում է *Արշակապատ* քաղաքի կառուցումը՝ Կոզովիտ գավառում: Արշակը թույլատրում է քաղաքում ազատորեն բնակություն հաստատել բոլոր ցանկացողներին, նույնիսկ օրինազանցներին: Այդ հանգամանքն առաջացնում է նախարարների դժգոհությունը, քանզի նրանց կալվածքներից Արշակապատ էին փախչում ավանդառուներն ու պարտապանները, նրանցից դժգոհ ծառաներն ու շինականները: Թագավորից դժգոհ նախարարները, օգտվելով առիթից, որ արքան մեկնել է Վրաստան, հարձակվում և ավերում են Արշակապատը: Արշակը պատժում է որոշ նախարարների:

**Արշակ II-ի քաղաքականությունը և պարսկա-հռոմեական պատերազմը:** 359 թ. պատերազմ է սկսվում Հռոմի և Պարսկաստանի միջև: Այս պատերազմի ընթացքում շատ կարևոր էր Հայաստանի դիրքորոշումը: Շապուհն օգնության խնդրանքով դիմում է Արշակին: Վերջինս



Շապուհ II-ի դրամներից

հայոց գործով պարսիկներից շուտ հասնում է *Մծքին* քաղաքի մոտ և հաղթանակ տանում հռոմեացիների հանդեպ: Շապուհի դատեր հետ ամուսնանալու առաջարկը Արշակը կտրականապես մերժում է: Անդովկ Սյունուն հայտնի է դառնում, որ Շապուհը մտադիր է սպանել Արշակին: Այդ մասին իմանալով՝ Արշակը անմիջապես վերադառնում է հայրենիք: Հայ-պարսկական կարճատև ռազմական դաշինքը խախտվում է: Ռազմական գործողություններն անձամբ գլխավորելու նպատակով Արևելք եկած Կոստանդինոս II-ի հրավերով Արշակ II-ը մեկնում է Մաժակ քաղաքը, որտեղ նրանք ամրապնդում են հայ-հռոմեական դաշինքը Արշակի և Օլիմպիայի կայսեր մահացած եղբոր նշանածի ամուսնությամբ: Փառանձեմը չէր կարող հաշտվել այդ իրավիճակի հետ: Նրա ծառաներից մեկը թունավորում է Օլիմպիային:

Պարսկա-հռոմեական պատերազմն ավարտվում է Տիգրանի մոտ Հուլիանոս Ուրացող կայսեր պարտությամբ և մահով: Պարսից արքայի և հռոմեական նոր կայսեր՝ Հուլիանոսի միջև 363 թ. *կնքված պայմանագրով* կայսրը պարտավորվում էր չօգնել հայոց արքային: Ըստ Փավստոս Բուզանդի՝ կայսրը Շապուհին վստահեցրել էր. «...եթե կարողանաս հաղթել նրանց և պարտադրես ծառայելու, ես նրանց թիկունքը չեմ պաշտպանի»: Հռոմեացի պատմիչ Ամմիանոս Մարկելիմոսը (IV դ.) այդ պայմանագիրն անվանել է *«ստորայի»*:

**Հայ-պարսկական պատերազմը:** Մեծ Հայքի թագավորության հարավային սահմանագլխին՝ Գանձակ (Շահաստան)



քաղաքում տեղակայված հայոց սահմանապահ գնդի հրամանատարներն Արշակ թագավորին տեղեկացնում են Շապուհ II-ի զորքերի ներխուժման վտանգի մասին: Արշակի հրամանով Վասակ սպարապետի զորքը դուրս է գալիս թշնամու դեմ և 363 թ. պարտության մատնում նրան:

Հաջորդ տարի Սասանյանների զորքերը Հայաստան են ներխուժում երեք ուղղությամբ: Արշակը, Վասակը և նրա եղբայրը տեղի ունեցած մի քանի ճակատամարտերում ջախջախում են թշնամուն:

Այդ ժամանակ Մերուժան Արծրունին ներկայանում է Շապուհին, իր հպատակությունը հայտնում նրան և, ուրանալով քրիստոնեությունը, ընդունում մազդեզականություն: Շապուհը նրան խոստացել էր օգնել տիրանալու հայոց գահին՝ երկիրը պարսկական տիրապետությանը և կրոնին ենթարկելու պայմանով:

Պարսից զորքերի ներխուժումները Հայոց աշխարհին ավերածություններ էին պատճառում: **Վասակ Մամիկոնյանը կարողանում է թշնամուն դուրս մղել երկրից:** Հաջորդ անգամ Շապուհի մեծաքանակ զորքը հասնում է Անգեղ ամուր բերդը, որտեղ Արշակունի թագավորների գերեզմաններն ու գանձերն էին: Պարսիկները, չկարողանալով տիրել այս բերդին, գնում ու գրավում են **Անի բերդը Դարանաղիում:** Նրանք չեն կարողանում քանդել միայն Սանատրուկ թագավորի շիրիմը, արքայական մյուս գերեզմանները բացում են և թագավորների ոսկորները գերեվարում՝ ասելով. «*Նրա համար ենք մենք հայոց թագավորների ոսկորները մեր աշխարհը փանում, որ այս աշխարհի թագավորների փառքը, բախրն ու քաջությունը այստեղից թագավորների ոսկորների հեղ մեր աշխարհը փոխադրվեն*»: Վասակ սպարապետի գլխավորած հայոց 60000-անոց զորքը ջախջախում է թշնամուն, ազատում թագավորների ոսկորները և վերաթաղում Արագած լեռան լանջին՝ **Աղձք** գյուղում:

Հայաստան ներխուժած պարսից զորքերը նոր պարտություններ են կրում: Երկարատև պատերազմները հյուժում էին թե՛

պարսիկների և թե՛ հայերի ուժերը: Վիճակն ավելի է ծանրանում, երբ Մերուժանի դավաճանական օրինակին հետևում է Վահան Մամիկոնյանը:

**Արշակի և Վասակի դավադրական սպանությունը:** Շապուհը, համոզվելով, որ ռազմական ճանապարհով անհնար է ընկճել հայերին, որոշում է խաբեությամբ ձերբակալել Արշակին: Նա դեսպանների միջոցով հայոց արքային Տիգրան է հրավիրում՝ վիճելի հարցերը կարգավորելու պատրվակով: Շապուհը իր մատանիով կնքված աղ է ուղարկում, ինչը պարսիկների բարձրագույն երդումն էր համարվում: Ի վերջո Արշակ թագավորը Վասակ սպարապետի ուղեկցությամբ **368 թ. մտնում է Պարսկաստան:** Շապուհն Արշակին փորձելու նպատակով, ինչպես պատմում է Փավստոս Բուզանդը, հրամայում է Հայաստանից բերել հող ու ջուր և արքունի դահլիճի հատակի կեբը ծածկում այդ հողով՝ վրան ցանելով ջուրը: Շապուհը, Արշակի ձեռքից բռնած, ձեռնելով շրջում էր դահլիճում: Պարսից հողի վրա Արշակը, որ խոսում էր գրջումով, հայկական հողի վրա սաստիկ ընթուստանում է Շապուհի դեմ և հպարտորեն ասում. «*Ընտո՛ր ինձանից, չարագործ ծառա, որ տերերիդ վրա տեր ես դարձել, և ես չեմ ների քեզ և թո որոյոց իմ նախնիների վրեժը...*»: Շապուհը հրամայում է Արշակին ձերբակալել և փակել Անիուշ բանտում:

Հաջորդ օրը Շապուհի հրամանով պալատ են բերում Վասակ Մամիկոնյանին: Նա ծաղրում է Վասակին՝ ասելով. «*Աղվես, այդ դո՛ւ էիր խանձարիչը, որ այսքան չարչարեցիր մեզ... Ես քեզ պիտի աղվեսի մահով սպանեմ*»: Իսկ Վասակ սպարապետը արժանապարտորեն պարասխատնում է. «*Այժմ, երբ ինձ փեսնում ես կարճահասակ, մեծության չափը չես հասկանում, որովհետև մինչև այժմ ես քեզ համար առյուծ էի, իսկ այժմ՝ աղվես Բայց մինչ ես Վասակն էի՝ հսկա էի, մի որս հենում էի մի լեռան վրա, իսկ մյուսն էլ՝ մյուս լեռան. երբ հենվում էի աջ ոտքիս վրա, աջ կողմի լեռն էր գեղնի փակ անցնում, երբ ձախ ոտքիս վրա էի հենվում, ձախ կողմի լեռն էր գեղնի փակ անցնում*»: Շապուհի

հարցին, թե որոնք էին այդ լեռները, Վասակ սպարապետը պատասխանում է. «Այդ երկու լեռներից մեկը դու էիր, իսկ մյուսն է՝ հունաց թագավորը»: Կատարած Շապուիք հրամայում է Վասակին սպանել: Շուտով բանտում նահատակվում է նաև Արշակ II թագավորը՝ Արշակունյաց արքայատոհմի ամենապայծառ դեմքերից մեկը:



Արածանի գետը Չիրափի դաշտում

**Պապ թագավորի գահակալությունը:** Փառանձեմ թագուհին տասնմեկ հազար ընտիր զորականներով Արշակ II-ի՝ Տիգրան մեկնելուց հետո ամրանում է Արտազես ամրոցում և երկարատև ու հերոսական դիմադրություն ցույց տալիս պարսիկներին: Թագուհու միակ հույսն իր որդու՝ Պապի վերադարձն էր, որին նա ուղարկել էր Վաղես կայսեր մոտ՝ օգնություն խնդրելու: Զավթիչները, ներխուժելով ամրոց, ոչնչացնում են ողջ մնացածներին, իսկ Փառանձեմին անմարդկային խոշտանգումների ենթարկելով՝ սպանում:

Այդ ընթացքում Մերուծանը և Վահանը երկրի տարբեր վայրերում վերածություններ էին կատարում, ասորուշաններ շինում և հայերին բռնի պարտադրում մազղեզական կրոնը: Ուրացյալ Վահանին սպանում է իր որդին՝ Սամվել Մամիկոնյանը:

**Պասար** հոռմեական գորավար Տերենտիոսի գլխավորած մի զորաջոկատով վերադառնում է Հայաստան և **հասպարտում է հայոց գահին (370-374 թթ.)**: Նահատակված սպարապետ Վասակ Մամիկոնյանի որդին՝ **Մուշեղը**, դառնում է հայոց սպարապետ և սկսում Հայոց աշխարհի ազատագրումը:

Ըստ Փավստոս Բուզանդի՝ Մուշեղը վերականգնում է «...*ինն սահմանը, որ առաջ գոյություն ուներ Հայոց երկրի և Արաց երկրի միջև, որպիսին էր մեծ գետը Կորքը*»: Մուշեղ գորավարը շրջում էր երկրում և քանդում պարսիկների ու հայրենիքն ուրացողների կառուցած մազղեզական ասորուշանները: Պարսից արքունիքից պատիվ վայելող անձինք ձերբակալվում և խստագույնս պատժվում էին: Այդպես Մուշեղը լուծում էր Արշակ արքայի և Վասակ սպարապետի վրեժը: Պապ թագավորը տեր է կանգնում

Կոզովիտ գավառի Դարույնք բերդում պահվող Արշակունյաց գանձերին: Երկրում վերաշինվում են ավերված քնակավայրերը, նորոգվում եկեղեցիները, կարգի բերվում պետության գործերը:

370 թ. Մուշեղը 40 հազար ընտիր զորականներով գնում է դեպի Հայաստանի հարավային սահմանը: Այնտեղ էր եկել Շապուհն իր զորքով, որի մի զևդի հրամանատարն էր հայրենադավ Մերուծանը: **370 թ. Արրպատրականում Մուշեղն** իր զորքով նախահարձակ է լինում: Շապուիք փախչում է, իսկ պարսից ավագներից շատերը ձերբակալվում են և Մուշեղի հրամանով մահապատժի ենթարկվում: Հաղթանակած հայերի ձեռքն են ընկնում պարսից արքայի գանձարանը և կանանոցը: Մուշեղը **հրամայում է կանանոցը վերադարձնել Շապուհին**: Շապուիք, ապշած հայոց գորավարի արարքից, մի գավաթի վրա նկարել է տալիս Մուշեղի պատկերը՝ ձեռնակ ձին հեծած: Իր զորքին հյուրասիրելու պահին նա ամեն անգամ ձեռքն է վերցնում գինու գավաթը և ասում. «**ձերմակաձին զինի արքե**»: Երբ հայոց զորքը վերադառնում է պատերազմից, ոմանք Պապի առջև ամրաստանում են Մուշեղին: Թագավորը գայրանում է, որ Մուշեղն ինքնակամ ազատել է կանանոցը՝ անհարկի մեծահոգաբար վարվելով իր մոր հանդեպ դաժանորեն գործած Շապուիի նկատմամբ:

Պապ թագավորը, տեղեկանալով, որ 371 թ.



պարսից մեծաքանակ զորքը կրկին ներխուժել է երկիր և հասել Միջնաշխարհ, հրամայում է հայոց զորքերը հավաքել Այրարատ նահանգի **Բագրևանդ գավառի Ձիրավի դաշտում**։ Նրանց են միանում հռոմեական զորաջոկատները։ Պապ թագավորը մարտավարության բոլոր կանոններով հայ-հռոմեական միացյալ ուժերը նախապատրաստում է վճռական ճակատամարտի։ Հայոց զորքի թիվը ավելի քան **90 հազար էր**։

Տերևնտիոս զորավարը խնդրում է Պապ թագավորին և Ներսես կաթողիկոսին ապահովության համար քարձրանալ Նպատ լեռը։ Այնտեղ է գնում նաև Մուշեղը։ Կաթողիկոսի քարեխոսությամբ փարատվում է Պապի գայրույթը Մուշեղի նկատմամբ։ Սպարապետը սուրբ երդում է տալիս և ստանում կաթողիկոսի օրհնությունն ու թագավորի քարի մաղթանքը, որից հետո կրկին ստանձնում է զորքի հրամանատարությունը։

Լուսադեմին սկսվում է **Ձիրավի ճակատամարտը**։ Ներսես կաթողիկոսը, բազուկները տարածած, հայոց հաղթանակի համար աղոթում է Նպատ լեռան վրա։ Մուշեղի գլխավորած զորագնդերը հաջողությամբ գրոհում են պարսիկների վրա։ Հաղթանակը կատարյալ էր։

Պարսից բանակի մնացորդները փախուստի են դիմում։ Մերոմանին ձերբակալում է Սմբատ Բագրատունին։ Նա, երկաթե շամփուրը տաքացնելով, բոլորում է պսակի ձևով և շիկացնելով ասում. «**Քեզ պսակում եմ, Մերոման, որովհետև դու ձգգրում էիր հայոց վրա թագավորելու, և իմ՝ ասպետիս պարսքն է քեզ պսակել իմ հայրերի իշխանության կարգով**»։ Եվ շիկացած շամփուրը դնում է Մերոմանի գլխին։ Այդպես իրակալացվում է չարագործի մահապատիժը։

**372 թ.** Մուշեղը, լուր ստանալով Շապուհի առաջիկա ներխուժման մասին, զորքով շարժվում է դեպի **Գանձակ**։ Հայոց զորքը քաջալերական «**Քաջ Արշակի համար**» քաջականչություններով մարտի է նետվում և ջախջախում է պարսկական ուժերը։ Վերականգնվում է երկրի խաղաղությունը։

**Պապի քարեխոսումները**։ Պապ թագավորը և Մուշեղ սպարապետը զբաղվում են

պետության անվտանգության և ռազմատնտեսական հզորության ամրապնդմամբ։ Բանակի թիվը հասցվում է մոտ հարյուր հազարի։ Հոգևորականների եղբայրներին, գավակներին և ազգականներին պարտադրվում է պետական ծառայություն կատարել։ Մինևոյն ժամանակ սահմանափակվում է եկեղեցական հողատիրությունը։ Այնպատակով Պապը նախ վերացնում է «պտղի և տասանորդների կարգը», այսինքն՝ բերքից եկեղեցուն վճարվող տուրքը։ Այնուհետև նա, հօգուտ արքունիքի, եկեղեցուց կտրում է դեռևս Տրդատ III Մեծի տված հողի մեծ մասը։ Պապի հրամանով փակվում են նաև կուսանոցները և այրինների ապաստանները, թույլ է տրվում կույսերին և այրի կանանց ամուսնանալ։ Այդպես Պապը խրախուսում էր երկրի քնակչության և հայոց բանակի թվաքանակի աճը։

Պապի վարած անկախ քաղաքականության արդյունքում Հայաստանից վտարվել էին պարսից զորքերը։ Հայոց կաթողիկոսական աթոռին Սր Ներսես Մեծի մահվանից հետո Աղքիանոսի տոհմից քարձրացած Հուսիկ-Շահակը այլևս Կեսարիա չի մեկնում ձեռնադրություն ստանալու մետրոպոլիտից, ինչով հաստատվում էր Հայոց կաթողիկոսական աթոռի սկզբնական ինքնազխտությունը։

Պապը պատգամավորներ է ուղարկում Վաղես կայսեր մոտ տարածքային պահանջով, ըստ Փավստոս Բուզանդի՝ փաստարկելով, թե՛ «հնում Կեսարիայի ուրիշ տասը քաղաք մերն են եղել, նո տուր, Ուռհա (Եդեսիա) քաղաքն էլ մեր նախնիքն են շինել, ուստի եթե չես ուզում, որ խռովություն ծագի մեր մեջ, նո տուր»։ Սա վկայում է ժամանակին այդ տարածքների՝ հայկական պետության մեջ լինելը։ **Վաղես կայսրը**, որն այդ ժամանակ Կիլիկիայի **Տարսուն** քաղաքում էր, պատասխանում է դավադրությամբ։ Կայսրը իր մոտ է կանչում հայոց թագավորին, որը վերջին պահին է իմանում դավադրության մասին։ Պապը մեծ դժվարությամբ իր 300-հոգանոց թիկնապահ գնդով կարողանում է խուսափել ծուղակից և վերադառնում է Մեծ Հայք։

Վաղես կայսեր հրամանով հոռմեական հրամանատարները 374 թ. դավադրորեն սպանում են Պապին խնջոյքի ժամանակ: Այսպես նենգաբար ասպարեզից հանվեց հայոց երիտասարդ ու եռանդուն արքան,

որն իր կարճատև գահակալման ընթացքում կատարեց բազմաթիվ հայրենասեր գործեր: Նա հայոց պատմության մեջ մնաց որպես նշանավոր արքաներից մեկը:

### Հարցեր և առաջադրանքներ

1. Ինչ քաղաքականություն էր վարում Արշակ II-ը: Ե՞րբ և ո՞ւմ կողմից է հրավիրվել Աշտիշատի ժողովը: Ինչ կարևոր որոշումներ ընդունեց այդ ժողովը: Ո՞րն էր Արշակ II-ի և նախարարների միջև հակամարտության պատճառը:
2. Ինչ ընթացք ունեցավ 359 թ. ծագած պարսկա-հունական պատերազմը: Ինչպե՞ս ընթացան հայ-հոռմեական հարաբերությունները: Ինչ գիտեք 363 թ. կնքված պայմանագրի մասին:
3. Ներկայացրե՞ք հայ-պարսկական պատերազմի ընթացքը: Ինչպե՞ս Շապուհին հաջողվեց ձեռքակալել Արշակ II-ին և Վասակ Մամիկոնյանին: Փորձե՞ք մեկնաբանել Արշակի և Վասակի պահվածքը:
4. Ինչպե՞ս ավարտվեց Արտագերսի պաշտպանությունը: Ինչո՞վ ավարտվեց 370 թ. Ատրպատականում տեղի ունեցած ճակատամարտը: Բնութագրե՞ք Մուշեղ սպարապետի արարքը:
5. Ներկայացրե՞ք Ձիրավի հաղթական ճակատամարտը: Ինչ պատժի արժանացավ դավաճան Մերուժանը:
6. Հայոց պետության անվտանգության և ռազմատնտեսական հզորության ամրապնդման ուղղությամբ ինչ քայլեր ձեռնարկեց Պապ թագավորը: Ինչ արտաքին քաղաքականություն էր վարում նա: Ներկայացրե՞ք Պապի կերպարը:

## ԼՐԱՑՈՒՑԻՉ ՆՅՈՒԹ

### **Փախստու Բուզանդը 371թ. Ձիրավի ճակատամարտի մասին**

Պապ թագավորն ու Ներսես եպիսկոպոսապետը կանգնած մնացին Նպատ լեռան վրա, և Սուրբ Ներսես, իր մշտատարած ձեռքերը երկինք բարձրացնելով, խնդրում էր Տիրուջից, որ խնայե իր ուխտին և իր Սուրբ եկեղեցիներին... Մինչ նա աղոթում էր Աստծուն, հայոց բոլոր գործերի ճակատը կրակի նման գնում էր պարսից գործերի դեմ, իսկ Մուշեղի գունդը, բոլոր մյուս գնդերից առաջ անցնելով, շտապ-շտապ գնում էր... Պարսից զնդերը պարտություն կրեցին, փախուստի դիմեցին և ցրվեցան, սփռվեցին դաշտերում, լեռների կատարներում, խորերում և ձորերում... (Հայոց պատմություն, Ե, 4):

### **§ 3. ՀԱՅՈՑ ԱՐՇԱԿՈՒՆՅԱՑ ԹԱԳԱՎՈՐՈՒԹՅԱՆ ՄԱՅՐԱՄՈՒՏԸ**

**Վարազդատի գահակալությունը և Մուշեղ սպարապետի ծրագիրը:** Հոռմեական կայսր Վաղեսը կեղծ ափսոսանք է հայտնում Պապի սպանության կապակցությամբ: Ապա Մեծ Հայքում թագավորում է Պապի ազգական **Վարազդատը (374-378 թթ.):** Նա վերադարձել էր Հռոմից, ուր հեռացել էր խուսափելով Շապուհի հետապնդում-

ներից: Վարազդատը կայսրությունում գտնվելու ժամանակ հայտնի էր դարձել որպես օլիմպիական խաղերի հաղթող: Քանի որ նա երիտասարդ էր և անփորձ, ուստի Մուշեղ սպարապետն էր առաջնորդում հայոց բանակը, իսկում Մեծ Հայքի թագավորության սահմանները և բարի խրատներ տալիս թագավորին: Մուշեղի ծրագիրը






Սր Մարոպ Մաշտոց

նախատեսում էր Սասանյանների հարձակումներից Հայաստանը պաշտպանելու նպատակով Հռոմեական կայսրության հետ սերտ ռազմական համագործակցություն: Իսկ կայսրությունը ձգտում էր Հայաստանը պահել իր քաղաքական ոլորտի մեջ:

Բառ Սահառունի նախարարը, որ Վարազդատի ուսուցիչն էր եղել, մտադրվում է Մուշեղից խել սպարապետության պաշտոնը: Նա Վարազդատին տրամադրում է Մուշեղ սպարապետի դեմ՝ հավատացնելով, թե նա է թագավոր դառնալու նպատակով կազմակերպել Պապի սպանությունը: Եվ քանի որ նրանք Մուշեղից շատ էին վախենում, ապա որոշում են ընթրիքի ժամանակ նրան սպանել: Խնջույքի թեժ պահին չարագործ Բատը Մուշեղին դավադրաբար սպանում է: *Մուշեղ Մամիկոնյանի* վերջին խոսքերն էին. «Իմ այնքան ծառայությունների, արյուն ու քրտինք թափելու... հատուցումն այն եղավ: Բայց այս մահը երանի թե ձիու վրա ինձ հասներ»:

**Արշակ III-ի գահակալությունը և Մանվել սպարապետը:** Այդ ժամանակաշրջանում գերությունից ազատվելով՝ Պարսկաստանից հայրենիք են վերադառ-



Հայոց կաթողիկոս Սր Սահակ Պարթև

նում Մանվել և Կոմս Մամիկոնյան եղբայրները: Մանվելը տեր է կանգնում Մամիկոնյան տոհմի տանուտերության և նահապետության առաջնորդությանը և ստանձնում սպարապետության գործը՝ պահանջելով Վարազդատից հեռանալ երկրից: Վերջինս էլ իր հերթին է պահանջում, որ Մանվելը հեռանա երկրից: Ի վերջո Վարազդատը հարկադրված հեռանում է կայսրության սահմանները: Իսկ Բառ Սահառունուն, ինչպես նաև Մուշեղի սպանության մյուս մեղաակիցներին բռնում և բերում են Մանվելի մոտ, որի իրամանով նրանց մահապատժի են ենթարկում:

Սպարապետ *Մանվել Մամիկոնյանի* խնամակալությամբ հայոց գահին հաստատվում են Արշակն ու Վաղարշակը՝ Պապի որդիները: *Արշակ III-ին (378-387 թթ.)* Մանվելն ամուսնացնում է իր Վարազդուխտ դստեր հետ: Երբ Մանվելը ծանր հիվանդանում է, նա իր մոտ է կանչում Արտաշիր որդուն և պատվիրում հավատարիմ լինել Արշակ թագավորին, Հայոց աշխարհը պաշտպանել թշնամիներից:

**Հայաստանի պարսկա-հռոմեական բաժանումը և Խոսրով IV-ի միավորիչ ջանքերը:** Հայ Արշակունիների տոհմից

**Խոսրովին 385 թ.** պարսից արքան ուղարկում է Հայաստան: Արշակ III-ը հեռանում է Հայաստանի արևմտյան մասը, որտեղ մահանում է երկուսուկես տարի անց: **387 թ.** Մեծ Հայքի թագավորությունը բաժանվում է Հռոմեական կայսրության և Սասանյան Պարսկաստանի միջև: Հայկական թագավորության արևմտյան մասն անցնում է Հռոմի, իսկ արևելյանը՝ Պարսկաստանի գերիշխանության տակ: Մեծ Հայքի արևմտյան մասի կառավարումը Թեոդոսիոս I կայսրը հանձնում է կուսակալներին՝ կոմսներին: Արևմտյան Հայաստանի հյուսիսարևմտյան մասը հռոմեական աղբյուրներում շարունակում էր կոչվել *Մեծ Հայք* կամ *Ներքին Հայք*, իսկ հարավարևմտյան մասում պահպանվում էր հայ նախարարների ինքնուրույնությունը: **Խոսրով IV-ը** իշխում է Արևելյան Հայաստանում:

Խոսրով IV-ը, Թեոդոսիոս I-ի համաձայնությամբ որոշ ժամանակ հարկ վճարելով, իշխում էր նաև Հայաստանի արևմտյան մասի վրա: Առանց Սասանյանների հետ համաձայնեցնելու նա հայոց կաթողիկոս է նշանակում **Սահակ Պարթևին**՝ Ներսես Մեծի որդուն՝ փորձելով միավորել երկրի երկու մասերը: Խոսրով թագավորի ինքնուրույն հարաբերությունները հռոմեական կայսեր հետ և Սահակ Պարթևին կաթողիկոս նշանակելն առաջացնում են Շապուհ III-ի գայրոյթը: Երա հրամանով պարսից պաշտոնյաները ննգորեն ձերբակալում են Խոսրովին և նրան հավատարիմ Գագավոն Կամսարականին: Գագավոնի եղբայրը՝ Շավարշ Կամսարականը, և Պարզև Անատունի իշխանը յոթ հարյուր զինակիցներով հարձակվում են պարսկական բազմաթիվ պահակախմբի վրա: Հայ քաջերից շատերը զոհվում են, իսկ Պարզևին պարսիկները գերեվարում և Խոսրովի ու Գագավոնի հետ տանում են Պարսկաստան:

**Վոամշապուհի համապետական գործունեությունը:** Խոսրով IV-ի եղբոր՝ **Վոամշապուհ արքայի (388-414 թթ.)** գահակալության տարիները խաղաղ էին և արգասավոր: Սակայն Պարսկաստանի ու Հռոմեական կայսրության միջև բաժանված

Հայաստանին սպառնացող վտանգը պահպանվում էր: Ստեղծված քաղաքական իրավիճակում պետականության շահերից բխող մեծ ջանասիրությամբ գործում էր հայոց կաթողիկոս Սահակ Պարթևը: Վոամշապուհ արքայի հետ խորհրդակցելով՝ նա մեկնում է պարսից արքունիք և ստանում Վոամ IV-ի համաձայնությունը Համագասպ Մամիկոնյանին (Սահակ Պարթևի դստեր՝ Սահականույշի ամուսնուն) հայոց սպարապետ նշանակելու մասին: Պարսից արքան նաև համաձայնվում է, որ Խոսրովի ազատման համար պայքարած նախարարները նորից տեղ դառնան պարսից արքունիքի կողմից բռնազավթված իրենց տիրույթներին: Այսպես Կամսարականները և Ամատունիները վերադարձնում են իրենց տոհմական տիրույթները:

Վոամը շտապում էր կարգավորելու հարաբերությունները Վոամշապուհի հետ, քանի որ Կոստանդնուպոլսում խռովություններ էին ծագել, և խառնաշփոթ էր ստեղծվել կայսրությունում, ինչը վտանգում էր վիճակը պարսկա-բյուզանդական սահմանային գոտում՝ Հյուսիսային Միջագետքում:

Վոամշապուհին հաջողվում է օգտվել ստեղծված իրավիճակից և դիվանագիտորեն միավորել Մեծ Հայքի երկու մասերը Բյուզանդիայի տերություններին՝ Բյուզանդիային և Պարսկաստանին հարկ վճարելու գնով: Վոամշապուհի գահակալման շրջանում տեղի է ունենում նաև մշակութային դարակազմիկ իրադարձություն: Արքայի և Սահակ Պարթև կաթողիկոսի հովանավորությամբ Մեսրոպ Մաշտոցը ստեղծում է **հայոց այբուբենը (405 թ.)**:

**Հայ Արշակունիների հարստության անկումը և դրա հետևանքները:** Վոամշապուհի մահից հետո նրա որդին՝ Արտաշեսը, անչափահաս էր: Հայ նախարարների խնդրանքով պարսից արքա Հազկերտ I-ը թագավոր է հաստատում **Խոսրով IV-ին**, որը ութ ամիս անց մահանում է (**415 թ.**): Հազկերտը հայոց գահին բազմեցնում է իր որդուն՝ **Շապուհին (415-419 թթ.)**, որի անարգաբարո կառա-



վարումը տևում է չորս տարի: Նրանից հետո Մեծ Հայքում գահակալում է **Վռամշապուհի որդին՝ Արտաշեսը (422-428 թթ.)**: Ըստ նախարարների ազդեցիկ խմբավորման կարծիքի՝ Արտաշեսը իբրև թե հեղինակագրվել էր և կորցրել երկրի կառավարման դեկր: Այդ նախարարները խնդիր էին դրել գահընկեց անելու Արտաշեսին, ինչի համար նրանք դիմում են պարսից արքային: Երկրի պառակտված ուժերը հաշտեցնելու հույսը մնում էր Սահակ Պարթև կաթողիկոսը, որը, վճռականորեն դեմ լինելով Արտաշեսի գահընկեցությանը, ասում էր. «**Քալ լիցի՝ իմ մուրբված ոչխարը մարնեմ գայլերին...**»:

Մի խումբ նախարարներ փառամոլ երեց Սուրմակի հետ բողոքով գնում են պարսից արքունիք՝ չարախոսելով, թե իբր Արտաշես թագավորը և Սահակ կաթողիկոսը հույների կողմն են անցել: Վռամ արքան իր պալատն է կանչում Արտաշեսին և Սահակ Պարթևին: Վռամի բոլոր ձիզերը՝ Սահակ կաթողիկո-

սին ստիպելու ամբաստանել հայոց թագավորին, ապարդյուն են անցնում: Զայրացած Վռամը Տիգրանի հրապարակում քննություն է կատարում: Նա, ուշադրություն չդարձնելով Արտաշեսի խոսքերին, հոժարությամբ լսում է չարախոսներին: Արդյունքում Վռամը հրամայում է թագավորությունը վերցնել **Արտաշեսից (428 թ.)** և նրան արգելափակել Պարսկաստանում, իսկ Սահակ Պարթևին գրկել կաթողիկոսությունից ու նրա փոխարենն նախկուպոսության աթոռը տալ Սուրմակին: Տիգրան մեկնած նախարարները Վռամից մեծ պարգևներ են ստանում և վերադառնում Հայաստան: Ըստ Եղիշեի՝ «**Հայոց նախարարներին անցավ թագավորությունը, որովհետքն թեպեքն հարկը պարսից արքունիքն էր գնում, սակայն հայոց այրումին ամբողջապես նախարարներն էին աստուծոյ դում պարերազմի ժամանակ**»: Հայկական պետականությունը պահպանվում էր նախարարական համակարգի միջոցով:

**Հարցեր և առաջադրանքներ**

1. Ո՞վ հաջորդեց Պապին, ինչո՞վ էր նա նշանավոր: Ի՞նչ ձևկառուցիր ունեցավ Մուշեղ Մամիկոնյանը: Մեկնաբանե՞ք նրա վերջին խոսքերը:
2. Ներկայացրե՞ք Մանվել Մամիկոնյանի գործունեությունը: Ե՞րբ և ինչո՞ւ Արշակ III-ը հեռացավ Հայաստանի արևմտյան մասը: Ի՞նչ քայլեր ձեռնարկեց խոսքով IV-ը երկրի միավորման համար:
3. Ո՞վ էր Վռամշապուհը: Համառոտ ներկայացրե՞ք նրա վարած քաղաքականության հիմնական արդյունքները:
4. Քաղաքական և հոգևոր ինչ մթնոլորտ էր Մեծ Հայքում Արտաշես Արշակունու օրոք: Ի՞նչ դիրք էր բռնել կաթողիկոս Սահակ Պարթևը: Ներկայացրե՞ք Արտաշես Արշակունու գահագրկման գործընթացը:
5. Ի՞նչ հետևանքներ ունեցավ հայ Արշակունիների արքայատոհմի անկումը:

**ԼՐԱՑՈՒՑԻՉ ՆՅՈՒԹ**

**Մովսես Խորենացին Մեսրոպյան նշանագրերի՝  
ապրվածային շնորհով փրվելու մասին**

Մեսրոպը ապավինում է աղոթքի: Եվ տեսնում է ոչ երազ քնի մեջ, ոչ տեսիլք արթնության մեջ, այլ սրտի գործարանում նրա հոգու աչքերին երևում է աջ ձեռքի թաթ՝ քարի վրա գրելիս, այնպես որ քարը գծերի հետքը պահում էր, ինչպես ձյունի վրա: Եվ ոչ միայն երևաց, այլև բոլոր (գրերի) հանգամանքները նրա մտքում հավաքվեցին, ինչպես մի ամանում: Եվ աղոթքից վեր կենալով՝ ստեղծեց մեր նշանագրերը (Հայոց պատմություն, Գ, 53):

### Թեմա 3. ՀԱՅԿԱԿԱՆ ՊԵՏԱԿԱՆՈՒԹՅԱՆ ՆԱԽԱՐԱՐԱԿԱՆ ՇՐՋԱՆԸ

#### § 1. ԱՐԵՎԵԼՅԱՆ ՀԱՅԱՍՏԱՆԻ ՄԱՐԶՊԱՆԱԿԱՆ ԿԱՐԳԱՎԻՃԱԿԸ: ՎԱՐԴԱՆԱՆՑ ՊԱՏԵՐԱԶՄԸ

**Նախարարական համակարգը:** Հայաստանի երկու հատվածներում թագավորության անկումից հետո հայոց պետականությունն ունեցավ ինքնատիպ դրսևորումներ: Այն առաջին հերթին պահպանվեց նախարարական համակարգի շնորհիվ: Հայ նախարարներն իրենց մեծ և փոքր տիրույթների տերեր մնացին ինչպես Արևելյան, այնպես էլ Արևմտյան Հայաստանում: Հայ առաքելական եկեղեցու հոգևոր առաջնորդությամբ այդ համակարգը, ամբողջություն կազմելով, հզոր ուժ էր ներկայացնում: Թե՛ սասանյան և թե՛ հռոմեական տիրակալները ձգտում էին խարխել այդ համակարգը, վերացնել հայոց ներքին ինքնավարությունը: Յուրաքանչյուր նախարարություն պահպանում էր իր գինվորական ուժը և տնտեսությունը:

Հայ Արշակունիների անկումից հետո Սասանյանները ծրագրել էին Արևելյան Հայաստանը դարձնել իրենց տերության սովորական վարչաքաղաքական միավորներից մեկը՝ *մարզպանություն*: Այդ նպատակով նրանք իրականացրին *նախարարների և Հայ եկեղեցու իրավունքների ասիմանափակումներ*: Սկզբում Վոսմ արքան որպես մարզպան Արևելյան Հայաստան ուղարկեց պարսիկ Վեհմիհրչապուհին: Այա Հայ եկեղեցու միավորիչ ուժը սասանելու նպատակով նա հրամայեց իր պալատում արգելափակել Սահակ Պարթևին: Սակայն նրա փոխարեն «կաթողիկոս» նշանակված ոմն Սուրմակին մեկ տարի անց նախարարները հեռացնում են արթոից: Հաջորդը ասորի Բրբիշոն էր, որի աղտեղի վարքի պատճառով նախարարներից շատերը Մեսրոպ Մաշտոցի և համախոհ եկեղեցականների համաձայնությամբ դիմում են Վոսմ արքային՝ պահանջելով վերադարձնել Սահակ Պարթևին:

Վախենալով հայերի ընդվզումից՝ պար-

սից արքունիքը հարկադրված համաձայնում է ազատ արձակել մեծ հեղինակություն վայելող հայոց կաթողիկոսին և վերադարձնել հայրենիք: Միաժամանակ, զգուշանալով Սահակ Պարթևի հնարավոր հայրենանակեր քայլեր ձեռնարկելուց, պարսից արքան նրան է հանձնում միայն մի քանի գյուղ, արգելում հոգևորական ձեռնադրել, թույլատրում զբաղվել միայն կրթական գործով: Հայաստան վերադառնալով՝ հայոց հայրապետն անմիջապես անցնում է միավորիչ, ազգանպաստ ձեռնարկումների:

Սահակ կաթողիկոսը պաշտպանում էր հայ նախարարների ժառանգական իրավունքները: Նորից հաստատել է տալիս իր թոռան՝ Վարդան զորավարի իրավունքները Մամիկոնյան տոհմի մեջ, կարողանում է չեզոքացնել իրեն հակաթոռ նշանակված ասորի Շամուելի գործունեությունը: Վահան Ամատունուն է անցնում հազարապետի պաշտոնը: *Վարդան Մամիկոնյանը դառնում է տպարասպետ*: Փաստորեն հայ նախարարական և եկեղեցական համակարգը փլուզելու պարսիկների քաղաքականությունը ձախողվում է: *Հայաստանը պահպանում է սեփական պետական համակարգի մի շարք կարևոր օղակներ*:

Մովսես Խորենացին, քարձր գնահատելով Սահակ Պարթևի գործունեությունը, գրել է, որ նա չղաղարեց հոգևոր կաթով սնուցանել «եկեղեցու մանուկներին Մեսրոպի հետ միասին, որին հաստատեց Վաղարշապատ քաղաքի կաթողիկե եկեղեցում, իսկ ինքը մնաց Բագրևանդ գավառում...»:

**Հայ ժողովրդի վիճակի ծանրացումը:** Հայաստանի վիճակը կտրուկ վատթարանում է Պարսկաստանում Հազկերտ II-ի գահակալության (439–457 թթ.): Նա առաջին հերթին փորձում է թուլացնել Հա-



յաստանի ռազմական ուժը: Հազկերտը հայոց գնդերն ուղարկում է Արևելք՝ քոչվոր հոների դեմ պատերազմելու:

Սահակ Պարթևը վախճանվում է 439 թ. *սեպտեմբերի 7-ին*: Նրան հողին են հանձնում Տարոն գավառի Աշտիշատ գյուղում: 440 թ. *փետրվարի 17-ին* Վաղարշապատում մահանում է նաև Մեսրոպ Մաշտոցը: Հազարապետ Վահան Ամատունին նրա աճյունը տանում է իր պապենական կալվածքը՝ Օշական գյուղը:

*Սահակ Պարթևին ու Մեսրոպ Մաշտոցին Հայ առաքելական եկեղեցին դասել է սրբերի շարքին*: Սուրբ Մեսրոպ Մաշտոցի դամբարանի վրա երեք տարի անց Վահան Ամատունին կառուցում է գմբեթավոր եկեղեցի:

Հայոց աշխարհի համար այսպիսի տազնապալի ժամանակներում կաթողիկոս *Հովսեփ Ա Վայոցձորցու (439-452 թթ.)* գլխավորությամբ 444 թ. *եկեղեցական ժողով* գումարվեց Մեծ Հայքի Այրարատ նահանգի Ծաղկոտն գավառի *Ճահապիսան* ավանում: Հայաստանի ներքին կյանքի վերաբերյալ ընդունվեց 20 կանոն, որոնց մեջ գլխավոր կետը պատիժների խստությունն էր ընդդեմ եկեղեցու և ընտանիքի կարգերը խախտողների: Պատիժներ սահմանվեցին հատկապես մոլորեցականների (բորբոխիտներ) աղանդի դեմ, որոնք եկեղեցական կանոնադրությունն ու պաշտամունքն ավելորդ էին համարում և ամեն տեսակ անկարգություն ու անօրինություն գործում:

Հայաստանի ինքնուրույնությանն ուղղված հաջորդ հարվածը 447 թ. Հազկերտի հանձնարարականով Դենշապուհ պաշտոնյայի՝ Արևելյան Հայաստանում աշխարհագրի անցկացումն էր, որի նպատակներից էին հարկերի ծանրացումը և եկեղեցու ազատության սահմանափակումը: Դենշապուհը Հայոց աշխարհի հազարապետ Վահան Ամատունու փոխարեն նշանակեց մի պարսիկ պաշտոնյայի: Մի մոզպետ էլ ստացավ երկրի դատավորի պաշտոնը:

Հայ ժողովրդի բոլոր խավերի վիճակը ծանրանում է: Ինչպես Եղիշեն է ասում. «Անում էին ոչ թե ինչպես վայել է արքունի արժանապարտությանը, այլ ավազակաբար»

*հափշտակելով, այն սարիճան, որ իրենք էլ մեծապես զարնանում էին, թե մի տեղից որ այսբան գանձ է դուրս գալիս, էլ ինչպես է շեն մնում այդ աշխարհը»:*

**Ապստամբության սկիզբը և ծավալումը:** Պարսից արքունիքը այդքանով չքավարարվեց: Շուտով ստացվեց արքայի հրամանը քրիստոնեությունից հրաժարվելու և մազդեական (գրադաշտական) կրոնն ընդունելու մասին: Դա լցրեց հայ ժողովրդի համբերության բաժակը: 449 թ. *Արտաշատում* Հովսեփ կաթողիկոսի գլխավորությամբ եկեղեցական ժողով գումարվեց, և նախարարների ու ամբողջ ժողովրդի համաձայնությամբ մերժվեց Սասանյանների՝ գրադաշտականությունն ընդունելու պահանջը:

Հազկերտը, ստանալով հայերի մերժողական նամակը, սաստիկ կատաղում է և իր մոտ կանչում հայ նախարարներին՝ մարգպան *Վասակ Սյունուն*, սպարապետ *Վարդան Մամիկոնյանին*, *Վահան Ամապունուն*, Գուգարքի բղեշխ *Աշուշային* և այլոց, ինչպես նաև Վիրքի ու Աղվանքի նախարարներին:

450 թ. *սարիլին* նախարարները ժամանում են *Տիգրնոս*: Հազկերտը սպառնում է նրանց գրադաշտականություն չընդունելու դեպքում զրկել ժառանգական իրավունքներից և ընտանիքներով աքսորել Պարսկաստանի խորքերը:

Հայրենիք վերադառնալու և ապստամբության գործը կազմակերպելու համար նախարարները որոշում են առերես ընդունել գրադաշտականությունը: Վարդան Մամիկոնյանը, տեղեկանալով այդ մասին, սկզբում կտրականապես մերժում է, սակայն երբ լսում է նախարարների վճիռը հայրենիք վերադառնալու և գործը շարունակելու մասին, տալիս է իր համաձայնությունը: Հազկերտը, իմանալով հայ նախարարների որոշման մասին, կարծելով, որ վերջապես հասել է իր նպատակին, մոզպետին ու մոզբեթին հրամայում է ուղեկցող ուժերի և հայոց գնդի հետ մեկնել Հայաստան: Սակայն նա Գուգարքի Աշուշա բղեշխին և Սյունյաց Վասակ իշխանի երկու գավակներին՝ Բաբիկին ու Ատրնեբսեհին, պատանդ է պահում իր արքունիքում:



Հայոց գունդը, հայ նախարարները և մոզերի բազմությունն ուղեկցող զորքը հասնում են Հայոց աշխարհ և քանակում **Ծաղկոսն զախտի Անգղ** ավանում: Մոզերն իրենց ուղեկցող պարսից զորքի հետ փորձում են քանդել տեղի եկեղեցին: Դա առաջացնում է տարբեր տեղերից ժամանակ հայ քնակչության գայրույթը: Նրանք **Ղևնդ էրեցի** գլխավորությամբ հարձակվում են մոզերի վրա և փրկում եկեղեցին պղծումից ու ավերումից: Իրավիճակն արագորեն սրվում է:

Հայոց սպարապետ Վարդան Մամիկոնյանը խորհրդակցություն է հրավիրում, որի ժամանակ բոլորը տեղեկանում են, որ Տիգրոն մեկնած ու վերադարձած նախարարների ուրացումը կեղծ է եղել: Ի լուր բոլորի՝ Վարդան Մամիկոնյանը հայտնում է ապստամբության մասին: Բոլորը միահամուռ երդում են տալիս, ասում **«Հախազո ոխարի»** խոսքեր: Ուխտը կնքվում է հայոց մարզպան Վասակ Սյունու և տանուտերերի ու ավագ սեպուհների մատանիներով: Աշխարհագորր, ռամիկ բազմությունը, միանալով հայոց զորաքանակին, հարձակվում են մոզերի կառուցած արուշանի՝ կրակապաշտարանի վրա, քանդում այն, իսկ մոզերին գերի վերցնելով՝ մահապատժի ենթարկում Անգղ ավանի հարևան Ջարենհավանում:

Ապստամբությունն արագորեն ծավալվում է Հայոց աշխարհում: Ապստամբ ուժերը պարսից կայազորերից ազատագրում են Արտաշատը, Գառնին, Արտազերսը և այլ քնակավայրեր: Կազմվում է կառավարություն. Վասակ Սյունին՝ մարզպան, Վարդան Մամիկոնյանը՝ սպարապետ, Հովսեփ Վայոցձորցին՝ մեծ դատավոր, Խորեն Խորխոռունին՝ մաղխագ:

Որոշ ժամանակ անց բուն Աղվանքից եպիսկոպոսների հետ Այրարատ է գալիս հազարապետը և տեղեկացնում, որ պարսիկների քանակը երեք հարյուր մոզերի հետ ներխուժել է իրենց երկիրը: Հայ զորականները քաջակերելով ճանապարհում են աղվանից պատվիրակներին՝ խոստալալով օգնության ելք գտնել:

Հայերը որոշում են օգնության խնդրան-

քով դիմել քրիստոնյա Բյուզանդական կայսրությանը: Սակայն կայսրը ոչ միայն հրաժարվում է հայերին օգնություն ցուցաբերելուց, այլև ընդհակառակը՝ Հազկերտի մոտ դեսպաններ է ուղարկում և դաշինք կնքում նրա հետ:

Հայոց զորքը հավաքվում է և, երկրի պաշտպանությունը տարբեր ուղղություններով ապահովելու համար, բաժանվում է երեք գնդի: **Առաջին գունդը՝ Ներշասպոն Արծրունու** գլխավորությամբ, շարժվում է հարավ՝ պաշտպանելու Հայոց աշխարհն Ատրպատականի կողմից: **Երկրորդ գունդը՝** սպարապետ Վարդան Մամիկոնյանի հրամանատարությամբ, նախապատրաստվում է արշավելու դեպի հյուսիս-արևելք՝ Աղվանք և Ճորա պահակ ներխուժած պարսիկների առաջխաղացումը կանգնելու նպատակով: Իսկ **երրորդ գունդը** հանձնվում է Վասակ Սյունուն և մնում Այրարատ աշխարհում:

**Խաղխաղի ճակատամարտը:** Կուր գետի անցումի մոտ Վարդան Մամիկոնյանի զորագունդը հանդիպում է պարսկական զորքին: **Ճակատամարտը** տեղի է ունենում հայոց արքայական հինավուրց ձմեռանոցի՝ Խաղխաղ քաղաքի մոտ **450 թ.**: Վարդանն իր գնդով խիզախորեն գրոհում է թշնամու զորքի աջ թևի վրա: Հաղթանակած հայկական գունդը, ցիրուցան անելով պարսիկներին, անցնում է Կուրի ձախ ափը և ազատագրում բուն Աղվանքի բերդերն ու քաղաքները:

Ապա հայոց զորքը շարունակում է իր հաղթական երթը դեպի Հյուսիսային Կովկասի նշանավոր ռազմավարական լեռնանցքներից մեկը՝ Ճորա պահակ, և այնտեղ ևս ջախջախիչ հարված հասցնում պարսիկներին: Վարդան Մամիկոնյանն այստեղից դեսպան է ուղարկում հունների մոտ և դաշինք կնքում նրանց հետ ընդդեմ Սասանյանների: Անսպասելիորեն գոժկան է հասնում Հայոց աշխարհից: Վասակ Սյունին փոխել էր իր վերաբերմունքը ապստամբության նկատմամբ: Չստանալով օգնություն Բյուզանդիայից՝ Վասակը ծրագրել էր հաշտվել պարսից արքունիքի հետ: Ժողովրդի աջակցությունը շահելու համար ևս լուրեր է տարածում, թե իբր



Հազկերտը հրաժարվել է կրոնափոխություն պարտադրելուց: Նա ժողովրդին հորդորում էր հետ կանգնել ապստամբությունից, ինչը կարող էր թելադրված լինել նաև պատանդության մեջ նրա որդիների գտնվելու հանգամանքով: Սկսված ապստամբության պայմաններում, երբ ժողովուրդը հանուն հայրենիքի կենաց ու մահու պայքարի էր ելել, Վասակ մարզպանի հետանալն ապստամբներից և հաստատվելը Սյունիքում մեծ հարված էր երկրի անվտանգությանը:

Վարդանը, գիտակցելով պահի լրջությունը, անմիջապես վերադառնում է Հայաստան: Որպես տաղանդավոր զորավար, պետական և քաղաքական մեծ գործիչ երկրի կառավարումը և զորքերի հրամանատարությունը Վարդան Մամիկոնյանն ամբողջությամբ վերցնում է իր ձեռքը: Հազարապետի պաշտոնը կրկին անցնում է Վահան Ամատունուն, իսկ մեծ դատավորինը մնում է Հովսեփ կաթողիկոսին: Վարդան Մամիկոնյանը հայոց զորքին ուղարկում է երկրի գանազան գավառները՝ ձմեռելու:

**Ավարայրի ճակատամարտը:** Հազկերտը քազմաքանակ զորք է ուղարկում Հայոց աշխարհ: Դրա հարվածային ուժը փղերի գունդն էր: Պարսից մեծաքանակ բանակը գլխավորում էր *Մուշկան Նյուսալավուրդը*:

Հայոց *վաթսունվեց հազարանոց* հեծյալ և հետևակ *զորքը* սպարապետ Վարդան Մամիկոնյանի գլխավորությամբ Արտաշատից շարժվում է Վասպուրական աշխարհի *Արցուս* գավառը և բանակում *Ավարայրի* դաշտում՝ *Տղմուս* գետի ձախ ափին: Եռապատիկ ավելի զինվոր ունեցող պարսիկ բանակը ձամբար է դնում մյուս ափին:

Հայոց սպարապետը հայրենաշունչ կոչով դիմում է հայոց զորքին: Անոնդ Երեցը և մյուս հոգևոր հայրերը Սուրբ պատարագի սեղան են կանգնեցնում և մկրտում մինչ այդ չմկրտվածներին: Այս արարողությունը տևում է ամբողջ գիշեր: Առավոտյան զինվորները նաև հաղորդություն են առնում:

Վարդան զորավարը հայոց զորքին հրամանատարներ է կարգում: Առաջին զորագունդը հանձնվում է *Ներշապուհ Արծ-*



Ավարայրի ճակատամարտը

*րունու* Երկրորդի հրամանատարը *Խորեն Խորխոռունին* էր, երրորդինը՝ *Թաթուլ Վանանդեցին*: Վարդան Մամիկոնյանը վերցնում է չորրորդ գնդի հրամանատարությունը և իրեն նիզակակիցներ կարգում Արշարունիքի տեր *Արշավիրին* ու իր եղբորը՝ *Համազասպին*:

451 թ. մայիսի 26-ի լուսաբացին սկսվում է *Ավարայրի ճակատամարտը*: Հայոց հեծելազունը, Վարդան զորավարի գլխավորությամբ անցնելով Տղմուս գետը, շեշտակի հարվածով մխրձվում է պարսից զորքի մեջ: Միայն որոշ ժամանակ անց թշնամին կարողանում է վերադասավորել իր ուժերն ու հարվածել հայոց զորքի ձախ թևին: Հայոց զորավարը թշնամու շարքերում այնպիսի իրարանցում է առաջացնում, որ Մուշկան Նյուսալավուրտը հրամայում է փղերին մտցնել ռազմի դաշտ: Կռիվը սաստկանում է: Վարդան Մամիկոնյանն ու իր զինակիցները հայտնվում են շրջապատման մեջ: Վարդան զորավարը և ութ մեծամեծ նախարարներ զոհվում են: Ճակատամարտը վերջանում է երեկոյան: Հայոց զորքից զոհվում է 1036 զինվոր, իսկ պարսիկներից՝ 3544:

Հայ առաքելական եկեղեցին Ավարայրի ճակատամարտում հերոսաբար զոհված-

ներին դասեց սուրբ ևահատակների շարքին: Երանց հիշատակի օրը մտցվեց եկեղեցական տոնացույցի մեջ՝ **Սուրբ Վարդանանց** տոն անունով:

Հայրենիքի և հավատքի պաշտպանության համար մղված Վարդանանց պատերազմը հայոց ազատատենչ ոգու վառ արտահայտությունն էր: Ավարայրի ճակատամարտը հաղթանակ էր ընդդեմ բռնակալության, դավանափոխության, մահվան: *«Մահ ոչ խնացեալ մահ է, մահ խնացեալ անմահութիւն»*, այսպիսի խոսքերով է պատմիչ Եղիշեն բնութագրել Վարդանանց սիրանքը: Հետագա դարերում Ավարայրի հերոսապատումը, սրբազործված Վարդան Մամիկոնյանի անունով, *«ոգեշնչման և հայրենիքը կյանքի գնով պաշտպանելու գաղափարի աղբյուր դարձավ հայոց բազում սերունդների համար»*:

**Վարդանանց պատերազմի արդյունքները:** Ավարայրի թոցը չէր մարել: Հայոց աշխարհի մեծ նախարարների տոհմերից շատերն ամրացել էին Միջնաշխարհի, Եգիպտոսի, Սմոնիքի, Արցախի, Ռուսիքի ամրոցներում: Նոր ուժերով համալրված պարսից զորքերը զանազան ուղղություններով դարձյալ հարձակումներ էին գործում: Միջնաշխարհում Կապույտ լեռան ամրոցների պաշտպանները քաջությամբ հակահարված տվեցին և ջախջախեցին թշնամուն:

Պարսից արքան, իր անհաջողությունների գլխավոր մեղավորը համարելով Վասակ Սյունուն, նրան կանչում է Տիգրոն:

Հովսեփ կաթողիկոսը, Ղևոնդ Երեցը և բազմաթիվ ուրիշ հոգևորականներ ու հայ նախարարներ գերվեցին: Միաժամանակ Հազկերտը հարկադրված երկրից հանում է պարսից զորքը:

Նկատի ունենալով, որ հայ նախարարներից շատերը շարունակում էին անատիկ պահել ամրոցները, պարսից արքունիքը հրահանգում է զգուշությամբ վերաբերվել բանտարկված հոգևորականներին և աշխարհը «սիրով նվաճել»:

Հայաստանում մնացած հոգևորականներին թույլատրվում է վերադառնալ իրենց ծառայությանը, շինականներին՝ տեր կանգնել իրենց ունեցվածքին և անցնել խաղաղ աշխատանքի: Բռնությամբ մազդեզականություն ընդունածներին իրավունք է տրվում վերստին վերադառնալու քրիստոնեությանը: 454 թ. հեռավոր արսորում ևահատակվում են Հովսեփ Վայոցձորցի կաթողիկոսը, Ղևոնդ Երեցը և մյուսները: Մարգարան Վասակը դատապարտվում է մահվան:

Երկար տատապանքներից հետո պարսից գերությունից ողջ մնացած նախարարները՝ 464 թ. Պերոզի գահակալության (459–484 թթ.) ժամանակ, վերադառնում են հայրենիք: Հայոց աշխարհի կաթողիկոսական աթոռին է բարձրանում **Գյուտր կաթողիկոսը (461–478 թթ.):**

*Սուրբ Վարդանանց նահապետության գնով հայոց երկիրը պահպանում է իր ներքին ինքնուրույնությունը, իսկ ժողովուրդը՝ քրիստոնեական հավատքը:*

### Հարցեր և տասջողրանքներ

1. Համառոտ ներկայացրեք նախարարական համակարգի էությունը: Ի՞նչ էին ծրագրել Սասանյանները հայ Արշակունիսների անկումից հետո:
2. Ինչպե՞ս էր Հազկերտը փորձում թույլացնել Հայաստանի ռազմական հզորությունը: Ի՞նչ նպատակ էր հետապնդում Դենշապուհի անցկացրած աշխարհագիրը:
3. Հազկերտի հրովարտակը հայերից ի՞նչ էր պահանջում: Երբ հրավիրվեց և ինչ որոշում ընդունեց Արտաշատի ժողովը:
4. Ի՞նչ որոշում ընդունեցին Տիգրոն կանչված նախարարները: Սերկայացրեք Անզղի և Զարեհավանի դեպքերը:
5. Ինչպիսի՞ իրադրություն էր Աղվանքում: Երբ է տեղի ունեցել և ինչպե՞ս է ավարտվել Խաղխաղի ճակատամարտը: Ի՞նչ հետևանք այն ունեցավ:
6. Նկարագրեք Ավարայրի ճակատամարտը: Պատմական ինչ կարևոր արդյունքներ ունեցավ ճակատամարտը:



481-484 ԹԹ.

Մարզպանական Հայաստանի քաղաքական իրավիճակը: Վարդանանց պատերազմից հետո պարսից արքունիքն առժամանակ շարունակեց հայերին սիրաշահելու քաղաքականությունը: Սակայն ժամանակ առ ժամանակ քաղաքական ու կրոնական հալածանքները կրկնվեցին: Արևելյան Հայաստանում հայրենասիրական ուժերը գլխավորում էր *Վահան Մամիկոնյանը*՝ Վարդան զորավարի եղբոր՝ Հմայակի որդին: Հայոց հոգևոր կյանքը առաջնորդում էր Գյուտ կաթողիկոսը: Արտահայտելով հայ հայրենասերների տրամադրությունը՝ օգնության խնդրանքով նա մի քանի դիմումներ էր հղել բյուզանդական կայսրին: Այս անգամ ևս Բյուզանդիան անպատասխան էր թողել հայ հայրենասերների դիմումները:

Պարսից *Պերոզ արքան* առիթը բաց չի թողնում երկիրը թուլացնելու համար: Նախարարական կալվածքները մասնատելու նպատակով նա *հողեր ժառանգելու իրավունք է շնորհում կրթուր իշխաններին՝ սեպուհներին*: Գյուտ կաթողիկոսի և Վահանի դեմ բանասարկություններ են սկսվում: Պերոզի հրամանով Գյուտ կաթողիկոսը 471 թ. մեկնում է Տիգրն: Աննկուն կերպով պատասխանելով իրեն ուղղված մեղադրանքներին՝ Գյուտ կաթողիկոսը մերժում է դավանափոխ լինելու՝ Պերոզի առաջարկը: Որոշ ժամանակ անց նա վերադառնում է հայրենիք և իր կյանքի վերջին տարիներն ապրում Վանանդ գավառում:

Պերոզ արքան, զբաղված լինելով Միջին Ասիայում հոների դեմ պատերազմով, խուսափում է հայ հայրենասիրական ուժերին քացահայտորեն հալածելու քայլերից: Սակայն նա թաքուն խրախուսում էր ուրացող նախարարներին, որոնց գլխավորում էր Գաղիշո մաղխագը:

*Արևելյան Կրասարանում* պարսիկների դեմ ապստամբում է *Վախթանգ Գորգասաթ* թագավորը (456-502 թթ.): Նա հարվածն ուղղում է պարսից արքայի դրածո բղեշխ Վազգենի դեմ: Վերջինս խիզախ իշխան Աշուշայի զավակն էր և Սուրբ Վարդանի աղջկա Շուշանիկի ամուսինը: Սակայն նա պարսից կրոնն ընդունելուց հետո ուրացել էր քրիս-

տոնությունը: Շուշանիկը, որ մայրական սրբության մարմնավորումն էր և ճշմարիտ քրիստոնյա, չնայած երկարատև տանջանքներին, մերժում է կրոնափոխվելու՝ Վազգենի բոլոր պահանջները և նահատակվում: Եկեղեցին նրան ևս դատել է սրբերի շարքին:

Վախթանգի կողմից Վազգեն բղեշխի սպանությունն ազդանշան էր Հայաստանում ապստամբության բռնկման:

**Ապստամբական պայքարը:** 481 թ. հայ նախարարները հավաքվում են *Շիրակում* և որոշում ապստամբություն սկսել: Վարդանանց ազատատենչ միաբանության ուխտերի ոգով նրանք վճռում են. «*Լավ ենք համարում մի անգամ մեռնել, քան թե ամեն օր եկեղեցու և քրիստոնեության արհամարհանքը և քակրումը տեսնել*»: Վահան Մամիկոնյանը ստանձնում է ապստամբության ղեկավարությունը՝ կանգ չառնելով անգամ պարսից արքունիքում պատանդ մնացած եղբոր՝ Վարդի կյանքը վտանգելու առջև:

Մարզպան Ատրվշնասպը քանակում է Շիրակ գավառի Անի ամրոցի մոտ: Հայ ապստամբները հետապնդում են պարսից մարզպանին մինչև Արտաշատի բերդը: Մարզպանն իր խմբով գիշերը փախչում է Ատրպատական:

481 թ. Արևելյան Հայաստանում կառավարություն է կազմվում. *Սահակ Բագրատունի* ասպետը նշանակվում է *մարզպան*, *Վահան Մամիկոնյանը՝ ապարապետ*, *Տովհաննես Ա Մանդակունի* կաթողիկոսը՝ *մեծ դադափոր*: Ատրվշնասպի՝ նոր ուժերով ներխուժման լուրը ստանալով՝ հայ ապստամբները պատրաստվում են դիմադրության: Հայ զորականները հասնում են Վարազկերտ գյուղը և լսում, որ պարսից 7-հազարանոց զորքն անցել է Արաքս գետը: *Հայոց չորս հարյուր զորականների գունդը* բանակում է Արարատի քարքարոտ լանջին՝ Մասյացոտն գավառի *Ակոտի գյուղի* մոտ: Պարսից հիմնական ուժերը ջախջախվում են, սպանվում է նաև Ատրվշնասպը:



Պարսից արքունիքը չի հապաղում Հալապոսանի դեմ նոր արշավանք կազմակերպել: Պարսիկների քաղաքական գորքը հասնում է Հեր և Զարնանդ գավառների սահմանը: Վահան Մամիկոնյանի գլխավորած հայոց զորքը շտապում է Արտագ գավառ: Ավարայրի դաշտի մոտակայքում **Ներսիսհասպար** գյուղի մոտ, տեղի է ունենում նոր **ձակարանարար**: Մարտից առաջ ոգևորիչ ձև է արտասանում կաթողիկոս Հովհաննես Ա Մանդակունին: Կոչում հատկապես աչքի է ընկնում հայոց կենտրոնական գունդը: Ճակատամարտը հայոց հաղթանակով է ավարտվում: Այդ ժամանակ էլ **Վարդը** փախուստով ազատվում է պարսից պատանդությունից և վերադառնում հայրենիք:

Հայոց զորքը հանգստանում էր Ծաղկոտն գավառում՝ Վաղարշակի Ջերմուկներում, որը հայոց բանակի հանգստավայրն էր: Շուտով Վախթանգ թագավորից օգնության խնդրանք է ստացվում: Վրաց թագավորը հայտնում էր, որ պարսկական մեծ զունդ է մտել Վիրք, իսկ ինքը նահանջել է Գուգարք աշխարհ: Վախթանգը նաև տեղեկացնում էր, որ հունների զորքին գալու հրաման էր տրված, ուստի բոլորը միասին կարող են ոչնչացնել թշնամուն: **482 թ.** Վահանը փոքրաթիվ զնդով շտապ գնում է Գուգարաց աշխարհ և այնտեղից անցնում **Ճարմանայի դաշտը**՝ Կուր գետի հովիտ: Վախթանգը հուսադրում է հայերին, թե եղած ուժերը քավարար են հաղթելու պարսիկներին: Սակայն Ճարմանայի ձակատամարտը անհաջող և ողբերգական ելք է ունենում. զոհվում են հայոց տանուտեր, սպետ Սահակ Բագրատունին, Վահանի եղբայր քաջ Վասակ Մամիկոնյանը և ուրիշներ: Հայոց բանակի մնացած ուժերով Վահան Մամիկոնյանը վերադառնում է հայրենիք:

**484 թ.** Հայաստան ներխուժած պարսից զորքերը, Հազարավուխտի գլխավորությամբ անցնելով Երասխ գետի կամուրջը, ներխուժում են Արտաշատի շրջակա տարածքը, այնուհետև՝ Դվինի մոտ ռազմական կարգով դասավորվում Խոսրովակերտ անտառից մինչև Ջրվեժի լեռները: Հայոց հեծելազունը, քաջասրտորեն ձեռքերով պարսկական զնդի մի թևը, շատերին տապալում է: Մարտի ընթացքում զոհվում են երկու նախարարներ՝ Դիմաքսյան և

Սահառունի տոհմերից: Հովհաննես կաթողիկոսը, որ զորքի հետ մարտադաշտում էր, ձիուց վայր է ընկնում և վնասվում, սակայն շարունակում է ոգեշնչել հայերին:

Վահանը հայ նախարարների հետ անցնում է **Խաղդպաց** աշխարհը: Հազարավուխտը հարձակվում է Բարձր Հայքի Շաղագոմ գավառում գտնվող ապստամբների մի խմբի վրա, ռամիկներից շատերին կոտորում է, իսկ Ներսես ու Հրահատ Կամսարական եղբայրների կանանց պատանդ տանում:

Պարսից արքունիքի կողմից հայոց մարզպան նշանակված Շապուհը Կամսարականների կանանց բանտարկում է: Բասն գավառի Բողբերդ ամրոցում և լուր տալիս նրանց ամուսիններին, որ եթե նրանք հնազանդվեն պարսից թագավորին և ապանեն Վահան Մամիկոնյանին, ապա կարող են հետ ստանալ իրենց կանանց: Կամսարական եղբայրները ոչ միայն մերժում են այդ նենգ առաջարկը, այլև սեպուհ Մուշեղ Մամիկոնյանի հետ իրենց ջոկատով փորձում են միանալ Վահան Մամիկոնյանի զորքին: Կարևոր գավառի Արծաթի կոչվող գյուղի մոտ նրանք ջախջախում են պարսից զունդը:

Վահան Մամիկոնյանն իր զորքով գնում և բանակում է Արշարունյաց գավառում: Հայոց զորականների նետածգությունից պարսից զնդից շատերը սպանվում են: Առավուտյան հայ զորականները տեսնում են Շապուհի առաջապահ զորքը, ինչը բնավ չի ընկճում Վահանին և նրա զինակիցներին. նրանք քաջաքար շարունակում են պայքարը:

Պարսկաստանից անսպասելի լուր է ստացվում, որ պարսից զորքերը Միջին Ասիայում պարտություն են կրել հեփթաղներից, և Պերոզ արքան սպանվել է: Պարսից զորքն արագորեն վերադառնում է Պարսկաստան:

**Նվարսակի պայմանագիրը:** Վահան Մամիկոնյանը հայոց զորքով գալիս է **Դվին**: Պարսկաստանում **484 թ.** գահ քարձրացած **Վաղարշը** Հայաստան է ուղարկում պարսիկ պաշտոնյա **Նիխորին**, որը հայերին պետք է տեղեկացներ, որ Վահանի և իր զինակիցների ապստամբության պատճառը Վաղարշի եղբոր՝ Պերոզի անմարդկային վարքն էր: Արքան խորա-



մանկում էր, քանզի նա Նիխորին հանձնարարել էր սիրաշահելով նրանց ենթարկել պարսից պետությանը:

Նիխորը, գալով Հայաստան, մնում է **Շեր գավառի Նվարսակ գյուղում**: Դեսպանների միջոցով նա Վահանին հրավիրում է քանակցությունների:

Վահանը Նիխորի առջև պայմաններ է դնում՝ հրաժարվել կրոնափոխության առաջարկից, անարժան և ուրացյալ նախարարներին պաշտոններ չտալ, հարգել հայ նախարարների ժառանգական իրավունքները, մարդկանց զնահատել ըստ արժանվույն և այլն, այսինքն՝ ճանաչել Հայաստանի ներքին ինքնավարությունը: Նիխորը հավանություն է տալիս Վահանի պայմաններին:

Վահանը, ստանալով Նիխորի հրավերը, նախարարների և քազում գնդերի հետ մեկնում է նրա ճամբարը: Երբ մոտենում են Նվարսակ գյուղին, Վահանն իր զորքին հրամայում է պատրաստվել՝ ըստ պատերազմական կարգի: Պատերազմական փողերի ձայներից երկիրը թողում է: Պարսից ճամբարում զարհուրած կարծում են, թե Վահանը եկել է պատերազմելու: Նրան Նիխորի պատգամավորներն ասում են, թե պարսից կարգով քանակ մտնելիս փող հնչեցնելու պատիվը վերապահված է միայն իրենց զորավարին: Վահանը պատասխանում է, որ ինքը շատ լավ գիտի Պարսից աշխարհի կարգը և արևածագին իր զորքով մտնելով Նիխորի ճամբարը՝ պահանջում է իր առաջադրած պայմանները հաստատել պարսից արքայի գրով և կնիքով:

**Նվարսակում 484 թ. պայմանագիր է**

**կնքվում** Վահան Մամիկոնյանի և Նիխորի միջև: Մի քանի օր անց Վահանը, հավաքելով հայոց այրուձին, ուխտակից նախարարների հետ մեկնում է Տիգրոն՝ կնքելու հայ-պարսկական հաշտություն: Արքունի մեծ դահլիճում Վահան Մամիկոնյանի հետ խոսելիս Վաղարշ թագավորը հայտնում է իր գոհունակությունը Նվարսակի հաշտության կապակցությամբ և, ամբողջ մեղքը Պերոզի վրա բարդելով, ասում. «*Դուք բնավ ոչինչ համարեցիք այս աշխարհը. քաջաբար մեռան նրանք, որ մեռան, և առավել քաջաբար ապրում եք դուք*»: Վահանը դիվանագիտորեն թագավորին արդար լինելու կոչ է անում: Վաղարշը համաձայնում է քավարարել Վահանի բոլոր պահանջները՝ դադարեցնել կրոնափոխության քաղաքականությունը, կրկին թույլատրել քրիստոնեական կրոնի դավանումը, չմիջամտել հայ նախարարների ներքին գործերին և պաշտոններ չտալ հավատուրացողներին, հարգել հայ հողատեր-նախարարների ժառանգական իրավունքը և այլն: Վահան Մամիկոնյանը պարսից արքայի կողմից ճանաչվում է Մամիկոնյանների տանտերության **զահեղեց և հայոց սպարապետ**: Նա, վերադառնալով Հայաստան, մեկնում է հայոց ոստան՝ **Դվին**: Վաղարշի հատուկ հրովարտակով հայոց սպարապետ ու Մամիկոնեից տեր Վահանը հաստատվում է **մարզպանի** պաշտոնում:

**Վարդան Մամիկոնյանի և Վահան Մամիկոնյանի գլխավորած ազատագրական ապստամբությունները նշանավորեցին Հայաստանում հայոց փրկության համակարգի պահպանումը և հայոց պետականության փաստական վերականգնումը:**

### **Տարցեր և առաջադրանքներ**

1. Ինչ քաղաքականություն էր վարում Պերոզը Հայաստանի նկատմամբ: Ո՞վ էր Վահան Մամիկոնյանը: Ինչ գիտեք Շուշանիկի մասին: Ինչո՞ւ Վազգեն բղեջևի սպանությունը Հայաստանում ապստամբության բռնկման ազդանշան եղավ:
2. Ինչ որոշեցին հայ նախարարները Շիրակում. ինչ իրադարձություններ հաջորդեցին դրան: Ներկայացրե՞ք Հայաստանում ձևավորված կառավարության կազմը: Նկարագրե՞ք Ալյոնի ձևկառուցումը:
3. Ձեր կարծիքով՝ ինչո՞ւ հայերը որոշեցին օգնել Վախթանգին: Ինչ հետևանքներ ունեցավ այդ օգնությունը: Ներկայացրե՞ք պատերազմի հետագա ընթացքը:
4. Ինչ քաղաքականություն որդեգրեց պարսից արքա Վաղարշը: Երբ կնքվեց Նվարսակի պայմանագիրը և ինչ նշանակություն ունեցավ: Հասնե՞լատե՞ք Վարդանանց և Վահանանց պատերազմները, ցույց տվե՞ք դրանց նշանակությունը:

### § 3. ՀԱՅԱՍՏԱՆԸ VI ԴԱՐՈՒՄ

Վաչագան Բարեպաշտի թագավորությունը Հայոց Արևելից կողմերում: V դ. 80–ական թթ. հայոց ապստամբական շարժման արդյունքներից էր Մեծ Հայքի Արցախ և Ուտիք նահանգներում (*Հայոց Արևելից կողմանք*) ու հարակից տարածքներում հայկական թագավորության հիմնումը, որտեղ Հայկագուն–Սիսակյան Առաջինից սերող տոհմից գահ բարձրացավ *Վաչագան Բարեպաշտը* (484 թ.–VI դ. առաջին կես): Վաչագան թագավորը, անցնելով սուրբ նահատակների վայրերով, Ամարատում այցելում է նաև Գրիգորիս եպիսկոպոսի գերեզմանին: Նրա բարենորոգչական գործունեության շնորհիվ բարգավաճում են եկեղեցաշինությունը և դպրոցաշինությունը: Վաչագան Բարեպաշտ արքան ստեղծում է *«Սահմանադրաբնի կանոնական»*–ը, որը եպիսկոպոսների, քահանաների և ազատների համաձայնությամբ ընդունվում է Աղունի կանոնադիր ժողովում: *Սյն համաշխարհային և հայ իրախագիրության պատմության մեջ վաղ կանոնադրություններից է:* Մովսես Կաղանկատվացու գնահատմամբ՝ Վաչագան Բարեպաշտը *«եղավ ասրվածագիրության լույսի դուռ և բազմազան բարիքների երջանիկ օրինակ»:*

Արցախի Տիգրանակերտի եկեղեցի, V–VI դդ.



*Քաղաքական իրավիճակը և Դվինի 506 թ. ժողովը:* Միջազգային ապարեզում կարևորվում էին քրիստոնեական եկեղեցիների հարաբերությունները: Հայ առաքելական եկեղեցին մշտապես պահպանել է Քրիստոսի մի բնության մասին ճշմարիտ դավանաբանությունը՝ հենվելով տիեզերական *սուսչին երեք ժողովների* վճիռների վրա: Հայ եկեղեցին չէր մասնակցել *Քաղկեդոնի IV ժողովին* (451 թ.), որն ընդունել էր Քրիստոսի՝ «մի անձ, երկու բնություն» քացատրությունը: Այդ բանաձևի հետևորդները հետագայում կոչվեցին քաղկեդոնականներ կամ երկարնակներ:

Վահան Մամիկոնյանից հետո իշխանությունը VI դ. սկզբին անցնում է նրա եղբորը՝ *Վարդ Պարթիկին:* Հայոց կաթողիկոս Բարգևն Ա–ն *Դվինում 506 թ. ժողով է գումարում՝* Հայ առաքելական եկեղեցուն ննթակա վրաց, աղվանից հոգևորականների և նեստորականներից Պարսկաստանում նեղվող քրիստոնյաների ներկայացուցիչների մասնակցությամբ: Դվինի ժողովը դատապարտում է նեստորականների գործողությունները և Նիկեայի ժողովի դավանաբանության վրա հաստատված գրություն է կազմում ու հանձնում Պարսկաս-



տանից եկած քրիստոնյաներին: *Ճողովում ուղենշվում է Հայ եկեղեցու դավանաբանական ինքնուրույնությունը:*

Վարդ Պատրիկից հետո Արևելյան Հայաստանում կառավարեցին պարսիկ մարզպանները, այնուհետև՝ հայոց իշխան *Մծեժ Գնունին:*

Ակաված բյուզանդա-պարսկական պատերազմը, որը ավերածություններ պատճառեց Հայաստանին, շարունակվում է նաև նոր գահակալած Հուստինիանոս I-ի (527–565 թթ.) և Խոսրով I Անուշիրվանի (531–578 թթ.) գահակալության սկզբնական շրջանում և ավարտվում «հավիտենական» կոչված հաշտության կնքումով (532 թ.):


**Արևմտյան Հայաստանը VI դ. առաջին կեսին:** Արևմտյան Հայաստանում (*Մեծ Հայքի արևմտյան մաս և Փոքր Հայք*) գործում էր Բյուզանդական կայսրության վարչակարգը: Հուստինիանոս I-ը, կայսրության կառավարումը կենտրոնացնելու և հայ նախարարների ներքին կառավարման համակարգը քանդելու նպատակով նաև Արևմտյան Հայաստանում իրականացնում է մի շարք միջոցառումներ, որոնք ծանրացնում են հայության վիճակը: Կայսրը 530–531 թթ. *ուսզմավարչական* բաժանում է կատարում, խախտում Արևմտյան Հայաստանի իշխանական տների համակարգը՝ կառավարումը հանձնելով բյուզանդական գինվորական պաշտոնյաներին: 536 թ. հրապարակած օրենքով Արևմտյան Հայաստանի նախկին նահանգներից և հայկական հինգ ինքնուրույն իշխանություններից ստեղծում է *Աուսջին Հայք* (կենտրոնը՝ *Տուարինիանուպոլիս*), *Երկրորդ Հայք* (*Սեբաստիա*), *Երրորդ Հայք* (*Մելիտինե*) և *Չորրորդ Հայք* (*Մարտիրուպոլիս*) նահանգները: Հատուկ օրենքով *տոհմական կալվածքներ ծառանգելու իրավունք էր տրվում նաև կանանց ու աղջիկներին*, որով նախարարական հողային տիրույթները քաժան-քաժան էին լինում: Դրանով վտանգվում էր նաև Արևմտյան Հայաստանի հայ նախարարների տոհմական կապը Արևելյան Հայաստանի նախարարական տների հետ:

Բյուզանդական կայսրության լուծը ծանրանում է: Հայոց իշխան Համազասպին զրպարտելով և սպանելով՝ կայսեր մտերիմներից Ակակիոսը հայերի վրա ավելի ծանր հարկ է դնում ու բռնություններ գործադրում: 539 թ. հայերը *Հովհաննես Արշակունու* և նրա որդու՝ *Արդավանի* գլխավորությամբ ապստամբում ու սպանում են Ակակիոսին: Հուստինիանոսն ուղարկում է Սիստաս գորավարի զորքը: Ճակատամարտում նրան նիզակով սպանում է ապստամբության ղեկավար Արտավան Արշակունին: Կայսրը նոր ուժեր է ուղարկում: Ջորավար Բուզեսը դավադրաբար սպանում է իր մոտ գնացած Հովհաննես Արշակունու: Ապստամբները հարկադրաբար դիմում են Խոսրով Անուշիրվանին: Օգտվելով առիթից՝ պարսից արքան 540 թ. Բյուզանդիային պատերազմ է հայտարարում: Բազմական գործողությունները ավերածություններ են պատճառում Հայաստանին:

Արտավանն իր եղբոր հետ անցնում է Բյուզանդիա՝ կայսեր մոտ ծառայության: Նրանք մասնակցում են Հյուսիսային Աֆրիկայում մղված կռիվներին: *Արդավանն* այնտեղ զորավար է նշանակվում, այնուհետև, գալով կայսրության մայրաքաղաք, 548 թ. մասնակցում է հայազգի զորավար *Արշակ Արշակունու*՝ Հուստինիանոսի դեմ կազմակերպած խռովությանը: Այն քացահայտվում է մասնակից բյուզանդացիների մատնությամբ: Հուստինիանոսը, ի թիվս մյուսների, Արտավանին պաշտոնանկ է անում և արգելափակում պալատում, քանզի նրանց՝ որպես հմուտ զորավարների կարիքն ինքը զգալու էր հետագա պատերազմների ժամանակ:

571 թ. ապստամբությունը և պարսկա-բյուզանդական 20-ամյա պատերազմը: Ազգային-եկեղեցական խնդիրներով մտահոգ հայոց կաթողիկոս Ներսես Բ Բագրևանդացու ջանքերով 554 թ. գումարվեց *Դվինի երկրորդ ժողովը: Այն վերջնականապես հաստատեց Հայ առաքելական եկեղեցու սզգային ինքնուրույնությունը*, ինչն արտահայտվել է Հայոց աշխարհի միա-





Դվինի կենտրոնական թաղամասի վերակազմություն

քանության ուխտին նվիրված գրվածքում: Դվինի ժողովների (VI դ.) որոշումները պաշտպանում էին Հայ եկեղեցու դավանաբանությունը թե՛ պարսից արքունիքի հովանավորած նեստորականության և թե՛ քաղկեդոնական քանաձևին հետևող բյուզանդական եկեղեցու ուսնձգություններից:

564 թ. Հայաստանում պարսիկ մարզպան Սուրենի նշանակումով ավելի ծանրացան հարկերն ու տուրքերը, վարչական և կրոնական ճնշումները: Դվինում փորձ արվեց հիմնելու զրադաշտական պաշտամունքի մի ատրուշան: Չնայած **Հովհաննես Ա Գաբրիելնացի** կաթողիկոսի և նախարարների բողոքներին՝ մարզպանը շարունակում է իր ապօրինի գործողությունները՝ հարստահարում հայ բնակչությանը, Ա. Գրիգոր եկեղեցին վերածում պահեստի: Սուրենը սպանում է Մամիկոնեից տեր Վասակի որդուն՝ Մանվելին: Այդ սպանությունը մեծ զայրույթ է առաջացնում և լցնում հայ ժողովրդի համբերության բաժակը:

**Հայերը 571 թ. ապարանքում են՝** Վասակ Մամիկոնյանի մյուս որդու՝ **Վարդանի** (Վարդան Կրտսեր) գլխավորությամբ: Կռիվ ժամանակ Սուրեն մարզպանը սպանվում է Դվինում: Ապստամներից ոմանք գնում են Բյուզանդիա: Կայսրը օգնական գործ է ուղարկում, և Վարդանը ջախջախում է պարսիկներին: Հայաստան ներխուժած պարսից զորավար Միհրանի 20-հազարանոց զորքը պարտվում է հաղամախալի ձակատամարտում:

**572 թ. վերակազմ պարսկա-բյուզանդական պայտեռազմի** ընթացքում Խոսրով Անուշիրվանը ներխուժում է Հայաստան և, անցնելով Արտազ և Բագրևանդ գավառներով, հասնում է Կարին, իսկ այնտեղից՝ Մելիտինե: Նրա դեմ է դուրս գալիս Վարդանը և պարտության մատնում: 20 տարի տևած պարսկա-բյուզանդական պատերազմը կրկին ավերածությունների պատճառ է դառնում Հայաստանում:

Պալատական դավադրության հետևանքով 590 թ. սպանվում է պարսից արքան: Պարսկաստանի արևելյան շրջանների զորքերի հրամանատար Վահրամ Չուբին

ապստամրում է: Պարսից նոր արքան՝ Խոսրով II-ը, տարածքներ խոստանալով, օգնություն է խնդրում Մավրիկիոս կայսրից (582-602 թթ.), որը չի հապաղում օգտվել Սասանյանների թուլացումից: Մավրիկիոսի ուղարկած ռազմական օգնության զգալի մասը կազմում էին հայկական զնդերը: Իր հերթին Վահրամը խնդրել էր հայոց զորավար Մուշեղ Մամիկոնյանին իրեն օգնել զորքով՝ փոխարենը **խուսրանալով վերականգնել հայոց թագավորությունը**: Մուշեղը, զգուշավորություն ցուցաբերելով, չի պատասխանում նրան: Վահրամի՝ սպառնալիքներով լի երկրորդ հրովարտակից երևում էր, թե որքանով իրավացի էր Մուշեղը՝ չվստահելով նրան: Մուշեղն իր պատասխան նամակում նշել էր, որ թագավորությունն Աստծուց է, իսկ նա ոչ թե Աստծուն էր ապավինել, այլ փղերի գորույթանք:

**Հայաստանի 591 թ. պարսկա-բյուզանդական բաժանումը**: Բյուզանդիայի և Պարսկաստանի միջև գտնվող երկրները վարչաքաղաքական խոշոր փոփոխություններ են կրում **591 թ.** պարսկա-բյուզանդական բաժանումով: Դա հատկապես վերաբերում է Հայաստանին, որի հզոր ռազմական ուժերը, հարուստ տնտեսությունը և բնական պաշարները հանգիստ չէին տալիս նվաճողներին:

Հայաստանի 591 թ. **երկրորդ բաժանումով** երկրի մեծ մասն անցավ Բյուզանդիային: Խոսրովը զիջումներ էր կատարել հիմնականում ի հաշիվ Հայաստանի: Նոր միացրած և նախկին հայկական տարածքներից





Թևավոր խաչ Դվինից. V-VI դդ.

ու հարակից երկրամասերից բյուզանդացիները կազմավորում են մի շարք խոշոր նահանգներ՝ «*Մեծ մասն Մեծ Հայոց*» (տարածվում էր մինչև Սև ծովի ափերը), «*Մասն Մեծ Հայոց*» (Բարձր Հայք), «*Չորրորդ Հայք կամ Վերին Միջագետք*», «*Մեծ Հայք*» (Տուրուբերան), «*Վորազդյն Հայք*» (Տայք), «*Ներքսագոյն Հայք*» (Այրարատ նահանգի մեծ մասը) և այլ նահանգներ:


Նվաճողներին հանգիստ չէր տալիս հայոց գորքերի հզորությունը, ինչը երևում է բյուզանդական Մորիկ կայսեր՝ պարսից արքային ուղարկած նամակից. «*Անհնազանդ մի ազգ են... մեր միջև...: Բայց եկ... ես ինչ (այսինքն՝ Արևելյան Հայաստանի հայ գորականներին) ժողովեմ և Թրակիա ուղարկեմ, և դու քոնը (այսինքն՝ Արևելյան Հայաստանի հայ գորականներին) ժողովիր և հրամայիր Արևեք տանել: Քանզի, եթե մեռնեն, մեր թշնամիները կմեռնեն, և եթե ապանեն, մեր թշնամիները կապանվեն, և մենք կապրենք խաղաղությամբ: Քանզի, եթե նրանք իրենց երկրում մնան, մեզ հանգիստ չի լինի»: Այս հրեշավոր ծրագիրը Բյուզանդիայի նվաճողական քաղաքականությունից էր բխում:*

Հայ գորավարները հաճախ ապստամբում էին: Նրանցից էր *Սմբատ Բագրատունին*, որը ազատագրական շարժում էր սկսել հայրենիքում: Նա ցանկանում էր մնալ ու պայքարել Հայաստանի ազատագրման ու թագավորության վերականգնման համար, այլ ոչ թե կռվել նվաճող պետությունների հեռավոր սահմաններում: Կայսրը հրամայում է Սմբատին ու նրա զինակիցներին ձերբակալել և նետել կրկեսի գազանների առջև: Նախ նա բռունցքի հարվածով սպանում է արջին, հետո փախուստի է մատնում ցուլին, ապա խեղդում է առյուծին: Կայսրը հանդիսականների պահանջով ազատում է նրան:

### Հարգեր և առաջադրանքներ

1. Ինչի արդյունքում ստեղծվեց և ինչ տարածքներ էր ընդգրկում Վաչագան Բարեպաշտի թագավորությունը: Ներկայացրեք նրա գործունեությունը:
2. Քրիստոսի քնության քաջատրոյության ինչ ուսմունք է դավանում Հայոց եկեղեցին: Երբ և ինչպե՞ս առաջացան քաղկեդոնական և հակաքաղկեդոնական ուղղությունները: Երբ և ո՞վ է հրավիրել Դվինի 506 թ. ժողովը, ինչ որոշում ընդունվեց:
3. Ի՞նչ նպատակով և ինչ միջոցառումներ իրականացրեց Հուստինիանոս I-ը, ինչ հետևանքներ դրանք ունեցան: Ներկայացրեք հակաբյուզանդական ապստամբությունն ու խոտվությունը:
4. Ի՞նչ որոշում ընդունեց 554 թ. գումարված Դվինի ժողովը: Ի՞նչ քաղաքականություն էին վարում պարսիկները հայերի նկատմամբ: Ներկայացրեք 571-572 թթ. ապստամբության ընթացքը:
5. Որտեղով էր անցնում պարսկա-բյուզանդական 591 թ. սահմանագիծը: Ի՞նչ միջոցներով էին Պարսկաստանն ու Բյուզանդիան ջլատում հայոց ռազմական հզորությունը:

ՀԱՅԿԱՍՏԱՆԻ VII-IX ԴԱՐՈՒՆՈՒՄ





## § 4. ՀԱՅԱՍՏԱՆԸ VII ԴԱՐԻՄ

Պարսկա-բյուզանդական պատերազմի վերակումը: Հայաստանը VII դարի առաջին տասնամյակներում կրկին հայտնվեց պարսկա-բյուզանդական պատերազմական գործողությունների ոլորտում:


Պատերազմի առաջին տարիներին նախաձեռնությունը Պարսկաստանի (Իրան) կողմն էր: Խոսրով II-ի զորքերը ներխուժում են Արևմտյան Հայաստան, որտեղ հայ ժողովրդի պայքարը գլխավորում է **Վահան իշխանը Տարնում**:

Պատերազմի շրջանում՝ 607–608 թթ., Բյուզանդիայի զործուն աջակցությամբ **Վրաց եկեղեցին ընդունում է քաղկեդոնականություն և անջազվում Հայ եկեղեցուց**:

Սասանյանների զորքերը գրավում են Բյուզանդական կայսրությանը ենթակա տարածքները Ասորիքում, Փոքր Ասիայում և Եգիպտոսում: 614 թ. նրանք տիրում են նաև Երուսաղեմին, որտեղից, որպես ավար, ոսկու և արծաթի հետ տանում են նաև **Խաչափայրը**, որի վրա խաչել էին Քրիստոսին:

615 թ. Խոսրով II-ը գումարում է Տիգրոնի ժողովը, որին մասնակցում էին պարսից տիրապետության տակ հայտնված երկրներից հոգևոր և աշխարհիկ ներկայացուցիչներ: Հայերից ներկա էին **Կոմիդրաս Մամիկոնյան** և **Մաթեոս Անարունի** եպիսկոպոսներն ու **Սմբար Բագրատունին**: Վիճաբանություններից հետո ընդունվում են տիեզերական առաջին երեք ժողովների վճիռները, և մերժվում են 451 թ. Քաղկեդոնի ժողովի որոշումները: Խոսրովը հրամայում է. «Ամեն քրիստոնյա, որ իմ իշխանության տակ է, հայոց հավարին թող հարի»: Տիգրոնի ժողովից հետո **Կոմիդրաս Մամիկոնյանը** պաշտոնապես օժիվում է **հայոց կաթողիկոս** (615–628 թթ.): Նրա ջանքերով կառուցվում է հոյակերտ **Ս. Հովհաննիսի տաճարը** (618 թ.):

**Հայաստանի քաղաքական վիճակը VII դարի 20–30-ական թթ.:** VII դ. 20–ական թթ. Հերակլ կայսրը (610–641 թթ.) մի քանի արշավանք է ձեռնարկում դեպի Պարսկաստան: Բյուզանդական զորքերի



Էջմիածնի Ս. Հովհաննիս տաճարի ընդհանուր տեսքը. 618 թ.

երթուղիներն անցնում էին Հայաստանով, որի պատճառով մեր երկիրը կրկին դառնում է պատերազմի թատերաբեմ: Բյուզանդացիները լուրջ հաջողություններ են ունենում: 631 թ. **սևպրեմերի 14-ին Հերակլը Խաչափայրը վերադարձնում է Երուսաղեմ**: Հենց այդ օրն էլ քրիստոնյաներն սկսում են նշել **Խաչվերացի (Սուրբ Խաչ) եկեղեցական տոնը**:

Արևելյան Հայաստանում սկսվել էր **անկախացման գործընթաց՝ մարզպան Վարազդիրոց Բագրատունու** (628–632 թթ.) գլխավորությամբ: Դրանից անհանգստացած ախյայան երկրները մոռանում են իրենց միջև առկա թշնամությունը և կրկին հայերի դեմ գործում միասնաբար: Բյուզանդական և պարսկական իշխանությունները Վարազդիրոցի դեմ դավադրություն են կազմակերպում: Վարազդիրոցը ցանկանում էր մնալ և ծառայել հայրենիքում, սակայն կայսրը նրան ուղարկում է Կոստանդնուպոլիս: Չհաշտվելով «պատվավոր աքսորյալի» վիճակի հետ՝ նա մասնակցում է Հերակլի դեմ կազմակերպած դավադրությանը: Դավադրության բացահայտումից հետո Հերակլը բոլորին դաժանորեն պատժում է, իսկ Վարազդիրոցին աքսորում մի կղզի:

Արևմտյան Հայաստանի կառավարիչ

Մեծ Գեունին գործում էր ազատատենչ հայ գորականների դեմ: Նա ձերբակալում է իշխան **Դավիթ Սահառունու**: Հայրենասիրական ուժերը համախմբվելով ջախջախում են Մեծին: Դավիթը ստանձնում է երկրի գորավարությունը: Հերակլը նրան տալիս է *«պարբիկ-կյուրապաղապի»* աստիճան և ճանաչում **հայոց իշխան**: Հերակլի այդպիսի վերաբերմունքը թելադրված էր թե՛ Բյուզանդիային համակած ձգնաժամով և թե՛ արաբների հարձակումներով: Դավիթ Սահառունին մինչև VII դարի 30-ական թթ. վերջը **գլխավորում է երկրի վերամիավորման գործը**: Նրան փոխարինում է **Թեոդորոս Ռշրունին**:

**Հայաստանը և արաբների զավթողական պատերազմները**: Արաբական թերակղզում քնակվող և անասնապահությանը զբաղվող ցեղերի քաղաքական միավորումը տեղի ունեցավ **622 թ.**՝ իրենց մարգարե **Մուհամմեդի օրոք**: Նա եղավ մահմեդական (իսլամ) կրոնի (կենտրոնը՝ Մեքքա քաղաքը) և Արաբական խալիֆայության հիմնադիրը: Մուհամմեդը անմիջապես սկսեց նվաճողական պատերազմներ, որ շարունակեցին նրա հաջորդները: **636 թ.** բյուզանդական զորքը խոշոր պարտություն կրեց Յարմուք գետի ափին, իսկ **637 թ.** արաբները Քադիսիայի ճակատամարտում ջախջախիչ հարված հասցրին նաև պարսիկներին և **կործանեցին պարսկական տերությունը**:

**Հայոց իշխան և ապարապետ Թեոդորոս Ռշրունին**, օգտվելով երկու աշխարհակալ երկրների՝ արաբներից կրած պարտությունից, **639 թ. վերամիավորեց Հայաստանի արևմտյան և արևելյան մասերը**: Երկիրը դարձավ ինքնուրույն իշխանապետություն: Հայոց իշխանի **նաբավայրն Աղթամար կղզին էր**, որտեղից իրականացվում էր երկրի պաշտպանությունը:

**640 թ.** սկսվեցին **արաբական զորքերի** ներխուժումները **Հայաստան**: **641 թ.** հոկտեմբերին արաբները հարձակվում են **Դվինի** վրա: Չնայած քնակիչների համառ դիմադրությանը՝ նրանք գրավում, ավե-

րում ու թալանում են քաղաքը, քնակիչներից շատերին կոտորում, իսկ 35 հազար մարդ գերեվարում և տանում խալիֆայության խորքերը: Արաբական արշավանքները հետագա տարիներին կրկնվում են:

Կոստանդին (Կոստաս) II կայսրը (641–668 թթ.), չհաշտվելով Թեոդորոս Ռշտունու ինքնուրույն քաղաքականության հետ, նրան մեղադրում է Հայաստանում գտնվող բյուզանդական մի ջոկատի՝ արաբներից **643 թ.** կրած պարտության մեջ և ձերբակալում: Այդ նույն ժամանակ գերությունից փախչում և հայրենիք է վերադառնում **Վարազդիտը**: Կայսրությունն արաբների դեմ հայերի աջակցությունը ստանալու համար նրան շնորհում է կյուրապաղատի կոչում և հանձնում հայոց իշխանի պաշտոնը: Սակայն Վարազդիտը շուտով մահանում է: Հայաստանը կայսրության ոլորտում պահելու ձգտումով Կոստասն ազատ է արձակում Թեոդորոսին և ճանաչում նրա իշխանությունը:

**647 թ.** խալիֆայության զորքերը դարձյալ ներխուժում են Հայաստան, Վիրք ու բուն Աղվանք: Վասպուրականի կողմերում ասպատակած արաբական զորամասը չի կարողանում գրավել Հերան և Որդսպու բերդերը: Այա արաբները փորձում են իրենց վրեժը լուծել Կոզովիտ գավառի Արծաի ամրոցի քնակիչներից: Թեոդորոս Ռշտունու գլխավորությամբ ամրոցին օգնության հասած հայոց զորքը գլխովին ջախջախում է արաբներին՝ իրենց երկու զորավարներով:

Հայ ժողովուրդը դիմակայեց խալիֆայությանը: Մինչդեռ Հայաստանի նկատմամբ նվաճողական քաղաքականություն վարած Սասանյան Պարսկաստանը մի քանի տարվա ընթացքում լրիվ ջախջախվեց ու կործանվեց, իսկ Բյուզանդական կայսրությունը, չսթափվելով խալիֆայությունից կրած պարտություններից, կրկին շարունակեց իր նվաճողական քաղաքականությունը Հայաստանի հանդեպ:

**Հայ-արաբական պայմանագիրը**: Խալիֆայությունը չէր հրաժարվել Հայաստանը նվաճելու ծրագրից: Նման պայման-



ներում հայ հոգևոր ու աշխարհիկ իշխանների մի խմբավորում՝ *Ներսես Գ Տայեցի կաթողիկոսի ղեկավարությամբ*, շարունակում էր հույներ կապել քրիստոնյա Բյուզանդիայի օգնության հետ: Սակայն մյուս թևը՝ Թեոդորոս Ռշտունու գլխավորությամբ, փորձում էր քաղաքական հարաբերություններ հաստատել Արարական խալիֆայության հետ: Ռշտունին Հայաստանի անվտանգությունն ապահովելու նպատակով 652 թ. մեծ ընծաներով ուղղվեց Ասորիքի (Սիրիա) և Վերին Միջագետքի՝ այդ ժամանակվա կառավարիչ *Մուավիայի* մոտ: Արաբները, ձեռնառու համարելով հայերի հետ դաշինքը, *Դամասկոսում* կնքում են *հայ-արաբական դաշնագիր*:

*Ըստ պայմանագրի՝* խալիֆայությունն առնվազն 3 տարի հարկ չէր գանձելու, իսկ դրանից հետո հայերն այնքան էին վճարելու, որչափ կամենային: Ի հաշիվ գանձվող հարկի՝ հայերը 15-հազարանոց այրուծին էին պահելու, որը պետք է պատրաստ լիներ գործելու այլ տեղերում: Հայաստանում արաբական զորք չէր լինելու: Բյուզանդացիների ներխուժման դեպքում խալիֆայությունն այնքան զորք էր ուղարկելու, որքան հայերը կամենային:

Պայմանագրի կնքումը սրում է հայ-բյուզանդական հարաբերությունները: 653 թ. Կոստանդին II-ը 100-հազարանոց բանակով ներխուժում է Հայաստան: Կարինում նրան են ներկայանում Ներսես կաթողիկոսն ու Մուշեղ Մամիկոնյանը և խնդրում հրաժարվել Հայաստանը կողոպտելու քայլից: Կոստանդին II-ն իր զորքի մեծ մասը հետ է ուղարկում, իսկ ինքը 20-հազարանոց զորքով գալիս է Դվին: Նա հայոց հեծելազորի իշխան է նշանակում Մուշեղ Մամիկոնյանին: Այդ իրավիճակում, «պայմանագրի» համաձայն արաբները չեն հապաղում ներխուժել Հայաստան: Նրանք հետապնդում են բյուզանդական զորքին, որը նախ փախչում է Տայք, իսկ այնտեղից՝ Տրապիզոն, որտեղ և պարտություն է կրում հետապնդող արաբական զորքից:

*Թեոդորոս Ռշտունին* գնում է Դամաս-



Զվարթնոցի տաճարի մանրակերտը ըստ Թ. Թորամանյանի վերակազմության

կոս՝ Մուավիայի մոտ, և որպես հայոց իշխան՝ Հայաստանի հետ *միաժամանակ իշխանություն սրանում նաև Վիրքի ու Արփանքի վրա՝* մինչև Ճորա պահակն ընկած տարածքները:

Արաբների հաջորդ ասպատակությունը և բյուզանդական ներխուժումը մեծ ավերածություններ են պատճառում երկրին: Արաբները Հայաստանից հեռանում են մեծ ավարով և բազում գերիներով: Ռշտունին, կամովին միանալով գերիներին, 656 թ. մահանում է օտարության մեջ: Նրա մարմինը բերում և թաղում են հայրենի կապածքում՝ Ռշտունիքում:

**Հայաստանի անկախության վերականգնումը:** VII դ. երկրորդ կեսը նշանավորվում է Հայաստանի վերականգնված անկախության պահպանմամբ և երկրի քարգավաճմամբ:

Թեոդորոս Ռշտունուն հաջորդում է *Տամազույ Մամիկոնյանը*: Կոստանդին II-ը, ձգտելով Հայաստանը ներգրավել կայսրության ազդեցության ոլորտը, նրան ձանաչում է հայոց իշխան: Սերեոսի քնու-


թագրմամբ՝ նա առաքինի, ընթերցասեր և ուսումնասեր այր էր, որը քաջությամբ և ջերմեռանդությամբ նախանձախնդիր է լինում գինվորական գործին: Համազասպի իշխանության տարիները խաղաղ էին:

Ներսես Գ-ն 661 թ. ավարտում է Զվարթ-  
 ևնցի տաճարի կառուցումը:

Հայոց իշխան **Գրիգոր Մամիկոնյանի** (661-685 թթ.) կառավարումը նույնպես խաղաղ էր: Դա պայմանավորված էր նաև արդեն խալիֆ դարձած Մուավիայի կառավարմամբ, երբ կրկին ուժի մեջ էր մտել Թեոդորոս Ռ-շտունու հեռառես թաղաքականության շնորհիվ կնքված հայ-արաբական պայմանագիրը: Հայաստանի տարածքային ամբողջականության և անկախության վերականգնումը հսկայական նշանակություն ունեցավ Հայոց աշխարհի թաղաքական և տնտեսական քարգավաճման համար: Հայաստանի կախումը խալիֆայությունից ձևական ընույթ ուներ, իսկ վճարվող հարկը չնչին էր՝ 500 դահեկան:

Հայոց իշխան Գրիգոր Մամիկոնյանին հայ պատմիչներն անվանում են կարգ ու կանոնի բարեպաշտ առաջնորդ: Նա Արուճ ավանում ձեռնարկում է Ս. Գրիգոր եկեղեցու, իսկ կողքին՝ իշխանական պալատի կառուցումը:

680 թ. վերջից Հայաստանը սկսում է հարկ չվճարել խալիֆայությանը: Հինգ տարի անց հյուսիսից ներխուժած խազարների դեմ մղած պայքարում զոհվում է Գրիգոր Մամիկոնյանը, որին հաջորդում է **Աշոտ Բագրատունին** (686-689 թթ.): Նրա օրոք Հայաստանի վիճակը վատթարանում է խալիֆայության և կայսրության զորքերի



Թալինի տաճարը հարավից: VII դ.

ներխուժումների հետևանքով: Աշոտ Բագրատունին երկիր ներխուժած արաբական զորքին պարտության է մատնում, սակայն թշնամուն հետապնդելու ժամանակ ինքը ևս զոհվում է: 689 թ. Հայաստան է ներխուժում բյուզանդական զորքը: **Ներսես Կանաքականին** կայսրը ճանաչում է հայոց իշխան: Նրա օրոք կառուցվում է Թալինի նշանավոր եկեղեցին:

Մի կողմից՝ բյուզանդացիներն էին ձգտում ամրապնդելու կայսրության ազդեցությունը Հայաստանում, իսկ մյուս կողմից՝ արաբները սաստկացնում էին իրենց հարձակումները: Ներսես Կանաքականին հաջորդած **Սմբատ Բագրատունու** իշխանության տարիներին շարունակվում էր հայ ժողովրդի հերոսական դիմադրությունը խալիֆայության զորքերին: Բայց նրանց հարձակումներն օրեցօր տաստկանում էին և լուրջ սպառնալիք դառնում Հայաստանի անկախության համար:

### Հարգեր և առաջադրանքներ

1. Ինչ ընթացք ունեցավ պարսկա-բյուզանդական հակամարտությունը VII դարի սկզբներին: Ովքեր ավարտին հասցրին: Հայաստանի միավորման զորքընթացը:
2. Ներկայացրե՞ք արաբական արշավանքները Հայաստան և դրանց հետևանքները:
3. Երբ և ինչ պայմաններով կնքվեց հայ-արաբական պայմանագիրը: Ինչ նշանակություն այն ունեցավ:
4. Ներկայացրե՞ք Հայաստանի վիճակը VII դ. երկրորդ կեսին:



## § 5. ՀԱՅ ՆԱԽԱՐԱՐԱԿԱՆ ՀԱՄԱԿԱՐԳԸ ԱՐԱԲԱԿԱՆ ԽԱՆԻՖԱՅՈՒԹՅԱՆ ԳԵՐՈՇԵՆԱՆՈՒԹՅԱՆ ՇՐՋԱՆՈՒՄ

Արաբական խալիֆայությունը, գրավելով Հայաստանը, Վիրքը, բուն Աղվանքն ու Մերձկասայան շրջանները, 701 թ. կազմեց մեկ ընդհանուր վարչաքաղաքական Արմինիա կոչվող միավոր՝ փոխարքայություն (որի կենտրոնը նախ Դվինն էր, VIII դ. վերջից՝ Պարթավը): Հայ ժողովուրդը VIII–IX դարերում բազմիցս ապստամբեց օտար լծի դեմ: Հայ նախարարական համակարգը, չնայած խալիֆայության դաժան բռնություններին, պահպանել էր իր քաղաքաբարրերը, որոնց հողատիրական հիմքը կազմում էին Բագրատունյաց, Սյունյաց, Մամիկոնյան և Արծրունիների իշխանական տիրույթները: Հայոց իշխանի պաշտոնը հիմնականում զբաղեցնում էին Հայաստանում և ամբողջ Արմինիայում մեծ հեղինակության տեր Բագրատունյաց տան ներկայացուցիչները, որոնց էր անցել նաև հայոց սպարապետի պաշտոնը: Հայ եկեղեցին այդ ծանրագույն ժամանակաշրջանում շարունակում էր իր ազգապահպան գործունեությունը:

**Հակաարաբական ապստամբությունները VIII դարի առաջին կեսին:** Արմինիայի առաջին արաբ ոստիկանի (կառավարիչ) դաժան հարկահանությանը և կրոնական հալածանքներին հայերը պատասխանեցին ապստամբությամբ, որը գլխավորեց Աշոտ իշխանի որդին՝ Սմբատ Բագրատունին:

Այդտի գյուղ հասած նախարարներին հետապնդում էր ավելի քան 5–հազարանոց արաբական զորքը: Հայկական 2000–անոց այրուձին շարունակում է ճանապարհը և Երասխի հովտում՝ Լարդանակերտ ավանում, 703 թ. հունվարին բանակ է դնում: Լուսաբացին ապստամբները գրոհում են թշնամու գորթի վրա, որը, սարսափելի սառնամանիքին գիշերելով բաց երկնքի տակ, կորցրել էր մարտունակությունը: Ջախջախված արաբների փախուստի պահին սատույցը ջարդվում է, և նրանցից շա-

տերը խեղդվում են Երասխի ջրերում: Մյայն 300 հոգու մեծահոգաբար պատսպարում և բուժում է Կամսարական իշխանուհի Շուշանը և խնդրում Սմբատին նրանց կենդանի թողնել: Սակայն վեհանձնության այս աննախադեպ դրսևորումը հետագայում չգնահատվեց բիրտ թշնամու կողմից:

**Ապարամբությունն ընդգրկել էր Երևանը, Վանանդը, Վասպուրականը:** Ռշտունիք նահանգի Գուկանք գյուղի մոտ ապստամբները Վասպուրականի Սմբատ իշխանի գլխավորությամբ ջախջախում են թշնամուն: Միայն 280 արաբ զինվոր փախչում են և թաքնվելով եկեղեցում՝ ներում են խնդրում: Սմբատ իշխանը եկեղեցուց դուրս է հանում չարագործներին և մահապատի ենթարկում: Վանանդ գավառում Կամսարական իշխանի հեծյալ գունդը ջախջախում է արաբների մի մեծ զորամաս:

Խալիֆայությունն ապստամբների դեմ մեծաքանակ զորք է ուղարկում: Սահակ Չորավորոցի կաթողիկոսը նամակով խնդրում է արաբ հրամանատարին ճանաչել հայոց հավատը և հրաժարվել արյունահեղությունից: Սակայն արաբական զորքը ներխուժում է երկիր և հետևում հայ նախարարների գործողություններին:

705 թ. Հայաստանում այրուձիի հաշվառում կատարելու և ոռձիկ վճարելու պատրվակով Նախիջևանը բռնազավթած արաբ կառավարիչը իր մոտ եկած բազմաթիվ հայ նախարարների զինաթափում, թալանում և փակում է Նախիջևանի ու Խրամի եկեղեցիներում ու ողջակիզում նրանց: Այս գազանային ոճրագործության ժամանակը արաբական մի սկզբնաղբյուրում կոչվել է «կրակի տարի»:

VIII դարի 20–ական թթ. սաստկանում են խալիֆայության ճնշումները: Այդ քաղաքականությունն իրականացվում էր Հայաստանի քաղաք–ամրոցներում տեղակայված արաբական կայազորերի միջոցով:

725 թ. Արմինիա եկած Հերթ ոստիկանի «աշխարհագրով» հարկահանությունը խիստ

ճանրացավ: Վճարվող հողահարկին գումարվեցին նորերը: Հարկային նոր քաղաքականությունն ուղեկցվեց դաժան բռնություններով: Ոչ մահմեդականներից գանձվող *ծխահարկը* (ըստ գերդաստանների՝ երդերի) փոխարինվում է *գլխահարկով*: Հաճախ հարկի փոխարեն տանում էին հարկատուի ընտանիքի անդամներին: *Հարկադու է դառնում* նաև *հոգևորականությունը*:

Հայ նախարարների տիրույթների մի մասը բռնագավթում էին արարները՝ ստեղծելով *ամիրայություններ* կոչվող վարչաքաղաքական միավորներ: Ոչ մահմեդականները, հատկապես քրիստոնյաները դառնում էին կրոնական բռնության գոհ՝ հաճախ ենթարկվելով բռնի հավատափոխության: Արգելվում էին խաչերով ու սրբապատկերներով երթերը փողոցներում, եկեղեցական զանգեր հնչեցնելը, խաչեր կանգնեցնելը:

*748 թ.* հայերը կրկին *սպառաձրում են՝ Գրիգոր և Դավիթ Մամիկոնյան* երբայրների գլխավորությամբ: Խալիֆի հրամանով Դավիթին ձերբակալում և սպանում են: Գրիգորի հետ եղած նախարարներին է միանում *հայոց իշխան և սպարապետ Աշոտ Բագրատունին*: Նրանք գնում են Տայք՝ հույս ունենալով օգնություն ստանալու Բյուզանդիայից: Ապստամբության ղեկավարների մեջ պատակտում է սկսվում: Աշոտը հեռանում է Բագրևանդ գավառ, իսկ Գրիգորին նենգորեն տեղեկացնում են, թե Աշոտը հարել է արաբներին: Նրա հրամանով Դավիթի ծառաները Աշոտին կուրացնում են:

Ապստամբությունն արձագանք էր գտել *Սասուն-Խուր գավառում*, որտեղ ապստամբությունը ղեկավարում էր *Հովհանն*: Քաջ սասունցիները սպանում են այնտեղ նշանակված արաբ կառավարչին: Խալիֆայությունն ստիպված էր Հովհանին նշանակել «Լեռան» կառավարիչ, դրանով իսկ Սասուն գավառը, որ մինչ այդ մտցվել էր «Ջագիրա» (Հյուսիսային Միջագետք) նահանգի կազմի մեջ, միանում է Արմինիային՝ անցնելով հայոց իշխանի իրավասության ներքո: Փաստորեն 748-750 թթ. ապստամբության ճնշումից հետո էլ Հայաստանը

շարունակում է պահպանել ներքին ինքնուրույնության մի շարք տարրեր:

*774-775 թթ. ապստամբությունը*: Խալիֆայության գերիշխանության դեմ առավել հզոր էր հայ ժողովրդի 774-775 թթ. ապստամբությունը, որը *սկսել էր Շիրակի Կոնայրի գյուղից Արարատագը Մամիկոնյանը*: Գնալով Դվին՝ նա ռազմական խորամանկությամբ արաբ ռատիկանից գնեք էր ստացել՝ խալիֆայության թշնամիների դեմ կովելու պատրվակով: Այնինչ Շիրակում զինելով իր ռազմիկներին՝ նա հարձակվում է արաբ գլխավոր հարկահանի վրա, խլում հավաքված ամբողջ հարկը, ապա իր ընտանիքով ու զինակիցներով հեռանում է Մեծ Հայքի հյուսիսարևմտյան սահմանային գոտի, այդտեղից էլ՝ Եգեբաց աշխարհ:

Ապստամբներին այդուհետ ղեկավարում է *Մուշեղ Մամիկոնյանը*: Ջախջախելով Տարոն ներխուժած արաբական ջոկատը՝ նա ընտանիքով ամրանում է *Արարատը* ամրոցում: Շուտով 260 զինակիցների հետ Մուշեղը Բագրևանդ գավառում ոչնչացնում է արաբ հարկահաններին: Դվինը զավթած արաբական կայազորից 4000 հեծյալ գալիս է Բագավան գյուղ: Այստեղ Մուշեղի ջոկատը ջախջախում է թշնամուն և փախուստի մատնում արաբական զորքի մնացորդներին: Դվինը զավթած արաբները սարսափահար փակվում են քաղաքում:

Հայ ապստամբական ուժերի թիվը շուտով հասնում է 5000 զինվորի: Մուշեղին էր միացել *սպարապետ Սմբատ Բագրատունին*: Ճատերին թվում էր, թե խալիֆայության տիրապետության վերջն էր եկել: Ապստամբները պաշարում են *Կարինը*: Խալիֆը *775 թ.* գարնանը ապստամբների դեմ 30-հազարանոց զորք է ուղարկում, որը գալիս է *Խուրս*: Համազասպ Արծրունին ու եղբայրները, Ամասունյաց տոհմի նախարարները և սպարապետ Սմբատի եղբայրը իրենց զորքերով գալիս են Բերկրի: Ապստամբները հասնում են *Արձեշ* քաղաք և *սպրիլի 15-ին* մարտի մեջ մտնում արաբների հետ: Սակայն Խալթից եկած և դարանակալ արաբական մյուս զորքը հարձակ-



վում է հայերի վրա: Ջոհվում են չորս իշխաններ և 1500 ռամիկներ:

Կարինը պաշարող ապստամբները, տեղեկանալով Արձեշի ձակատամարտի տխուր վախճանի մասին, Մուշեղի գլխավորությամբ շարժվում են դեպի Բագրևանդ գավառ, ուր եկել և քանակ էր դրել արաբական զորքը:

*Վճռական ձակատամարտը տեղի է ունենում Արածանի գետի հովտում՝ Արձեղ գյուղի մոտ, 775 թ. սպրիլի 25-ին:* Ճակատամարտի սկիզբը բարենպաստ էր հայերի համար: Արաբները նույնիսկ ստիպված էին նահանջել: Ըստ Ղևոնդի՝ հայերը, միմյանց քաջալերելով, ասում էին. «Քաջությամբ մտնենք մեր աշխարհի ու մեր ազգի համար»: Հայերը կոժվում են հերոսաբար, սակայն ապստամբական ուժերը չեն բավարարում, և շատերը զոհվում են: Հայրենիքի ազատության համար իրենց կյանքը զոհաբերում են Բագրատունյաց, Մամիկոնյան, Գնունյաց և քազում այլ տոհմերից նախարարներ, ինչպես և ռամիկներ՝ մոտ երեք հազար հոգի:

### Հայկական իշխանական տների հզորացումը:

IX դ. խալիֆայության թուլացման պայմաններում կրկին հզորանում են *Բագրատունի, Արծրունի, Սյունիքի, Արցախի* հայկական իշխանությունները: Առավել ազդեցիկ դիրքի հասան հայոց իշխանի պաշտոնը գրադեցնող Բագրատունիները: Սմբատ Բագրատունու որդին՝ *Աշոտ Մսակերը*, ընդարձակել էր իր տիրույթները Տարոնում, Այրարատում, Տայքում և այլուր: Նա խալիֆայության կողմից *804 թ.* պաշտոնապես *ճանաչվեց հայոց իշխան:* Նրա *եղբայրը՝ Շապուհը*, նշանակվեց *սպարապետ:* Աշոտ Բագրատունին իր *նաքավայրը Գարոյնից տեղափոխեց* Ախուրյանի ափին գտնվող *Բագարան* քերդաքաղաքը:

Աշոտ Մսակերին հայոց իշխանաց իշխանի պաշտոնում հաջորդեց որդին՝ Տարոնի տեր *Բագարատր Բագրատունին (826-851 թթ.):* Նա ամբողջ Արմինիայում մեծ հեղինակություն ուներ: Բագարատի մյուս եղբայրը՝ Շիրակի տեր *Սմբատ Բագրատունին*, դարձավ

*հայոց սպարապետ:* 851 թ. հայ նախարարները՝ հայոց իշխանաց իշխան Բագարատր Բագրատունու գլխավորությամբ, արաբ հարկահավաքին թույլ չտվեցին երկրի ասիմանն անցնել և հենց այդտեղ էլ նրան հանձնեցին հարկերը: Այդ քայլով Բագրատունյաց իշխանը քաջարձակ անհնազանդություն էր ցուցաբերում հետզհետե թուլացող խալիֆայության նկատմամբ:

### 850-855 թթ. ապստամբությունը:

IX դարում հայ ժողովուրդը շարունակեց պայքարն անկախ պետականության վերականգնման համար: *850 թ. Բագարատր Բագրատունին Աշոտ Արծրունու* հետ արաբ նվաճողներին *դուրս բռեց Տարոնից:* Արաբների մի ուրիշ զորախումբ ջախջախվեց Վասպուրականում:

*851 թ. Յուսուֆի* գլխավորությամբ արաբական զորաբանակ է ներխուժում Հայաստան: Խլաթում նա խաբեությամբ ձերբակալում է Բագարատին և ուղարկում խալիֆայություն: *Տովման Խուրթեցու* և Բագարատի որդիների՝ *Աշոտի ու Դավիթի* գլխավորությամբ սասունցիները Տարոնում հարձակվում ու ոչնչացնում են զավթիչներին: Յուսուֆը փախչում և թաքնվում է Ս. Փրկիչ եկեղեցու գմբեթում: Սասունցիները, գտնելով ոճրագործին, մահապատժի են ենթարկում: Ապստամբությունն ավելի է ծավալվում: Այդ պայքարն իր արտացոլումն է գտնում *«Սասնա ծռեր»* կամ *«Սասունցի Դավիթ»* դյուցազներգությունում:

852 թ. խալիֆը հայ ապստամբների դեմ ուղարկում է իր դաժանությամբ աչքի ընկած *Բուղա* անունով մի թուրք վարձկան զորականի: Թշնամին ասպատակում է Բաղեշը, Խուրթը և Սասունը: Բնակչության մի մասին Բուղան կոտորում է, մյուսներին գերեվարում, այդ թվում՝ *Տովման Խուրթեցուն* և Բագարատի որդիներին: Վասպուրականցիներն *Աշուր Արծրունու* գլխավորությամբ ամրանում են *Նկան* ամրոցում և հերոսաբար դիմադրում արաբներին: Աշոտի ձերբակալությունից հետո արաբների դեմ պայքարը շարունակում է նրա եղբայրը՝ *Գուրգենը:* Բուղայի 15000-անոց զորքի

ղեմ Գուրգենը կովում էր 900 ոսգմկենբրով: 852 թ. «Արյան լիճ» կոչվող լեռնային բարձրադիր լճի ափին *տնեղի ունեցած ճակատամարտի* ավարտվում է հայերի հաղթանակով: Պարտված թշնամին խուճապահար փախչում է Վասպուրականից:

853 թ. Բուղայի զորքը մտնում է Վիրք, սակայն, հյուսիսում պարտվելով Կովկասի լեռնականներից, կրկին ներխուժում է Հայաստան և մի շարք խայտառակ պարտություններ կրում Արցախում: Հայոց իշխան *Եսայի Արու-Մուսեի* քաջարի զինվորները *Քթիչ ամրոցը* (Տող գյուղի մոտ) մոտ մեկ տարի անառիկ են պահում: Պատմիչի վկայությամբ՝ կրած պարտություններից հետո Բուղան այնքան էր հուսալքվել, որ երկար ժամանակ չէր համարձակվում դուրս գալ իր վրանից: Ինչպես հաճախ, այս անգամ էլ նենգ թշնամին դիմում է խա-

թևության. քանակցելու պատրվակով նա իր մոտ է կանչում ու ձերբակալում քաջարի զորականին:

*Վասպուրականում* ապստամբները *Գուրգեն Արծրունու* զլխավորությանը ջախջախում և դուրս են մղում արարներին: Բուղան այս պարտություններից հետո վերջնականապես խայտառակվում է, և խալիֆը 855 թ. նրան Հայաստանից հեռ է կանչում:

Հայոց *հզորագույն սպարապետությունը* (850-855 թթ.) սասանեց արաբական տիրապետությունը Հայաստանում: Երկրի քաղաքական զարգացումն ընթացավ հայոց անկախ պետականության և թագավորության վերականգնման հունով, որում որոշիչ նշանակություն ունեցավ հայ ժողովրդի պայքարն Օտար նվաճողների դեմ: Սմբատ սպարապետի որդին՝ *Աշոտ Բագրատունին*, 855 թ. *ճանաչվեց հայոց իշխան ու արարապետ:*

### Տարզեր և առաջադրանքներ

1. Ինչ տարածքներ էր ընդգրկում Արմինիա փոխարքայությունը: Ներկայացրե՛ք 703 թ. հակաարաբական ապստամբությունը: Ինչ քաղաքականություն էին վարում արարները Հայաստանում 720-ական թվականներին: Ներկայացրե՛ք 748-750 թթ. հակաարաբական ապստամբությունը:
2. Վերհանե՛ք 774-775 թթ. հակաալթաբական ապստամբության նշանակությունը:
3. Ինչով էր պայմանավորված հայ իշխանական տների հզորացումը IX դարում: Ո՞ր իշխանական տները հզորացան: Ովքե՛ր էին այդ ժամանակաշրջանի նշանավոր Բագրատունիները. ինչ պաշտոններ էին զբաղեցնում:
4. Ո՞րն էր 850-855 թթ. ապստամբության նպատակը: Ներկայացրե՛ք այդ ապստամբության ընթացքը, կարևոր իրադարձությունները և նշանակությունը:

## Լ Բ Ա Յ Ո Ւ Ց Ի Չ Ն Յ Ո Ւ Թ

### *Ղևոնդ պարմագիրը 775 թ. Արձնիի ճակատամարտի նահապետների մասին*

Իսկ քաջահաղթ նահատակները, թեպետև սակավաթիվ էին... սակայն դառնաշունչ օրհասական պահին ահի չմատնվեցին, այլ բոլորը, միահամուռ հավաքվելով, իրար քաջալերում էին հետևյալ խոսքերով. «Քաջությանը մեռնենք մեր աշխարհի և մեր ազգի համար, և թող մեր աչքերը չտեսնեն մեր սրբարանների և մեր Աստուծո փառավորման վայրերի ոտից կոխան լինելն ու պոծվելը, այլ թշնամիների սուրը թող նախ և առաջ մեր դեմ ուղղվի... Մեր անձերը գոհենք ճշմարիտ հավատի փոխարեն և ոչ թե երկրավոր կյանքի սիրուն, քանզի այս ժամանակավոր մահվան դիմաց կա հավիտենական կյանք (Պատմություն, ԼԴ):



**Թեմա 1. ՀԱՅԱՍՏԱՆԻ ԲԱԳՐԱՏՈՒՆՅԱՑ  
ՈԱԳԱՎՈՐՈՒԹՅՈՒՆԸ**

**§ 1. ՀԱՅԱՍՏԱՆԻ ԱՆԿԱՆՈՒԹՅԱՆ ՎԵՐԱԿԱՆԳՆՈՒՄԸ  
ԵՎ ԱՄՐԱՊԵՂՈՒՄԸ**

Հայկական պետականության վերականգնման նախադրյալները: Միջին դարերի հզոր տերություններից մեկը՝ Արարական խալիֆայությունը, IX դարում սկսեց թուլանալ և անկման ուղի բռնել: Զարգացման տարբեր աստիճաններում գտնվող, տարբեր լեզու, դավանանք ունեցող ժողովուրդներին մի պետության մեջ բռնի միավորումը կայուն ու երկարատև լինել չէր կարող: Տերությանը ենթակա երկրներում, այդ թվում և Հայաստանում աստիճանաբար ավելի ու ավելի էր ուժեղանում արաբական լուծը թոթափելու համար մղվող պայքարը: *Հայաստանի անկախությունը վերականգնելու համար արեղծվել էին նպատարալիր պայմաններ:*

Արտաքին քաղաքական իրադրությունը բարենպաստ էր դրա համար: Առանձին երկրների արաբ ամիրաները տեղերում ամրապնդել էին իրենց իշխանությունը և ձգտում էին անջատվել խալիֆայությունից: Գերազանցապես վարձկաններից բաղկացած արաբական բանակը միշտ չէ, որ ենթարկվում էր խալիֆներին: Կայուն չէր դրությունը նաև խալիֆայության կենտրոնում: Լայն ծավալ ստացած ժողովրդական ազատագրական ընդվզումները, մասնավորապես Ատրպատականում Բաբեկի գլխավորած ապստամբությունը և գահակալական կոիվները խարխուլում էին կենտրոնական իշխանության դիրքերը:

Մյուս կողմից՝ խալիֆայության ծանր դրությունից օգտվում էր նրա վաղեմի հակառակորդը՝ Բյուզանդիան: Վերջինս ամեն կերպ աջակցում էր խալիֆայության կենտրոնախույս ուժերին: Այդ պատճառով խիստ սրվել էին արաբա-բյուզանդական հարա-

բերությունները: Կազմալուծվող խալիֆայությունը հարկադրված էր դիմելու գիջումների քաղաքականության:

Խալիֆայության թուլացման և տրոհման ժամանակաշրջանում Հայաստանում տեղի էին ունենում որոշակի փոփոխություններ: Առաջադիմում ու խորանում էին ավատատիրական հարաբերությունները: Աստիճանաբար ընդարձակվում ու ամրապնդվում էր հայ իշխանների ժառանգական հողատիրությունը, ընդարձակվում էին նրանց կալվածքները: Զարգանում էր երկրի տնտեսական կյանքը՝ գյուղատնտեսությունը, արհեստագործությունը: Տնտեսապես և ռազմականորեն զորեղացող հայ նախարարներն անկախության էին ձգտում: Նրանք ի գորու էին գլխավորելու համաժողովրդական շարժումը հայկական պետականության վերականգնման համար: Մանավանդ որ հայ ժողովրդի բոլոր խավերը միասնական էին և երազում էին անկախության մասին: Հայ նկեղեցին ջանում էր ազատագրվել կրոնական հալածանքներից, աշխատավորական զանգվածները՝ օտարերկրյա տիրապետությունից: Հայ ժողովուրդը պետականությունը կորցնելուց հետո առհասարակ չէր հաշտվում այդ վիճակի հետ: Նրանք կենսունակ էր սեփական պետականությունը վերականգնելու գաղափարը:

Այսպիսով՝ առկա էին թե՛ ներքին և թե՛ արտաքին անհրաժեշտ նախադրյալները հայկական պետականությունը վերականգնելու համար:

**Հայկական թագավորության վերականգնումը:** Արաբական խալիֆայության թուլացումից Հայաստանում հմտորեն օգտ-

վում էին հատկապես ժամանակի նշանավոր իշխանական տներինց Բագրատունիները: Նրանք ձգտում էին իրենց ազդեցությունն ու իշխանությունը տարածել ամբողջ երկրում: Ստեղծված նպաստավոր պայմաններում գործում էր Աշոտ Բագրատունին՝ մի նշանավոր ռազմաքաղաքական գործիչ և շնորհալի ղեկավանգետ: **Աշոտ Բագրատունին**, ինչպես գիտեք, 855 թ. հաստատվել էր հայոց իշխան և սպարապետ, իսկ 862 թ. երկրի իշխանների առաջարկով նա ճանաչվեց նաև հայոց իշխանաց իշխան: Նրան հանձնվեց նաև ամբողջ երկրի հարկահանությունը: Շնորհիվ դրա՝ երեք անգամ կրճատվեցին հարկերը, փոխվեց բռնություններով և կամայականություններով ուղեկցվող հարկահանության կարգը:

Աշոտ Բագրատունու ձեռքն անցավ երկրի կառավարումը: Իր եղբորը՝ **Աբասին**, որը բաջ ռազմիկ էր, նա նշանակեց սպարապետ: Շուտով բանակը աճեց, զինվորների թիվը հասավ 40 հազարի:

Այսպիսով՝ թեպետև երկիրը արաբական գերիշխանության ներքո էր, սակայն Բագրատունիների ձեռքում էին ինչպես ռազմավարչական, այնպես էլ տնտեսական իշխանությունը: Աշոտ Բագրատունին որոշակի քայլեր կատարեց հայ նախարարների միջև երկպառակությունները վերացնելու և իր ազդեցությունը նրանց վրա ամրապնդելու ուղղությամբ: Այդ նպատակով նա խնամիական կապեր հաստատեց Վասպուրականի և Այունիքի գահերեց իշխանների հետ:

Բյուզանդիան հետևում էր խալիֆայության ներսում, այդ թվում և Հայաստանում կատարվող իրադարձություններին: Հայաստանին իր կողմը թեքելու, իր դաշնակիցը դարձնելու նպատակով կայսրությունը հարց բարձրացրեց հայկական եկեղեցին բյուզանդականի հետ միավորելու վերաբերյալ: Այդ առթիվ բյուզանդական պատրիարքը նամակով դիմեց Աշոտ Բագրատունուն: **Շիրակաբանում 869 թ. եկեղեցական ժողովը** մերժեց դավանական միավորման առաջարկը: Աշոտը այդ մասին նամակով հայտնեց բյուզանդացիներին՝ միաժամանակ հասկացնելով, որ, այդու-

հանդերձ, կողմնակից է կայսրության հետ քաղաքական դաշինքին:

Հայաստանի անկախությունը վերականգնելու մեջ մեծապես շահագրգռված էր Հայ եկեղեցին, որը և լիակատար աջակցություն էր ցույց տալիս Բագրատունիներին: Հայոց կաթողիկոս **Զաքարիա Զազեցու** նախաձեռնությամբ նույն՝ 869 թ. նշանավոր հայ իշխանների հատուկ ժողով հրավիրվեց: Այնտեղ միահամուռ որոշում ընդունվեց Աշոտ Բագրատունուն հռչակել հայոց թագավոր: Հայաստանի թագավորությունը ճանաչելու նպատակով ժողովը դիմում է խալիֆին: Խալիֆայությունը ձգձգում է Հայոց թագավորության ճանաչումը:

Բյուզանդիայում գահ էր բարձրացել ծագումով հայ՝ **Մակեդոնական** կամ **Հակական հարստության** հիմնադիր **Վասիլ I կայսրը** (867–1057 թթ.): Վերջինս 876 թ. պատվիրակ է ուղարկում Աշոտ Բագրատունու մոտ: Կայսրը հայտնում էր, որ ինքը ծագում է հայ Արշակունիներից, և քանի որ Բագրատունիներն ավանդաբար հայոց թագավորներին թագադրելու թագադիր ասպետի առանձնաշնորհում են ունեցել, նրանից թագ էր խնդրում: Ի նշան փոխադարձ բարեկամության՝ Աշոտը թագ է ուղարկում Վասիլ I-ին: Բյուզանդական կայսրին թագադրելու այս փաստը մի կողմից՝ վկայում էր Աշոտ Բագրատունու հեղինակության մասին, մյուս կողմից՝ արարների դեմ ուղղված բացահայտ քայլ էր:

Համոզվելով, որ բռնի ուժով հաջողության չի կարող հասնել, նոր խալիֆը 885 թ. արքայական թագ, թանկարժեք զգեստներ ուղարկեց և **Աշոտ Բագրատունուն ճանաչեց Հայաստանի թագավոր**: Բյուզանդիայի Վասիլ I կայսրն իր հերթին շտապեց ճանաչել Աշոտի գահակալությունը: Նա ևս արքայական թագ ուղարկեց և բարեկամական դաշինք կնքեց Աշոտի հետ: Հայաստանի և հարևան երկրների հյուրերի ներկայությամբ 885 թ. **օգոստոսի 26-ին Բագրատան քաղաքում** մեծ հանդիսավորությամբ Աշոտ Բագրատունին կաթողիկոս **Գևորգ Գառնեցու կողմից օծվեց հայոց թագավոր**:

Այսպիսով՝ Հայաստանի փաստական



անկախությունը միջազգային ճանաչում գտավ: Դրանով հիմք դրվեց Բագրատունյաց հարստությանը (885–1045 թթ.), և ավելի քան 450 տարի անց վերականգնվեց համահայկական պետականությունը: Այն ձեռք բերվեց շնորհիվ հայ ժողովրդի մղած երկարամյա ազատագրական պայքարի: Նորանկախ պետականության համար հիմք ծառայեցին պահպանված հայ նախարարական համակարգը, կիսանկախ իշխանությունները, Հայ եկեղեցու նկիրապետությունը և այլն:

**Երկրի անկախության ամրապնդումը:** *Աշոտ I-ը (885–890 թթ.)* ջանք չէր խնայում թագավորական իշխանությունն ամբողջ երկրում տարածելու, միասնական հայկական պետություն ստեղծելու համար: Սակայն այդ պայքարում նա հանդիպում էր ուժեղ դիմադրության: Հատկապես նկատելի էր արտաքին թշնամական ուժերի՝ սահմանակից պետությունների նման ձգտումը:

Աշոտի մահից հետո գահ բարձրացավ *Սմբատ I-ը (890–914 թթ.)*: Նորընտիր թագավորը պետական խոշոր գործիչ էր և իր հոր արժանի հաջորդը: Նա շարունակեց երկրի խաղաղ շինարարությունը և պետության ամրապնդումը: Խաղիֆայությունը և Ատրպատականի Սաջյան ամիրայությունը թշնամաբար էին վերաբերվում հայկական պետության հզորացմանը: Բյուզանդիայի հետ 893 թ. կնքված պայմանագիրն առիթ դարձնելով՝ Սաջյան ամիրայի զորքերը ներխուժեցին Հայաստան: *Արագածուրն զավառի Դուդս ցյուղի մոտ 894 թ.* տեղի ունեցած ճակատամարտում արաբները ծանր պարտություն կրեցին: Սաջյան ամիրաները, համոզվելով, որ ռազմական ուժով դժվար է հաջողության հասնել, փոխեցին իրենց քաղաքականությունը: Նրանք Հայաստանը թուլացնելու նպատակով որդեգրեցին հայ իշխանների միջև երկպառակություններ առաջացնելու քաղաքականությունը: Շուտով առիթ ստեղծվեց միջամտելու հայ իշխանների միջև առաջացած տարաձայնություններին: Սյունյաց իշխանների և Արծրունիների միջև վեճ առաջացավ Նախճավան քաղաքին տիրելու պատճառով: Սմբատ թա-

գավորն այդ վեճը լուծեց հոգաւտ Սյունիքի: **Գագիկ Արծրունին** Սմբատին խնդրեց վերանայել վճիռը՝ իրեն վերադարձնել Նախճավանը, քանի որ այդ քաղաքը ժամանակին եղել էր Վասպուրականի կազմում: Սմբատն անդրդվելի մնաց և չլուխեց իր որոշումը:

Գագիկ Արծրունին, խիստ դժգոհ մնալով Սմբատ թագավորից, բանակցություններ սկսեց Ատրպատականի ամիրա Յուսուֆի հետ: Յուսուֆի միջնորդությամբ *խալիֆը 908 թ. Սմբատի փոխարեն Հաղապանի թագավոր ճանաչեց Գագիկ Արծրունուն* և նրան վերապահեց հարկերը հավաքելու իրավունքը: Բագրատունիների թագավորությանը վերջ տալու նպատակով Յուսուֆ ամիրան Գագիկ Արծրունու հետ հարձակվեց Հայաստանի վրա: Յուսուֆի կողմն անցան նաև որոշ հայ իշխաններ: Սկսվեց Հայաստանի հասարակական, ծանր պատերազմ: Սմբատին օգնելու համար բյուզանդական կայսրը մեծ զորքով շարժվեց դեպի Հայաստան, բայց ճանապարհին մահացավ, և նրա զորքը հետ դարձավ: Թշնամիներով շրջապատված հայոց թագավորը մնաց մեն–մենակ:

Սմբատ I–ն իր փոքր զորագնդով ամրացավ Կապույտ բերդում: Սակայն մի ամբողջ տարի դիմադրելուց հետո, տեսնելով, որ երկիրն ավերվում է, անձնատուր եղավ: Յուսուֆը, հայոց թագավորի հետ բանակցելու փոխարեն, ինչպես պայմանավորվել էին, նրան կալանավորեց և ուղարկեց Դվինի քանդը: Այդ ժամանակ Նախճավանի Երեջակ բերդը խիզախաբար դիմադրում էր արաբներին: Յուսուֆը Սմբատին տարավ այնտեղ և պահանջեց, որ բերդի պաշտպաններին զենքը վայր դնելու հրաման արձակի: Բնականաբար, հայոց արքան չկատարեց այդ պահանջը, Յուսուֆը նրան տանջանքների ենթարկեց ու գլխատեց (914 թ.): Այսպիսով՝ թշնամու զոհ դարձավ Բագրատունյաց երկրորդ գահակալը: Նա մաքառեց հանուն միասնական հայոց պետականության և զոհ դարձավ ավատական ներքին երկպառակություններին ու օտար նվաճողների խարդավանքներին:

Հայ ժողովուրդը, սակայն, ոտքի ելավ իր անկախության ու պետականության պահպանման համար: Այդ պայթյալը գլխավորում էր Սմբատ I-ի ավագ որդին՝ **Աշոտ II-ը (914-928 թթ.)**, որին ժողովուրդը **Երկաթ** անունը տվեց իր խիզախության ու տոկոսության համար: Նա իր եղբայր Արասի հետ իրենց գորաջոկատներով հանկարծակի ու սրընթաց հարձակումներով լուրջ հարվածներ հասցրեց թշնամու ուժերին և քայլ առ քայլ ազատագրեց երկիրը: Նա հարձակվեց նաև Տփխիսի (Թիֆլիս) ամիրայության վրա, ջախջախեց Յուսուֆի կայսրը: Հայոց երկրի ուժերն ավելի պառակտելու միտումով արաբները Հայաստանի թագավոր հռչակեցին Աշոտի հորեղբոր որդուն՝ Աշոտ սպարապետին: Աշոտ Երկաթը վճռական միջոցներով սաստեց նրան և որոշ նախարարների: Շուտով հայ իշխանները հասկացան, որ երկրի փրկությունը միասնության մեջ է: Նրանք աստիճանաբար համախմբվեցին Աշոտ II-ի շուրջը: Գագիկ Արծրունին, զգալով իր վարմունքի կորստաբեր լինելը, երես թեթեց արաբներից: Նա սկսեց հարվածներ հասցնել արաբներին, ազատագրել ու ամրապնդել Վասպուրականի թագավորությունը: Սյունյաց Սմբատ և Սահակ իշխանները, գործակցելով Աշոտ Երկաթի հետ, միացան երկրի ազատագրման նվիրական գործին:

Աշոտ Երկաթն իր ջոկատով (921 թ.) ամ-

րացել էր **Սևանա կղզուն**: Արաբական գործերի հրամանատար Բեշիրը շրջապատեց կղզին: Աշոտ II-ը նավակներում տեղավորեց իր 70 ռազմիկներին և մի մատախապատ օր, դեռևս ափ չհասած, հանկարծակի սկսեց նետահարել արաբներին: Հայոց փոքրիկ զորաջոկատի այդ անսպասելի ու համարձակ գործողությունը խուճապի մատնեց արաբներին: Գլխակորույս նահանջող թշնամու վրա Գաննիում հարձակվեց Գևորգ իշխանի փոքրաթիվ ջոկատը և նոր ջարդ տվեց: Սևանի վճռական ձակատամարտից հետո ազատագրվեց Հայաստանի կենտրոնական շրջանների մեծ մասը:

Բյուզանդիան փորձեր էր անում Հայաստանի և Վրաստանի ուժերը միավորելու ընդդեմ արաբների: Աշոտ II-ը 921 թ. մեկնեց **Կոստանդնուպոլիս**, որտեղ հակաարաբական **դաշինք կնքեց**: Արաբները, համոզվելով, որ Հայաստանը գեների ուժով չեն կարող իրենց ենթարկել, գիշումների գնացին: Բաղդադի խալիֆը 922 թ. **Աշոտ II-ին** ոչ միայն թագ ուղարկեց, այլև **ճանուցեց Հայաստանի շահնշահ**, այսինքն՝ թագավորների թագավոր: Դրանով նա գերապատվություն էր ստանում մյուս թագավորների նկատմամբ: Արքայական այս բարձր տիտղոսը Բագրատունիները կրեցին մինչև վերջ:

Այսպիսով՝ հայկական պետության անկախության համար մղվող պայքարն ավարտվեց հաղթանակով:

**Հարգեր և առաջադրանքներ**

1. Որո՞նք էին Հայոց թագավորության վերականգնման նախադրյալները: Նախարարական ռը տոհմը գլխավորեց անկախության համար մղվող պայքարը:
2. Ներկայացրե՞ք Աշոտի գործունեությունը թագավորության վերականգնման համար: Ինչո՞ւ Վասիլ I կայսրը շտապեց ճանաչել Աշոտի գահակալությունը և թագ ուղարկեց նրան:
3. Ինչո՞ւ Գագիկ Արծրունին պայքարի դուրս եկավ Սմբատ I Բագրատունու դեմ: Նշե՞ք այդ հակամարտության հետևանքները Հայաստանի համար:
4. Ո՞վ էր Աշոտ Երկաթը, ինչպե՞ս նա կարողացավ հաղթել արաբներին: Է՞րբ նա ձանաչվեց շահնշահ: Բնութագրե՞ք Աշոտ Երկաթին:



## § 2. ԲԱԳՐԱՏՈՒՆՅԱՑ ՀԱՅԱՍՏԱՆԻ ՎԵՐԵԼՔԸ

**Պետության բարգավաճումը:** Հայաստանի անկախության ամրապնդումը տեղի ունեցավ երկրում սկսված տնտեսական և մշակութային վերելքի պայմաններում: Խաղաղ ու նպաստավոր էին Աշոտ II-ի թագավորության վերջին տարիները: Քանի որ թագավորը զավակ չունեւ, նրա մահվանից հետո գահ բարձրացավ եղբայրը՝ **Կարսի կառավարիչ Աբասը (928-953 թթ.):** Նա Բագրատունիների արքունիքը տեղափոխեց Կարս և այն դարձրեց Հայաստանի նոր մայրաքաղաքը: Կարսը կարճ ժամանակում աճեց, կառուցապատվեց և դարձավ երկրի նշանավոր քաղաքներից մեկը:

Երկրի բնակչությունը զբաղված էր տնտեսությունը վերականգնելով ու բարեկարգելով: Չորային կլիմա ունեցող Հայաստանի համար բացառիկ նշանակություն ուներ ոռոգումը: Երկրի հիմնական նահանգներում՝ Այրարատում, Շիրակում, Սյունիքում, Վասպուրականում, կառուցվում են ջրամբարներ, ջրանցքներ: Դարերով խոպան մնացած տարածությունները ոռոգման միջոցով յուրացվում, մշակվում էին:

Կենտրոնական իշխանության հզորացմանն ու երկրի բարեշինմանն էր ձգտում նաև Հայ եկեղեցին: Նկատի ունենալով այդ հանգամանքը՝ Աբասը կաթողիկոսական աթոռը տեղափոխեց Շիրակ: **Անանիա Մոկացի կաթողիկոսը 948 թ.** այն **Աղթանար կղզուց փոխադրեց** Անիից հյուսիս գտնվող **Արզնայի վանքը:** Եկեղեցին, որ իր հերթին տեղ էր դարձել հողային մեծ տարածքների, կավածքների, ձեռնամուխ է լինում լայնածավալ շինարարական գործունեության:

**Երկրում սկսված րնդեսական, մշակութային վերելքը նշանավորում է զարգացման մի նոր սարիճան. սախարարիությունը վաղմիջնադարյան փուլից թևակոխում է զարգացած սախարարիության դարաշրջան:**

Աբասին հաջորդեց նրա որդի **Աշոտ III-ը (953-977 թթ.):** Նոր թագավորը պետության ամրապնդման ուղղությամբ սկսեց ավելի վճռական ու ծավալուն ձեռնարկումներ: Նա կազմակերպեց մեծ քանակ: Հայ եկեղեցու որոշ թեմեր անջատողական հակումներ

ունեին: Դա հայկական հզոր իշխանությունների անջատական ձգտումների արտահայտությունն էր: Սյունյաց և Աղվանից (Արցախ և Ոսիթ) թեմերը, հենվելով տեղի իշխանությունների աջակցության վրա, իրենց անկախ էին համարում: Անանիա Մոկացի կաթողիկոսին հաջողվեց նրանց հնազանդեցնել: Դա, ըստ էության, Բագրատունյաց թագավորության հաղթանակն էր, նրա գրեթե րության և հեղինակության արգասիքը:

Երկրում ծավալվում է շինարարական աշխատանքը: Խոսրովանույշ թագուհին Ձորագետի հովտում հիմնեց Սանահինի, Տապատի նշանավոր վանքերը, որոնք շտապ ընդարձակ կավածքների տեղ դարձան: Դրանք առավել նշանավորվեցին՝ որպես հայ մշակույթի խոշոր կենտրոններ: Աշոտ III թագավորը հատուկ հոգատարություն էր ցուցաբերում աղքատների, հիվանդների, անդամալույծների, կույրերի նկատմամբ: Նրանց համար բացում էր հիվանդանոցներ և բարեգործական այլ հաստատություններ: Այդօրինակ գործունեության համար էլ նա ստացավ **Ռդրուն** մականունը:

Երկրի բարգավաճումն ու շինարարությունն ավելի մեծ թափով շարունակվեց **Սմբատ II-ի** ժամանակ (977-990 թթ.): Դվինում շարունակում էր գոյատևել մի ամիրայություն (իշխանություն), որն ընդունում էր Բագրատունիների գերիշխանությունը: Սակայն Դվինի ամիրան անսպասելի հարձակվեց Շիրակի վրա և սկզբում հասավ հաջողության: Բայց Սմբատ II-ը կարողացավ ոչ միայն նրան հետ մղել, այլև գլխավին ջախջախել և **Դվինի ամիրայությունը**՝ արարների այդ վերջին հենակետը, 987 թ. միացնել իր թագավորությանը:

**Անին՝ մայրաքաղաք:** Բագրատունյաց թագավորությունը ներքին և արտաքին նպաստավոր պայմաններում բռնել էր վերելքի ուղի: Սակայն Բագրատունիները չունեին իրենց հիմնական նստավայրը: Զգացվում էր խոշոր կենտրոնի՝ նոր մայրաքաղաքի անհրաժեշտությունը: Առաջին Բագրա-





Սմբատաշեն պարիսպները, Անի

տունները հաստատվել էին Բագարանում և Երագավորում (Շիրակավան): Արասն իր նստավայրը դարձրել էր Կարս քաղաքը, որը, ընկած լինելով թագավորության ծայրամասային գավառում, համահայկական մայրաքաղաքի նշանակություն ձեռք չէր բերել: Դվինը շարունակում էր մնալ արաբների ձեռքին, դրանից բացի, այն չէր կարող մայրաքաղաք լինել, որովհետև դուրս էր Բագրատունիների հիմնական տիրույթներից՝ Շիրակից: Բարգավաճող Հայաստանին անհրաժեշտ էր մի միավորող կենտրոն: Բագրատունիները նպատակահարմար գտան Կամսարականներից իրենց անցած Շիրակի նշանավոր Անի ամրոցը դարձնել մայրաքաղաք:

**Անին 961 թ. հռչակվեց մայրաքաղաք:** Նոր մայրաքաղաքն անտիկ դիրք ուներ և բանուկ առևտրական ուղիների վրա էր: Նոր մայրաքաղաքի հիմնումը խորհրդանշելու էր Բագրատունյաց թագավորության համահայկական պետություն դառնալու հանգամանքը: Այդ նպատակով Անին մայրաքաղաք դարձնելու տոնակատարությունը միացվեց Աշոտ III-ին թագադրելու հանդիսությունների հետ: Անի էին հրավիրվել «ամենայն իշխանքն տանն Հայոց», գորքը, Աղվանքի թագավորը՝ իր շքախմբով, քարձրաստիճան հոգևորականներ և այլ նշանավոր դեմքեր: Բոլորի ներկայությամբ Անանիա կաթողիկոսը մեծ շուքով օծեց Աշոտ թագավորին: Նա հռչակվեց

շահնշահ՝ արքայից արքա: Այդ հանդիսությունները ժամանակակիցների վրա այն տպավորությունն էին գործում, կարծես վերականգնվել էր Արշակունիների համահայկական պետությունը: Աշոտի թագավորությունը օրինական ճանաչվեց Բյուզանդական կայսրության, արիսագների թագավորի, հարևան ամիրայությունների կողմից:

Աշոտ III-ը և նրա հաջորդները միջոցներ չէին խնայում նոր մայրաքաղաքը բարեկարգելու, շքեղ պալատներով, եկեղեցիներով, բնակելի և այլ շինություններով կառուցապատելու: Աշոտ թագավորը 963-964 թթ. կառուցեց քաղաքի աշտարակազարդ պարիսպների առաջին գիծը (Աշոտաշեն): Կամսարականների նախկին ամրոցն ընդարձակվելով դարձավ Անի քաղաքի միջնաբերդը: Հետագայում քաղաքն այնքան էր ընդարձակվել, որ Սմբատ II թագավորը 977-989 թթ. ընթացքում կառուցեց վիթխարի քաղաքն իր մեջ ընդգրկող երկրորդ պարիսպների գիծը (Սմբատաշեն):

Մայրաքաղաքի՝ ճարտարապետական հոյակապ շինություններով կառուցապատումը շարունակվեց նաև հետագա տասնամյակներում: Քաղաքն ուներ ընդարձակ շուկա, իջևանատներ: Այնտեղ կառուցվել էին տասնյակ եկեղեցիներ, տաճարներ, պալատներ, շքեղ հյուրանոցներ, աշխարհիկ բազմաթիվ շենքեր: Այն միջնադարյան Հայաստանի հռչակավոր ու ամենամեծ քաղաքն էր: Իգուր չէ, որ ժողովուրդն ասում է՝ Անին ուներ հազար ու մի եկեղեցի:

**Բագրատունյաց թագավորության հզորացումը X դ. վերջին և XI դ. սկզբին:** Սմբատ II-ի մահից հետո գահ բարձրացավ նրա եղբայր **Գագիկ I-ը (990-1020 թթ.):** Նա Բագրատունյաց թագավորների շարքում առավել տաղանդավոր պետական ու ռազմական գործիչը եղավ: Նրա օրոք Բագրատունյաց թագավորությունը հասավ իր հզորության ու ծաղկման գագաթնակետին: Գագիկն ընդարձակեց իր պետության սահմանները: Դրա հետ մեկտեղ հարևանների հետ շարունակեց



վարել խաղաղ, բարեկամական հարաբերություններ: Այդպիսի հարևաններից էին Տայքի կյուրապաղատությունը և վրաց թագավորությունը: Ատրպատականի Մամլան ամիրան երկու անգամ արշավանք կազմակերպեց: 998 թ. **Ապսխունիքի Ծամբ** գյուղի մոտ հայ-վրացական ուժերը պարտության մատնեցին նրան: Այդ կոիվներում աչքի ընկավ հայկական գորբերի հրամանատար **Վահրամ Դահրավունին:**

Հայոց թագավորը կրում էր «Շահնշահ հայոց» տիտղոսը: Այդ նշանակում էր, որ Հայաստանի տարբեր ծայրամասերում առաջացած մանր թագավորությունները ենթակա էին Բագրատունիներին: Առանց շահնշահի հավանության նրանք չէին կարող գահակալել: Նրանք իրավասու չէին ինքնուրույն հարաբերությունների մեջ մտնելու հարևան պետությունների հետ: Հայոց կաթողիկոսների ընտրությունն անգամ կատարվում էր Բագրատունյաց թագավորների միջնորդությամբ: **Տաշիր-Ձորագետի** (Լոռի) **թագավոր Դավիթը** (989-1048 թթ.) 1001 թ. անհնազանդություն հայտնեց և հրաժարվեց հայոց թագավորի գերիշխանությունը ճանաչելուց: Գագիկի քանակը մտավ Տաշիր-Ձորագետ և հպատակեցրեց ամբողջ տարածքը: Դավիթ թագավորը երկրից փախավ՝ գրկվելով իր հողային տարածքներից: Դրա համար էլ նա ստացավ «Անհողին» մականունը: Սակայն իր արարքի համար Դավիթը զոջաց, և հարցը խաղաղությամբ ավարտվեց: Նա գնաց իր հորեղբայր Գագիկ I-ի մոտ, ներում խնդրեց և միայն դրանից հետո հետ ստացավ իր տիրույթները:

Գագիկ I արքան ավելի ամրապնդեց ու մեծացրեց քանակը: Հայկական գորբը նրա օրոք հզոր ուժ էր: Նա աստիճանաբար և հետևողականորեն ընդարձակում էր պետության սահմանները: Գագիկը վերացրեց Վայոց ձորի իշխանությունը և նրա տարածքը միացրեց իր թագավորությանը: Ապա միավորեց Արցախի մեծ մասը, այդ թվում և Խաչեն գավառը: Հարավում Վասպուրականից անջատվեցին և Բագրատունիների տերությանը միացվեցին Կոգովիտ և Ծաղ-



Անիի Փրկչի եկեղեցին

կոտն գավառները: Այդ մասին Ասողիկ պատմիչը գրում է. «Եվ տիրապետեց նա բազմաթիվ քերդերի և գավառների Վայոց ձորի, Խաչենի և Փառիսոսի սահմաններում՝ ավելի քան իր եղբայրը, և չկար մեկը, որ սարսափ պատճառեր Հայաստանին»:

Գագիկ I-ի թագավորության շրջանում հայկական տարածքների մեծ մասը փաստորեն միավորվել էր Բագրատունիների կենտրոնական թագավորության գերիշխանության ներքո:

Տայքի կյուրապաղատ Դավիթը 1000 թ. մահացավ: Վասիլ II կայսրը գործով շարվեց դեպի Արևելք և կտակի համաձայն Տայքը միացրեց կայսրությանը: Վրաստանի, Արխազիայի և մյուս բոլոր թագավորներն ու նշանավոր իշխանները ներկայացան նրան և իրենց նվիրվածությունը հայտնեցին: Թեպետև կայսրը Հայաստանի տարածքում էր, Գագիկ I-ը հարկ չհամարեց նրան այցելելու: Այդ քայլով հայոց թագավորը ցուցադրեց իր գործելությունն ու արժանապատվությունը:

Գագիկ I-ի թագավորության տարիներին ավելի մեծ ծավալներով շարունակվում էին խաղաղ շինարարական աշխատանքները, երկիրն օրեցօր բարգավաճում էր: Ծաղկում էր Անի մայրաքաղաքը: Գագիկ I-ի կինը՝ **Կապրամիդե** թագուհին, 1001 թ. ավարտեց Անիի Կաթողիկե հույակապ եկեղեցու շինարարությունը: Այն կա-

ուցվեց հոշակավոր ճարտարապետ *Տրդատի* նախագծով: Այդ ժամանակ Ձվարթնոցի նշանավոր տաճարը քանդվել էր: Գագիկը դրա նմանությամբ մի տաճար կառուցեց Անիում, որը հայտնի է Գագկաշեն անունով:

Գագիկ I-ի ժամանակ հզորացավ Պահլավունիների իշխանական գերդաստանը: Այդ տոհմի ներկայացուցիչները ժառան-

գաբար վարում էին սպարապետի պաշտոնը: Աչքի էր ընկնում մանավանդ սպարապետ Վահրամ Պահլավունին: Պահլավունիները ևս շինարարական լայնածավալ աշխատանքներ էին սկսել: Նրանք են կառուցել *Բշնիի* նշանավոր ամրոցը և եկեղեցին, *Անրեղը*, *Մարուշենը* և այլն: Շինարարական աշխատանքներ էին ծավալվել նրկրի բոլոր մասերում:

**Հարցեր և առաջադրանքներ**

1. Ինչ քաղաքականություն էր վարում Աբաս թագավորը: Ներկայացրե՞ք Աշոտ III-ի կառավարման շրջանում երկրի ունեցած հաջողությունները:
2. Պարզաբանե՞ք Սմբատ II-ի ներքին և արտաքին քաղաքականության արդյունքները:
3. Ձեր կարծիքով՝ ինչո՞ւ Բագրատունիները կառուցեցին նոր մայրաքաղաք: Երբ և ո՞ւմ օրոք Անին հոշակվեց մայրաքաղաք:
4. Փաստերով հիմնավորե՞ք, որ իրոք Գագիկ I-ի օրոք Բագրատունյաց թագավորությունը հասել էր իր հզորության գագաթնակետին: Իշխանական ո՞ր տոհմը նշանակալի դիրքերի հասավ նրա օրոք:

**§ 3. ՊԵՏԱԿԱՆ ԿԱՌԱՎԱՐՄԱՆ ՀԱՄԱԿԱՐԳԸ: ՏՆՏԵՍՈՒԹՅԱՆ ՎԵՐԵԼՔԸ**

**Պետական կարգը:** Հայկական պետության գլուխ կանգնած էր թագավորը: Երկրի ներքին և արտաքին բոլոր հիմնական հարցերը վճռում էր նա: Բագրատունյաց թագավորն *ինքնակալ միապետ* էր և անձամբ էր լուծում պետության գործերը: Նա կարող էր խորհրդակցել սպարապետի, կաթողիկոսի, իշխանաց իշխանի կամ այլ մեծամեծ պաշտոնյաների հետ: Բագրատունի թագավորներին էին ենթարկվում նաև մյուս մանր թագավորությունները կամ իշխանությունները: Թագավորը պետությունը կառավարում էր բարձրաստիճան հատուկ պաշտոնյաների կամ գործակալությունների միջոցով: Պաշտոնները վատահավում էին թագավորական տան անդամներին և արքունիքին մոտ կանգնած խոշոր ավատատերերին: Գործակալությունների մեջ կարևոր էին *իշխանաց իշխանի* և *հայոց սպարապետի* պաշտոնները:

Իշխանաց իշխանը թագավորին հաշվետու էր ենթակա իշխանների գործունեու-

թյան համար: Նրան էին ենթարկվում արքայական կալվածքները տնօրինողները, պետական գանձարանը, երկրի մեծ ու փոքր պաշտոնյաները: Այդ բարձր պաշտոնը սովորաբար տրվում էր արքայի եղբայրներին կամ զահաժառանգներին: Հայոց սպարապետը պետության զինված ուժերի՝ բանակի հրամանատարն էր: Պատերազմի ժամանակ մանր թագավորությունների գործերի հրամանատարները ենթարկվում էին հայոց սպարապետին: Անիի թագավորության մեջ X դ. վերջերից այդ պաշտոնը վարում էին Պահլավունիները: Բագրատունի թագավորների գահը ժառանգում էր ավագ որդին, հաճախ նաև եղբայրը:

Բագրատունի թագավորները հատուկ նշանակություն էին տալիս բանակի կազմակերպմանը: Մշտական բանակը պատերազմների ժամանակ համալրվում, հասնում էր **90-100 հազարի**: Բանակը կազմված էր *արքունական* և *մարզպանական զեղերից*: Արքունի գունդն անմիջականո-



րեն ենթարկվում էր թագավորին, իսկ մարգաանական գնդերն իշխաններին ենթակա զորամասերն էին: Բանակը կազմված էր հեծելազորից և կրկնակի մեծ քանակով հետևակից: Հայոց զորքի հիմքը այրուձին՝ հեծելազորն էր: Բագրատունի թագավորների հենարանն էր արքունական գունդը, որը կազմված էր թագավորական տիրույթներից հավաքագրված ռազմիկներից: Այն պահվում էր մեծ մասամբ մայրաքաղաքում և արքայական ամրոցներում: Հայկական բանակում Բագրատունիների օրոք լեզգիներից և այլ ցեղերից օգտագործվել են շատ սահմանափակ թվով վարձկան զինվորներ:

Միջնադարում եկեղեցին մեծ մասնակցություն ուներ երկրի կառավարման մեջ: Բագրատունի թագավորների համար եկեղեցու դերը, մանավանդ X դ. երկրորդ կեսից սկսած, ավելի մեծացավ: Թագավորների տիրապետությունը հեռավոր իշխանությունների վրա հաճախ ձևական քնույթ էր կրում: **Եկեղեցին էր ապահովում երկրի միասնականությունը:** Եպիսկոպոսական բոլոր թեմերը ենթակա էին հայոց կաթողիկոսին, որն իր հերթին ձանաչում էր թագավորի գերիշխանությունը: Հայոց կաթողիկոսները մնայուն նստավայր չունեին: Անին մայրաքաղաք դառնալուց հետո նրա մերձակայքում գտնվող Արգինան ի վերջո դարձավ մշտական նստավայր: Բագրատունիների ժամանակաշրջանում չկար Արշակունյաց շրջանին այնքան հատուկ հակասությունը թագավորական իշխանության և եկեղեցու միջև: Հայոց թագավորի դիրքորոշումը վճռական էր կաթողիկոսի ընտրության ժամանակ: Գլխավոր դատավորի իրավունքն առաջվա նման պատկանում էր հայոց կաթողիկոսին: Փոքր գործերի դատավարությունը կատարվում էր եկեղեցական ժողովների մշակած կանոններով և սովորության իրավունքով:

Իշխանական տների նման՝ խոշոր հողատեր էր դարձել նաև Հայ եկեղեցին: Մեծաքանակ վանքերը տիրում էին բազմաթիվ գյուղերի: Տաթևի վանքին, օրինակ X դ. սկզբներին պատկանում էր 22 գյուղ:

### **Տնտեսական կյանքի զարգացումը:**

Երկարատև խաղաղությունը Բագրատունյաց Հայաստանի տնտեսական վերելքի համար լայն հնարավորություններ ստեղծեց: Դրան նպաստում էր նաև ավատատիրական հարաբերությունների զարգացումը:

**Երկրագործության** համար բարենպաստ պայմաններ ուներ Հայկական լեռնաշխարհը: Զարգացած ավատատիրության շրջանում որոշակի առաջադիմություն ապրեցին երկրագործությունն ու երկրագործական տեխնիկան: Դաշտավարության մեջ կարևոր նորություն էր երկաթե խոփ ունեցող ծանր գութանի տարածումը: Այն օգտագործվում էր հատկապես խոշոր տնտեսություններում: Դրանով հեշտությամբ վարում էին նաև խոպան հողերը: Մեծ չափերով կիրառվում էր հողի մշակման **եռադաշպային համակարգը:** Աճում էր մշակելի հողերի տարածությունը խոպան հողերի հաշվին: Մշակելի դարձած հողային տարածքներն անվանվում էին նորք:

Երկրագործության կարևոր պայմաններից էր հողի ոռոգումը: Այս դարաշրջանում **ընդարձակվում էր ոռոգման ցանցը:** Օգտագործվում էին հնուց եկած՝ դեռևս Վանի թագավորության շրջանի ջրանցքները, կառուցվում էին նոր ջրանցքներ ու ջրամբարներ: Հողամշակման և նրա տեխնիկայի բարելավմանը զուգընթաց առաջադիմում էր նաև գյուղատնտեսական մթերքների մշակումը: Գինու հնձանները, ձիթաններն ու ջրաղացներն ավելի լայն տարածում են ստանում:

Հացաբույսերից տարածված էր ցորենի, գարու, հաճարի, բրնձի մշակումը: Ընդարձակվում են նաև տեխնիկական բույսերի՝ բամբակի, կտավատի, քունջութի, կանեփի մշակումը:

Գյուղատնտեսության ճյուղերից զարգանում են նաև **այգեգործությունն ու քանջարությունը:** Ծառապտուղներից տարածված էին ծիրանը, դեղձը, տանձը, խնձորը, սալորը, ընկույզը: Եթե խաղողագործությունն ավանդական զբաղմունք էր Հայաստանում, ապա նորություն էր տարածում գտած քանջարանոցային որոշ

բույսերի՝ յորու, վարունգի, կաղամբի, գազարի, ձմերուկի մշակումը: Զարգանում էր նաև շերամապահությունը:

Բագրատունյաց շրջանում IX–XI դդ. հողօգտագործման եղանակների մեջ կատարված տեղաշարժերից նշանակալից էր ավատատիրական խոշոր տնտեսության *լեռնակի* մեծածավալ *կարվածքների* առաջացումը:

*Անասնապահությունը* գյուղատնտեսության կարևոր ճյուղերից էր: Երկրի լեռնային մասերի ալպյան ընդարձակ արոտավայրերն անասնապահության զարգացման լայն հնարավորություններ էին ստեղծում: Արդիսի արոտավայրերով հարուստ էին մասնավորապես Արագածի փեշերը, Սյունիքը, Սևանի ավազանը, Տաշիր–Ձորագետը, Վասպուրականը, Տարոնը և երկրի այլ մասեր: Պահվում էին մեծ քանակությամբ խոշոր և մանր եղջերավոր անասուններ՝ կով, եգ, գոմեշ, ձի, ավանակ, ոչխար, այծ: Ոչխարի հոտերից ստացվող բուրդն օգտագործվում էր գորգեր, հագուստ և տարատեսակ գործվածքներ պատրաստելու համար: Զիները, ավանակները և խոշոր եղջերավոր անասուններն օգտագործվում էին որպես հիմնական փոխադրամիջոց: Դրանք բեռներ էին տեղափոխում կամ օգտագործվում էին որպես քաշող ուժ սայլերի, կառքերի համար:

Բնակչության տնտեսական կյանքում որոշ տեղ էին զբաղեցնում նաև մեղվաբուծությունը, որսորդությունը և ձկնորսությունը:

Երկրի տնտեսության ու մշակույթի ընդհանուր վերելքի պայմաններում առաջադիմում և առավել մասնագիտանում էին **արհեստների** առանձին ճյուղերը: Արհեստների կատարելագործմանը նպաստում էր նաև այն հանգամանքը, որ հայերն այս քնագավառում լավագույն ավանդույթներ ունեին:

*Բագրատունյաց ժամանակաշրջանի փնական խաղաղ շինարարական աշխատանքների պայմաններում արհեստագործությունն այնքան առաջադիմեց, որ անջարկեց երկրագործությունից:*

Հիմնական արհեստներից էր *մետաղագործությունը*: Արհեստի այս ճյուղից հայտնի էին դարբնությունը, զինագործությունը, պղնձագործությունը և ոսկերչությունը: Մե-

տաղագործ վարպետները պատրաստում էին գյուղատնտեսական գործիքներ, սառը զենքեր, պղնձն ամանեղեն, եկեղեցական սպասք, պերճանքի առարկաներ ու զարդեր: Հայտնի էին հատկապես ոսկերչական քարձրարվեստ իրերը:

Մեծ հռչակ էին վայելում հայ *շինարարները*՝ ճարտարապետները, քարակուփ վարպետները: Հայ վարպետները կառուցում էին բերդեր, քարավանատներ, կամուրջներ, եկեղեցական շենքեր: Նրանք եկեղեցիներն ու այլ շինությունները զարդարում էին նրբաճաշակ քանդակներով:

Հյուսները պատրաստում էին գյուղատնտեսական գործիքներ, շենքերի փայտյա մասեր, կահույք, կենցաղային իրեր և այլն: Առաջադիմել էր փայտի փորագրությունը, որի զեղեցիկ նմուշները պահպանվել ու հասել են մեզ: Լայն տարածում գտած արհեստներից էր կաշեգործությունը: Արհեստի այս տեսակը հայ մարդու կյանքի ու կենցաղի անբաժանելի մասն էր: Կաշեգործական արհեստներից տարածված էին կոշկակարությունը, մորթեգործությունը, գրակագործությունը:

Հայաստանը հայտնի էր իր մանածագործական արտադրանքով: Հատուկ արհեստանոցներում պատրաստում էին Արևելքում մեծ հռչակ վայելող *բրդե և մնայաքսե գործվածքներ*: Դրանք սպառվում էին հավասարապես և երկրի ներսում, և արտաքին շուկայում: *Արար հեղինակ Մասուդին գրում է. «Հայկական գործվածքներն այնքան զեղեցիկ են, որ նրանց նմանը չկա ծայրից ծայր ամբողջ աշխարհում»:* Միջազգային շուկաներում հայտնի էին հայկական գորգերը: Դրանք տարածում էին գտել Արևելքի երկրներում, Վոլգայի րուղարների ու սլավոնների մոտ: Մանածագործության հետ սերտորեն կապված էր նաև ներկերի արտադրությունը: Դրանք՝ իր շրջակայքով, հայտնի էր որպես *որդան կարմիր* հռչակավոր ներկի արտադրության կենտրոն: Որդան կարմիր ներկը մեծ պահանջարկ ուներ և արտահանվում էր այլ երկրներ:

Բարձր զարգացման էր հասել կավա-



գործությունը: Կավե ամանները լայն տարածում ունեին բնակչության կենցաղում: Դվինը և Անին հայտնի էին իրենց բրուտանոցներով:

Այսպիսով՝ արհեստների զարգացման հետ **խորանում է նրանց ներսում աշխատանքի բաժանումը**: Մայր արհեստը ճյուղավորվում է, և առաջ են գալիս նոր մասնագիտություններ:

Հայաստանի տնտեսության ընդհանուր վերելքին խթանեց նաև **առևտուրը**: Գյուղի և քաղաքի միջև կատարվում էր լայն ապրանքափոխանակություն: Քաղաքներում զգացվում էր գյուղատնտեսական մթերքների պահանջ, արհեստավորին էլ հարկավոր էր հումք, որը հիմնականում բերվում էր գյուղերից: Գյուղացին իր մթերքը շուկա էր հանում, որպեսզի ձեռք բերած փողով գներ գործիքներ, հագուստ, կենցաղային իրեր: Արհեստավորն իր արտադրանքն էր վաճառքի հանում՝ անհրաժեշտ հումք և ապրուստի միջոցներ գնելու համար: Այսպիսով՝ **քաղաքի և գյուղի միջև տեղի էր ունենում աշխույժ առևտուր**:

Մանրավաճառ առևտրականները՝ փերեզակները, գամբյուրը ձեռքներին, շրջում էին քաղաքներում ու գյուղերում և վաճառում զանազան կենցաղային իրեր: Երկրի ներքին առևտրի զարգացման շնորհիվ խոշոր քաղաքներում առաջանում էին մշտական շուկաներ: Նման քաղաքներում և առևտրական ճանապարհների խաչմերուկներում հաճախ կազմակերպվում էին կիրակնօրյա շուկաներ՝ **տոնավաճառներ**:

Երկրի ներքին առևտրին զուգընթաց IX-XI դդ. **աշխուժանում էր հարկապես աբրաքին առևտուրը**: Արաբական խալիֆայության և Բյուզանդիայի միջև կրկնվող պատերազմների պատճառով չեզոք Հայաստանը դարձել էր տարանցիկ առևտրի կարևոր կենտրոն: Հայաստանի վրայով էին անցնում արևելքը և արևմուտքը, հյուսիսն ու հարավը իրար կապող միջազգային առևտրի կարևոր մայրուղիներ: Այդ առևտուրն ընդգրկում էր Միջին Արևելքը, Արաբական խալիֆայության և Բյուզանդիայի տարածքները, հաճախ հասնում մինչև Հեղկաստան և Չինաստան:

Հայաստանն արտաքին առևտրին մասնակցում էր հիմնականում իր սեփական արտադրանքով: Հայաստանից արտահանվում էին հացահատիկ, ձիեր, ջորիներ, երկաթ, պղինձ, աղ, գինի, ներկեր և այլն: Արտահանվող ապրանքների մեջ զգալի տեղ էր գրավում արհեստագործական արտադրանքը: Դրանցից էին մետաղե գործիքները, ոսկյա և արծաթյա իրերը, պղնձյա ամանները, բրոնզա և մետաքսյա գործվածքները և այլն: Առևտրական քարավանները Հայաստան էին բերում հնդկական համեմունքներ, թանկագին քարեր, չինական ու միջինասիական մետաքս գործվածքներ, ռուսական մորթիներ ու մուշտակներ և այլ արտադրանք: Առևտրի ծավալման շնորհիվ մեծացավ դրամական շրջանառությունը:

**Քաղաքները**: Բագրատունիների մասնակաշրջանը նշանավորվում է նաև միջնադարյան բազմաթիվ քաղաքների առաջացման ու նրանց բուռն աճով: Քաղաքների առաջացումը կապված էր աշխատանքի հասարակական բաժանման, արհեստների և առևտրի, մանավանդ միջազգային առևտրի զարգացման հետ: Հին քաղաքների տեղերում կամ բոլորովին նոր վայրերում առաջացան տասնյակ քաղաքներ: Դրանցից արագ զարգացան առանձին իշխանությունների կենտրոններն ու միջազգային առևտրական ուղիների վրայի քաղաքները:

Քաղաքի կենտրոնական մասում սովորաբար **միջնաբերդն** էր: Այստեղ էին արքունիքի կամ նշանավոր իշխանի դղյակները իրենց օժանդակ շենքերով: Այստեղ էին նաև մյուս ազդեցիկ իշխանավորների և քարձր հոգևորականության պալատները: Միջնաբերդը շրջապատված էր լինում առանձին պարսպով: Միջնաբերդի շուրջը տարածվում էր բուն քաղաքը, որը կոչվում էր **ճահաարան**: Այստեղ կենտրոնացած էին հարուստ վաճառականների շենքերը, շուկաները, արհեստավորական գործատները, հյուրանոցները և այլն: Շահաստանը ևս շրջապատված էր արտաքին պարսպով: Դրանի դուրս էին **քաղաքի արխարձանները**, որտեղ բնակվում էին ընչազուրկ խավերը:

Քաղաքը կառավարում էր **քաղաքապետը՝ շահապը**: Հարկահանությանը, շուկաներին, առևտրին, արհեստներին հետևում էր հատուկ պաշտոնյա, որը կոչվում էր մոխթախը: Որոշ խոշոր քաղաքներ կառավարվում էին ավագների խորհրդի կողմից:

Իշխանական դասը և հոգևորականները քաղաքներում ունեին խանութներ, արհեստանոցներ, ձիթհաններ, ջրաղացներ, հյուրանոցներ: Քաղաքների կյանքում գյուղատնտեսությունը կարևոր, հաճախ գերակշիռ դեր էր կատարում:

Հայաստանի նշանավոր քաղաքները դառնում են մանր թագավորությունների կամ իշխանությունների կենտրոններ: Խոշոր ավատատերերը մրցում էին իրար հետ՝ իրենց մայրաքաղաքում կառուցելով պալատներ, տաճարներ և այլ շինություններ:

Միջնադարյան Հայաստանի ամենանշանավոր քաղաքն **Անին էր**: Քաղաքի միջնաբերդը բարձրանում էր Ախուրյան գետի ափի մի ժայռաբլրի վրա: Միջնաբերդից իջնող հարթության վրա փռված էր քաղաքը: Առևտուրը կատարվում էր հատուկ հրապարակում, ուր իրար էին հանդիպում տարբեր երկրներից ժամանած վաճառականները: Քաղաքի բնակչությունը կավե խողովակներով 12 կմ հեռավորությունից խմելու ջուր էր ստանում: Անի մայրաքաղաքը կառուցապատված էր քարակերտ շեն-

քերով, ուներ սալահատակված մայթերով քարեկարգ փողոցներ: Բյուզանդացի մի ժամանակակից հեղինակ վկայում է. «Անին մեծ և բարեկարգ քաղաք է»:

Այն միջնադարյան հայ մշակույթի, արհեստների, հատկապես ճարտարապետության ամենանշանավոր կենտրոնն էր: Անին ուներ քաղաքային ինքնավարություն, որի գլուխ կանգնած էր քաղաքի ավագների խորհուրդը:

**Դվինը**, VIII–IX դդ. լինելով խալիֆայության «Արմինիա» երկրամասի վարչական կենտրոնը, բարգավաճում էր: Քաղաքի միջնաբերդը բլրի վրա էր և շրջապատված էր պարիսպներով: Ընդարձակ քաղաքը փոխված էր բլրի ստորոտում և նույնպես պարսպապատ էր: Երկրի մայրաքաղաքի դերը Դվինը զիջել էր Անիին, բայց պահպանում էր խոշոր կենտրոնի նշանակությունը: Քաղաքն ուներ ընդարձակ շուկա և մեծ թվով արհեստանոցներ: Այն միջազգային քարավանային առևտրի և արհեստների խոշոր կենտրոն էր: Երկրաշարժի (893 թ.) հետևանքով Դվինում շատ շենքեր ավերվեցին: Սակայն քաղաքն աստիճանաբար վերաշինվեց և մնաց որպես առևտրաարդյունագործական խոշոր կենտրոն: Բագրատունյաց Հայաստանում նշանավոր քաղաքներ էին նաև **Կարսը**, **Արծնը**, **Կանք** և շուրջ երեք տասնյակ մեծ ու փոքր այլ քաղաքներ:

### **Հարցեր և առաջադրանքներ**

1. Գծապատկերի միջոցով ներկայացրե՛ք Բագրատունյաց Հայաստանի պետական կառավարման համակարգը: Համեմատե՛ք այն վաղ միջնադարի կառավարման համակարգի հետ:
2. Տնտեսության ո՞ր ճյուղերը վերելք ապրեցին զարգացած միջնադարում: Յուրջ տվե՛ք գյուղատնտեսության բնագավառում ի հայտ եկած նորությունները: Արհեստների ինչ նոր տեսակներ զարգացան Հայաստանում: Ներկայացրե՛ք Հայաստանի ներքին և արտաքին առևտուրը:
3. Որո՞նք էին քաղաքային կյանքի վերելքի պատճառները: Թվարկե՛ք զարգացած միջնադարի հայկական քաղաքները: Նկարագրե՛ք այդ ժամանակի քաղաքը: Համեմատե՛ք այն ժամանակի եվրոպական քաղաքի հետ:



## § 4. ԲԱԳՐԱՏՈՒՆՅԱՑ ԹԵԳՎԱՎՈՐՈՒԹՅԱՆ ՄԱՍՆԱՏՈՒՄԸ ՈՒ ԱՆԿՈՒՄԸ

**Կենտրոնացված պետություն ստեղծելու ջանքերը:** Բագրատունյաց թագավորները ձգտում էին ամրողջ Հայաստանը միավորել մեկ միասնական, կենտրոնացված պետության մեջ: Նրանց այդ թայլերը հանդիպում էին երկրի ներքին ու արտաքին ուժերի համառ դիմադրությանը: Երկրի, հատկապես ծայրագավառների նշանավոր իշխանությունները տնտեսական և ռազմական քավարար հզորություն ունեին և ինքնարավ կյանք էին վարում: Նրանք հաճախ ձգտում էին անկախության:

Կենտրոնախույս ուժերը խրախուսվում էին սահմանակից երկու հզոր պետությունների՝ Արաբական խալիֆայության և Բյուզանդական կայսրության կողմից: Խալիֆայությունը չէր հաշտվում Հայաստանը կորցնելու իրողության հետ, ամեն կերպ օժանդակում էր այդ ուժերին: Բյուզանդիան հայոց պետությունը թուլացնելու, երկրի արևմտյան տարածքները կայսրությանը միացնելու հետևողական քաղաքականություն էր վարում:

Բագրատունի թագավորները պայքարում էին կենտրոնախույս ուժերի դեմ: Նրանք այդ բնագավառում նկատելի հաջողություններ ունեցան, սակայն վերջնական հաղթանակի չհասան: Ո՞րն էր դրա պատճառը:

Ջարգացած ավատատիրության ժամանակաշրջանում բոլոր երկրներում տիրապետող են եղել ավատատիրական մասնատվածությունը և կենտրոնախույս ձգտումները: Սակայն, առաջին հերթին, երկրի տնտեսական ընդհանուր զարգացումը խթանում և ի վերջո հանգեցնում է միավորման ու միասնական կենտրոնացված պետության ստեղծման: Հայաստանում տնտեսական զարգացման գործոնը և մյուս հանգամանքները լիովի առկա էին: Այդուհանդերձ, ինչու տեղի չունեցավ այդ միավորումը: Մի երևույթ, որը թախտորոշ նշանակություն կունենար հայ ժողովրդի հետագա պատմական ձևակառուցումը:

Իրա պատճառը անհրաժեշտ է որոնել արտաքին գործոնների մեջ: Պատմական



Գագիկ թագավոր. Աղթամարի Ս. Խաչ եկեղեցի, 915-921 թթ.

այդ բնական գործընթացի իրականացմանը խանգարեց Բյուզանդական կայսրությունը՝ տիրելով երկրի զգալի մասին և ապա վերջ տալով Բագրատունյաց թագավորությանը:

**Ենթակա թագավորությունների առաջացումը:** Ենթակա թագավորությունների մեջ *Վասպուրականն* ամենից ընդարձակն էր: Այն ընդգրկում էր Վանա և Կասպետան լճերի միջև ընկած տարածքը: Ինչպես տեսանք, խալիֆայությունը **908 թ. Գագիկ Արծրունուն** ձանաչեց այդ երկրամասի թագավոր: Արաբներն ընդունում էին Բագրատունիների գերիշխանությունը, որը հաճախ ձևական բնույթ էր կրում: Վասպուրականով էր անցնում միջազգային առևտրի հարավային ուղին, որի վրա առաջացել էին առևտրական խոշոր կենտրոններ՝ *Վանք, Բերկրին, Արձնք, Մանազկերտը*: Գագիկ Արծրունու օրոք՝ X դ. առաջին կեսին, Վասպուրականը տնտեսական և մշակութային վերելք ապրեց: Պատմական աղբյուրների համաձայն՝ Վասպուրականն ուներ 8 քաղաք, 4000 գյուղ, 72 ամրոց ու բերդ, 115 վանք: Նրա բնակչու-

թյունը պատկանելի թիվ էր կազմում, հասնում էր 1 միլիոնի:

Անիի Բագրատունիների հետ սերտ հարաբերությունների մեջ էր **Վանանդի** կամ **Կարսի թագավորությունը**: Այս թագավորությունը գոյություն ունեցավ մեկ դար (963–1065 թթ.): Երբ Աշոտ III–ը մայրաքաղաքը տեղափոխեց Անի, Կարսի կառավարիչ նշանակեց իր եղբորը՝ Մուշեղ Բագրատունին: Սակայն վերջինս 963 թ. իրեն թագավոր հռչակեց: Աշոտ III–ը ձանաչեց նրա թագավորությունը՝ իրեն ենթակա լինելու պայմանով: Դրանով առաջացավ Բագրատունյաց մի նոր թագավորություն: Մուշեղին հաջորդեց Աբասը, որը հատուկ ուշադրություն դարձրեց քանակի վրա: Նա իր հեծյալ զորքով ակտիվորեն մասնակցեց արաբների դեմ հայերի և վրացիների արշավանքներին:

**Տաշիր-Ձորագետի** կամ **Լոռու թագավորության** գրուխ կանգնած էր Անիի Բագրատունիների մի ճյուղը: 972 թ. Տաշիրի կառավարիչ նշանակվեց Աշոտ III–որդի Գուրգենը, որին Սմբատ II–ը թագավորի տիտղոս շնորհեց: Այդպես 978 թ. **հիմնադրվեց Տաշիր-Ձորագետի թագավորությունը**: Գուրգեն թագավորը, ստանալով տեղական Կյուրիկե անվանումը, հիմք դրեց Կյուրիկյան հարստության: Այս թագավորությունը ևս ենթակա էր Անիի Բագրատունիների գերիշխանությանը: Այն զբաղեցնում էր Գուգարք նահանգի մեծագույն մասը: Կյուրիկյանների թագավորությունն առավել հզորության հասավ Դավիթ Անողիին՝ շուրջ 60 տարի տևած կառավարման շրջանում: Նա ընդարձակեց իր թագավորության սահմաններն ի հաշիվ Գանձակի և Թիֆլիսի ամիրայությունների: Տաշիր-Ձորագետի կենտրոնը դարձավ **Լոռի** քաղաքը, որի ավերակներն այժմյան Ստեփանավան քաղաքի մոտ են: Այս թագավորությունը գոյատևեց ավելի քան մեկ դար՝ մինչև **1133 թ.**:

Վանանդի թագավորի օրինակին հետևեց **Սյունիքի** նշանավոր **իշխան Սնորարը**: Նա 987 թ. հիմնեց Սյունիքի թագավորությունը՝ ձևանշելով Անիի Բագրատունիների գերիշխանությունը: Այն երկար կյանք ունե-



Սմբատ և Գուրգեն արքայորդիները, Հաղպատ, Ա. Նշան եկեղեցի, 971–991 թթ.

ցավ և իր գոյությունը պահպանեց շուրջ երկու դար: Թագավորության կենտրոնը սկզբում **Սյունի** ավանն էր (այժմ՝ Սիսիան), որը ռազմական և առևտրական առումով անհարմար վայրում էր: Այդ պատճառով մայրաքաղաքը տեղափոխվեց **Կապան**: Սյունիքի թագավորությունը մեծ վերելք ապրեց Վասակ թագավորի ժամանակ: Համեմատաբար փոքր տարածք ունեցող այս թագավորությունը բավականաչափ խիտ բնակչություն ուներ: Սյունիքում XII դ. կար 43 ամրոց ու բերդ, 40 վանք և 1000–ից ավելի գյուղ ու ավան:

**Բյուզանդիայի նվաճողական քաղաքականությունը**: Բյուզանդիան X դարի երկրորդ կեսից Հայաստանի նկատմամբ որդեգրեց նվաճողական քաղաքականություն: **Տարոնում** հաստատվել էր Բագրատունիների ինքնուրույն մի իշխանություն: Տարոնի իշխան Աշոտ Բագրատունու մահից հետո՝ **966 թ.**, իշխանությունը միացվեց Բյուզանդական կայսրությանը: Տարոնից հետո բյուզանդացիները գրավեցին Մանազկերտը: Միայն ազատատեր լեռնային **Սասունն էր**, որ պահպանեց իր անկախությունը: Դրանից հետո Բյուզանդիայի քաղաքականության գոհը դարձավ Տայքը:



**Տայքում** առաջացել էր հայ-վրացական խառը բնակչությամբ գործող մի իշխանություն՝ Դավիթ Կյուրապաղատի գլխավորությամբ: Վասիլ II կայսրը հարկադրեց Դավիթ իշխանին, որ Տայքն իր մահից հետո կտակի կայսրությանը: Դավիթ Կյուրապաղատը մահացավ 1001 թ., և Վասիլ II-ը Տայքը միացրեց կայսրությանը: Վրաց Բագրատունիները փորձեցին ընդդիմանալ բյուզանդացիների նվաճողական քայլերին, բայց հաջողություն չունեցան:

Երկրի տարանջատման ձգտումը թափանցեց անգամ Անիի Բագրատունյաց թագավորության ներսը: Գագիկ I-ի մահից հետո գահին տիրանալու համար պայքար սկսվեց նրա երկու զավակների միջև: Վրաց թագավորի և գորավար Վահրամ Պահլավունու միջնորդությամբ հաշտություն կայացավ: Ավագ որդին՝ **Հովհաննես-Սմբատը**, ժառանգեց հոր գահը՝ ստանալով Անի քաղաքը և Շիրակը: Կրտսեր եղբորը՝ եռանդուն ու ռազմիկ **Աշոտ IV-ին**, բաժին ընկան Սևանի ավազանը, Գուգարքը և որոշ այլ գավառներ: Հովհաննես-Սմբատի մահվան պարագայում Աշոտը ժառանգելու էր ամբողջ թագավորությունը: Այսպիսով՝ Անիի թագավորությունը երկու մասի բաժանվեց և բռնեց թուլացման ուղի: Նրան ենթակա թագավորություններն ավելի ինքնուրույն դարձան:

Տայքի նահանգի պատկանելության շուրջ 1022 թ. **Տրսպիզոնում** քանակցություններ սկսվեցին Բյուզանդիայի և Վրաստանի միջև: Բանակցություններին Հայաստանից մասնակցում էր Պետրոս կաթողիկոսը: Վասիլ II կայսրը պահանջեց, որ Անիի թագավորությունը հանձնվի Բյուզանդիային: Հայոց թուլամորթ թագավոր Հովհաննես-Սմբատը կայսրի և կաթողիկոսի ճնշմամբ ստորագրեց մի ամոթալի կտակ, որի համաձայն՝ Անիի թագավորությունն իր մահից հետո պետք է անցներ Բյուզանդիային: Դրանով Բագրատունյաց թագավորությունն ավելի թուլացավ և կորցրեց իր գոյատևման հեռանկարը:

Շուտով Բյուզանդիայի զոհը դարձավ **Վասպուրականը**, որն այդ շրջանում ենթարկվում էր սելջուկ-թուրքական ցեղերի

հարձակումներին: Վասիլ II-ը 1021 թ. հարկադրեց թագավոր **Սենեքերիմ Արծրունու** Վասպուրականը հանձնել կայսրությանը: Դրա փոխարեն նա Սենեքերիմին տվեց **Փոքր Հայքի Սևրասրիա քաղաքն** իր շրջակայքով: Սենեքերիմ Արծրունու հետ Սևրաստիա գաղթեցին տասնյակ հազար հայեր: Այսպիսով՝ Հայաստանի մեծ մասն անցավ Բյուզանդիային: Անմիջական վտանգ էր կախվել Անիի թագավորության գլխին:

**Պայքար պետականության պահպանման համար:** Անին Բյուզանդիային կտակելը գաղտնի էր պահվում: Այդ պատճառով եղբայրների միջև բախում չառաջացավ: Խաղաղ փիճակը շարունակվեց շուրջ քսան տարի՝ մինչև 1041 թ., երբ նույն տարում անհայտ հանգամանքներում մահացավ Աշոտ IV-ը, ապա՝ Հովհաննես-Սմբատը: Նրանց մահից հետո բյուզանդական կողմնորոշում ունեցողներն ակտիվացան, որոնց հոսանքը գլխավորում էին Պետրոս կաթողիկոսը և թագավորի՝ արքունիքում կշիռ ունեցող խնամակալը՝ Վեստ Սարգիսը:

Իմանալով հայոց թագավորների մահվան մասին՝ բյուզանդական կայսրն Անին գրավելու համար մեծ բանակ ուղարկեց: Քաղաքի պաշտպանության համար ոտքի ելավ բնակչությունը և դիմեց սպարապետ **Վահրամ Պահլավունուն**՝ ընդդեմ Բյուզանդիայի պայքարը գլխավորելու պահանջով: «Մենք ամենքս պատրաստ ենք մեռնելու, — ասում էին ժողովրդի ներկայացուցիչները, — բայց չենք մեռնի, մինչև չոչնչացնենք մեր թշնամիներին, որոնք տարապարտ կերպով եկել են մեր դեմ և կամենում են հափշտակել մեր երկիրը»: Քաղաքի դարպասներից դուրս հայերն ալեգարդ սպարապետ Վահրամ Պահլավունու գլխավորությամբ հարձակվեցին և մեծ ջարդ տալով՝ փախուստի մատնեցին բյուզանդական զորքին:

Այդ հաղթանակից հետո Վահրամ Պահլավունու առաջարկով Անիում թագավոր հռչակվեց թագաժառանգ Աշոտի տասնութամյա որդին՝ **Գագիկ II-ը (1042-1045 թթ.)**: Դա պետությունն ամրապնդելու նպատա-

կով կատարված խելամիտ քայլ էր: Հայոց նոր թագավորը փայլուն կրթություն ստացած, հունարենին տիրապետող, հոր քաջությունը ժառանգած երիտասարդ էր: Նա իր կարճատև գահակալության ընթացքում դրանորեց ռազմական և պետական գործչի մեծ ունակություններ: Նա պայքար սկսեց երկիրը ներսից քայքայողների դեմ. բանտարկեց Վեստ Սարգսին, հետ վերցրեց նրա կողմից հափշտակված արքունի գանձերը: Սակայն հավատալով այդուհետ արքային հավատարիմ լինելու նրա կեղծ խոստումներին՝ ազատ արձակեց: Կայսերական զորքերի երկրորդ և երրորդ հարձակումները նույնպես ավարտվեցին բյուզանդացիների պարտությամբ:

Այդ անհաջողություններից հետո Բյուզանդիան, համոզվելով, որ գենքի ուժով չի կարողանում արդյունքի հասնել, դիմում է նենգ միջոցի: Կայսրը հաշտություն կնքելու պատրվակով Գագիկ II-ին հրավիրում է Կոստանդնուպոլիս: Վահրամ Պահլավունին և նրա կուսակիցները, դրա մեջ խարդավանք տեսնելով, դեմ են կանգնում այցելությանը: Նրանց խորհրդով Գագիկը հրաժարվում է Բյուզանդիայի մայրաքաղաք մեկնելուց: Հետագայում, տեղի տալով կաթողիկոսի և Վեստ Սարգսի հորդորնե-

րին, **Գագիկը 1044 թ. մեկնում է Կոստանդնուպոլիս:** Կոստանդին Անուռայի կայսրը բանակցելու փոխարեն հայոց թագավորից պահանջում է Անին հանձնել կայսրությանը: Գագիկ II-ը մերժում է այդ անօրինական պահանջը՝ կայսրին դատապարտելով հետևյալ խոսքերով. «**Հայոց փան փերն ու թագավորը ես եմ, և ես քեզ չեմ րապիս հայոց կրկիրը, որովհետև դու ինձ խաբուրթամբ ես քերկ Կոստանդնուպոլիս:**»

Կայսրը հայոց թագավորին կայանավորում է և թույլ չի տալիս վերադառնալ Հայաստան: Նա գործ է ուղարկում Անին գրավելու: Անիի քնակչությունը կրկին համախմբվում է սպարապետի շուրջը և հետ մղում զավթիչների գրոհները: Սակայն արքունիքում մեծացել էր բյուզանդասերների թիվը: Ջլատվել ու թուլացել էր քնակչության դիմադրական կողովը. **1045 թ. քաղաքը հանձնվում է բյուզանդացիներին:** Դրանով ավարտվում է Անի-Շիրակի Բագրատունիների հայկական պետության գոյությունը:

Բագրատունյաց թագավորության անկումը ծանր հետևանքներ ունեցավ Հայաստանի համար: Երկար դարեր հայ ժողովուրդը բուն երկրում կորցրեց իր միասնական ու լիակատար անկախ պետականությունը:

### Հարցեր և առաջադրանքներ

1. Պարզարանք կենտրոնացված պետության թուլացման սխառձատները:
2. Երբ, որտեղ և ում կողմից տեղովեցին ենթակա թագավորությունները: Դրանցից որն էր ամենահզորը:
3. Ինչ քաղաքականություն էր վարում Բյուզանդիան Հայաստանի նկատմամբ: Ինչո՞ւ հաջողություն ունեցան բյուզանդացիների ծրագրերը:
4. Աերկայացրե՞ք Անիի թագավորության թուլացման և անկման պատմությունը:

## Թեմա 2. ՀԱՅՈՑ ՊԵՏԱԿԱՆՈՒԹՅՈՒՆԸ XI-XIV ԴԱՐԵՐՈՒՄ

### § 1. ՀԱՅԱՍՏԱՆԸ XI ԴԱՐԻ ԵՐԿՐՈՐԴ ԿԵՄԻՆ

Հայաստանում կենտրոնական թագավորության անկման հետևանքները: Անիի թագավորության անկումից հետո հայոց պետականությունն առիասարակ վերացնելու և հայկական անկախ բոլոր

պետական կազմավորումներն իրեն ենթարկելու Բյուզանդիայի քայլերը շարունակվեցին: Բյուզանդական արքունիքը, ձգտելով ավելի թուլացնել Հայաստանը, նվաճված երկրամասերի հայ ազնվակա-



նությանը երկրից հեռացնելու նոր ձեռնարկումներ կատարեց: Այդ նպատակով հայ իշխաններին շնորհվեցին բարձր տիտղոսներ, կայսրության արևմտյան շրջաններում տրվեցին ընդարձակ կալվածքներ: Հայկական գործերը ցիրուցան արվեցին, մի մասն էլ տարվեց տերության խորքերը: Սկսվեց քնակչության զանգվածային արտագաղթ դեպի Փոքր Ասիա. Վրաստան և այլ շրջաններ: Բնակչությունը ենթարկվեց ծանր հարկման: Պայքարի սրաքն ուղղվեց նաև Հայ եկեղեցու դեմ: Նույնիսկ Անիի անկման հարցում իրենց օժանդակած կաթողիկոս Պետրոս Գետադարձին բյուզանդացիները կանչեցին Կ. Պոլիս և արգելեցին վերադառնալ հայրենիք: Հարկման ենթարկվեց նաև եկեղեցին: Քաղկեդոնական դավանանքի տարածման համար ստեղծվեց լուրջ վտանգ: Բյուզանդիայի *այս անհեռարես քաղաքականությունը ճակատագրական եղավ ոչ միայն Հայաստանի, այլև կայսրության համար*: Շուտով բյուզանդացիները բախվեցին հզոր թշնամու՝ սելջուկ-թուրքերի հետ:

**Հայկական թագավորությունները և իշխանությունները:** Նույնիսկ XI դարի կեսին Անիի Բագրատունյաց թագավորության անկման և Միջին Ասիայի ռազմատենչ քոչվոր ցեղերի՝ սելջուկ-թուրքերի ձեռնարկած ավերիչ արշավանքների հետևանքով ստեղծված բարդ աշխարհաքաղաքական պայմաններում հայ ժողովուրդը շարունակեց իր պայքարը համահայկական պետականությունը վերականգնելու ուղղությամբ: Եթե կենտրոնական թագավորության քնակչության մի մասն իր ոչ եռանդուն պայքարն արտահայտում էր օտար ավեր հեռանալու եղանակով, ապա մյուսները, մնալով հայրենիքում, հնարավոր միջոցներով փորձում էին ընդդիմանալ բյուզանդացիների հայակործան քայլերին ու սելջուկների ասպատակություններին:

Միասնական պետականության վերականգնման համար պայքարում հայ քնակչությունը փորձում էր համախմբվել գոյատևող մյուս հայկական թագավորություն-

ների զահակայների շուրջ և ունենում էր նաև հաջողություններ: Պատահական չէ, որ Անիի անկումից հետո դեռ հայկական թագավորություններն ու իշխանությունները որպես հայոց պետականության ինքնատիպ կրողներ, պահպանեցին իրենց գոյությունը երկար ժամանակ: Բագրատունիները զահագրկվել էին Անի-Շիրակում, սակայն շարունակում էին իշխել հարևան Կարսում և Տաշիր-Չորագետում, իսկ Այունյաց թագավորները իշխեցին ևս 120 տարի:

Կարսի թագավորությունում դեռ Արաս թագավորի ժամանակ հաստատված խաղաղությունը պահպանվեց նրա որդու՝ *Գագիկ Արասյանի* օրոք (1029–1065 թթ.): Գագիկը կարողացավ խնամիական կապեր հաստատել տարբեր հայ և օտարագահ թագավորական ու ազնվականական տոհմերի հետ ու զգալիորեն ամրապնդել իր դիրքերը: Նա ամուսնացավ Վիրա-արխագաց թագավոր Բագրատ IV-ի քրոջ՝ Գուրանդուխտի հետ: Իզուր չէ, որ, ըստ պատմիչ Մատթեոս Ուտհայեցու, Անիի տիրակալներից հետո «շահնշահ» տիտղոսն անցավ Գագիկ Կարսեցուն:

Իր ազդեցիկ դիրքը պահպանում էր և Բյուզանդիայի ոտնձգություններին հաջողությամբ ընդդիմանում էր Հայաստանի հյուսիսային ընդարձակ տարածքները զբաղեցնող *Տաշիր-Չորագետի Կյուրիկյան թագավորությունը*: Այստեղի երկարամյա թագավոր Դավիթ Անհողինը շարունակում էր յուրաքանչյուր պատեհ առիթ օգտագործել՝ իր ազդեցությունը տարածաշրջանում ավելացնելու նպատակով: Նա ամուսնացած էր Կախեթի իշխան Կվիրիկեի քրոջ հետ: Կվիրիկեի մահից հետո այդ իշխանությունն անցավ Դավիթի որդուն՝ Գագիկին, որն էլ դարձավ Կախեթի Կյուրիկյան հարստության նոր ճյուղի հիմնադիրը: Այս եղանակով սերտ կապեր հաստատվեցին Կախեթի հետ, որտեղ հետզհետե աճեց հայ քնակչության թիվը: Պատահական չէ, որ այդ իշխանությունը (նաև թագավորություն) վերածվեց հայկական պետական կազմավորման:

Իր կյանքի վերջին տարիներին Դավիթ

Անհողինը, չնայած պատկանելի տարիքին, ծրագրել էր բյուզանդացիներից Անին ազատագրել և հասնել իր վաղեմի երազանքին: Մակայն վերահաս սելջուկյան արշավանքները ձախողեցին այդ ծրագիրը: Գավիթին փոխարինած որդու՝ Կյուրիկեի օրոք երկիրը կարողացավ գերծ մնալ ավերածություններից, շարունակել խաղաղ տնտեսական բարգավաճման քաղաքականությունը: **Լոռի (Losh)** բերդը դարձավ թագավորանիստ, աճեց պղծի հանքերի շահագործումը, հատկապես մեծ զարգացում ապրեց գյուղատնտեսությունը:

Լեռնային անմատչելի տեղանքը և ազատ ապրելու՝ սյունեցիների կամքը ապահովեցին հայկական մյուս՝ **Սյունիքի թագավորության** կենսունակությունը: Վասակ թագավորը չունեւր արու զավակ: Նրա մահից (1040 թ.) հետո գահն անցավ իր փեսա Աշոտ իշխանի որդուն՝ Սմբատին, որին պատմիչներն անվանում են Սմբատ Աշոտյան: Սյունյաց թագավորությունը ևս կարողացավ դիմակայել ժամանակի բոլոր փորձություններին և հաջող պայքար մղելով նախ՝ Գանձակի ամիրայության, ապա՝ սելջուկների դեմ՝ իր դիրքերը պահպանել երկար ժամանակ մինչև XII դարի երկրորդ կեսը:

Հայկական անկախ թագավորություններից բացի, իրենց **կիսանկախ վիճակը պահպանում էին** բազմաթիվ այլ իշխանություններ ու կազմավորումներ **Տայքում, Սասնում, Սպեր-Բարեղորում, Արցախում** և այլուր:

**Հայաստանը սելջուկ-թուրքերի արշավանքների ժամանակաշրջանում:** Սելջուկ-թուրքերի նախնիները քոչվոր անասնապահներ էին և գրադեցնում էին Աթալից Միջին Ասիա ընկած տարածքը: Նրանք առաջին անգամ Հայաստանում և Փոքր Ասիայում հայտնվել էին դեռևս VIII դարում՝ իբրև վարձկաններ արաբական բանակում: X դարի երկրորդ կեսին թուրքական ցեղերի մի մասը միավորվեց իրենց առաջնորդ Սելջուկի շուրջը, գրավեց Պարսկաստանը և մտնեցավ Հայաստանի սահմաններին:

Արդեն **1047 թ.**՝ Բագրատունյաց թագա-

վորության անկումից երկու տարի անց, սելջուկների 20-հազարանոց բանակն առաջին անգամ ներխուժեց Հայաստան: Վասպուրականի վրայով այն գրեթե անարգել, բյուզանդացիների թողտվությամբ հասավ մինչև Բասեն՝ ճանապարհին ավերելով բազմաթիվ բնակավայրեր:

**1048 թ.** հետևեց 100-հազարանոց սելջուկյան բանակի նոր արշավանքը: Ջորավարներ Գթմուշի և Իբրահիմի զորքերը մահ ու ավեր սփռեցին ամենուր: Մանանդի Սմբատական լեռան մոտ նրանք կազմակերպեցին բնակչության կոտորած: Թուրքերը գրավեցին Կարինի մոտ գտնվող Արծն վաճառաչահ ու հարուստ քաղաքը, ավերեցին այն, բնակչությանը կոտորեցին կամ գերեվարեցին: Սելջուկներին ուշացումով փորձեցին կանգնեցնել բյուզանդական զորքն ու նրանց օգնության հասած հայկական ու վրացական ջոկատները, սակայն Բասենի ճակատամարտում պարտություն կրեցին: Հարուստ ավարով սելջուկները վերադարձան Անրպատական: Նոր սթափված բյուզանդացիները հայերին սիրաշահելու քայլեր կատարեցին:

**1054 թ.** սելջուկների երրորդ արշավանքն արդեն գլխավորում էր նրանց առաջնորդ **Տուղրիլը:** Այս անգամ թշնամին համառ դիմադրության հանդիպեց Կարս քաղաքի մոտ: Մարտում Կարսի պաշտպաններից Թաթուլ անունով մի երիտասարդ ծանր վիրավորել էր Տուղրիլի մերձավորներից մեկին: Բեկը գերի ընկած Թաթուլին ասում է, որ եթե իր մերձավորն ապրի, ինքը ազատ կարձակի նրան: Քաջ Թաթուլը համարձակորեն պատասխանում է, որ հարվածն իրենն է, և թուրք զինվորն անպայման կմեռնի: Սելջուկներն այս հետախուզական արշավանքից հետո էլ հարուստ ավարով հեռացան Հայաստանից:

Իրադրությունը փոխվեց, երբ սելջուկյան պետության զլուխ կանգնեց սուլթան Ալփ-Ասլանը: **1064 թ.** նա ներխուժեց Հայաստան՝ այն վերջնականապես գրավելու մտադրությամբ: Ասպատակելով Լոռին՝ սելջուկները պաշարեցին Անին: Քաղաքի բյուզանդական կայազորը քաշվեց միջնա-



բերդ և բնակչությանը թողեց անպաշտպան: Ծաղկուն քաղաքը վերածվեց ավերակների: Անիի անկումից հետո ավերածություններից խուսափելու նպատակով Տաշիր-Ձորագետի, Կարսի ու Սյունիքի թագավորները ձևականորեն իրենց հպատակությունը հայտնեցին սելջուկներին: Այդ ժամանակ չունենալով անհրաժեշտ ուժեր՝ սելջուկները հրաժարվեցին հայկական մյուս թագավորությունների վրա հարձակվելու մտադրությունից:

1071 թ. բյուզանդացիները փորձեցին կասեցնել սելջուկների առաջխաղացումը և մեծ բանակով շարժվեցին արևելք: Վճռական ճակատամարտը տեղի ունեցավ *Մանազկերտի* մոտ և ողբերգական վախճան ունեցավ կայսրության համար: Բյուզան-

դացիները ծանր պարտություն կրեցին: Բազմաթիվ գերիների հետ թուրքերի ձեռքն ընկավ նաև կայսր Դիոգենեսը: Շուտով կնքվեց հաշտություն, որով բյուզանդացիները ճանաչեցին սելջուկների տիրապետությունը Հայաստանի ու Փոքր Ասիայի վրա: 1074 թ. հաստատվեց սելջուկյան պետության իշխանությունը Փոքր Ասիայում: Հայաստանի տարածքում ստեղծվեցին Մանազկերտի, Խլաթի և այլ սելջուկյան իշխանություններ: Նորից, ինչպես արաբական տիրապետության շրջանում, երկիրը հայտնվեց ծանր վիճակում: Օտար քոչվոր անասնապահական կենցաղը ծանր հարված հասցրեց Հայաստանի տնտեսությանը: Կրկին մեծ չափեր ընդունեց բնակչության արտագաղթը:

### Հարցեր և առաջադրանքներ

1. Ի՞նչ քայլեր ձեռնարկեց Բյուզանդիան Հայաստանում Անիի թագավորության անկումից հետո: Ներկայացրե՞ք Հայ եկեղեցու նկատմամբ Բյուզանդիայի վարած քաղաքականությունը:
2. Ովքե՞ր էին սելջուկ-թուրքերը, երբ նրանք հայտնվեցին Հայաստանում: Թվարկե՞ք նրանց արշավանքները, ցույց տվե՞ք դրանց հետևանքները:
3. Որտե՞ղ և երբ տեղի ունեցավ վճռական ճակատամարտը բյուզանդացիների և սելջուկների միջև, ինչ արդյունք ունեցավ այն:

## § 2. ՀԱՅ ԺՈՂՈՎՐԴԻ ԱՋԱՏԳՐԱԿԱՆ ՊԱՅՔԱՐԸ ՕՏԱՐ ՆՎԱՃՈՂՆԵՐԻ ԴԵՄ (XII-XIV ԴԱՐԵՐ)

**Պայքար սելջուկ-թուրքերի դեմ:** XI դարի վերջին սելջուկյան պետությունն սկսեց աստիճանաբար թուլանալ: Ջուզահեռաբար նկատվեց Հայաստանի հյուսիսային հարևանի՝ Վրաստանի հզորացման գործընթացը: 1065 թ. Կարսի թագավոր Գագիկ Աբասյանը, վախենալով թուրքերից, իր թագավորությունը հանձնեց Բյուզանդիային, և ինքը հեռացավ Փոքր Ասիա: *Սյունիքի* ու *Տաշիր-Ձորագետի* թագավորությունները շարունակեցին պահպանել իրենց գոյությունը և, օգտվելով սելջուկների թուլացումից, վերականգնեցին իրենց տիրույթները: Հայաստանի հարավում *Սասունում*, պահպանվում էր *Թոռնիկյանների* իշխանությունը:

Սելջուկյան պետության մասնատման հետևանքով Հայաստանում առաջացան մահմեդական իշխանություններ: Դեռ 1064 թ. գրավված *Անին* հանձնվել էր *Շադդադյաններին*: Շադդադյաններից բացի, ստեղծվեց նաև *Շահ-Արմենների ամիրայությունը* Հայաստանի հարավում՝ *Խլաթ* կենտրոնով: Պատմական Ուտիքում ձևավորվեց *Գանձակի աթաբեկությունը*:

Այս մահմեդական իշխանությունների դեմ XI դարի վերջից համատեղ պայքարի դուրս եկան հայերն ու վրացիները: Հայ-վրացական հարաբերությունները ջերմացան հատկապես վրաց *Գալիք Շինարար* (1089-1125 թթ.) թագավորի օրոք: Վերջինս Հայաստանից Վրաստան ար-



տագադթող հայերի համար կառուցել տվեց **Գորի** քաղաքը: Դավիթի շուրջը համահմարվեցին բազմաթիվ հայ իշխաններ՝ իրենց զինական ուժերով: Հայ զորահրամանատարների ներկայությունը վրացական արքունիքում ավելի էր բարձրացնում Վրաստանի՝ որպես քրիստոնյա հարևանի հեղինակությունը սելջուկների լծից ազատագրվել ցանկացող հայ ժողովրդի աչքում: Այսպիսի պայմաններում հայերը հաճախ ապստամբում էին և օգնության նպատակով դիմում վրաց թագավորներին: 113 թ. հայ-վրացական ուժերը թշնամուց մաքրեցին **Լոռին**: Սակայն վրաց արքունիքը տեղի **Տաշիր-Ձորագետի** թագավորությունը վերացրեց և մտցրեց վրացական պետության կազմի մեջ:

1124 թ. Անիի ապստամբած բնակչությունը պատվիրակություն ուղարկեց Դավիթ Շինարարի մոտ՝ նրան հայտնելով քաղաքը վրաց թագավորին հանձնելու իրենց մտադրության մասին: Դավիթը զորքով մտավ Անի և այնտեղից դուրս բռնեց Շաղղաղյաններին: Վերջիններս նոր զորք հավաքեցին և կրկին պաշարեցին Անին: Միայն երկու տարի անց՝ 1126 թ., երբ քաղաքում սկսվեց սով, անեցիները քաղաքը հանձնեցին Շաղղաղյաններին:

Պայքարը Անիի և Հյուսիսային Հայաստանի մյուս շրջանների համար նոր թափ ստացավ վրաց Գեորգի III թագավորի օրոք (1156–1184 թթ.): 1161 թ. Անին նորից գրավվեց հայ-վրացական ուժերի կողմից: Թշնամին կրկին այն վերատիրեց: 1174 թ. Անին որոշ ժամանակով նորից անցավ հայերի և վրացիների ձեռքը:

Հայ-վրացական զինակցությունն իր գագաթնակետին հասավ **Թամար թագուհու** իշխանության տարիներին (1184–1207 թթ.): Նրա ժամանակ էլ հայ զորականներից **Սարգիս Ջաքարյանը** 1185 թ. **պրացավ ամիրապատարի՝ սպարապետի պաշտոնը**: Նրա մահից հետո այդ պաշտոնն անցավ Սարգսի ավագ որդուն՝ **Ջաքարե Ջաքարյանին**: Ջաքարեի կրտսեր եղբայր **Իվանեն** (Հովհաննեն, Հովհաննես) դարձավ աթաբեկ՝ թագաժառանգի խնամա-



Անբերդ ամրոցը

կալ: Վերջիններիս հրամանատարությամբ XII դարի վերջին հայ-վրացական զորքերը թշնամուց ազատագրեցին Հյուսիսային Հայաստանի բազմաթիվ շրջանները: 1196 թ. ազատագրվեց Արագածի լանջին կառուցված **Անբերդ** հայտնի բերդը, իսկ 1199 թ.՝ քանիեորդ անգամ՝ նաև **Անին**: Թշնամուց մաքրվեցին Արցախը, Սյունիքը, Արարատյան դաշտը:

1203 թ. ազատագրվեց **Դվինը**, իսկ 1206 թ.՝ **Կարսը**, ապա նաև **Բասինն** ու **Բագրևանդը**: Շարունակելով հարձակումը՝ հայ-վրացական ուժերը հասան Մանազկերտ ու Արձնշ: 1209 թ. պաշարվեց Վանա լճի ափին ընկած **Խլարը**՝ Շահ-Արմենների նստավայրը: Սակայն մի պատահական դիպված (Իվանեն պատահաբար ընկավ որսափոսը և գերվեց թշնամու կողմից) խանգարեց Խլարի գրավմանը: Ջաքարեն ստիպված եղավ եղբորը ստանալու դիմաց դադարեցնել քաղաքի պաշարումը և նահանջել:

**Ջաքարյանների իշխանապետությունը Հայաստանում: Իշխանական նոր տները:** Հյուսիսային ու կենտրոնական Հայաստանում սելջուկների լծի թոթափումից հետո ազատագրված հայկական հողերը վրաց արքունիքի կողմից հիմնականում տրվեցին Ջաքարյաններին: Վերջիններս, վրաց պետության հովանավորությամբ ունենալով ներքին լայն



ինքնուրույնություն, ստեղծեցին իրենց **իշխանապետությունը**, որն իր մեջ ընդգրկեց Շիրակը՝ Անի մայրաքաղաքով, Արարատյան դաշտը, Արաքս գետի միջին հոսանքը, Սևանի շրջակայքը:

Զաքարյաններն այնքան մեծ իշխանություն ունեին սեփական տիրույթներում, որ իրենց հերթին պահում էին վասալ կախյալ իշխանապետություններ: Հայաստանի հյուսիս-արևելքում՝ Տավուշում, Գարդմանում և Փառխոտում, Զաքարյաններից կախյալ ստեղծվել էր **Վահրամյանների իշխանությունը**, որի կենտրոնը **Գագ ամրոցն էր**: Նրա հիմնադիրը Սարգիս Զաքարյանի եղբայր Վահրամն էր: Զաքարյանների մի ճյուղն էլ նստում էր **Ջախախի իշխանության** կենտրոն **Թմուկ** (Թմկա) **քերդում**:

Զաքարյաններին ենթակա իշխանություններ կազմավորվեցին՝ Վայոց ձորում՝ Պոռչյանների, Արագածոտնում՝ Վաչուտյանների կողմից: Վաչուտյանների նստավայրը Ամբերդն էր: Այուսիքում ազդեցիկ դիրք ձեռք բերեցին Օրբելյանները, Արցախում (հասչենում)՝ Հասան-Ջալալյանները: Հայկական այս բոլոր իշխանապետությունները սերտորեն գործակցում էին վրաց պետության հետ, սակայն ներքին քաղաքական ու տնտեսական քնազավառներում միանգամայն ինքնուրույն էին: Զաքարյանների օրոք երկիրն ապրում էր քաղաքական ու տնտեսական վերելքի ժամանակաշրջան:

**Մոնղոլական առաջատակությունները:** Պայքար թաքար-մոնղոլական տիրապետության դեմ: 1206 թ. Սիբիրի և Չինաստանի միջև ընկած քոչվոր մոնղոլական ցեղերի ժողովը՝ մեծ խուրալը, ցեղապետերից Թեմուչինին ընտրեց խան՝ Չինգիզ խան անունով: Վերջինս շուտով սկսեց իր աշխարհակալ նվաճումները: 1219 թ. Չինգիզ խանը մտավ Միջին Ասիա և պարտության մատնեց Խորեզմի շահին, որի որդին՝ Ջալալեդդինը, նահանջելով պայքարը շարունակեց Իրանում և Այսրկովկասում՝ իր հերթին կողոպտելով ու ջարդելով տեղի բնակչությանը:

1220 թ. **մոնղոլները** ներխուժեցին **Այսրկովկաս**: Նրանց դեմ դուրս եկան վրաց թագավոր Գեորգի Լաշան և Իվանե Զաքարյանը՝ հայ-վրացական միացյալ ուժերով: Ճակատամարտը տեղի ունեցավ Կոտմանի դաշտում: Մոնղոլները կիրառեցին պայքարի խորամանկ ձև. կազմակերպեցին կեղծ նահանջ, իսկ երբ հայ-վրացական ուժերն անցան հակագրոտի, թաքստոցում գտնվող ուժերով հարվածեցին թիկունքից: Անակնկալի եկած Գեորգիի զորքերը պարտություն կրեցին և նահանջեցին: Այնուհետև, շրջանցելով Զաքարյանների տիրույթներն ու Վրաստանը, մոնղոլներն անցան Հյուսիսային Կովկաս և Ռուսիա:


Վերոհիշյալ հետախուզական արշավանքից հետո մոնղոլները նորից հայտնվեցին 1231 թ., երբ հետապնդելով Ջալալեդդինին՝ կարողացան նրան ջախջախիչ պարտության մատնել: Ապա մոնղոլներն անցան Վատպուրական, ավերեցին շատ քնակավայրեր: Հաջորդ տարի նրանք նորից վերադարձան Միջին Ասիա՝ հետդարձի ճանապարհին ավերելով Գանձակ քաղաքը:

1236 թ. մոնղոլական 30-հազարանոց բանակը, բազմաթիվ քոչվոր ցեղերի ուղեկցությամբ, **Չարնադանի** գլխավորությամբ ներխուժեց Հայաստան: Այդ ժամանակ Վրաստանը կորցրել էր իր նախկին հզորությունը, իսկ Աղվանքն ու Զաքարյանների իշխանապետությունը խիստ մասնատված էին և բռնկված ներիշխանական երկպառակություններով: Պատահական չէ, որ թշնամին լուրջ ու կազմակերպված դիմադրության չհանդիպեց: Քաջ ծանոթ լինելու Այսրկովկասի իրավիճակին՝ մոնղոլները բաժանեցին գորքը ջոկատների, որոնք իրենց հրամանատարների՝ նոյոնների գլխավորությամբ սկսեցին հպատակեցնել երկրամասը: Հայ իշխաններից շատերը հեռացան Վրաստան, իսկ մյուսները հայտնեցին իրենց հպատակությունը: **Լոռի** և **Ճամբոր** քաղաքները զրավելուց հետո մոնղոլները պաշարեցին **Անին**: Թշնամին պատվիրակներ ուղարկեց քաղաքի բնակիչների մոտ՝ պահանջելով անձնատուր լինել: Վրդովված անեցինները հարձակվեցին

մոնղոլ պատվիրակների վրա և սպանեցին նրանց: Գագագաձ թշնամին գործի դրեց պաշարողական մեքենաները և, քանդելով քաղաքի պարիսպները, ներխուժեց անպաշտպան քաղաքները: Բնակչության մի մասը կարողացավ փախչել, իսկ մյուս մասը հիմնականում սրի քաշվեց կամ ստրկության վաճառվեց: Շուտով նույն բախտին արժանացան նաև **Կարսը**, **Դվինը** և այլ քաղաքներ: Մոնղոլական բանակին կրնկալուս ուղեկցող թոչվոր ցեղերը շտապեցին զավթել երկրի լավագույն հողերը:

1242-1243 թթ. մոնղոլական զորքերը շարժվեցին դեպի երկրի արևմտյան շրջանները, որոնք այդ ժամանակ Իկոնիայի սուլթանության հսկողության տակ էին: Ճանապարհին պաշարվեց **Կարինը**, որտեղ կենտրոնացել էր շրջակա խաղաղ բնակչության մի ստվար հատված: Մոնղոլներն այս արշավանքին հարկադրաբար մասնակից էին դարձրել նաև վրացական ու հայկական ջոկատներ: Վերջիններս, տեղակայված լինելով նրանց բանակի առաջին գծում, ստիպված կռվում էին իրենց հայրենակիցների դեմ և տալիս մեծ կորուստներ: Կարինը դիմադրեց շուրջ երկու ամիս և ընկավ թշնամու ձեռքը: Բնակչության զանգվածային կոտորածները կրկնվեցին նաև այստեղ: 1243 թ. մոնղոլները պարտության մատնեցին Իկոնիայի սուլթանությանը և գրավեցին Երզնկան, Տերիկը, Կեսարիան ու Սերաստիան: Հասնելով Կիլիկիայի սահմաններին՝ մոնղոլները կանգ առան և 1254 թ. դաշնակցային պայմանագիր կնքեցին հայոց թագավոր Հեթում I-ի հետ: 1244 թ. մոնղոլներն իրենց ենթարկեցին նաև Հալապոտանի հարավային շրջանները՝ Տարոնը, Վասպուրականը և Աղձնիքը:

Մոնղոլական տիրապետությունն աղետաբեր եղավ հայ ժողովրդի համար: Լինելով քոչվոր անասնապահներ՝ նրանք բերրի դաշտավայրերը և հատկապես քաղաքները սկսեցին վերածել արոտավայրերի: Կարճ ժամանակում հսկայական ծաղկուն քաղաքներ, այգիներ, բանջարանոցներ վերածվեցին արոտավայրերի: Նորից



Կարս. Վարդանի կամուրջը

վերսկսվեց բնակչության զանգվածային արտագաղթը:

Նվաճված երկրների բնակչությունը ենթարկվեց ծանր հարկման: 16-ից մինչև 50 տարեկան տղամարդիկ դրվեցին հարկերի տակ: Բնակչությունը պարտավոր էր նաև զանազան պարիակներ կատարել: Հպատակ ժողովուրդները պարտավոր էին նաև կազմել զինական ջոկատներ, որոնց ուղարկում էին ամենավտանգավոր ճակատները:

Նվաճումների սկզբնական շրջանում Հայ եկեղեցու նկատմամբ նվաճողները մեղմ քաղաքականություն էին վարում: Սակայն երբ XIII դարի վերջին մոնղոլներն ընդունեցին իսլամը, սկսվեցին նաև կրոնական հալածանքները: Երբեմնի վաճառաշահ Անի, Դվին, Արձնչ և այլ քաղաքներ վերածվեցին ավանների:

Մոնղոլական տիրապետությունը զայրույթի ալիք առաջացրեց հպատակ ժողովուրդների շրջանում: 1249 թ. հայ և վրաց իշխանները վրաց թագավորի մասնակցությամբ սկսեցին նախապատրաստվել ապստամբության: Գավառներ ուղարկվեցին ջոկատներ: Լոռիում հատկապես ետանդուն գործում էին Զաքարյանները: Սակայն մոնղոլները կարողացան բացահայտել ապստամբությունը և ձնչել:

1259 թ. բռնկվեց նոր ապստամբություն, որի պատճառը հարկերի քարձրացումն էր



և հայ-վրացական ջոկատները եգիպտոս՝ մամլուքների դեմ պատերազմի ուղարկելու մոնղոլների որոշումը: Հուգումներն ընդգրկել էին Արևելյան Վրաստանը, Շիրակը, Արցախը, Լոռին: Հուլավու խանը դաժանորեն ձևեց ապստամբությունը: Հայ դեկավարներից Խաչենի տիրակալ Հասան-Ջալալը և Ջաքարե Ջաքարյանը՝ ամիրսպասալար Ջաքարեի թոռը, մահապատժի ենթարկվեցին:

**Հայկական իշխանական տները XIII դարի երկրորդ կեսին—XIV դարում:** Մոնղոլները Հայաստանը մտցրեցին էլզանություն վարչամիավորի մեջ: Շարունակվեցին հայ իշխանական տների թու-

լացման քայլերը, նրանց միմյանց դեմ օգտագործելու փորձերը: Խիստ թուլացան Վաչուտյաններն ու Պոռշյանները: Համամատարար իրենց դիրքերը պահպանեցին Օրբելյանները՝ Սյունիքում, Դուփյանները՝ Վերին Խաչենում, Հասան-Ջալալյանները՝ Ներքին Խաչենում, Ազիզբեկյանները՝ Արայի լեռան շրջանում: Ջաքարյանների շտապիղները 1266 թ. Գուգարքի Ջավախք գավառում, Ախալցխայի շրջակայքում, Տայքի զգալի մասում ստեղծեցին հայ-վրացական մի իշխանություն՝ *Սանցխե-Ջավախք* անունով, որը պահպանեց իր անկախությունը մոնղոլական պետությունից և գոյատևեց մինչև XVI դ. վերջը:

### **Հարցեր և առաջադրանքներ**

1. Մահմեդական ինչ իշխանություններ առաջացան Հայաստանում:
2. Ինչպե՞ն զարգացան հայ-վրացական հարաբերությունները Դավիթ Շինարարի օրոք: Երբ և ո՞ւմ օրոք երկու երկրների միջև զինակցությունը հասավ իր գագաթնակետին: Ներկայացրե՞ք Ջաքարյանների ազատագրական պայքարի արդյունքները: Հայաստանում Ջաքարյաններից կախյալ ինչ իշխանություններ ստեղծվեցին:
3. Որտե՞ղ էին բնակվում մոնղոլական ցեղերը, երբ ստեղծվեց նրանց տերությունը: Ներկայացրե՞ք դեպի Հայաստան և Այսրկովկաս մոնղոլների արշավանքները և դրանց արդյունքները:
4. Ի՞նչ հետևանքներ ունեցավ մոնղոլական տիրապետությունը հայ ժողովրդի համար: Ձեր կարծիքով՝ ինչո՞վ էր պայմանավորված մոնղոլների սկզբնական մեղմ քաղաքականությունը Հայ եկեղեցու հանդեպ:
5. XIII դարի երկրորդ կեսին և XIV դարում հայկական ո՞ր իշխանությունները պահպանեցին իրենց դիրքերը:

## **Թեմա 3. ԿԻԼԿՅԱՆ ՀԱՅԱՍՏԱՆԸ**

### **§ 1. ՀԱՅԱԿԱՆ ՊԵՏԱԿԱՆՈՒԹՅԱՆ ԱՌԱՋԱՅՈՒՄԸ ԿԻԼԿԻԱՅՈՒՄ**

**Հայկական պետականության առաջացման նախադրյալները:** Այն տարածքը, որտեղ Բագրատունյաց թագավորության անկումից հետո առաջացավ հայկական նոր պետականություն, հայտնի է *Կիլիկիա* անվանումով: Այն Փոքր Ասիայի հարավ-արևելքում էր: Կիլիկիայի հարավում Միջերկրական ծովն էր: Հյուսիսում նրա սահմանները հասնում էին մինչև Տավրոսի լեռները, արևելքում՝ անցնում Ամանոսի (Սև) լեռներով:

Այս բնական սահմանների միջև ընկած տարածքը բաժանված է երեք մասի: Հյուսիս-արևելքը, որտեղ կան բազմաթիվ լեռնային զանգվածներ, կոչվում է *Լեռնային Կիլիկիա*: Հարավարևելյան շրջանները, որոնք հարուստ են գետահովիտներով ու դաշտավայրերով, հայտնի է *Գաշարային Կիլիկիա* անունով: Նրա հիմնական մասը ծովի մակերևույթից բարձր է մոտ 150–200 մ և աշխարհի արգավանդ դաշտավայրերից մեկն է: Քարքարոտ բլուր-

ներ ունեցող արևմտյան մասը կոչվում է **Բարուր Կիլիկիա**։

Կիլիկիայի հայկական պետության ժամանակաշրջանում հայկական աղբյուրներն այս երկիրը սովորաբար անվանել են «Հայոց աշխարհ», «Կիլիկյան Հայաստան», իսկ իաշակիր մասունագիրները՝ «Հայաստան», «Փոքր Հայք»։

Կիլիկիան՝ որպես աշխարհագրական միավոր, և Կիլիկյան Հայաստանը՝ որպես պետություն, տարածքային առումով միմյանց երբեք չեն համապատասխանել։ Ազգրնական շրջանում նորաստեղծ հայկական պետությունն ընդգրկում էր Կիլիկիայի միայն մի մասը, իսկ հետագայում իր մեջ ներառեց նաև նրանից դուրս մի շարք շրջաններ։

Հայկական լեռնաշխարհին հարող Կիլիկիան դեռևս հին ժամանակներից ծանոթ էր հայերին։ Ք.ա. I դ. Տիգրան Մեծը նվաճեց և հայկական տերությանը միացրեց Կիլիկիայի արևելյան շրջանները։ Վաղ ժամանակներից սկսած՝ հայերը բնակություն էին հաստատում Կիլիկիայում, իսկ X դ. նրանք այստեղ արդեն զգալի թիվ էին կազմում։

Կիլիկիայում և հարակից շրջաններում հաստատված հայ բնակչության ազգային-ակեղեցական խնդիրները հոգայու համար **Խաչիկ Ա կաթողիկոսը (973-992 թթ.)** X դ. վերջին Անտիոք, Տարսոն և Մուլնդա (Ուլնիա) քաղաքներում և մի շարք գավառներում եպիսկոպոսական թեմեր է հիմնադրում։

Կիլիկիայում հաստատված հայերը հիմնականում զբաղվում էին երկրագործությամբ, արհեստներով, առևտրով և լեռնային արդյունագործությամբ։ Կիլիկիայում հայկական պետականության առաջացման նախօրյակին այստեղ հաստատված հայ բնակչությունն արդեն ուներ կայուն կազմակերպված ընկերային միջավայր։

XI դ. կեսերից սկսվում է հայ բնակչության զանգվածային արտագաղթ Կապադովկիա, Կիլիկիա, Ասորիք, Հյուսիսային Միջագետք։ Դա հիմնականում կապված էր թուրք-սելջուկների ավերիչ արշավանքների և Բյուզանդիայի վարած քաղաքականության հետ։ Հայ բնակչության մի մասը, Հայաստանից արտագաղթելով, հաստատվեց Կիլիկիայում։

Իր հերթին, Բյուզանդիան Հայաստանից Կապադովկիա, Կիլիկիա, Ասորիք, Հյուսիսային Միջագետք էր տեղափոխում հիմնականում արքայական և իշխանական ընտանիքներին։ Այսպես Հայաստանից արտագաղթեց նաև Արծրունիների և Բագրատունիների մի մասը։

Հարկադրական արտագաղթի հետևանքով արդեն XI դ. երկրորդ կեսին, Եփրատ գետից արևմուտք գտնվող հայաբնակ շրջաններից բացի, հայերը մեծամասնություն էին կազմում նաև Կիլիկիայի, Կապադովկիայի, Ասորիքի և Հյուսիսային Միջագետքի մի շարք գավառներում։

Կիլիկիայում, հայերից բացի, ապրում էին նաև հույներ, ասորիներ, արաբներ, հրեաներ։ Սակայն XI դ. վերջերին Կիլիկիայի ողջ բնակչության գերակշիռ մասը հայերն էին։ Նրանք բնակվում էին և Լեոնային, և Դաշտային Կիլիկիայում։

### **Հայկական իշխանությունների առաջացումը։**

Աերը նշված շրջաններում հաստատված հայ իշխանների մի մասը ծառայության է անցնում Բյուզանդական կայսրությունում, որոշակի տարածքների կառավարումը հանձնվում էր նրանց։ Այս ճանապարհով Բյուզանդիան աշխատում էր ամրապնդել կայսրության արևելյան սահմանները, քանի որ այստեղ հաստատված հոծ հայ բնակչությունն անհրաժեշտության դեպքում կպաշտպաներ այս տարածքները թշնամիների, մասնավորապես սելջուկների հարձակումներից։ Այդ իշխաններից էր **Ապրդարիպ Արծրունին**, որը Սենեքերիմ Արծրունու հետ տեղափոխվել էր Սերաստիա։ 1042 թ. նա նշանակվեց **Կիլիկիայի կառավարիչ** (ստրատեգոս)։ Նրան էին հանձնվել Ադանա, Մսիս, Տարսոն քաղաքները և Լամբրոն ու Պապեռոն բերդերը։ Հետագայում Ապրդարիպ Արծրունին Լամբրոնը և շրջակա գյուղերը նվիրում է Գանձակից Կիլիկիա տեղափոխված Օշին իշխանին, որն ամուսնացել էր նրա աղջկա հետ։ Այսպես **Լամբրոն** ամրոցում հաստատվում է Հեթումյան իշխանական տունը։





ների դեմ: Սակայն սկսված խաչակրաց առաջին արշավանքը թշնամիների ուշադրությունը որոշ ժամանակ շեղեց Կիլիկիայից: Սա հնարավորություն տվեց հայերին ամրապնդելու և ընդարձակելու նորաստեղծ իշխանությունը:

Պաղեստինը և Ասորիքը մահմեդականներից ազատագրելու համար Արևմտյան Եվրոպայից խաչակիրները շարժվեցին դեպի Արևելք: Նրանց մի մասը անցնելու էր Կիլիկիայով: 1097 թ. խաչակիրների երկու բանակ մտավ երկիր և ձեռնամուխ եղավ Դաշտային Կիլիկիայի քաղաքների նվաճմանը: Այդ ժամանակ հայոց իշխան Կոստանդինը վերահսկում էր Տավրոսի լեռնանցքները, ուստի խաչակիրները ստիպված էին համագործակցելու նրա հետ:

Խաչակիրների հետ սկսեցին համագործակցել նաև Կիլիկիայում հաստատված մյուս հայ իշխանները, մասնավորապես Լամբրոնի տեր Օշինը և իշխան Բագունին: Սակայն խաչակիրների և հայերի փոխհարաբերությունները միշտ չէ, որ բարեկամական էին: Խաչակիրները հաճախ թալանում և ավերում էին հայկական բնակավայրերը: Նրանք բռնազավթեցին նաև հայ իշխաններին պատկառող տիրույթները Հյուսիսային Ասորիքում և Եփրատի ափերին: Դրանց թվում էին Կուրիս, Կարկառ և Պիր բերդաքաղաքները:

Մանազկերտի ձակատամարտից հետո սելջուկների մի մասը հաստատվել էր Փոքր Ասիայում և այստեղ ստեղծել իրենց պետությունը՝ Իկոնիայի սուլթանությունը: Սելջուկները և այստեղ հաստատված

թուրքմենական տարրեր ցեղեր Կիլիկիայի համար դարձան վտանգավոր հարևաններ:

Դաշտային Կիլիկիան գրավելուց հետո խաչակիրները շարժվեցին դեպի Ասորիք և Պաղեստին: 1098 թ. նրանք գրավեցին Եղեսիան և սպանեցին քաղաքի հայազգի կառավարիչ Թորոս Կուրոպալատին: Այստեղ նրանք հիմնեցին խաչակրաց առաջին պետությունը՝ **Եղեսիայի կոմսությունը**: Նույն թվականին խաչակիրները ստեղծեցին խաչակրաց երկրորդ պետությունը՝ **Ասորիքի իշխանությունը**: 1099 թ. նրանք նվաճեցին Երուսաղեմը և հիմնադրեցին խաչակրաց երրորդ պետությունը՝ **Երուսաղեմի թագավորությունը**: Հետագայում նրանք ստեղծեցին չորրորդ պետությունը՝ **Տրիպոլիի կոմսությունը**:

Եթե Իկոնիայի սուլթանության և Կիլիկյան Հայաստանի փոխհարաբերություններին սովորաբար քնորոշ էին թշնամանքը և մշտական ռազմական առձակատումը, ապա խաչակիրների հետ հարաբերություններն ավելի բարդ ու խճճված էին: Իրենց առաջին արշավանքի ընթացքում խաչակիրները գրավեցին և կործանեցին հայկական մի շարք իշխանություններ, որից հետո հայ-խաչակրաց ռազմական բախումները կապված էին Դաշտային Կիլիկիայի հետ: Սակայն խաչակրաց պետությունների թուլացմանը զուգահեռ հայ-խաչակրաց հարաբերություններում առավել գերակշռող էին դառնում դաշնակցային պարտավորությունները, քանզի մահմեդական վտանգը հավասարապես սպառնում էր նրանց գոյությանը:

### **Հարցեր և առաջադրանքներ**

1. Որտեղ է Կիլիկիան և աշխարհագրական ինչ շրջանների է բաժանվում: Կիլիկիայի քաղաքներում ու գավառներում նրբ և ինչն ստեղծվեցին եպիսկոպոսական թեմեր:
2. Ո՞ր դարում մեծացավ հայերի հոսքը դեպի Կիլիկիա, ուրիշ ինչ ժողովուրդներ էին ապրում Կիլիկիայում:
3. Ներկայացրե՞ք Կիլիկիայում հայկական պետության ստեղծման պատմական գործոնները: Ի՞նչն առիթ դարձավ Փիլարտոս Վարաժնունու հայկական իշխանության ստեղծման համար: Ուրիշ ինչ հայկական իշխանությունն ստեղծվեց:
4. Հայաստանից դուրս ստեղծված պետական կազմավորումներից ո՞րն էր ամենակենսունակը. ո՞վ և նրբ է այն հիմնադրել: Ի՞նչ հետևանքներ ունեցան խաչակրաց արշավանքները Կիլիկիայի համար:



## § 2. ԿԻԼԻԿԱՆ ՀԱՅԱՍՏԱՆԻ ԱՄՐԱՊՆԴՈՒՄԸ: ՀԱՅՈՑ

### ԹԱԳԱՎՈՐՈՒԹՅԱՆ ՎԵՐԱԿԱՆԳՆՈՒՄԸ

**Պայքար Դաշտային Կիլիկիայի համար:** Լեոնային Կիլիկիայում ձևավորված Ռուբինյան պետության հետագա գոյատևման համար կարևոր էր Դաշտային Կիլիկիայի նվաճումը: Անհրաժեշտ էր իջնել անմատչելի լեռներից ու գրավել գյուղատնտեսության համար կարևոր կենսական տարածքներ և առևտրական ճանապարհների վրայի քաղաքներ: Պետք էր նվաճել նաև Միջերկրական ծովի ափերի նավահանգիստները: Հակառակ դեպքում լեռներում ծվարած հայկական փոքրիկ պետությունը չէր կարող երկար գոյություն ունենալ: Այս խնդիրները լուծելու համար Կիլիկյան Հայաստանը պայքարի մեջ մտավ Բյուզանդիայի, խաչակիրների և սելջուկների դեմ:

Կոստանդինին հաջորդեց նրա որդի **Թորոս I-ը (1100-1129 թթ.)**, որը Կիլիկյան Հայաստանի սահմաններն ընդարձակեց դեպի հարավ: 1104 թ. Թորոսը գրավեց Միս և Անավարզա (Անաբարզա, Անարգարա) քաղաքները: Նա ամրացրեց **Անավարզան** և **դարձրեց մայրաքաղաք:** Թորոսը հայոց Գագիկ II թագավորի սպանության վրեժը լուծեց հույն Մանդալեի որդիներից: 1111 թ. նա ձերբակալեց և մահապատժի ենթարկեց երեք եղբայրներին:

1107 թ. Կիլիկիա ներխուժեցին Իկոնիայի սելջուկները: Թորոսի և Գող Վասիլի միացյալ զորքերը Բերդուսի մոտ տեղի ունեցած ձակատամարտում ծանր պարտության մատնեցին նրանց և դուրս բռնեցին երկրից:

Թորոսին հաջորդեց նրա եղբայր **Լևոն I-ը (1129-1137 թթ.)**: Նա ձեռնամուխ եղավ Դաշտային Կիլիկիայի նվաճմանը: Այստեղ հայերը բախվեցին խաչակիրների և բյուզանդացիների հետ: Խաչակիրներն առաջին արշավանքի ժամանակ Դաշտային Կիլիկիայի արևելյան շրջանները խլել էին սելջուկներից և հաստատվել այստեղ:

Լևոնը 1132 թ. բյուզանդացիներից գրավեց Մսիս, Ադանա և Տարսոն քաղաքները: Այսպիսով՝ համառ պայքարից հետո Կիլիկյան Հայաստանը կարողացավ իր

սահմանները հարավում հասցնել մինչև Միջերկրական ծով:

Բյուզանդիան չէր կարող հաշտվել Կիլիկիայի և Ասորիքի կորստի հետ, ուստի Հովհաննես Կոմնենոս կայսրը պատրաստվեց վերանվաճելու դրանք:

**1137 թ.** գարնանը բյուզանդական մի մեծ բանակ կայսեր գլխավորությամբ հայտնվեց Դաշտային Կիլիկիայում: Օգտվելով թվական գերակշռությունից՝ նրանք գրավեցին Տարսոն, Ադանա և Մսիս քաղաքները: Բյուզանդացիները մեծ դժվարությամբ կարողացան գրավել Անավարզան: Լևոնը հայկական փոքրաթիվ ուժերի հետ ամրացավ Վահկա բերդում, որի պաշտպանությունը տևեց վեց ամիս: Ի վերջո Վահկան ևս հանձնվեց: Լևոնը կնոջ և երկու որդիների՝ Ռուբենի ու Թորոսի հետ շրթայակապ տարվեց Կոստանդնուպոլիս:

Կիլիկիայում ստեղծված հայկական պետությունը մի քանի տարով դադարեց գոյություն ունենալուց:

Գերված Լևոնը մահանում է քանտուն, իսկ Ռուբենին կայսեր հրամանով մահապատժի են ենթարկում: Թորոսը կարողացել էր շահել կայսեր համակրանքը և ապրում էր արքունիքում: Օգտվելով իր կիսաազատ կարգավիճակից՝ նա փախուստի է դիմում, վերադառնում է Կիլիկիա և գլխավորում հայ ժողովրդի ազատագրական պայքարը: Նրան են միանում նաև իր երկու եղբայրները՝ **Մկեհր** և **Սրեոխանեն**, որոնք բյուզանդական արշավանքի ժամանակ Հայեպոլում էին ու խույս էին տվել գերությունից:

**Թորոս II-ը (1145-1169 թթ.)** իր շուրջը համախմբված հայկական փոքրաթիվ զորախմբի հետ պայքար սկսեց բյուզանդացիների դեմ: Մի քանի տարվա ընթացքում նա գրավեց Վահկան, Անավարզան, Մսիսը, Տարսոնը: Սակայն Բյուզանդիան չէր հաշտվում Կիլիկիան կորցնելու մտքի հետ: 1152 թ. Կիլիկիա մտավ բյուզանդական մի մեծ բանակ, որին միացան նաև Արևմտյան Կիլիկիայի հայ իշխանների տրամադրած զորքերը

և պաշարեցին Մսիս քաղաքը: Մթության քո-  
ղի տակ Թորոսը հակահարձակման անցավ  
և ջախջախեց քյուզանդական զորքերը:

Թորոս II-ը նշանակալից զործ կատա-  
րեց: Նա վերականգնեց հայկական պետու-  
թյունը և ստեղծեց 30000-անոց բանակ: Նրա  
կարևոր ձեռնարկումներից էր այն, որ օգնեց  
հայոց կաթողիկոսությանը տեղափոխվելու  
Հռոմկա քերդաքաղաք: Անիի Բագրա-  
տունյաց թագավորության անկումից հետո  
հայոց կաթողիկոսությունը մշտական նստա-  
վայր չունեւր և տեղից տեղ էր փոխվում:  
Թորոսի ջանքերով 1151 թ. այն փոխադրվեց  
*Համկլլա*, ուր մնաց մինչև 1292 թ.:

Թորոս II-ին հաջորդեց եղբայրը՝  
*Մլենը* (1169-1175 թթ.): Այդ ժամանակ Դաշ-  
տային Կիլիկիան նորից Բյուզանդիայի  
տիրապետության տակ էր: Միայն նրա  
արևելյան մի քանի շրջաններ պատկանում  
էին խաչակիրներին: Երկրի ընդարձակման  
և հետագա ամրապնդման համար անհրա-  
ժեշտ էր ծովեզրյա բոլոր շրջանները ազա-  
տագրել հույներից և խաչակիրներից: Այս  
դժվարին խնդիրն իրագործելու համար  
Մլենը դաշնակցեց Հալեպի ամիրայի հետ:  
Նա խաչակիրներից հետ վերցրեց Դաշտա-  
յին Կիլիկիայի արևելյան շրջաններում  
գտնվող քերդերը: 1173 թ. Մլենը Բյուզանդի-  
այից ազատագրեց *Արանա*, *Մսիս* և *Sup-  
սուն* քաղաքները և ծովափնյա շրջանները:

Մլենի դաշինքը մահմեդականների հետ  
ձիշտ հաշվարկած քաղաքականության  
արդյունք էր: Բազմաթիվ քրիստոնյա տի-  
րակալներ, ելնելով իրենց պետությունների  
շահերից, համագործակցել և համագոր-  
ծակցում էին մահմեդականների հետ:

Մլենը քարևկարգեց *Սիս քաղաքը* և  
1173 թ. դարձրեց *Կիլիկյան Հայաստանի  
մայրաքաղաք*: Մլենի վարած քաղաքակա-  
նությունը և իրագործած քարեփոխումները  
նպաստեցին հայոց պետության ամրա-  
պնդմանը և հզորացմանը: Սակայն նրա  
քաղաքականությունից, հատկապես իսլա-  
մական երկրների հետ գործակցելու քայ-  
լերից դժգոհ քարձրաստիճան հոգևորա-  
կանները և իշխանները դավադրություն  
կազմակերպեցին և սպանեցին նրան:

Մլենին հաջորդեց նրա եղբայր Ստե-  
փաննի որդի *Ռուբենը* (1175-1187 թթ.):  
Օգտվելով Բյուզանդիայի և Իկոնիայի սուլ-  
թանության միջև առաջացած թշնաման-  
քից՝ Ռուբենը գրավեց Կիլիկիայի արև-  
մտյան շրջանները: Այսպես Կիլիկիայում  
վերացվեցին քյուզանդական տիրապետու-  
թյան վերջին հենակետերը:

**Քաղաքական իրավիճակը Մերձա-  
վոր Արևելքում XII դ. վերջին: Թագավո-  
րության հռչակումը:** XII դ. վերջին Մեր-  
ձավոր Արևելքում տեղի ունեցան այնպիսի  
փոփոխություններ, որոնք զգալի ազդեցու-  
թյուն թողեցին Կիլիկյան Հայաստանի վրա:

Այդ ժամանակ հզորացել էր Եգիպտոսի  
Այուբյան սուլթանությունը: Սուլթան *Սալահ  
սադ Դինը* (1169-1193 թթ.) Եգիպտոսին միաց-  
րեց Ասորիքի և Պաղեստինի մի մասը և  
պայքար սկսեց խաչակիրների դեմ: 1187 թ.  
նա պարտության մատնեց խաչակիրներին  
և գրավեց Երուսաղեմը:

Իկոնիայի սելջուկյան սուլթանությունը  
նույնպես վերելք էր ապրում և իր հզորու-  
թյան գագաթնակետին էր: Նա զբաղված էր  
իր տարածքները հիմնականում Բյուզան-  
դիայի հաշվին ընդարձակելով: Իկոնիայի  
սուլթանությունը և Եգիպտոսը թշնամաբար  
էին տրամադրված Կիլիկիայի նկատմամբ:  
Լարված էին նաև Անտիոքի իշխանության և  
Կիլիկիայի փոխհարաբերությունները:

Այսպիսի իրավիճակում Կիլիկյան Հա-  
յաստանում իշխանությունն անցնում է Ռու-  
բենի եղբայր *Լևոն II-ին* (1187-1219 թթ.):  
Նրա կառավարման առաջին շրջանում  
ստեղծված միջազգային իրավիճակը քա-  
րեննպաստ էր Կիլիկիայի համար: Միրիոկե-  
ֆալոնի ճակատամարտից (1176 թ.) հետո  
Բյուզանդիան մեկընդմիշտ հրաժարվել էր  
Կիլիկիայից: Իկոնիայի սուլթանությունը  
պատրաստվում էր դիմագրավելու խաչակ-  
րաց երրորդ արշավանքին:

Երուսաղեմը գրավելուց հետո Եգիպ-  
տոսի սուլթանությունը որոշ ժամանակ  
զբաղված էր խաչակրաց տիրույթների  
նվաճումով:

Երուսաղեմը մահմեդականներից հետ





Լևոնի բերդը. Կիլիկիա

գրավելու համար 1189 թ. սկսվեց խաչակրաց երրորդ արշավանքը: Լևոն II-ը կապեր հաստատեց խաչակիրների առաջնորդներից մեկի՝ Սրբազան հռոմեական կայսրության (Գերմանիա) կայսր *Ֆրիդրիխ Շիկսմորուսի* հետ: Լևոնը խոստացավ օգնել խաչակիրներին, իսկ դրա դիմաց կայսրը համաձայնեց նրան ճանաչել Կիլիկիայի թագավոր: Սակայն կայսրը խեղդվեց Կիլիկիայի գետերից մեկում, և Լևոնի թագադրությունը հետաձգվեց:

Այդ ժամանակ Դաշտային Կիլիկիայի արևելյան շրջանների համար նորից խնդիրներ ծագեցին Անտիոքի և Կիլիկիայի միջև: Սահմանային վեճերը լուծելու պատրվակով Անտիոքի իշխան Բոհեմունը III-ը Լևոնին հրավիրեց Անտիոք: Իրականում նրա նպատակը հայոց իշխանին ձերբակալելն էր: Իմանալով այս մասին՝ Լևոնն ինքը նշանակեց հանդիպման վայրը: Խնջույքի պատրվակով նա Անտիոքի իշխանին հրավիրեց իր մոտ և ձերբակալեց: **1194 թ. Սիս քաղաքում** Լևոնի և Բոհեմունդի միջև հաշտության պայմանագիր կնքվեց: Պայմանագրի համաձայն՝ Բոհեմունդը Կիլիկիային վերադարձրեց նրանից խլված տարածքները: Սրա դիմաց առանց փրկագնի նա ազատ արձակեց Անտիոքի իշխանին: Երկու երկրների միջև բարեկամություն հաստատելու համար կողմերը որոշեցին Բոհեմունդի ավագ որդի և ժա-

նանգորդ Ռայմոնդին ամուսնացնել Լևոնի եղբայր Ռուբենի ավագ դուստր Ալիսի հետ: Ծնված արու զավակը պետք է ծառայեր Անտիոքը և Կիլիկիան: Անտիոքի և Կիլիկիայի միավորմամբ Լևոնը փորձում էր ստեղծել հայ-խաչակրաց միացյալ պետություն:

XII դ. վերջին Կիլիկյան Հայաստանը Մերձավոր Արևելքի ամենաուժեղ քրիստոնյա երկիրն էր: Արտաքին թշնամիների դեմ տարած հաղթանակները և երկրի ամրամասների ընդարձակումն ու ամրապնդումը բարձրացրին Լևոն II-ի հեղինակությունը:

Եգիպտոսի հզորացումից ու Երուսաղեմի անկումից հետո խաչակիրների վիճակը խիստ ծանրացել էր: Նրանց օգնելու գործում Արևմտյան Եվրոպան հույսեր էր կապում նաև Կիլիկյան Հայաստանի հետ: Հաշվի առնելով այս ամենը՝ Լևոնը շարունակեց քայլերն արքայական թագ ձեռք բերելու ուղղությամբ: Նա բանակցություններ սկսեց Հռոմի պապի և Սրբազան հռոմեական կայսրության կայսր Հենրիխ VI-ի հետ: Այս անգամ դրանք հաջողությամբ պսակվեցին: 1197 թ. Հենրիխ VI-ը պատվիրակության միջոցով թագ ուղարկեց Լևոնին: Նրան թագ էր ուղարկել նաև Բյուզանդիայի կայսր Ալեքսիոս III Անգելոսը:

Լևոնի թագադրության հարցով շահագրգռված էր նաև պապականությունը, որը փորձում էր Հայոց եկեղեցին ենթարկել հռոմեական կաթոլիկ եկեղեցուն:

Հայոց թագավորության վերականգնման խնդիրը Լևոնի համար այնքան կարևոր էր, որ նա համաձայնվեց առերես կատարել Հռոմի պապի պահանջները: Իրականում հայկական եկեղեցին ոչ մի զիջում չարեց կաթոլիկ եկեղեցուն:

Լևոն II-ը մեծ հանդիսավորությամբ հայոց թագավոր օծվեց **1198 թ. հունվարի 6-ին՝ Սուրբ Ծննդյան** օրը, *Տարսուն քաղաքի Մայր տաճարում*: Լևոնին թագավոր օծեց հայոց կաթողիկոս *Գրիգոր Զ Ապիրապը* (1194-1203 թթ.): Ուսումնասիրողները Լևոն II իշխանին թագավոր դառնալուց հետո այդուհետ հիշատակում են որպես Լևոն I թագավոր:

Լևոնի գահակալության տարիներին Կի-

լիկյան Հայաստանը վերելք էր ապրում: Կարևոր ձեռնարկումներից մեկը Կիլիկիայի **Լամբրոն** անառիկ բերդի գրավումն էր: Նրա նախորդները մի քանի անգամ փորձել էին գրավել այն, սակայն անհաջողության էին մատնվել: 1202 թ. նա Լամբրոնի Հերոսն իշխանին հրավիրեց Տարսոն և քանտարկեց: Դրանից հետո Լևոնն առանց կռվի գրավեց բերդը և միացրեց արքունիքին:

Աշխարհագրական դիրքի շնորհիվ Կիլիկիան առևտրական ճանապարհների խաչմերուկում էր, ուստի Լևոնը մեծ ուշադրություն էր դարձնում առևտրի զարգացմանը: Վերաշինվեցին ու քարեկարգվեցին **Այաս** ու **Կոռկոս նավահանգիստները**: Կառուցվեց ոչ միայն ռազմական, այլև առևտրական նավատորմ: Կարգավորվեց երկրի դրամական շրջանառությունը: Լևոնն արտոնություններ շնորհեց Ջենովայի, Վենետիկի և մի շարք այլ քաղաքների վաճառականներին:

Նա մեծ ուշադրություն էր դարձնում նաև մշակույթի զարգացմանը: Թագավորի հրամանով Կիլիկիայում հիմնադրվեցին տարբեր տիպի դպրոցներ: Նա արքունիք էր հրավիրում և հովանավորում գիտության և արվեստի ներկայացուցիչներին:

Լևոն I-ի թագավորության շրջանի կարևոր խնդիրներից մեկը Անտիոքի գահաժառանգության համար մղվող պայքարն էր: Երբ մահացավ Անտիոքի իշխան Ռայմոնդը, նրա և Ալիսի որդի Ռայմոնդ-Ռուբենը դարձավ Անտիոքի իշխանության ժառանգորդը: Սակայն վերջինիս դեմ դուրս



Կոռկոսի բերդը, Կիլիկիա

եկավ նրա հորեղբայր Բոհեմունդը, որը գրավեց Անտիոքը և իր ձեռքը վերցրեց իշխանությունը: Այդ ժամանակ Լևոնը որոշեց միջամտել Անտիոքի ժառանգության համար մղվող պայքարին և պաշտպանել իր ազգականի շահերը: Կիլիկիայի և Անտիոքի միջև սկսվեց երկարատև պայքար: 1216 թ. Լևոնը գրավեց Անտիոք քաղաքը և իշխանությունը հանձնեց Ռայմոնդ-Ռուբենին, որին հռչակել էր նաև Կիլիկիայի թագաժառանգ: Շուտով նրա գործունեությունից հիասթափված Լևոնը փոխեց իր որոշումը և Կիլիկիայի թագաժառանգ նշանակեց իր մանկահասակ դուստր Զաբելին:

Լևոն թագավորը հայոց պատմության մեջ մնաց որպես **Լևոն Մեծագործ** (պատմիչի խոսքերով): Ն.Վ մահացավ 1219 թ. և իր հաջորդներին թողեց հզոր մի պետություն:

### **Հարցեր և առաջադրանքներ**

1. Ներկայացրեք Լևոն I-ի գործունեության կարևոր դրվագները:
2. Ինչո՞ւ և ճի՞ր Հովհաննես Կոմնենոս կայսրը շարժվեց Արևելք: Ներկայացրեք Կիլիկիայում հայկական պետությունը վերականգնելու ընթացքը: Ի՞նչ կարևոր ձեռքբերումներ ունեցավ Կիլիկիան Թորոս II-ի օրոք:
3. Երբ է գահակալել Ալեհը: Ի՞նչ հաջողություններ ունեցավ Կիլիկիան Ալեհի օրոք:
4. Ի՞նչ իրավիճակ էր Կիլիկյան Հայաստանում XII դարի վերջին: Ի՞նչ համաձայնություն էր կայացել Լևոն II-ի և Ֆրիդրիխ Շիկամորուսի միջև: Ի՞նչ ընթացք և ավարտ ունեցավ Լևոն II-ի և Անտիոքի իշխանության միջև ծագած սահմանային վեճը:
5. Արթայական թագ ձեռք բերելու ուղղությամբ Լևոն II-ը ի՞նչ քայլեր ձեռնարկեց: Ո՞վ և ճի՞ր թագավոր օժեց Լևոնին: Ո՞րն է թագավորության հռչակման պատմական նշանակությունը:



### § 3. ԿԻԼԻԿԻԱՅԻ ՀԱՅԿԱԿԱՆ ԹԱԳԱՎՈՐՈՒԹՅՈՒՆԸ

#### XIII-XIV ԴԱՐԵՐՈՒՄ

Հեթումյան արքայատոհմի հաստատումը: Հայ-մոնղոլական դաշինքը: Լևոն I թագավորը արու գավակ չուներ և 1216 թ. արքունի խորհրդի համաձայնությամբ թագաժառանգի իրավունքները փոխանցել էր իր դուստր Զաբելին: Վերջինս անչափահաս էր, ուստի նշանակվել էին երեք խնամակալներ՝ հայոց կաթողիկոս Հովհաննես Սսեցին, Ատան պայր և Կոստանդին Գունդստարը: Շուտով Ատան պայրի սպանությունից և կաթողիկոսի մահվանից հետո Կոստանդին Գունդստարը մնաց որպես Զաբելի միակ խնամակալ: Այդ ժամանակ հայոց գահին փորձեց տիրանալ Ռայմոնդ-Ռուբենը, որին Լևոնը զրկել էր թագաժառանգի իրավունքներից: Սակայն Կոստանդին Գունդստարը կարողացավ ձերբակալել Ռայմոնդ-Ռուբենին, որն էլ քանտում գտավ իր վախճանը:

Հայոց արքունական խորհուրդը որոշեց Զաբելին ամուսնացնել Անտիոքի իշխան Բոհեմունդ IV-ի որդու՝ Ֆիլիպի հետ: Այս ձանապարհով աշխատում էին վերջ դնել Անտիոքի և Կիլիկիայի միջև շարունակվող թշնամանքին: Ֆիլիպը Կիլիկիա ժամանեց 1222 թ. և, ամուսնանալով Զաբելի հետ, հռչակվեց հայոց թագավոր: Գահը նրան հանձնվեց որոշակի պայմաններով: Նա երկիրը պետք է կառավարեր հայկական օրենքներով և հարգեր Հայոց եկեղեցու դավանանքը: Սակայն Ֆիլիպը սկսեց արհամարհել հայոց ծիսակարգը և հովանավորել խաչակիրներին: Նա արքունիքից հեռացնում էր հայ իշխաններին, կարևոր պաշտոնները հանձնում խաչակիրներին, կողոպտում էր արքունի գանձերը և դրանք ուղարկում Անտիոք: Զայրացած հայ իշխանները ձերբակալեցին նրան և քանտարկեցին: Բանտում էլ նա թունավորվեց և մահացավ:

Գահակալության խնդիրը լուծելու համար հայ ավագանին Տարսոն քաղաքում ժողով հրավիրեց: Այս անգամ որոշեցին Զաբելին ամուսնացնել Կոստանդին Գունդստարի որդի Հեթումի հետ: Այսպի-

սով՝ 1226 թ. Զաբելի և Հեթումի ամուսնությամբ վերջապես լուծվեց գահակալության խնդիրը: Հեթումը հռչակվեց հայոց թագավոր (1226-1270 թթ.), և հիմք դրվեց Հեթումյանների արքայատոհմին:

XIII դ. կեսերին Մերձավոր Արևելքում տեղի ունեցան քաղաքական նոր փոփոխություններ, որոնք կապված էին մոնղոլական արշավանքների և Եգիպտոսում մամլուքների իշխանության հաստատման հետ:

Մոնղոլական արշավանքները նոր խնդիրներ դրեցին նաև հայկական պետության առջև: Գրավելով Այսրկովկասը և Հայաստանը՝ մոնղոլական հորդաները մտան Փոքր Ասիա: 1243 թ. Չմանկատուկի ճակատամարտում նրանք ծանր պարտության մատնեցին Իկոնիայի սուլթանությանը: Կոստանդին թագավորահայրը մեկնեց մոնղոլների հրամանատար Բաչուի մոտ և առաջարկեց դաշինք կնքել: Մոնղոլներն ընդունեցին այս առաջարկը՝ պայմանով որ հայոց թագավորն անձամբ մեկնի մոնղոլների մայրաքաղաք Կարակորում:

Իր այցը Մոնղոլիա նախապատրաստելու նպատակով Հեթումն իր եղբայր Սմբատ Գունդստարին ուղարկեց Կարակորում: Մոնղոլները համաձայնեցին պահպանելու Կիլիկյան Հայաստանի անկախությունը և տարածքային ամբողջականությունը: Հայերի բարեկամությունը շահելու համար նրանք խոստացան վերադարձնել այն տարածքները, որոնք մահմեդականները խլել էին Կիլիկիայից: Մոնղոլները մասնավորապես պարտավորվեցին ռազմական օգնություն ցույց տալ Կիլիկիային Իկոնիայի սելջուկների հարձակումների ժամանակ:

Հայ-մոնղոլական դաշինքը երկու կողմերին էլ ձեռնտու էր: Մոնղոլները ծրագրել էին գրավել Ասորիքը և Պաղեստինը, ուստի վստահելի դաշնակցի կարիք ունեին: Այդպիսին կարող էր լինել քրիստոնյա Կիլիկյան Հայաստանը:

Հայ-մոնղոլական դաշինքը հաստատու-

ու համար **Հեթում I-ը 1254 թ. գարնանը** մեկնեց Կարակորում: Նույն տարվա աշնանը Հեթումը և Մանգու մեծ խանը հաստատեցին հայ-մոնղոլական դաշինքը: Երկու կողմերը պարտավորվում էին միմյանց օգնել պատերազմների ժամանակ: Հայոց նկղեցիներն ու վանքերն ազատվում էին հարկերից: Այսպես հայոց թագավորը ձգտում էր ստեղծել քրիստոնեա-մոնղոլական դաշինք ընդդեմ մահմեդականների:

**Կիլիկյան Հայաստանը մոնղոլների մամլուքների միջև:** 1259 թ. Եգիպտոսում իշխանության գլուխ են գալիս **մամլուքները**: Նրանք զնված ստրուկներ էին, որոնք ծառայում էին սուլթանի անձնական գլխորդիայում:

1259 թ. մոնղոլները ձեռնամուխ եղան Ատորիքի նվաճմանը, որին մասնակցում էին նաև հայկական զորքերը: Սակայն ռաջոդդ տարի տեղի ունեցած ճակատամարտում մամլուքները ծանր պարտության մատնեցին դաշնակիցներին: Մամլուքներին անհանգստացնում էր մոնղոլա-հայ-խաչակրաց ռազմաքաղաքական դաշինքը: Անտիոքի իշխանության վրա մի քանի արշավանքներ կազմակերպելուց հետո մամլուքները որոշեցին հարձակվել Կիլիկիայի վրա: 1266 թ. նրանք շարժվեին դեպի Կիլիկիա: Օգնության համար Հեթումը մեկնեց մոնղոլների մոտ, սակայն նրանք ժամանակին չհասան: Հայ-եգիպտական զորքերի միջև վճռական ճակատամարտը տեղի ունեցավ **1266 թ. օգոստոսի 23-ին Սև լեռների** մոտ՝ **Մառի** կոչված այրում: Փոքրաթիվ հայկական ուժերը աջաբար դիմադրեցին, բայց անհասար մարտում պարտություն կրեցին: Ռոմից նաև Հեթում I-ի որդի Թորոսը, սկսելով մյուս որդի Լևոնը գերի ընկավ: Մամլուքյան թանակներն ավերեցին ու կողոպտեցին երկիրը:

Մառիի ճակատամարտից հետո քարացավ նաև խաչակիրների վիճակը: 1268 թ. մամլուքները կարողացան գրավել Անտիոք քաղաքը: Մառիի պարտությունը և Անտիոքի անկումը վերջ դրեցին քրիստոնեա-մոն-

ղոլական դաշինք ստեղծելու Հեթումի ծրագրին: Այս պայմաններում Հեթում I-ը 1270 թ. գահը հանձնեց եգիպտական գերությունից ազատված **Լևոն II-ին** (1270-1289 թթ.):

Մամլուքների հարձակումները վերսկսվեցին 1275 թ.: Նրանք ներխուժեցին Կիլիկիա, գրավեցին և ավերեցին Մսիս քաղաքը և շրջապատեցին մայրաքաղաք Սիսը: Սակայն չկարողանալով գրավել միջնաբերդը մեծ ավարով և քազմաթիվ գերիներով վերադարձան: Լևոն II-ը ստիպված էր քանակցություններ սկսել Եգիպտոսի հետ: Վերջապես 1285 թ. տասը տարի ժամկետով զինադադար կնքվեց: Կիլիկիան պարտավորվում էր տարեկան 500 հազար թագավորական արծաթ վճարել Եգիպտոսին: Երկու կողմերը պարտավորվեցին փոխանակել ռազմագերիներին և թուլատրել երկու կողմերի առևտրականների ազատ երթևեկություն երկու պետությունների տարածքում:

1292 թ. մամլուքները պաշարեցին ու գրավեցին հայոց կաթողիկոսանիստ **Հոմկլա** քերդաքաղաքը: Սպանվեցին քազմաթիվ հոգևորականներ, իսկ մյուսները Մոսեփանոս Հոմկլայեցի կաթողիկոսի (1290-1293) հետ գերի տարվեցին: Մամլուքները թարանեցին ու ավերեցին Հոմկլայի եկեղեցիները: **Հեթում II թագավորը** (1289-1306 թթ.) հայոց կաթողիկոսությունը տեղափոխեց Սիս:

Կիլիկիայի համար ստեղծված անբարենպաստ դրությունը շարունակվեց նաև XIV դարի սկզբին: Իրավիճակն ավելի բարդացավ, քանի որ մոնղոլներն ընդունեցին մահմեդականություն, և փոխվեց նրանց վերաբերմունքը քրիստոնյաների նկատմամբ: Այսպիսով՝ մոնղոլա-մամլուքյան հակամարտությունն ի վերջո ավարտվեց մամլուքների հաղթանակով:

Ստեղծված ծանր իրավիճակից դուրս գալու համար Կիլիկյան Հայաստանը սկսեց քանակցություններ վարել Բյուզանդիայի, Արևմտյան Եվրոպայի երկրների և պապականության հետ: Օգնության դիմաց հայերը խոստանում էին որոշ զիջումներ



կատարել հունական և հռոմեակաթոլիկական եկեղեցիներին: Այս խնդիրը քննարկվեց 1307 թ. Սիս քաղաքում հրավիրված ժողովում: Այստեղ որոշեցին ընդունել Քաղկեդոնի երկարնակության դավանանքը և Հայոց եկեղեցու ծեսերի ու արարողությունների մի մասը վերափոխել և հարմարեցնել հունական ու կաթոլիկ եկեղեցիների դավանանքին: Եկեղեցիների միավորման ճանապարհով հայոց արքունիքն աշխատում էր ստեղծել քրիստոնեական երկրների դաշինք ընդդեմ մահմեդականների:

Կիլիկիայում տեղակայված մոնղոլական զորքերի հրամանատար Բիլարդուն 1307 թ. հյուրասիրության նպատակով Անավարգա հրավիրեց հայոց թագավոր Լևոն III-ին, նախկին թագավոր Հեթում II-ին և 40 հայ իշխանների ու սպանել տվեց նրանց: Հեթում II-ի մյուս եղբայր **Օշինը** կարողացավ մոնղոլներին դուրս բռնել Կիլիկիայից և երկրի կառավարումը վերցնել իր ձեռքը (1308–1320 թթ.):

Այդ ժամանակ լարված իրավիճակ ստեղծվեց նաև Կիլիկյան Հայաստանի ներքաղաքական կյանքում: Երբ Օշին թագավորը և Կոստանդին Կեսարացի կաթողիկոսը փորձեցին իրագործել Սսի ժողովի որոշումները, հանդիպեցին հայ քնակչության համառ դիմադրությանը: Մայրաքաղաքում տեղի ունեցան բողոքի ցույցեր, որոնց մասնակիցները պահանջում էին հրաժարվել Սսի ժողովի որոշումները կենսագործելուց: Եկեղեցիների միավորման հակառակորդների մի մասին ձերբակալում և արքայում են Կիպրոս կղզի, իսկ մյուսներին քանտարկում են: Բուն Հայաստանում նույնպես հրաժարվում են Սսի և Ադանայի ժողովների որոշումները կատարելուց: Իմանալով այս մասին՝ պապականությունը պահանջում է նոր ժողով հրավիրել և վերահաստատել նախորդ ժողովների որոշումներն ու դրանք իրագործել: Արևմուտքից օգնություն ստանալու ակնկալիքով Օշին թագավորն ու Կոստանդին կաթողիկոսը 1317 թ. Ադանայում նոր ժողով հրավիրեցին, որը վերահաստատեց նախորդ



Հոռուկայի համայնապատկերը և Եփրատ գետի Մեզպան վտակը

ժողովների որոշումները: Այսպես հայ հասարակության մեջ առաջացավ մի խմբավորում, որը փորձում էր Հայոց եկեղեցին միավորել քրիստոնեական մյուս եկեղեցիների հետ: Այն ստացավ **ուսիթորյունք** (միարարյունք) անվանումը: Ուսիթորյունքի և **հակաուսիթորյունքի** պայքարը խախտեց Կիլիկիայի հասարակության միասնությունը և թուլացրեց երկիրը:

**Կիլիկյան Հայաստանի թուլացումը և անկումը:** Օշին թագավորի մահից հետո գահին անցավ նրա որդի **Լևոն IV-ին** (1320–1342 թթ.): Քանի որ նա անչափահաս էր, երկիրը կառավարում էին խնամակալները:

1320 թ. մամլուքները կրկին հարձակվեցին Կիլիկիայի վրա: Նրանք պաշարեցին Սիս քաղաքը, սակայն հանդիպելով ուժեղ դիմադրության՝ չկարողացան գրավել:

1321 թ. Կիլիկիա ներխուժեցին Իկոնիայի սուլթանության տարածքում տեղակայված մոնղոլական զորքերը և թուրքմենները: Նրանց 30–հազարանոց բանակը հասավ Ադանա և Սիս: Թշնամին շուրջ մեկ ամիս շարունակ ավերում էր երկիրը: Հաջորդ տարի Կիլիկիա արշավեցին մամլուքները: Նրանց հաջողվեց գրավել **Այսս** նավահանգիստը և ավերել ցամաքային ու ծովային ամրությունները: Եգիպտոսի հետ

հաշտության պայմանագիր կնքելու համար հայոց կաթողիկոս Կոստանդին Լամբրոնացին մեկնում է Կահիրե: 1323 թ. մայիսի 31-ին կնքվում է հայ-եգիպտական հաշտության պայմանագիրը: Կիլիկիան պարտավորվում էր եգիպտոսին տարեկան վճարել 12 մլն արծաթ դիրհեմ՝ Այաս նավահանգստից, ինչպես և օտարերկրացիներին վաճառած աղից ստացված եկամուտների կեսը: Եգիպտոսը պարտավորվում էր գործերը դուրս բերել Կիլիկիայից և վերաշինել ավերված քաղաքները, բացի Այաս նավահանգստի ծովային ամրություններից:

1335 թ. մամլուքները գրավեցին ու ավերեցին Տարսոն, Ադանա, Այաս և Մսիս քաղաքները: Լևոն IV-ը 1337 թ. ստիպված եղավ ծանր պայմաններով հաշտության պայմանագիր կնքել: Կիլիկիան հարկադրված էր որոշ տարածքներ ու բերդեր զիջել միայն մամլուքներին: Պետության համար այսպիսի ծանր իրավիճակում էլ հանկարծամահ եղավ Լևոն IV-ը:

Լևոնը ժառանգներ չունեւ, ուստի արքունական խորհուրդը որոշեց գահը հանձնել նրա հորաքրոջ որդուն՝ **Գվիդոն Լուսինյանին**, որն այդ ժամանակ Բյուզանդիայում էր: Լուսինյանները ֆրանսիական ծագում ունեին և կառավարում էին Կիպրոսում: Սա քաղաքական որոշում էր, որի միջոցով փորձ էր արվում Կիլիկիայի համար ապահովելու Կիպրոսի և Արևմուտքի ռազմաքաղաքական օժանդակությունը: Սակայն Գվիդոն Լուսինյանի կառավարումը կարճ տևեց: 1344 թ. նա իր եղբայր Բոհեմունդի և 300 ֆրանկ ապետների հետ սպանվեց Ադանա քաղաքում: Արքունի խորհուրդը որոշեց թագավոր ընտրել Պաղտին Մարաջախտի որդի **Կոստանդինին** (1344–1362 թթ.): Այսպես հայոց գահին անցավ Հեթումյաններին ազակից Նորեցիներին:

1360 թ. մամլուքները վերջնականապես գրավեցին Տարսոն և Ադանա քաղաքները:

Դաշտային Կիլիկիան նվաճելուց հետո նրանք վճռեցին գրավել նաև Լեոնային Կիլիկիան: Մամլուքների 60-հազարանոց բանակը շարժվեց Լեոնային Կիլիկիա և

պաշարեց **Սիս մայրաքաղաքը**: Մարտերում իրենց կատարած քաջագործություններով աչքի ընկան Լիպարիս սպարապետը, Հեթում և Ջարմանդուխտ ամուսինները: Հեթոսական ջանքերի շնորհիվ հայերը կարողացան անտոկ պահել մայրաքաղաքը:

Գիտակցելով, որ քրիստոնյա երկրները չեն օգնելու Կիլիկիային, **Մեարուպ Արսազեցի** կաթողիկոսը (1359–1372 թթ.) 1361 թ. **Սիսում** հրավիրում է **եկեղեցական ժողով**, որը չեղյալ է հայտարարում Սսի և Ադանայի նախորդ ժողովների որոշումները:

1373 թ. հայոց գահը կրկին թափուր է մնում: Արքունի խորհուրդը որոշում է այն հանձնել Գվիդոն Լուսինյանի եղբորորդի **Լևոն V-ին** (1373–1375 թթ.), որն այդ ժամանակ Կիպրոսում էր: Նա մեծ դժվարությամբ հասնում է Սիս և օժվում հայոց թագավոր: Այդ ժամանակ հայկական թագավորությունը, բացի մայրաքաղաքից, ընդգրկում էր Անավարգա քաղաքը և մի քանի բերդեր Լեոնային Կիլիկիայում: Մամլուքները և կարամանները (թուրքմենական ցեղ) կրկին պաշարում են մայրաքաղաքը: Պաշարվածները, դրսից ոչ մի օգնություն չստանալով, հրկիզում են քաղաքը և քաշվում միջնաբերդ: Ռազմամթերքի և սննդամթերքի պակասը ստիպում է **1375 թ. սպրիլի 16-ին** հանձնել նաև միջնաբերդը: Գերայների թվում էին նաև Լևոն Լուսինյանը և իր ընտանիքը, Պողոս Սսեցի կաթողիկոսը: Նրանց հատուկ հսկողությամբ տարան Կահիրե: Սուլթանը հայոց կաթողիկոսին թույլատրեց վերադառնալ Կիլիկիա, իսկ Լևոն V-ին արգելեց թողնել Կահիրեն: Հետագայում նա ևս գերությունից ազատվեց և տեղափոխվեց Արևմտյան Եվրոպա: Հայոց վերջին թագավորը մահացավ 1393 թ. Փարիզում:

Սսի անկումից հետո Կիլիկիայում իր գործունեությունը շարունակում էր հայոց կաթողիկոսությունը:

Հայոց պետականության անկումից հետո Կիլիկիայում դեռ երկար ժամանակ իրենց գոյությունը պահպանում էին մեծ թվով հայ իշխանական տներ:

Սակայն նեղվելով կարամանների և



մամլութենի միջև անընդհատ պատերազմներից ու ծանր հարկերից՝ Կիլիկիայի հայ բնակչության և իշխանների մի մասը

ստիպված հեռացավ հայրենիքից: Նրանք հիմնականում հաստատվեցին Կիպրոսում, Իտալիայում, Ֆրանսիայում:

### **Հարցեր և առաջադրանքներ**

1. Երբ է գահակալել Հերոմ I-ը: Ինչպե՞ս Հերոմյաններն ամրապնդեցին թագավորական իշխանությունը Կիլիկիայում:
2. Քաղաքական ինչ փոփոխություններ կատարվեցին Մերձավոր Արևելքում XIII դարի կեսերին: Երբ և ինչ պայմաններով կնքվեց հայ-մոնղոլական դաշինքը:
3. Ներկայացրե՞ք Կիլիկիայի և մամլութենի միջև 1266 թ. սկսված պատերազմի ընթացքը և հետևանքները: Ի՞նչ հետևանքներ ունեցավ մամլութենի կողմից 1292 թ. Հոռուկյա քերդաքաղաքի գրավումը:
4. Ի՞նչ իրավիճակ էր Կիլիկիայում XIV դարի սկզբին: Ի՞նչո՞ւ առաջացավ ունիթորական (միարարական) խմբավորումը. ինչ հետևանք դա ունեցավ:
5. Ի՞նչ ընթացք և արդյունքներ ունեցավ արտաքին թշնամու դեմ պայքարը XIV դ. առաջին կեսին:
6. Ի՞նչ որոշում կայացրեց Սսի 1361 թ. եկեղեցական ժողովը: Հիմնավորե՞ք այդ որոշման անհրաժեշտությունը: Ի՞նչ ձևկատագիր ունեցավ Կիլիկիայի վերջին թագավոր Լևոն V-ը:

## **§ 4. ԿԻԼԻԿՅԱՆ ՀԱՅԱՍՏԱՆԻ ԸՆԿԵՐԱՅԻՆ-ՏՆՏԵՍԱԿԱՆ ՀԱՐԱԲԵՐՈՒԹՅՈՒՆՆԵՐԸ ԵՎ ՊԵՏԱԿԱՆ ԿԱՐԳԸ**

**Հողատիրության տիպերը:** Գյուղական համայնքը: Կիլիկիայի բարենպաստ բնակլիմայական պայմանները հնարավորություն էին տալիս զբաղվելու երկրագործությամբ և անասնապահությամբ: Երկրագործության բնագավառում առաջնակարգ տեղ ունեին հացահատիկային րույսերի մշակումը և այգեգործությունը: Դաշտային Կիլիկիայի որոշ շրջաններում մշակում էին նաև մերձարևադարձային մի քանի քուսատեսակներ:

Անասնապահությունը հատկապես զարգացած էր Լեոնային Կիլիկիայում: Այստեղ պահում էին ձիեր, ջորիներ, խոշոր ու մանր եղջերավոր անասուններ և ընտանի թռչուններ: Անասնապահության մեջ առավել զարգացած էր ձիաբուծությունը: Կիլիկիայից արտահանում էին ձիեր, ջորիներ, կաշի, բուրդ:

Ընկերային-տնտեսական հարաբերությունները Կիլիկյան Հայաստանում ավելի բարդ ձևեր ընդունեցին, քան դրանք գոյություն ունեին քուն Հայաստանում: Մինչև

Ռուբինյան իշխանության հաստատումն այստեղ բնակվում էին մեծ թվով հույն և հայ իշխաններ: Հետագայում Կիլիկիայում հաստատվում են նաև խաչակիրներ, որոնք ռազմական ծառայության դիմաց հողեր էին ստանում: Ստեղծված պայմաններում Կիլիկյան Հայաստանում ձևավորվում էին *հողապիրության մի քանի տիպեր՝ արքունական, իշխանական, վանքապարկան, համայնական:*

Թագավորին պատկանող հողերը, քաղաքները, բերդերը կոչվում էին թագավորական կամ արքունի: Կիլիկյան Հայաստանում, ինչպես և Երուսաղեմի ու Կիպրոսի խաչակրաց թագավորություններում արքունի տիրույթները պատկանում էին ոչ միայն թագավորին, այլև արքայական ընտանիքի բոլոր անդամներին:

Կիլիկիայում հաստատված իշխանների մի մասն ուներ որոշակի տարածքներ, որոնց տիրում էին ժառանգաբար՝ մասնավոր սեփականության իրավունքով: Այս տարածքները կոչվում էին *հայրենիք*, իսկ սրանց տերերը՝ հայրենատեր-բերդատե-

րներ: Խոշոր հայրենատերերի թիվը Կիլիկիայում XII դ. վերջին հասնում էր 45-ի, իսկ հետագայում նվազում է:

Թագավորը և հայրենատեր-քերդատերերը որոշակի պայմանով, մասնավորապես զինվորական ծառայության դիմաց առանձին մարդկանց հողեր էին տրամադրում: Այս հողերը ժառանգաբար էին անցնում, բայց միևնույն ժամանակ պայմանական էին, քանզի ստացողի սեփականությունը չէին և պայմաններից որևէ մեկի խախտման դեպքում հետ էին վերցվում:

Կիլիկիայում կար շուրջ 150 վանք ու եկեղեցի, որոնք ունեին հսկայական չափերի հասնող հողատարածքներ: Վանքապատկան հողատիրությունը հիմնականում առաջանում էր գնման և նվիրատվությունների հաշվին: Կիլիկիայի հայ թագավորներն ու իշխանները ևս բազմաթիվ հողային նվիրատվություններ էին կատարում հոգուտ եկեղեցու:

Կիլիկիայում գոյություն ուներ նաև համայնական հողատիրություն: Համայնքին պատկանող հողերի մի մասը որոշակի պայմաններով գյուղացիներին տրվում էր օգտագործման համար: Տնամերձ հողերը համարվում էին գյուղացիների սեփականությունը:

Միջնադարի հասարակության կազմակերպման առանձնահատկություններից մեկն այն էր, որ յուրաքանչյուր մարդ ներկայանում էր որպես որևէ խմբի անդամ: Մարդը հասարակական կյանքին մասնակցում էր այն խմբի միջոցով, որին ինքը պատկանում էր:

**Գյուղական քնակության կազմակերպման էվոլյուցիոն ձևը համայնքն էր:** Որպես համայնք սովորաբար հանդես էր գալիս մեկ գյուղը: Սակայն երբեմն մեկ համայնքի մեջ մտնում էին մի քանի գյուղեր: Գյուղացին հասարակության մեջ ներկայանում էր համայնքի միջոցով: Համայնքն ընկերային, հարկային, ռազմավարական ու թեմական միավոր էր և կարգավորում էր գյուղացու հարաբերությունները պետության, հողատիրոջ և եկեղեցու հետ: Նա կարգավորում էր նաև գյուղի քնակիչների փոխհարաբերությունները միմյանց հետ:

Գյուղական համայնքը որոշակի ինքնավարությամբ օժտված վարչական միավոր էր: Գյուղի ներքին կյանքի հետ կապված խնդիրները տնօրինում էր համայնքը: Դրանք էին հարկերի և ռազմական պարտավորությունների բաշխումն ըստ ընտանիքների և հողաբաժանությունը: Համայնքի կարևոր խնդիրները լուծելու համար հրավիրում էին համայնքի անդամների ժողով, որն ընտրում էր նաև գյուղի տանուտեր:

Յուրաքանչյուր համայնք ուներ իր եկեղեցին կամ մատուռը, որը նվիրված էր լինում գյուղը հովանավորող որևէ սրբի: Գյուղական եկեղեցին զբաղվում էր համայնքի հոգևոր խնդիրներով: Նա էր տնօրինում ծննդյան, հարսանիքի, թաղման և գյուղում կատարվող այլ արարողությունները: Սովորաբար եկեղեցուն կից կար դպրոց, ուր գյուղի երեխաները սովորում էին գրել, կարդալ, հաշվել, երգել:

**Արհեստները, առևտուրը, քաղաքները:** Արհեստագործության զարգացմանը խթանում էին բազմատեսակ հումքի և օգտակար հանածոների առկայությունը և ներքին ու արտաքին առևտրի աճը:

Կիլիկիան Արևելք-Արևմուտք ցամաքային և ծովային տարանցիկ առևտրական ճանապարհների խաչմերուկում էր: Միջերկրական ծովի նավահանգիստները տարանցիկ առևտրի համար շատ հարմար դիրք ունեին:

Քաղաքների զարգացման համար որոշակի էր նաև խաչակրաց արշավանքների դերը, քանի որ դրանք միջազգային առևտրական հարաբերությունների աշխուժացման խթան էին:

Կիլիկիան Հայաստանի քաղաքային կյանքի աշխուժացման և առևտրի զարգացման համար մեծ նշանակություն ունեցավ մոնղոլական կայսրության ստեղծումը, որը ձգվում էր Չինաստանից մինչև Միջերկրական և Սև ծովերը: Մոնղոլական տերության տարածքով անցնող առևտրական ճանապարհների մի մասն ավարտվում էր մոնղոլների դաշնակից Կիլիկիայում: Այստեղի նավահանգիստներից էլ





Այափի ծովային ամրոցը

սկսվում էր ծովային առևտրական ուղին դեպի Եվրոպա:

Կիլիկյան Հայաստանի նշանավոր քաղաքներից էին Միսր, Տարսուսը, Այաք, Մախը, Կոռիկուսը, Ադանան, Անավարզան: Բոլոր քաղաքները ներառված էին արքունական տիրույթների մեջ և կոչվում էին **թագավորական քաղաքներ**: Սրանք կառավարում էին թագավորի նշանակած հատուկ պաշտոնյաները՝ **կապիտանները**:

Կիլիկյան Հայաստանը միջազգային առևտրին մասնակցում էր գյուղատնտեսական և արհեստագործական ապրանքներով: Երկրից արտահանում էին երկաթ, շինափայտ, կաշի, բուրդ, ձիեր, հացահատիկ, աղ: Առևտրի զարգացմանը նպաստում էին հայոց թագավորների կողմից եվրոպացի վաճառականներին տրված առևտրական արտոնությունները: Այսպես՝ 1201 թ. արտոնություններ ստացան ջնևվացիները, 1271 թ.՝ վենետիկցիները, իսկ 1335 թ.՝ ֆլորենցիացիները:

Քաղաքային քնակչության մի մասը զբաղվում էր արհեստագործությամբ: Արհեստավորները ստեղծում էին իրենց կազմակերպությունները՝ **համքարությունները** (եղբայրություն): Քաղաքի սահմաններում մինևույն մասնագիտության արհեստավորները միավորվում էին մեկ համքարության մեջ:

Արհեստի և առևտրի զարգացման համար խիստ կարևոր էր նաև դրամաշրջանառության կազմակերպումը: Դրամների թողարկումը սկսվել էր դեռևս Ռուբինյան

իշխանության շրջանում և շարունակվել մինչև պետության կործանումը: Հիմնական դրամական միավորը արծաթե դրամն էր: Կային նաև պղնձե դրամներ: Արծաթե դրամը, որը կոչվում էր թագավորական, օգտագործել են նաև այլ երկրներում:

**Արքունիքը և բանակը:** Պետության կառավարման գլխավոր մարմինն արքունիքն էր: Նրա մեջ մտնում էին **արքունի խորհուրդը, քարձրագույն դաբալյան արքանը և գործակալությունները**:

Արքունիքի գլուխ սկզբում կանգնած էր իշխանաց իշխանը, իսկ 1198 թվից՝ հայոց թագավորը: Նրանք էին պատերազմ հայտարարում, հաշտություն և դաշինք կնքում, քաղաքներ և ամրոցներ հիմնադրում, դրամներ հատում և լուծում գահաժառանգության խնդիրը:

Երկրի կառավարումը թագավորն իրականացնում էր գործակալությունների միջոցով: Նրանք տասից ավելի էին: Գործակալությունների մի մասը նման էր Հայաստանում ստեղծված կենտրոնական կառավարման մարմիններին, իսկ մյուսները նոր էին:

Թագավորության հոշակույմից հենտ վերականգնվեց նաև **թագադիր** գործակալությունը: Հանդիսությունների ժամանակ նա էր թագ դնում թագավորի գլխին, կապում արքայական նշանները, հետևում նաև արքունի կարգ ու կանոնի պահպանմանը:

**Խնամակալության** (պալլության) գործակալությունը զոյություն ուներ դեռևս իշխանության շրջանում: Գործակալը կոչվում էր պալլ: Նա թագավորի առաջին խորհրդականն էր, իսկ արքայի բացակայության դեպքում փոխարինում էր նրան: Թագավորի անչափահասության դեպքում պալլը իրականացնում էր ոչ միայն նրա, այլև ամբողջ երկրի խնամակալությունը:

Կենտրոնական կառավարման համակարգում մեծ էր արքունի պալատի կառավարչի՝ **սենեակալի** դերը: Նա էր տնօրինում արքունի եկամուտները և ծախսերը:

Գործակալությունների մեջ բավական ազդեցիկ տեղ էր զբաղեցնում **արքունի քարպուղարությունը**, որի գլխավոր պաշ-

տնյան կոչվում էր **կանցկիր**: Նա էր դեկավարում բանակցություններն օտար նրկրների ներկայացուցիչների հետ: Սովորաբար այս պաշտոնը տրվում էր Սսի արքեպիսկոպոսին կամ կրթված և լեզուներ իմացող այլ հոգևորականի: 1260–1289 թթ. այն զբաղեցնում էր ոչ թե Սսի արքեպիսկոպոսը, այլ **Վահրամ Բարունի** վարդապետը, որը նաև փիլիսոփա էր:

Պետության գինված ուժերը կազմակերպելու և ղեկավարելու համար ստեղծվել էր երեք գործակալություն՝ **սպարապետություն, սպասարարություն և մարաջախարություն**: Սպարապետին Կիլիկիայում հաճախ անվանում էին նաև **զունդարար**: Նա բանակի ընդհանուր հրամանատարն էր: Սպարապետությունը Կիլիկիայում չի եղել որևէ իշխանական տան ժառանգական պաշտոնը: Այդ պաշտոնին, որպես կանոն, նշանակում էին առավել բանիմաց և ունակ զորահրամանատարների: Բանակում մեծ էր արքունական հեծելազորի հրամանատարի սպասալարի դերը: Բանակի սպառազինությանը և պարենի մատակարարումը զբաղվում էր մարաջախտությունը, որի ղեկավարը կոչվում էր մարաջախտ: Նա սպարապետի անմիջական տեղակալն էր:

Կիլիկիայի հայկական պետությունն իր գոյատևման ամբողջ ընթացքում միշտ պատերազմների մեջ էր, ուստի կանոնավոր և ուժեղ բանակ ունենալն անհրաժեշտություն էր: Մշտական բանակի կազմալրացումը սկսվեց դեռևս Ռուբինյան առաջին իշխանների օրոք:

Հայոց թագավորների և իշխանների դեռ Կապադովկիա, Կիլիկիա և Հյուսիսային Միջագետք էր տեղափոխվում նաև արանց ռազմական ուժերի մի մասը: Հայ իշխանների մի մասը, Բյուզանդիայից ստանձնելով սահմանամերձ շրջանների և շերդերի պաշտպանությունը, ստեղծում էր մշտական և մարտունակ բանակ: Ռուբինյան իշխանության առաջացումից հետո հայոց իշխանների զորքերն անհրաժեշտության դեպքում ներառվում էին պետության բանակի կազմում: Կիլիկյան Հայաստանի բանակում հատուկ տեղ էին զբա-

ղեցնում հոգևոր-ասպետական միաբանությունների զորքերը: Ջինվորական ծառայության դիմաց սովորաբար Կիլիկիայի սահմանամերձ շրջաններում նրանց տալիս էին քերդեր և հողատիրույթներ: Այսպես՝ **Տիվանդակնանների միաբանությունը** ստացած տիրույթների դիմաց պարտավորվել էր ամեն տարի տրամադրել 400 հեծյալ ռազմիկ:

Պատերազմների ժամանակ գյուղացիներից և քաղաքացիներից հավաքագրվում էր նաև **աշխարհագոր**:

Կանոնավոր բանակի հիմնական կորիզը հեծելազորն էր: Կիլիկիայում ևս սահմանվել էր **սապկերի (ձիավորի)** աստիճանը: Այն ստանալու համար անհրաժեշտ էր քննություն հանձնել ձիավարժությունից, նետաձգությունից, նիզակի և սրի գործածությունից և գինվորականի համար անհրաժեշտ այլ գիտելիքներից ու հմտություններից:

Մշտական բանակ պահելու համար Կիլիկյան Հայաստանում ևս մտցվեց ռազմական հարկ: **Պապերազմի ժամանակ Կիլիկյան Հայաստանը կարող էր ռազմարաշար դուրս բերել 80–100 հազար զինվոր**:

Հայոց բանակում մեծ տեղ ուներ նաև **ռազմական նավագործը**: Առանց նրա օգնության անհնար էր պաշտպանել պետության ծովային սահմանները: Այն անհրաժեշտ էր նաև ծովային առևտրի անվտանգությունն ապահովելու համար: Ռազմական նավատորմի համար կառուցվել էին ծովային հատուկ ամրություններ: Դրանց մեջ հատկապես մեծ էր Այասի և Կոռիկոսի ծովային բերդերի նշանակությունը:

**Դատական համակարգը**: Մինչև հայկական պետականության առաջացումը Կիլիկիան Բյուզանդիայի կազմում էր և կառավարվում էր կայսրության իրավանորմերով: Հայկական պետականության հաստատումից հետո էլ այստեղ մեծ թվով հույներ էին ապրում, որոնց հասարակական-քաղաքական կյանքը որոշ ժամանակ դեռևս կարգավորվում էր հունա-բյուզանդական իրավունքով: Կիլիկիայում քնակություն էին հաստատել նաև մեծ թվով արևմտաեվրո-



պացիներ՝ խաչակիրներ, որոնք այստեղ էին բերել իրենց օրենսդրությունը:

Մինչև հայկական պետության ստեղծումը Կիլիկիան բաղկացած էր առանձին իշխանություններից, ուստի դատական կենտրոնական մարմիններ և համապետական օրենսդրություն չունեին: Յուրաքանչյուր իշխանություն ուներ սեփական դատարան, որը համարվում էր այդ շրջանի բարձրագույն դատական մարմինը: Բացի իշխանական դատարաններից, տեղական դատական մարմինների դեր կատարում էին նաև եկեղեցական դատարանները, որոնք առաջնորդվում էին կանոնական իրավունքով: Սակայն կանոնական իրավանորմերը բավարար չէին հասարակական ողջ կյանքը կարգավորելու համար, ուստի **Տարսուհի սպրեպիսկոպոս Ներսես Լամբրոնացին** հունարենից թարգմանում է հունա-բյուզանդական իրավունքի մի շարք երկեր: Հայկական պետականության ամրապնդմանը զուգահեռ անհրաժեշտ էր այս բոլորը միավորել և ստեղծել միասնական, համապետական օրենսդրություն: Այս խնդիրը լուծեց Հեթում I թագավորի նշանավոր **Սմբար սպարապետը**: Նրա կազմած «**Դատարանաագիրքը**» միավորեց հայկական, հունական և խաչակրաց իրավանորմերը և հարմարեցրեց Կիլիկիայում ձևավորված պայմաններին:

Կիլիկյան Հայաստանի դատարաններում օգտագործել են նաև Անտիոքի իշխանությունում ստեղծված «**Անտիոքի ասիգներ**» օրենսգիրքը:

Գոյություն ունեին հետևյալ դատարանները. **արքունի, Սսի արքեպիսկոպոսական, արտին կամ փոքր, եկեղեցական**:

Արքունի դատարանը՝ որպես դատական բարձրագույն մարմին, քննում էր պետական նշանակության կարևորագույն գործերը: Դրանց թվում էին՝ իշխանների միջև ծագած վեճեր, գահաժառանգության, հայրենիքի դավաճանության, թագավորի դեմ կազմակերպված դավադրության և այլ խնդիրներ: Արքունի դատարանի նախագահը թագավորն էր, իսկ նրա քաջակալության ղեկավար՝ իշխանաց իշխանը:

Իր նշանակությամբ կարևոր տեղ էր զբաղեցնում Սսի արքեպիսկոպոսական դատարանը: Այստեղ հիմնականում քննում էին բարձրաստիճան հոգևորականներին վերաբերող գործերը, քրիստոնյաների և այլադավանների միջև առաջացած վեճերի հարցերը: Սսի արքեպիսկոպոսական դատարանը նախագահում էր Սսի արքեպիսկոպոսը:

Ստորին կամ փոքր դատարանները քաղաքներում և գավառներում էին ու քննում էին տեղական նշանակություն ունեցող տարաբնույթ հանցագործություններ և իրավախախտումներ:

Եկեղեցական դատարանները Կիլիկիայում ևս պահպանվեցին: Այստեղ հիմնականում քննում էին ամուսնական հավատարմության, ամուսնալուծության, կենցաղային իրավախախտումների, եկեղեցական հարկերի մուծման կարգի խախտման և այլ գործեր: Այսպիսով՝ **Կիլիկյան Հայաստանում արեղծվել էր ճյուղավորված և լայն կազմակերպված դատական համակարգ**:

### Հարցեր և առաջադրանքներ

1. Տնտեսության հնչ ճյուղեր էին զարգացած Կիլիկիայում: Հողատիրության հնչ տեսակներ էին ձևավորվել: Ո՞րն էր գյուղական բնակչության կազմակերպման հիմնական ձևը:
2. Ի՞նչն էր նպաստում արհեստագործության զարգացմանը: Թվարկեք Կիլիկիայի նշանավոր քաղաքները, ինչո՞ւ էին դրանք կոչվում թագավորական, և ու՞րքն էին կառավարում:
3. Առևտուրը զարգացնելու միտված հնչ քայլեր ձեռնարկեցին հայոց թագավորները:
4. Ներկայացրեք գործակալությունները և նրանց գործառույթները:
5. Ո՞վ էր ասպետը (ձիավորը), ինչպե՞ս էին դառնում ասպետ: Ի՞նչ միջոցների հաշվին էր պահվում մշտական բանակը, որքան էր նրա թիվը պատերազմի ժամանակ:
6. Ներկայացրեք Կիլիկյան հայոց թագավորության դատական համակարգը:

**Թեմա 1. ԿՈՐՈՒՍՏՆԵՐԻ ԵՎ ՎԵՐԱԿԱՆԳՆՈՒՄԻ  
ՃԱՍՆԱԿԱԾՐՁԱՆ (XV դ.–XVII դ. առաջին կես)**

**§ 1. ՀԱՅԱՍՏԱՆԸ XV ԴԱՐՈՒՄ**

**Օտար տիրապետության հետևանքները:** Հայոց անկախ պետականության կորուստը և Հայաստանում օտար տիրապետության հաստատումը ծանր հետևանքներ ունեցան հայ բնակչության բոլոր խավերի կյանքում:

Սեփականության իրավունքի, դատատանի ու դատավարության քնազավառում հայոց ազգային համակարգի կազմալուծումը և հայկական միջավայրում օտար համակարգի պարտադրումը գործուն լծակ դարձան նվաճողների կողմից հայ իրականության մեջ ներթափանցելու, հայ հասարակությունը պառակտելու և օտար լծի դեմ հասարակական դիմադրությունը ջլատելու համար:

Օտար տիրապետության հաստատումը *հանգեցրեց հայ ախարարների՝ հողի սեփականության խափումների կոդաքսին* ու դրանով պայմանավորված՝ նաև *հայրենիքի գաղափարի թուլացմանը*: Օտար դավանանքի վրա խարսխված կառավարման համակարգի ներդրումը, հողի սեփականության իրավունքի անցումն արևելյան բոնատիրության հարափոփոխ իշխանությանը, քոչվորական ցեղախմբերի ներհուսքը Հայաստան միանգամայն անհուսալի և անպաշտպան էին դարձնում անձի ու գույքի որևէ երաշխիք, նպաստում բնակչության ունեզրկմանը և սեփական բնակավայրերը լքելուն:

Պետականության կորուստն ու օտար տիրապետության հաստատումը խոշոր հարված էին կրթամշակութային համակարգին: Չնայած առանձին անհատների գործադրած ջանքերին, Հայաստանի և գաղթաշխարհի տարբեր վայրերում կրթական կենտրոնների ստեղծմանը՝ քաղաքա-

կան ու տնտեսական անկայուն իրավիճակը հնարավորություն չէր տալիս կրթական միասնական գործընթաց ապահովելու բուն Հայաստանում, որն իր հերթին *խոչընդոտում էր հայ հասարակության քաղաքակրթական լիարժեք զարգացմանը*:

Չնայած ստեղծված ծանր պայմաններին՝ հայ բնակչության հիմնական զանգվածը, կառչած մնալով հայրենի ավանդների պահպանման ու զարգացման խնդիրներին, մասնակից է եղել ժամանակի գիտակրթական ոլորտում կատարված հայտնագործություններին ու առաջընթացին, շարունակել իր գոյապայքարը, պահպանել ազգային-քաղաքակրթական դիմագիծը և ուղիներ փնտրել սեփական հայրենիքում վերականգնելու անկախ պետականությունը և ունենալու արժանապատիվ ապագա:

**Պայքար վաչկատուն ցեղերի դեմ:** Հայոց պետականության անկումից հետո օտար ցեղերի ներհուսքը Հայաստան տեղի է ունեցել հայ բնակչության զինված ուժեղ դիմադրության պայմաններում: Այդ մասին, պատմական սկզբնաղբյուրներում եղած տեղեկություններից բացի, ցայտուն վկայություններ են նաև հաղթանակի հասնելու դեպքերում օտարների կողմից տեղի բնակչության նկատմամբ իրականացված դաժանություններն ու հաշվեհարդարները:

XIV դ. վերջին Հայաստանը ենթարկվեց *Լենկ Թեմուրի*, XV դ.՝ *թուրքմենական սկ-կոյունլու* և *կարա-կոյունլու* ցեղերի ասպատակություններին: XV–XVII դարերից պահպանված սկզբնաղբյուրներն արձանագրել են օտար ներխուժումների դեմ հայոց պայքարի շատ դրվագներ: Տեղացի-





Մայր տաճար Ա: Էջմիածինը, ժամանակակից տեսքը ների համառ դիմադրություն ցուցաբերելու վերաբերյալ հաղորդումներ են թողել նաև արշավաձեռքների ժամանակ օտար քանակներին ուղեկցող և իրենց քանակների հաղթանակների մասին պատմող թուրք և օտարազգի այլ պատմիչներ (Էվլիա Չելեբի և այլք):

Սեփական ռազմական ուժերի աստիճանական նվազումը և ունեցած հնարավորությունները համախմբելու ու կենտրոնացնելու դժվարությունները հայ քաղաքական գործիչներին հարկադրել է օտար բռնակալներից Հայաստանն ազատագրելու նպատակով համագործակցել դրանց դեմ պատերազմող այլ պետությունների հետ:

1453 թ.՝ Բյուզանդիայի կործանումից հետո, *Օսմանյան կայսրությունը վերածվեց Հայաստանի ազատագրության հիմնական ապստնալիքի ու խոչընդոտի*: Այդ է պատճառը, որ եվրոպական երկրների ու Հռոմի պապի կողմից արդեն իսկ XV դարի երկրորդ կեսին ծրագրվող հակաօսմանյան դաշինքների մեջ, ի թիվս արևելյան այլ իշխանությունների ու ժողովուրդների (Պարս-

կաստան, Վրաստան և այլք), ընդգրկված էր նաև Հայաստանի կառավարիչը:

**Ամենայն հայոց կաթողիկոսության վերահաստատումը Ա. Էջմիածնում:** Կիլիկիայում թագավորական իշխանության վերացումից հետո այնտեղ գտնվող կաթողիկոսական Աթոռը մնաց անպաշտպան: Կտրված լինելով բուն Հայաստանից՝ այն չէր կարող լիարժեքորեն իրականացնել իր համահայկական դերակատարումը: Կաթողիկոսական Աթոռն Էջմիածին փոխադրելու անհրաժեշտությունը դառնում էր Հայ եկեղեցու շատ գործիչների մտահոգության առարկան:

Հայ հոգևորականության ներկայացուցիչները մի քանի անգամ դիմեցին Գրիգոր կաթողիկոսին՝ առաջարկելով իր նստավայրը Սսից փոխադրել Էջմիածին, սակայն մերժում ստացան: Ուստի կաթողիկոսական Աթոռի փոխադրման կողմնակիցները վճռեցին հրավեր ուղարկել հայ քարձրաստիճան հոգևորականներին՝ հավաքվելու և որոշելու կաթողիկոսության հարցը:

*1441 թ. Թովմա Մեծոփեցու և Հովհաննես*

**Հերոննագու նահապետությանը Էջմիածնում գումարվում է մեծ ժողով**, որին մասնակցում են Հայոց եկեղեցու շատ ներկայացուցիչներ և հարցին տալիս են դրական լուծում: Այրարատյան նահանգի կառավարիչ Յաղուբ բեկը, որ կատարում էր Ջիանշահի կարգադրությունը, նպաստավոր պայմաններ է ստեղծում ժողովականների համար: Էջմիածնում ժողովականները կաթողիկոս են ընտրում **Կիրակոս Վիրապեցուն**:

Այդ իրադարձությունը հայ բնակչությանը մեծ հուսադրություն, ոգևորություն և ցնծություն է պատճառում: Վաղուց ի վեր համագային նման զանգվածային միջոցառման կարող ժողովուրդն այդ փաստն ընկալում է որպես թագավորության վերականգնմանը հավասարագոր իրադարձություն:

Այսպիսով՝ շուրջ հազարամյա ընդմիջումից հետո **Էջմիածինը կրկին դառնում է Հայոց կաթողիկոսության նստավայրը**: Էջմիածնի կաթողիկոսության վերականգնումն ավելի է բարձրացնում Այրարատյան աշխարհի ազգային-քաղաքական դերը և կարևոր նշանակություն ունենում բուն հայրենիքում հայ ժողովրդի հետագա համախմբման համար:

**Հայոց եկեղեցու նվիրապետական աթոռները**: Էջմիածնի Ամենայն հայոց կաթողիկոսարանն իր գործունեությունն իրականացնում էր Հայաստանում և հարակից երկրներում հիմնադրված եկեղեցական կառույցների միջոցով և նրանց օժանդակությամբ:

XII դ. սկզբից Հայոց եկեղեցու նվիրապետական հզոր կառույցներից մեկը **Աթանարի կաթողիկոսությունն** էր: Այն կարգավորում էր հիմնականում Վասպուրականի հայ բնակչության հոգևոր կյանքը:

Հայոց եկեղեցու կարևոր թեմերից էր **Երուսաղեմի հայոց պարրիապոսությունը**: Այն մեծ դեր էր խաղում Մերձավոր Արևելքում հայ ժողովրդի կրոնական ու աշխարհիկ կյանքը կարգավորելու գործում:

**Աղվանից** կոչվող **եկեղեցին** միավորում էր Այսրկովկասի արևելյան հատվածի ու հայկական Արցախ և Ուտիք նահանգների քրիստոնյա հայ բնակչությանը: XIV դարի վերջերից Աղվանից եկեղեցու կաթողիկոսանիստ կենտրոն դարձավ **Գանձասարի վանքը**, և Աղվանից կաթողիկոսությունը սկսեց անվանվել նաև **Գանձասարի կաթողիկոսություն**: Այն ենթարկվում էր Էջմիածնի Ամենայն հայոց կաթողիկոսությանը:

Օսմանյան թուրքերի կողմից Կոստանդնուպոլիսը գրավվելուց հետո այնտեղ 1461 թ. հիմնադրվում է **հայոց պարրիապոսություն**, որը պետք է տնօրիներ Օսմանյան պետության հայ համայնքի հոգևոր կյանքը: Պատրիարքը հաստատվում էր սուլթանի հրովարտակով:

Էջմիածնում Մայր Աթոռի վերահաստատումից հետո **Կիլիկիայի կաթողիկոսությունը** շարունակեց իր գոյությունը: Նրա իրավասության ներքո էր միայն շրջակա տարածքների հայ բնակչության հոգևոր առաջնորդությունը:

**Հայրեր և առաջադրանքներ**

1. Ինչպիսին էր վիճակը Հայաստանում օտար տիրապետության շրջանում: Ներկայացրե՞ք անկախ պետականության կորստի բացասական հետևանքները:
2. Ինչու էին հայ գործիչները փորձում Հայաստանը նվաճած բռնակալների դեմ պայքարում համագործակցել այլ պետությունների հետ:
3. Ինչու Կիլիկիայի կաթողիկոսությունն այլևս ի վիճակի չէր իրականացնելու իր համահայկական դերակատարումը: Երբ և ո՞ր ժողովում որոշվեց վերականգնել Էջմիածնի կաթողիկոսական Աթոռը: Հայ ժողովրդի համար ինչ նշանակություն ուներ այդ իրադարձությունը: 1441 թ. ո՞վ ընտրվեց Ամենայն հայոց կաթողիկոս:
4. Ներկայացրե՞ք Հայոց եկեղեցու նվիրապետական աթոռները ու չմիջնադարում:



## § 2. ՀԱՅԱՍՏԱՆԸ XVI ԴԱՐՈՒՄ ԵՎ XVII ԴԱՐԻ ԱՌԱՋԻՆ ԿԵՍԻՆ

### **Քաղաքական դրությունը Մերձավոր Արևելքում XVI դարի սկզբին:**

XVI դարի սկզբին թուրքմենական ցեղախմբերի տիրապետությանը Հայաստանում փոխարինելու եկան օսմանյան և սեֆյան հակամարտող պետությունների ծանր ու ավերիչ նոր ժամանակները: Կասպից ծովից հարավ-արևմուտք՝ Իրանի Արդեբիլ քաղաքում էր շեյխ Սեֆիի հիմնադրած կրոնական համայնքը: Հոգևոր-նազմական այդ համայնքը ձեռնամուխ եղավ նվաճումների միջոցով հողային նոր տիրույթներ ձեռք բերելուն: Այլ-կոյունլուներին պարտության մատնելուց և նրանց մայրաքաղաք **Թավրիզը** գրավելուց հետո **Սեֆյանները հիմնադրեցին** իրենց պետությունը, այնուհետև գրավեցին նաև Շիրվանը, ամբողջ Իրանը, Հայաստանը և հասան մինչև Բաղդադ:

Փոքր Ասիայի արևմտյան մասում **1299 թ. հիմնադրվեց Օսմանյան պետությունը:** Օգտվելով Բյուզանդիայի թուլացումից՝ օսմաններն աստիճանաբար գրավեցին նորանոր տարածքներ: 1453 թ. նրանք գրավեցին Բյուզանդիայի մայրաքաղաքը և տիրացան կայսրության ողջ տարածքին: Օսմանները գրավեցին Տրապիզոնի կայսրությունը, Կիլիկիան, ամբողջ Բալկանյան թերակղզին, Փոքր Ասիան՝ ասեղծելով ընդարձակ կայսրություն: Իրանից հետո սկիզբ առան թուրք-պարսկական պատերազմները՝ Հայաստանում և Մերձավոր Արևելքում գերիշխանություն հաստատելու նպատակով:

### **Հայաստանը և թուրք-պարսկական պատերազմները:**

Օսմանյան սուլթան Սելիմ Ահեղը **1512 թ.** մեծ զորքով արշավեց դեպի արևելք՝ կասեցնելու Սեֆյանների հաղթարշավը: Չալդրանի ճակատամարտում պարտության մատնելով սեֆյան շահ Իսմայիլին՝ նա գրավեց Թավրիզը և այնտեղից մեծ թվով զերիններ՝ հիմնականում արհեստավորներ, փոխադրեց Կ. Պոլիս: Շուտով շահ Իսմայիլը կարողանում է հավաքագրել խոշոր քանակ և թուրքերին դուրս բջել Իրա-

նից: Հետագա տարիներին պատերազմական գործողությունները շարունակվում են փոփոխակի հաջողություններով:

Պատերազմական իրադարձություններն ընթանում էին հիմնականում Հայաստանի տարածքում: Ավերվում էին հայկական քաղաքներն ու գյուղերը, քայքայվում էր տնտեսությունը, գերեվարվում՝ քնակչությունը: Այդ պատերազմների ժամանակ ավելի մեծ թվով թուրքական ու քրդական ցեղախմբեր հնարավորություն ստացան ներթափանցելու Հայաստան՝ քնակվելով բարեբեր երկրամասերում:

1550 թ. պարսիկները խոշոր քանակով արշավեցին Օսմանյան կայսրության դեմ: Այս անգամ ևս պատերազմի թատերաբեմը Հայաստանն էր: Պարսիկները որոշել էին ամայացնել այն բոլոր տարածքները, որտեղով թուրքական զորքերը կարող էին շարժվել Իրանի դեմ: Նրանց քանակն ավերակների վերածեց Հայաստանի թուրքերի ճանապարհին ընկած գրեթե բոլոր քնակավայրերն ու ցանքատարածությունները:

**1555 թ. Ամասիայում** Օսմանյան և Սեֆյան տերությունների միջև կնքվեց **հաշտության պայմանագիր:** Պայմանագրի համաձայն՝ պատերազմական գործողությունները դադարեցվում էին: Թուրք-պարսկական սահմանագիծն անցնում էր Հայաստանի տարածքով՝ այն բաժանելով երկու մասի: Արևմտյան մասն անցնում էր Օսմանյան կայսրությանը, իսկ Արևելյան Հայաստանում իրենց տիրապետությունն էին հաստատում Սեֆյանները: Կնքված հաշտությունը, սակայն, կարճատև էր:

Շուտով օսմանյան քանակները կրկին արշավեցին Իրանի տիրապետության ներքո գտնվող Այսրկովկաս և գրավեցին հսկայական տարածքներ: Իրանը չկարողացավ լուրջ դիմադրություն կազմակերպել օսմանցիների դեմ, և գահ բարձրացան շահ Աբաս I-ը (1587-1629 թթ.) շտապեց 1590 թ. հաշտություն կնքելու օսմանցիներին՝ նրանց զիջելով գրաված բոլոր տարածքները, այդ թվում՝ Այսրկովկասն ու





Ատրպատականը: Շահ Աբասը, սակայն, մտադիր չէր հրաժարվելու հետագա պայքարից, ուստի խաղաղության ժամանակահատվածն օգտագործեց նոր բանակ կազմավորելու, երկրի տնտեսությունը կարգավորելու և ապագա պատերազմական գործողությունների համար դաշնակիցներ որոնելու նպատակով: Շահ Աբասն առևտրական ու դիվանագիտական հարաբերություններ հաստատեց Ռուսաստանի ու արևմտեվրոպական երկրների հետ, անգլիական սպաների ու վարպետների օգնությամբ վերակազմեց ու վերագինեց պարսկական բանակը: Ձուլվեցին թնդանոթներ: Եվրոպական երկրներն իրենց հերթին օգնում և հրահրում էին շահ Աբասին Օսմանյան պետության դեմ պատերազմի: XVII դարի սկզբին օսմանյան արքունիքում սկսվել էին երկպառակություններ, գահակալական պայքար, երկրում ծավալվում էին գյուղացիական ու զինվորական ապստամբություններ:

**1603 թ. շահ Աբասը**, փորձելով օգտագործել հարմար առիթը, ձեռնամուխ եղավ օսմաններին զիջած տարածքների վերագրավմանը: Խոշոր բանակով նա հարձակվեց Թավրիզի վրա և գրավեց այն: Անցնելով Արաքս գետը՝ շահը մտավ **Ջուղա**, այնուհետև գրավեց **Նախիջևանը** և պաշարեց **Երևանի բերդը**: Օսմանյան բանակի գլխավոր ուժերը, փակվելով Երևանի բերդում, երկար դիմադրում են պարսիկներին: Երևանի բերդի վրա հարձակումների ժամանակ շահ Աբասը ճակատամարտի առաջին շարքեր է քշում հայ բնակչությանը. հայերին պարտադրում են խրամատներ փորել, հողե պատնեշներ կանգնեցնել և այլն: Իրանի բանակի սնունդը ևս ապահովվում էր հայ բնակչությունից վերցված պարենով: Ինն ամիս դիմադրելուց հետո Երևանի բերդը հանձնվում է պարսիկների ողորմաձությանը:

**Հայ բնակչության բռնագաղթը:** 1604 թ. թուրքական սուլթանը նոր բանակ ուղարկեց շահ Աբասի դեմ: Խուսափելով օսմանյան բանակի հետ ընդհարվելուց՝

շահ Աբասը վճռեց ամայացնել նրա ճանապարհին ընկած բնակավայրերը՝ բնակչությանը փոխադրելով Իրանի խորքերը: Դրանով օսմանյան բանակը կզրկվեր պարենից, օթևանի հնարավորությունից և այլևս չէր կարողանա շարունակել արշավանքը: Բռնագաղթի միջոցով որակյալ երկրագործներ ու արհեստավորներ փոխադրելով ու բնակեցնելով Իրանի ներքին գավառներում՝ շահ Աբասը հույս ուներ զարկ տալու իր երկրի տնտեսության զարգացմանը: Միաժամանակ հայ վաճառականությանը փոխադրելով Իրանի հարավային նահանգներ՝ նա որոշել էր հյուսիսային մասերում զարգացած մետաքսի առևտուրը փոխադրել դեպի Պարսից ծոցի շրջան, որից Օսմանյան պետությունը մեծ վնաս կկրեր:

**Հայ բնակչության տեղահանությունը սկսվեց 1604 թ. օգոստոսին:** Հրամայված էր իրդեհել րոլոր գյուղերը, շեները, խոտի և հացաբույսերի դեզերը: Գաղթեցվում էր **մոտ 300 հազար բնակչություն:** Տեղահանությունից զերծ մնացին Հայաստանի այն նահանգների բնակիչները, որոնք հեռու էին օսմանյան արշավանքի երթուղուց: Հայ բնակչությունը բազմիցս փորձեց չենթարկվել գաղթի հրամանին կամ խույս տալ գաղթից: Սակայն ամենուրեք նման քայլերն ավարտվում էին դաժան պատժամիջոցներով: Պարսկական զորքը հաշվեհարդար տեսավ Գառնի գյուղի նկատմամբ, որի բնակիչները փորձել էին ընդդիմանալ գաղթի հրամանին:

Լուր ստանալով, որ օսմանյան բանակը արդեն մտել է Արարատյան դաշտ՝ շահ Աբասը հրամայում է գաղթեցվող բնակչությանը արագորեն փոխադրել Արաքսի աջ ափը: Գետանցման ժամանակ մեծ թվով բնակչություն խեղդվում է ջրում: Հայերը բնակեցվում են Իրանի տարբեր նահանգներում: **Սպահանի մոտ** Ջուղայի բնակիչները շուտով հիմնում են **Նոր Ջուղա** բնակավայրը:

1605 թ. Արարատյան դաշտ ներխուժած օսմանյան բանակը, չհամարձակվելով հետապնդել պարսիկներին, նախընտրում է

ձևերն անցկացնել վասպուրականում: 1606 թ. վճռական ձևակառուցումը պարտություն կրելով՝ օսմանյան կողմը համաձայնում է հաշտության պայմանագրի ստորագրմանը, որով վերահաստատվում է Ամասիայի պայմանագրով նախատեսված սահմանագիծը, և Արարատյան դաշտն ու Հայաստանի հյուսիսային նահանգները կրկին անցնում են Իրանի գերիշխանության ներքո:

Թուրք-պարսկական պատերազմներն ավարտվում են 1638 թ., երբ օսմանյան քանակը գրավում է *Քաղղաղը*, որից հետո հաշտություն են առաջարկում պարսիկները: 1639 թ. Օսմանյան կայսրության և Սեֆյան Իրանի միջև կնքված *Կասրե-Շիրինի պայմանագրով*՝ Հայաստանը կրկին վերաբաժանվում է երկու ախոյան տերությունների միջև: Այդ սահմանագիծը քիչ փոփոխություններով պահպանվում է մինչև XIX դ. սկիզբը:

### Հարցեր և առաջադրանքներ


1. Երբ և որտեղ առաջացան Օսմանյան և Սեֆյան պետությունները:
2. Ներկայացրեք XVI դարում տեղի ունեցած թուրք-պարսկական պատերազմների հետևանքները Հայաստանի համար: Երբ կնքվեց Ամասիայի պայմանագիրը և ինչ էր նախատեսում:
3. Ինչո՞ւ 1590 թ. պայմանագրով շահ Արասն օսմանցիներին զիջեց գրաված տարածքները: Երբ շահ Արասը սկսեց զիջած տարածքների վերագրավումը:
4. Ինչո՞ւ շահ Արասը կազմակերպեց հայ ժողովրդի բռնագաղթը: Իրանի ո՞ր նահանգներում բնակեցվեց Հայաստանից տեղահանված բնակչությունը: Երբ ավարտվեցին թուրք-իրանական պատերազմները:

## § 3. ՀԱՅԱՍՏԱՆԻ ԱԶԱՏԱԳՐՈՒԹՅԱՆ ՀԱՄԱՐ ՊԱՅՔԱՐԻ ԱՇԽՈՒԺԱՅՈՒՄԸ

**Ազատագրական լեզունը:** Արևելյան ժողովուրդները սելջուկյան իշխանությունների հարձակումներին դիմակայելու գործում օժանդակություն ստանալու ակնկալիքով էին հետևում խաչակրաց արշավանքների ընթացքին ու հետագա ծավալմանը: Հայրենիքում պետականությունը կորցրած այ ժողովրդին Արևմուտքի հետ համագործակցության մղելու նպատակով լայնորեն քարոզվում էր օտար տիրապետության ծից հայոց հնարավոր փրկության գաղափարը արևմտանվորպական քրիստոնեա թագավորների՝ Ֆրանկների միջոցով: Ավելին՝ հայ ժողովրդին կաթոլիկության մղումն անհրաժեշտությունը և անխուսափելիությունը ներշնչելու նպատակով ստեղծվեցին *«ավանդազրույցներ»*, թե՛ հառոց պետականության վերականգնումն արևմտյան երկրների և մասնավորապես

Հռոմի օժանդակությամբ արդեն իսկ վաղ-միջնադարյան իրենց *«Տեսիլներում»* կանխատեսել-գուշակել էին Հայոց եկեղեցու խոշորագույն դեմքեր Սր Գրիգոր Լուսավորիչը, Սր Ներսես Մեծը, Սր Սահակ Պարթևը և ուրիշներ: Այդ քարոզչությունը հաջողություններ արձանագրեց Կիլիկիայում և բուն Մեծ Հայքում ոչ միայն XIII–XIV դարերում, այլև, ներառելով լրացուցիչ նոր երանգավորումներ, շարունակեց լայնորեն տարածում ստանալ հայ բնակչության մեջ նաև XV–XVII դարերում: Արևմտանվորպական երկրներում ազգային կենտրոնացված պետությունների առաջացումն ու հզորացումը և միաժամանակ պարսկա-օսմանյան լծի ներքո հայ ժողովրդի շահագործման ուժեղացումը նպաստավոր հանգամանքներ էին արևմտանվորպական երկրների օժանդակու-





Աղթամարի Վ. Խաչ եկեղեցին

թյամբ հայոց ազատագրությունն ակնկալելու համար: Արևմտանվորպական քարոզչամեթոդական լայնորեն նպաստում էր այդ գաղափարների տարածմանը՝ գաղութային քաղաքականությունն ընդլայնելու, Արևելքում իր ազդեցությունը մեծացնելու նպատակով:

**Հայոց թագավորության վերականգնման փորձը Աղթամարում:** XIII-XIV դարերում մոնղոլ-թաթարական պետության թուլացման ու այնուհետև XIV դ. վերջին՝ Լենկ Թեմուրի արշավանքների ժամանակաշրջանում, օգտվելով հայոց պետականության րացակայությունից, քոչվորական շատ ցեղեր էին ներթափանցում Հայաստան՝ ավերածությունների ու կողոպուտի ենթարկելով հայկական քնակավայրերն ու իշխանական կալվածքները: Թյուրքական ու քրդական այդ ցեղերի մի մասը մշտական քնակություն էր հաստատում Հայաստանում: Հայկական առանձին իշխանական տների կողմից նրանց դեմ կազմակերպված պայքարի ծավալումը համակարգված ու արդյունավետ չէր, քանի որ առանձին իշխանական տները ևս այդ պայքարի ընթացքում աստիճանաբար թուլանում էին կամ դադարում գոյություն ունենալուց:

Հայաստան մուտք գործած ցեղախմբերն անզիջում պայքար էին ծավալել

միմյանց դեմ՝ փորձելով ամրապնդել իրենց տիրապետությունը երկրում: Նրանք միաժամանակ ստիպված էին լինում համագործակցելու հայ իշխանական տների հետ, ճանաչելու նրանց հողային սեփականատիրական իրավունքները և իրենց ներկայացնելու որպես «*Հայաստանի թագավոր*» (Շահ-ի Արման): Այդպիսի քաղաքականություն էին վարում կարա-կոյունլուների առաջնորդներ *Կարա-Յուսուֆը, Իսթանդար Կարա-կոյունլուն* և այլք: Թեմուրյանների հաջորդների դեմ պայքարում կարա-կոյունլուների հիմնական հենարանը, այնուամենայնիվ, մնում էր հայ քնակչությունը: «Շահ-ի Արման» Իսթանդար Կարա-կոյունլուի մահից հետո գահն անցնում է նրա եղբորը՝ *Ջահանշահին* (1437-1467 թթ.): Ջահանշահը ևս շարունակում է զգալի չափով ապավինել հայ քնակչության օժանդակությանը, ուստի և նպաստում է հայոց կաթողիկոսարանի վերահաստատմանը Էջմիածնում: Քոչվորական ցեղախմբերի միջև ռազմական ընդհարումների ու արշավանքների ընթացքում, սակայն, մեծապես տուժում էր հիմնականում հայ քնակչությունը, ավերվում ու կողոպտվում էին հայկական քնակավայրերը:

Հայոց պետականության վերականգնման ձգտումը կենդանի էր հայ իշխանական տների շտապիղների մոտ: Ջահանշահի կառավարման ժամանակաշրջա-

նում Գեղամա երկրի, Վայոց ձորի, Արցախի, Սյունիքի, Գուգարքի և մի շարք այլ գավառների հայ իշխանական տների ներկայացուցիչները վերականգնեցին իրենց իշխանություններն ու վարչական կառավարումը և սկսեցին կոչվել **մելիքներ: երևանը՝** որպես կուսակալության կենտրոն, սկսեց արագորեն վերելք ապրել: Պատահական չէ, որ Աղթամարի կաթողիկոսական գահին տիրած և իրենց Արծրունյաց թագավորական տոհմից սերած համարող **Զաքարիա և Սրբիսաննոս Աղթամարցի կաթողիկոսները** հավակնում էին ոչ միայն Ամենայն հայոց կաթողիկոսի գահին, այլև փորձում էին վերականգնել հայոց թագավորությունը Վասպուրականում: **1465 թ. Աղթամարի Սուրբ Խաչ եկեղեցում** հանդիսավորությամբ **հայոց թագավոր է օծվում** կաթողիկոսի եղբորորդին՝ **Սմբատ Արծրունին:**

Ռազմաքաղաքական իրավիճակը Հայաստանում, որը վերածվել էր աշխարհավեր ուժերի բախման թատերաբեմի, թեև անհնար էր դարձնում նորահռչակ թագավորության ամրապնդման հետագա գործընթացը, սակայն նրա կարճատև զոյությունն իսկ փաստում էր հայ քնակչության կենսունակությունն ու կարևոր դերակատարումը սեփական հայրենիքում:

**Հայաստանի ազատագրության պայքարի նոր փուլի սկզբնավորումը:** Հայաստանը թեև երկար ժամանակ զրկվել էր ազգային պետականությունից, սակայն ազատության հասնելու նրա ձգտումը հայ ժողովրդի մեջ չէր մարել: Հայ ժողովրդի ծանր վիճակը XVI դարում հարկադրում էր ժամանակի հայ գործիչներին ելք որոնելու Հայաստանի ազատագրության համար: Սեփական ուժերի անբավարարության և հակառակորդների հզորության պայմաններում անհնար էր եղած ուժերով ձեռնարկել այդ ծրագրի իրագործումը: Այս է պատճառը, որ սկսվում է դաշնակիցների որոնումը: Հայ գործիչներին հույս էր ներշնչում այն փաստը, որ Հայաստանի զգալի մասը նվաճած օսմանցիները, գրա-

ված լինելով նաև Բալկանյան երկրները, սպառնալիք էին դարձել եվրոպական խոշոր պետություններին:

**1547 թ. Էջմիածնում Սրբիսաննոս Սպանարեցի կաթողիկոսը** հրավիրում է գաղտնի խորհրդակցություն, որտեղ որոշվում է իր գլխավորությամբ պատվիրակություն ուղարկել Եվրոպա: Պատվիրակության խնդիրն էր եվրոպական երկրների հետ բանակցություններ վարել՝ օսմանցիների դեմ համատեղ պայքար կազմակերպելու նպատակով: **1549 թ. պատվիրակությունը մեկնում է Եվրոպա, այցելում Վենետիկ, Հռոմ, Գերմանիա, լինում է Լեհաստանում և, առանց որևէ հաջողության, 1551 թ. վերադառնում Էջմիածին:**

**Միքայել Սեբաստացի կաթողիկոսը Սեբաստիա քաղաքում** գումարած եկեղեցական գաղտնի ժողովի անունից **1562 թ. Արգար** դպիր **Թոխատեցու** ղեկավարությամբ պատվիրակություն է ուղարկում Վենետիկ: Պատվիրակության ինքնակալությունն ընդգծելու նպատակով Արգար դպիրը և նրա որդի Սուլթանշահը ներկայացվում են որպես արքայական ծագում ունեցող անձնավորություններ: Արգար Թոխատեցու գլխավորած պատվիրակության նպատակն էր եվրոպական պետություններին համոզել, որ օգնեն հայերին ազատագրվելու օսմանյան տիրապետությունից: Չնայած երկարամյա դիվանագիտական ջանքերին՝ պատվիրակությունը չի հասնում իր նպատակին:

**Արցախի և Սյունիքի մելիքությունները, Ջեյթունի իշխանությունը:** Օտար նվաճողները մշտապես ձգտել են ոչնչացնել երկրի հայկական իշխանությունները: Հայ իշխանական տների որոշ ներկայացուցիչներ, չդիմանալով օտար նվաճողների ճնշումներին, արտագաղթել են Հայաստանից: Հայ կալվածատերերի զգալի մասը սեփական կալվածքներն ու տիրույթների մնացորդները փրկելու նպատակով կամովին հանձնել են եկեղեցուն, և իրենք ընդունելով հոգևոր կոչումներ, շարունակել են տիրել իրենց կալվածքներին: Այդպիսի-



ներին անվանել են *պարունքեր*: Չնայած դաժան պայմաններին հայկական իշխանությունների մի մասն այնուամենայնիվ կարողացել է գոյատևել, ինքնապաշտպանության համար նպաստավոր լեռնային երկրամասերում պահպանել իր տիրապետությունը: Երբ անհնար է եղել դիմադրությունը, հայ ավատատերերից ոմանք հպատակվել են նվաճողներին և շարունակել իրենց գոյությունը:

Արևելյան Հայաստանում այդպիսի մի շարք իշխանություններ կային *Սյունիք* և *Արցախ* նահանգներում: Հայտնի էին *Խաչենի*, *Վարանդայի*, *Ջրաբերդի*, *Դիզակի*, *Սյունիքի* և *Գեղանու* երկրի մի շարք իշխանություններ, որոնք անվանվել են *մելիքություններ*, իսկ նրանց գլուխ կանգնած իշխանները՝ մելիքներ:

Մելիքությունները եղել են ժառանգական: Մահացած մելիքին փոխարինել է ավագ որդին, որին հաստատում էր շահը: Նրանք ունեցել են իրենց գործը, իշխանությունը կենտրոնացած է եղել մելիքի ձեռքում: Ջորահրամանատարներ նշանակվում էին մելիքական տոհմի կրտսեր ներկայացուցիչները, որոնք կոչվում էին բեկ, հարյուրապետ (յուզբաշի), հազարապետ: Դատավարության իրավունքը պատկանում էր մելիքին: Դատավարության համար հատուկ օրենսգիրք չկար, մելիքներն առաջնորդվում էին սովորության իրավունքով: Նրանք վճռական դեր էին խաղում նաև հոգևոր գործերում: Մելիքները պարտավոր էին շահական գանձարան մուծել տարեկան

հարկի այն քանակը, որ որոշված էր արքունիքի կողմից: Նրանք պարտավոր էին իրենց տիրապետության սահմաններում ձնշել խոովարարներին, պատերազմի ժամանակ իրենց զորքերով ներկայանալ շահին, պաշտպանել երկրի սահմաններն օտար հարձակումներից: Մելիքները նաև խոշոր կալվածատերեր էին: Նրանք ունեին հողային ընդարձակ տիրույթներ, որոնց եկամտորամբողջությամբ պատկանում էր իրենց:

Արևմտյան Հայաստանում հայ ավատատերերի մանր իշխանություններն իրենց գոյությունը պահպանել էին *Ճազարսուն*, *Սասունում*, *Ջեյթունում*, *Մոկսում* և այլն:

Հայոց պատմության մեջ իր առանձնահատուկ տեղն ունի *Ջեյթունը*: Ջեյթունի հայերը չենթարկվեցին Օսմանյան տերությանը, նրանք քաջարար պաշտպանում էին իրենց անկախությունը: XVII դ. առաջին կեսին միայն գեյթունցիները պարտավորվեցին օսմանյան իշխանություններին վճարել տարեկան որոշակի հարկ՝ պահպանելով իրենց ներքին ինքնուրույնությունը: Հայկական ինքնավար այդ իշխանությունները հետագայում խոշոր դեր են խաղացել թուրքական և իրանական տիրապետության դեմ մղած ազատագրական պայքարում: *Դրանք հայկական պեղսականության բեկորներն էին*:

*Նշանակում է՝ միջնադարի ողջ ընթացքում հայոց պետականությունն իսպառ չէր վերացել և հանդես էր գալիս գանազան դրսևորումներով՝ մելիքությունների, կիսանկախ իշխանությունների, լեռնային համայնքների և այլ ձևերով:*

### Հարցեր և առաջադրանքներ

1. Ներկայացրե՞ք հայ ազատագրական լեգենդը և դրա նշանակությունը:
2. Ձեր կարծիքով՝ ինչո՞ւ արդյունավետ չէր Հայաստան ներթափանցած քոչվորական ցեղերի դեմ պայքարը: Ի՞նչո՞ւ կարա-կոյունլուներին հաջողվեց ամրապնդել իրենց դիրքերը Հայաստանում:
3. Երբ և որտե՞ղ փորձ կատարվեց վերականգնելու հայոց պետականությունը:
4. 1547 թ. Էջմիածնի գաղտնի խորհրդակցությունն ի՞նչ որոշում կայացրեց: Ի՞նչ նպատակով Եվրոպա մեկնեց Աբգար դպիր Թոխատեցու պատվիրակությունը:
5. Ովքե՞ր էին կոչվում պարոնտեր: Կառավարման ի՞նչ ձև էր գործում հայկական մելիքություններում: Թվարկե՞ք Հայաստանում պահպանված հայկական կիսանկախ իշխանությունները: Նրանցից ո՞րն էր ամենակենսունակը:

## Թեմա 2. ՀԱՅԿԱԿԱՆ ԳԱՂԹԱՎԱՅՐԵՐԸ XV–XVII ԳԱՐԵՐՈՒՄ

### § 1. ՀԱՅԿԱԿԱՆ ԳԱՂԹԱՎԱՅՐԵՐԻ ԱՌԱՋԱՅՈՒՄԸ: ԵՎՐՈՊԱՅԻ ԵՎ ԱՍԻԱՅԻ ՀԱՐԱՅՆՔՆԵՐԸ

**Ընդհանուր բնութագիր:** Հայկական գաղութների առաջացումը հայ ժողովրդի պատմական զարգացման առանձնահատկություններից է: Հարուստ անցյալ ունեցող ժողովուրդներից շատերին է բաժին ընկել օտար երկրներում գաղութներ ունենալու ճակատագիրը:

**Գաղութ, գաղթավայր կամ գաղթօջախ** հասկացության տակ պատմագիտությունն ընդունում է օտար երկրներում բնակություն հաստատած այն զանգվածներին, որոնք նոր միջավայրում ստեղծում են իրենց **համայնքը**: Նրանք ստանում են **ինքնավարության, պահպանում մայրենի լեզուն, ազգային սովորություններն ու դավանանքը**: Այսինքն, երբ այդ զանգվածներն օտար շրջապատում չեն կորցնում ազգային նկարագիրը և իրենց հատկանիշներով ու համախումբ կյանքով առանձնանում են տեղի ժողովուրդներից: Գաղութի առաջացման կարևոր հատկանիշներից է **ազգային դպրոցի ու եկեղեցու առկայությունը**: Սովորաբար գաղութ կամ գաղթավայր են անվանվում ինքնավարություն կամ այլ առանձնաշնորհում ստացած և պետության կողմից ճանաչված օտար ազգային միավորները: Այդ հատկանիշներից գուրկ, բայց ազգային նկարագիրը պահպանող համախումբ ապրող զանգվածները, որպես կանոն, կոչվում են «համայնք»:

Հայկական գաղթավայրերի ընդհանուր պատմությունը բաժանվում է **երեք փուլերի**: **Միջին դարեր**, երբ գաղութները, որպես կանոն, օգտվում են ինքնավարությունից և ապրում ինքնամիոփ կյանքով: **Նոր շրջան**, երբ ազատ շուկայական հարաբերությունների զարգացման հետևանքով վերանում են գաղութների ինքնարավ կյանքն ու առանձնաշնորհումները: Դրա փոխարեն նոր շրջանում հիմնվում են ազգային-բարեգործական հաստատություններ, մշա-

կութային, կրթական այնպիսի օջախներ, որոնք արգասավորում են հայկական գաղութների ազգային կյանքը:

**Երրորդ փուլը**, երբ Առաջին համաշխարհային պատերազմի ժամանակ Մեծ եղեռնի հետևանքով աշխարհով մեկ ցրված հայությունը ստեղծում է հայկական Սփյուռքը:

Հայկական գաղթավայրերում պահպանվել են հայ գիրն ու գրականությունը, հայկական բարքերն ու սովորությունները, ազգային մշակույթի ավանդները, այլ խոսքով՝ **հայ ինքնությունը**: Հատկանշական է, որ հայ առաջին տպագիր գիրքը, հայկական առաջին պարբերականը ծնունդ են առել բուն երկրից դուրս՝ Եվրոպայի և Ասիայի հայկական գաղթօջախներում:

Գաղթավայրերը կապված են եղել մայր հայրենիքի հետ, ապրել են նրա պատմական ճակատագրով: Մյուս կողմից՝ գաղթավայրերում հայ զանգվածները շփվել են տվյալ երկրների ժողովուրդների հետ, հայ մշակույթը ներառել է այդ ժողովուրդների ազդեցությունը, փոխադարձաբար ազդել նրանց վրա:

Հայկական գաղթօջախները մեծապես նպաստել են տարբեր ժողովուրդների փոխըմբռնմանն ու համագործակցությանը: Հետևաբար **գաղթավայրերի պարմությունը հայ ժողովրդի ամբողջական պարմության անքակտելի մասն է**: Մյուս կողմից՝ այն մեր ժողովրդի պատմական կապերի դրսևորման ցայտուն արտահայտությունն է:

Հայկական գաղութները գոյատևման տարբեր կյանք են ունեցել: Նրանց մի մասը վերելք է ապրել միջնադարում, հետագայում թուլացել, մարել է: Որոշ գաղութների աշխույժ կյանքն ընթացել է նոր շրջանում: Կան նաև գաղութներ, որոնք ձևավորվել են միջնադարում, բայց իրենց գոյությունը պահպանում են մինչև այժմ:



**Ղրիմ:** Այս թերակղզում հայերը մշտական բնակություն են հաստատել դեռ XI դարից: Հետագայում՝ հատկապես XIII–XIV դդ., մոնղոլական արշավանքների և տիրապետության հետևանքով ստվար հայ բնակչություն է տեղափոխվում Ղրիմ: Հայերը բնակվում էին Կաֆայում (Թեոդոսիա), Սուրխաթում (Հին Ղրիմ), Ալմեչիթում (Սիմֆերոպոլ), Կեոզլովում (Եվպատորիա), Օրբազարում (Արմյանսկ) և այլ քաղաքներում ու մի շարք գուտ հայկական գյուղերում:

Հայերի թիվն այնքան է աճում, որ նրանք թաթարներից հետո բնակչության քանակով զբաղեցնում էին երկրորդ տեղը, իսկ առանձին դեպքերում՝ կազմում բացարձակ մեծամասնություն: Բավական է հիշատակել, որ **XV դ. Կաֆա քաղաքի 70 հազար բնակչից 46 հազարը հայեր էին:** Իգուր չէ, որ թերակղզու հարավարևելյան շրջանը հաճախ անվանվում էր **Մոխյահն Հայասրան:**

Ղրիմի քաղաքները խոշոր դեր են խաղացել Արևելքի և Արևմուտքի առևտրում: Հայ վաճառականների ձեռքին էր թաթարական շրջաններում կատարվող առևտրի մենաշնորհը: Ղրիմահայերը մասնակցում էին մերձսևծովյան շրջանների, ինչպես նաև Կովկասի և Հայաստանի հետ կատարվող առևտրին: Առևտրի գլխավոր ուղիներից մեկն էլ ձգվում էր դեպի Կ. Պոլիս, որտեղից ձյուղավորվում էր դեպի արևելյան երկրներ և Արևմտյան Եվրոպա: Հայերի առևտրական գործունեության մեջ նշանակալից էր ռուսական շրջանների, մասնավորապես Մոսկվայի հետ տարվող առևտուրը:

Օսմանյան պետության կողմից 1475 թ. Ղրիմի գրավումից հետո հայ բնակչության նկատելի հատվածներ արտագաղթեցին, սակայն կարճ ժամանակ անց ներհոսք կատարվեց, և հայությունը վերականգնեց նախկին վիճակը:

**Կոստանդնուպոլիս:** Տարբեր պատճառներով Բյուզանդիա և նրա մայրաքաղաք Կոստանդնուպոլիս էին տեղափոխվել հազարավոր հայեր: 1453 թ. Կ. Պոլիսը գրավելուց հետո, թուրքերը Փոքր Ասիայից

այնտեղ են գաղթեցնում հույների, հրեաների և հայերի՝ նպատակ հետապնդելով նրանց միջոցով զարկ տալ մայրաքաղաքի տնտեսական կյանքին:

**1461 թ. ձևավորվեց** հայ հոգևոր համայնքը՝ **պատրիարքությունը**, որին ենթակա էին Փոքր Ասիայի, Տրապիզոնի և Ղրիմի թեմերը: Պատրիարքները փաստորեն արևմտահայության գործերը տնօրինողներն էին և որպես այդպիսին ճանաչվում էին պետության կողմից: Պատրիարքը, հոգևոր գործերից զատ, տնօրինում էր եկեղեցիների ու վանքերի կառուցումը, դպրոցների բացումը, տպարանների հիմնումը, գրքերի հրատարակումը և այլ գործեր: Պատրիարքը նշանակվում էր սուլթանի հատուկ հրովարտակով:

Կոստանդնուպոլիսի հայ համայնքի կազմում ծանրակշիռ դեր էին կատարում առևտրական և արհեստավորական շերտերը: XVI դ. ձևավորվում է **մեծահարուստ հայ չեղերիների դասը:** Չեղերի էին անվանվում այն երևելի հարուստները, որոնք զբաղվում էին վաշխառությամբ, ինչպես նաև առևտրով:

Կ. Պոլսի աշխարհագրական հարմար դիրքը մեծապես նպաստում էր առևտրին, ուստի այլևայլ վայրերից դեպի իրեն էր ձգում հայ վաճառականներին: Նրանք քաղաքում ունեին խանութներ, իջևանատներ, պահեստներ: Գաղութի բնակչության ճնշող մեծամասնությունը կազմում էին արհեստավորները, մանր ու միջին առևտրականները, օրավարձու մշակները: Արհեստավորները ստվար խավ էին և ընդգրկված էին իրենց շահերը պաշտպանող կազմակերպությունների՝ **Լանաֆուրյունների** (համաքարությունների) մեջ: Պոլսահայ գաղութն այնքան մեծացավ, որ դարձավ արևմտահայ մշակույթի գլխավոր կենտրոնը: Մշակույթի բուռն զարգացումը, սակայն, տեղի ունեցավ միայն նոր շրջանում:

**Լեհաստան:** Այստեղ հայկական համայնքներ են ձևավորվել XIII–XIV դարերում: Կիլիկիայի հայկական պետության անկումից և Օսմանյան կայսրության կող-



Ջամնատին: Արմյանակի փողոցի մեծահարուստ հայերի բնակելի շենքերը, XVII դ.

մից Ղրիմի գրավումից հետո գաղթի նոր ալիք ուղղվեց Լեհաստան: *Կամենեց-Պոդոլսկում, Լուցկում, Ջամնապոլեում, Սրաւնիսլավում* և այլ բնակավայրերում առաջացան հայկական գաղութներ:

Կամենեց-Պոդոլսկն ուներ *հայոց դպարան*, որը վարում էր տեղի հայերի գործերը: Հայերին տրվեց առևտրական արտոնություն: XVII դ. կեսերին քաղաքում կար 1200 հայ ընտանիք, որը այդտեղի բնակչության մեծ մասն էր: Հայերին թույլատրվեց հիմնել իրենց առանձին *մազհարդարը*՝ գաղութի գործերի ինքնավար վարչական մարմինը: Հայ համայնքի միջոցներով քաղաքում կառուցվում են դպրոց և հիվանդանոց:

Ոչ միայն Լեհաստանի կամ Ռեչ Պուպոլիտայի, այլև ամբողջ Արևելյան Եվրոպայի հայկական գաղթավայրերի մեջ մեծ է եղել հատկապես *Լվովի* գաղութի նշանակությունը: Լվովը XIV դ. դարձավ Հարավարևելյան Եվրոպայի հայության հոգևոր կենտրոնը:

Հայերն ակնառու մասնակցություն են ունեցել երկրի քաղաքական կյանքում: Նրանք թուրքական ազդեցության դիմակայելը և Օսմանյան կայսրության թուլացումը զուգակցում էին Հայաստանի ազատագրման հետ: Հատկանշական էր, որ 1683 թ. Վիեննայի ձակատամարտում թուրքերի դեմ տարած հաղթանակում Լեհաստանի թագավոր Յան Սոբեսկո քանակում կոչում էին նաև մեծաքանակ հայեր:

Լեհահայ գաղութներում պահպանվել և առաջադիմել են մշակույթի որոշ ճյուղեր: *1616 թ. Լվովում հիմնվում է հայկական դպարան*: Պատմամշակութային նշանավոր երևույթ էր *լեհահայերի դպարասրահորը*, որը կազմվել է գերագանցապես Մխիթար Գոշի «Դատաստանագրքի» հիման վրա:

Լեհական թագավորությունը XVII դ. թուլանում է, ուժեղանում են դավանական ճնշումները ոչ կաթոլիկ քրիստոնյաների նկատմամբ: Լեհահայերին հարկադրաբար կաթոլիկ դարձնելը, Էջմիածնի Մայր Աթոռից կտրելը և Հռոմի կաթոլիկ եկեղեցուն միացնելը քացասական հետևանքներ են ունենում: Դավանափոխությունը, արտոնությունների վերացումը թուլացնում են հայկական գաղութները: Սկսվում է ազգային դիմագիծը կորցնելու և ձուլվելու գործընթացը, որը հանգեցնում է հայկական գաղութների մարմանը:

**Իտալիա:** Հայերն Իտալիայում համայնքներ են ձևավորել XIII-XV դարերում: Իտալական քաղաքների հետ ունեցած առևտրատնտեսական կապերի շնորհիվ մի շարք քաղաքներում հայկական փոքր համայնքներ են առաջանում: Դրանցից էր *Հոմը*, որի բնակչությունն այնքան էր համալրվել հայերով, որ XIII դ. ուներ «Հայոց տուն» և երկու եկեղեցի: Հայերի հոսքը դեպի Իտալիա ուժեղանում է Կիլիկյան հայկական թագավորության անկումից հետո:

Իտալիայի ամենախոշոր ու նշանակալի համայնքը *Վենետիկ* քաղաքում էր: Վենետիկ ժամանող հայ վաճառականներն ունեին իրենց կենտրոնատեղին՝ «Հայոց տունը»: Այնտեղ է եղել «Հայոց փողոցը», իսկ մոտակա կամուրջը կոչվել է «Հայոց կամուրջ»: «Հայոց տունն» ընդարձակվում է, հայերը կառուցում են եկեղեցիներ: Վենետիկի հայկական գաղթօջախը XV-XVI դդ. դառնում է կազմակերպված հայկական կենտրոն: Վենետիկում հաստատված հարուստ վաճառականներից նշանավոր էին Շահիրիմանյանները, Միրիմանյանները, Շահումյանները և ուրիշներ:



Իտալիայի հայկական համայնքները և, առաջին հերթին, Վենետիկը նշանավոր էին ոչ այնքան առևտրափոխանակային հարաբերությամբ, որքան մշակութային առումով: Հայ մշակույթի կարևոր նվաճումներից մեկը՝ տպագրությունը, սկզբնավորվել է Վենետիկում:

**Հոլանդիա (Նիդերլանդներ):** Հայերը Նիդերլանդիայի երկրներին ծանոթ են եղել XIV դարից: **Քրյուգեն** նավահանգստային քաղաքում կար հայ բնակչություն: Ծուտով Քրյուգենին փոխարինում է **Անսլերդամը**: Հոլանդական այդ քաղաքը համաշխարհային շուկայի և մշակույթի կենտրոն էր և ուներ «Եվրոպայի կայսրուհու» համբավ: Աստիճանաբար ուժեղանում է առևտրական ընտանիքների հոսքը, և ձևավորվում հայկական համայնքը, որը գոյություն ունեցավ շուրջ երկու դար: Այս համայնքն ուներ առևտրական և մշակութային բնույթ: Տեղի շաքաթաթերթերից մեկը, անդրադառնալով տեղի հայության կյանքին, գրում է.

«Հայկական գաղութի պատմությունը մի ոսկե էջ է Ամստերդամ քաղաքի պատմության մեջ»:

Ամստերդամի որոշ հայ առևտրականներ ունեցել են իրենց սեփական նավերը, որոնք նավարկել են հոլանդական դրոշմերով: **1653 թ.** Ամստերդամից դեպի Զայտոնիա են ճանապարհվում **հինգ առևտրական նավեր**: Դրանցից երկուսը հայկական էին և կոչվել են «Հայկական վաճառական» ու «Պարսկական վաճառական»:

Հայկական առաջին տպարանն այս քաղաքում հիմնել է **Մսարթեսու Մարտեցին 1660 թ.**: Նա հայոց կաթողիկոսի պատվիրակն էր և ուղարկվել էր տպագրության գործը կազմակերպելու համար: Նրա գործը շարունակում է ժամանակի նշանավոր մտավորականներից **Ռսկան Երևանցին**:

Ամստերդամի գաղութը թուլանում է, երբ խաթարվում է միջազգային առևտուրը: Այն փաստորեն դադարում է գոյություն ունենալուց XVIII դ. վերջերին:

### Հարցեր և առաջադրանքներ

1. Ինչ եք հասկանում գաղութ (գաղթավայր) ասելով, որո՞նք են գաղութը բնորոշող հատկանիշները: Բանի՞ փուլի է բաժանվում հայկական գաղթավայրերի ընդհանուր պատմությունը:
2. Երբ և ինչո՞ւ ստվարացավ Արիմի հայկական գաղթօջախը: Թվարկե՛ք Արիմի հայաբնակ քաղաքները:
3. Երբ է ստեղծվել Կ.Պոլսի հայոց պատրիարքությունը: Ովքեր էին կազմում Կ.Պոլսի հայ բնակչությունը, ինչո՞վ էին նրանք գրադվում:
4. Թվարկե՛ք լեհահայ նշանավոր գաղթօջախներ, ինչ արտոնություններ ունեին այդ գաղութները: Որո՞նք էին լեհահայ գաղութների մարման պատճառները:
5. Երբ և ո՞ր քաղաքներում են առաջացել Իտալիայի հայ համայնքները: Հայ մշակույթի ո՞ր իրադարձությամբ է նշանավորվել Վենետիկը:
6. Ինչո՞ւ մեծացավ հայերի հոսքը դեպի Ամստերդամ, որքան գոյատևեց քաղաքի հայ համայնքը:

**Թեմա 1. ԱԶԳԱՅԻՆ-ՔՐԻՍՏՈՆԵԱԿԱՆ ՄՇԱԿՈՒՅԹԻ ՉԱՐԳԱՅՈՒՄԸ**

**§ 1. ՀԱՅ ԳՐԵՐԻ ԳՅՈՒՏԸ**

Մերոպ Մաշտոցի պատմական առաքելությունը: IV դարի վերջում մայրենի լեզվով գիր և գրականություն ունենալն ազգապահպան խնդիր էր դարձել, քանի որ հայերեն գրավոր լեզուն կենսական անհրաժեշտություն էր թե՛ պետության, թե՛ եկեղեցու և դրանով իսկ ներկա ու ապագա սերունդներին դաստիարակելու և կրթելու համար: Հայաստանում քրիստոնեությունը պետական կրոն հռչակվելուց հետո հայոց լեզվով եկեղեցական գրականության բացակայությունը, առավել ևս Աստվածաշնչի՝ ասորերենով և հունարենով ընթերցումներն անհնարին էին դարձնում ժողովրդի լայն խավերին ծանոթանալու քրիստոնեական վարդապետությանը և յուրացնելու այն:

Վիճակը քիչ էր փոխվում հայերեն բանավոր թարգմանությունից, քանզի օտար լեզուներին քչերն էին տիրապետում, որ կարողանային միանգամից թարգմանություն կատարել մայրենի լեզվով: Ավելին՝ *հունարենը* պարսից արքունիքը դիտում էր որպես թշնամի երկրի՝ Հռոմեական կայսրության լեզու և Հայաստանում զավթողական քաղաքականության իրականացման ժամանակ նույնիսկ *արգելում էր* դրա կիրառումը՝ փոխարենը պարտադրելով *պարսկերենը*: Իսկ որպես եկեղեցական լեզու մնում էր դարձյալ ժողովրդի համար անհասկանալի ասորերենը:

Դրան գումարվեցին IV դ. վերջին Մեծ Հայքի թագավորության բաժանումը Սասանյան Պարսկաստանի և Հռոմեական կայսրության միջև, իսկ այնուհետև՝ Հայաստանի արևմտյան մասում թագավորական իշխանության վերացումը: Այդ ամենը

նշանակում էր, որ արդեն *վրանգրված էր հայ Արշակունիների թագավորության գոյությունը*, դրանով իսկ՝ հայ ժողովրդի պետականորեն երաշխավորված քաղաքական և մշակութային կյանքը:

Արշակունիների մոտալուտ անկման պայմաններում Հայ առաքելական եկեղեցին էր դառնում միակ ազգային ամբողջական կառույցը, սակայն մայրենի լեզվով հոգևոր գրականության պակասը սպառնում էր հենց իր՝ Հայ առաքելական եկեղեցու անկախ գոյությանը:

Հենց այդ տագնապալի ժամանակաշրջանում *Մերոպ Մաշտոցին* էր վերապահված հայոց ինքնության հզոր դրսևորումներից մեկի՝ գրերի գյուտի առաքելությունը:

Մերոպ Մաշտոցը ծնվել է 361 թ. Տարոն գավառի Հացեկաց գյուղում՝ կարճատև Վարդանի ընտանիքում: Կրթություն ստանալով Ներսես Մեծի օրոք՝ այնուհետև նա Տարոնից մեկնում է Մեծ Հայքի թագավորության մայրաքաղաք՝ Վաղարշապատ, և Խոսրով IV-ի արքունիքում զինվորական ծառայություն կատարում: Միևնույն ժամանակ նա կարգված էր արքունի մատենագիր դպիրների խմբի մեջ:

Փայլուն տիրապետելով մայրենի լեզվին՝ Մերոպ Մաշտոցն արքունիքի միջազգային գրագրություններում կիրառում էր նաև *հունարենի, ասորերենի, պարսկերենի իր իմացությունը*: Թողնելով ծառայությունը հայոց արքունիքում՝ Մաշտոցը քարոզչական գործունեության նպատակով գնում է *Նախիջևան* գավառից հարավ գտնվող *Գողթան գավառը*: Քրիստոնեական ուսմունքը վարդապետելիս Մերոպ Մաշտոցը հայերեն բանավոր թարգմանում է *Սուրբ Գիրքը*:





Հայոց այրուքներին նվիրված հուշակոթող, Օշական

Մինչև նա Գողթան գավառում էր, Աստվածաշունչը Հայաստանի մյուս գավառների եկեղեցիներում կարդում էին ժողովրդի համար անհասկանալի օտար լեզվով: Ուստի, ըստ պատմիչ Ղազար Փարպեցու, նա խորհում էր, թե «գոյություն ունեն հայոց լեզվի նշանագրեր, որոնցով հնարավոր է սեփական ձայնով և ոչ թե մտաբանած լեզվով եկեղեցիներում շահեղ փղամարդկանց ու կանանց և առհասարակ ամբողջ բազմության սրբերը»: Այստեղ պատմիչը վկայել է նախամեսրոպյան շրջանում հայերեն գրերի գոյության մասին:

Պահպանվել են մատենագրական տեղեկություններ նախամաշտոցյան հայ գրերի մասին: II–III դարերում հայերը հիշատակված են հին դպրություն ունեցող ժողովուրդների շարքում: Պատմահայր Մովսես Խորենացին հիշատակել է նախաքրիստոնեական մեհենական գրականության մասին, որը, սակայն, առ այսօր չի հայտնաբերվել: Վարդան Արևելցին տեղեկացնում է, որ «հնուց հայերեն գիր է եղել». ինչը «վկայվեց Լևոն արքայի ժամանակ, քանզի դրան գրավ Կիլիկիայում՝ դրոշմված հայե-

րեն գրով... Հայկազուն թագավորների անուններով: Ըստ Գարեգին Սրվանձտյանցի՝ Բալու բերդաքաղաքի մոտ գտնվող Գրման քար կոչվող սուրբ վայրերի մերձակա մի քարայրի (որտեղ ձգնել է Մեսրոպ Մաշտոցը) պատերի սեպագիր արձանագրությունները միայն հայերը կարող են վերծանել:

### Հայ գրերի գյուտը և նշանակությունը:

Մեսրոպ Մաշտոցը Գողթն գավառում քարոզչության ժամանակ միտք հղացավ հայոց լեզվի նշանագրերը գտնելու և ամենայն ջանասիրությամբ իր անձը նվիրեց այդ մեծ գործին: Վերադառնալով Այրարատ՝ Մեսրոպ Մաշտոցն իր մտադրության մասին հայտնում է հայոց կաթողիկոս Սահակ Պարթևին և ստանում նրա հավանությունը: IV դարի վերջին գումարվում է *եկեղեցական ծաղոկ*, որտեղ, ըստ Կորյունի, որոշվում է «հայ ազգի համար նշանագրեր գտնել»: Վռամշապուռի արքայի հովանավորությամբ խնդրի լուծմանն անմիջապես ձեռնամուխ են լինում Սահակ Պարթևն ու Մեսրոպ Մաշտոցը:

Վռամշապուռի արքային հայտնել էին, որ Դանիել անունով ասորի մի եպիսկոպոս մոտ կան *հայերեն նշանագրեր*: Արքայի հանձնարարությամբ այդ նշանագրերը բերում են և երկու տարի դրանցով ուսուցանում աշակերտներին: Սակայն այդ նշանագրերն անբավարար եղան հարուստ հայոց լեզվի հնչյունային համակարգի օգտագործման համար:

Վռամշապուռի կարգադրությամբ Մեսրոպ Մաշտոցը, ձեռնարկելով սոր նշանագրեր ստեղծելու գործը, մի խումբ աշակերտներով մեկնում է Ամիդ, Եդեսիա և Սամոսատ քաղաքները:

Մեսրոպ Մաշտոցն աշակերտներին երկու խմբի էր բաժանել՝ մեկին կարգելով ասորական դպրության, իսկ մյուսին՝ հունական: Նա հանդիպում է Դանիել եպիսկոպոսին, սակայն նախկինից ավելի քան չգտնելով՝ անցնում է Եդեսիա՝ Պրատոն անունով մի հեթանոս ճարտասանի մոտ: Ապա իր պրպտումները շարունակում է այլ վայրերում: Վերջապես 405 թ. Ուռհայում (Եդեսիա) Մաշտոցը ստեղծում է հայոց գիրը:

Կորյուն վարդապետը և Մովսես Խորենացին գրում են հայոց գրերի՝ Աստծո շնորհով տրվելու մասին: Կորյունը գրել է. «Եվ այսպես նա բազում նեղություններ կրեց՝ իր ազգին մի բարի օգնություն գտնելու համար: Ամեն բան շնորհող Աստուծոց իսկապես պարզակեց նրան այդ բախորը, նա իր սուրբ աջով հայրաքար ծնեց նոր և սքանչելի ծնունդներ՝ հայերենի նշանագրեր»:

Մեսրոպ Մաշտոցը, գալով **Սամուսար** քաղաքը, գտնում է հունարեն գրչության արվեստի խորագիտակ Հոսիանոսին, որը գեղագրում է Մեսրոպ Մաշտոցի պատրաստած **36 նշանագրերը**, որոնցից յուրաքանչյուրին Հայոց աշխարհի մեծ ուսուցիչն անուն էր տվել. «Այր, բեն, գիմ, դա...»: Եղիշեի գնահատմամբ՝ **«Այրն է մայր խնամարթեան...»**:

Սուրբ Գրքի հայերեն թարգմանությունը անվանվեց **Աստվածաշունչ**, որից հայերեն թարգմանված ու գրված առաջին նախադասությունն էր. «**Ճանաչել գիմնարթիսն և գիտար, խնանալ գրանս հանձարոյ**»:

Հայրենիք վերադարձող Մեսրոպ Մաշտոցին Երասխի ափին մեծ հանդիսավորությամբ դիմավորում են Վուսնշապուհ արքան, Սահակ Պարթև կաթողիկոսը, նախարարագունդ ավագանին՝ ժողովրդի բազմության հետ: Այա նրանք միասին գալիս են մայրաքաղաք: Մեսրոպ Մաշտոցն անմիջապես ձեռնամուխ է լինում հայերեն այբուբենով մանուկների ուսուցմանը: Մեսրոպ Մաշտոցը՝ հայ դպրության հիմնադիրը, գրել է հոգևոր ճառեր, երգեր, հատկապես շարականներ: Սահակ Պարթևը նույնպես գրել է եկեղեցական կանոններ, թղթեր (նամակներ) ու հոգևոր երգեր:

Լուսավորչական գործունեությունն ընդարձակելով Հայաստանում՝ Մեսրոպ Մաշտոցը գնում և **դատեր է սրել ծուխ նաև վրաց** և Կուրի ձախափնյա րուն **Աղվանքի** ցեղերից՝ զարգարացիների լեզուների համար:

**Դպրոցը:** Սբ Մեսրոպ Մաշտոցը և Սբ Սահակ Պարթևը կրթական աշխատանքը ծավալեցին նախ Հայաստանի կենտրոնական երկրամասերում՝ մայրենի լեզվով դպրոցներ հիմնելով: **Առաջին վարդապետարանը՝** քարձրագույն դպրոցը, **հիմնադրվեց Վաղարշապատում:** Այստեղ պատրաստվում էին վարդապետներ՝ ուսուցիչներ, որոնց շարքում էր նաև Մաշտոցի վարքագիր Կորյունը: Այն ժամանակ Սահակ Պարթևը մեծ հոգատարությամբ զբաղվում էր նաև իր թոռան՝ հայոց ապագա սպարապետ Վարդան Մամիկոնյանի կրթությամբ:

Այնուհետև Մեսրոպ Մաշտոցը հայոց դպրոցներ է հիմնում նաև **Արցախում (Ամարասի դպրոցը)**, **Սյունիքում, Գողթան գավառում:** Սահակ Պարթևի նամակով Մաշտոցը Վարդանի հետ ներկայանում է քյոզանդական կայսր Թեոդոսիոս II-ին, ստանում է նրա համաձայնությունը Արևմտյան Հայաստանում ևս դպրոցներ բացելու մասին: Այդ առաքելությունը երկրի արևմտյան մասում նա իրականացնում է 419–422 թթ.: Դրանով իսկ **հոգևոր առումով Հայաստանը վերամիավորվում է:**

**Հայոց գրերը հայ ժողովրդի համար դառնում են գոյարևման, ազգային ինքնության, արժեհամակարգի պահպանման հզոր միջոց բոլոր ժամանակներում:**

### **Հարցեր և առաջադրանքներ**

1. Ինչո՞ւ IV դ. վերջում հրատապ խեղիք դարձավ մայրենի գիր ու գրականություն ունենալու հարցը: Ի՞նչ գիտեր Մեսրոպ Մաշտոցի մասին:
2. Վերիիշխե՞ք նախամաշտոցյան հայ գրերի մասին տեղեկությունները: Ինչո՞ւ Դանիել եպիսկոպոսի մոտից թերված նշանագրերը անբավարար եղան օգտագործման համար: Ո՞ր քաղաքներում եղան Մեսրոպ Մաշտոցն ու իր աշակերտները: Ո՞րն է հայերեն առաջին նախադասությունը: Որտեղից է այն թարգմանված:
3. Որտեղ է բացվել առաջին վարդապետարանը: Դրանից հետո որտեղ հիմնվեցին հայոց դպրոցներ:
4. Վերհանե՞ք գրերի գյուտի պատմական նշանակությունը:



## § 2. ՀԱՅ ՄՇԱԿՈՒՅԹԻ ՈՍԿԵԴԱՐԸ

Հայ մշակույթի պահպանման և հետագա զարգացման գործում անգնահատելի նշանակություն ունեցավ Սր Մեսրոպ Մաշտոցի հանձարով ստեղծված հայերեն նշանագրերի գյուտը:

Հազարամյակների պատմություն ունեցող հայոց լեզուն IV-V դդ. սահմանագլխին այնքան կատարյալ էր, որ Մեսրոպ Մաշտոցի նշանագրերի գյուտին անմիջապես հաջորդեցին համաշխարհային գրական և գիտական երկերի թարգմանությունը և հայ մատենագրության ու գիտության բարձրագույն արժեքների ստեղծումը:

**Թարգմանչական գրականություն:** Աստվածաշնչի հայերեն թարգմանությունն անգուզական երևույթ էր թարգմանչական արվեստի մեջ: Դարեր անց ֆրանսիացի գիտնականներն այն համարեցին **թարգմանությունների թագուհի**: Աստվածաշնչին հետևեցին համաշխարհային գիտության և պատմագեղարվեստական գրականության նմուշների թարգմանությունները: Երկրում ծավալվեց **թարգմանչաց շարժումը**: Թարգմանիչների ջանքերի շնորհիվ հայ ընթերցողը մայրենի լեզվով հաղորդակից դարձավ Արիստոտելի փիլիսոփայական երկերին, Դիոնիսիոս Թրակացու «Քերականությանը», Եվսեբիոս Կեսարացու «Ժամանակագրությանը», Կեղծ-Կայիսեանեսի «Պատմութիւն վարուց Ալեքսանդրի» և այլ երկերի: Հայերեն թարգմանությունների շնորհիվ պահպանվեցին Եվսեբիոս Կեսարացու «Ժամանակագրությունը», Արիստիդեսի «Ջատագովությունը», Հերմես Եռամեծի «Սահմանքը» և այլ երկեր, որոնց բնագրերը կորել են:

V դ. թարգմանությունների և ինքնուրույն գրականության լեզուն այնքան կատարյալ էր, որ մեսրոպյան հայ գրական ժառանգությունն անվանվեց **ոսկեդարյան**: Ըստ Եղիշնի՝ Հայաստանում լուսավորչական շարժումն ընթանում էր «**Լաւ է կոյր սոցօք, քան կոյր մկօք**» («**Լավ է սչքով կոյր լինել, քան մկբով**») նշանաբանով:

**Պատմագրություն:** V դարում մեծ վերելք ապրեց հայ պատմագրությունը: **Պոյուն** վարդապետը գրել է «**Լարք Մաշտոցի**» երկը, որում մեծ խանդավառությամբ ու սիրով շարադրել է իր ուսուցչի՝ Մեսրոպ Մաշտոցի կյանքն (վարքը) ու գործունեությունը՝ հայ գրերի գյուտը և լուսավորչական գործը: **Ագաթանգեղոսի «Պատմութիւն Հայոց»-ը** նվիրված է Սր Գրիգոր Լուսավորչի ու Տրդատ Մեծ թագավորի կյանքին ու գործունեությանը, Հայաստանում քրիստոնեության տարածմանն ու աշխարհում առաջինը պետականորեն ընդունմանը:

**Փախարոս Բուզանդի «Պատմութիւն Հայոց»-ն** ընդգրկում է Հայոց աշխարհի IV դարի առաջին տասնամյակներից մինչև Մեծ Հայքի թագավորության պարսկա-հռոմեական առաջին բաժանումն ընդգրկող ժամանակաշրջանի պատմությունը: Այն կարևոր սկզբնաղբյուր է Հայաստանի քաղաքական ու հոգևոր կյանքի, թագավորական իշխանության, նախարարությունների ու եկեղեցու հարաբերությունների և օտար զավթիչների դեմ հայ ժողովրդի մղած հերոսական պայքարի մասին:

Հայ պատմագրության թագն ու պսակն է **Մովսես Խորենացու «Պատմութիւն Հայոց»-ը**, որը **հայ դասական պարսնագիտության հիմնասյունն** է: Սահակ Պարթևի ու Մեսրոպ Մաշտոցի աշակերտ Մովսես Խորենացու հեղինակությունն այնքան մեծ էր, որ նա անվանվել է **Մեծն քերթող, քերթողսմայր**: Մովսես Խորենացու երկը, որ գրվեց հայոց տանուտեր Սահակ Բագրատունու մեկենասությամբ, ընդգրկում է հայ ժողովրդի պատմությունը՝ հնագույն ժամանակներից մինչև V դ. 40-ական թվականները: Ժամանակագրական այդպիսի ընդգրկմամբ Մովսես Խորենացին հայ պատմագրության մեջ առաջինը շարադրեց հայոց ամբողջական պատմությունը:

Պատմահոր երկը բաղկացած է երեք գրքից: Առաջին գրքում («Հայոց մեծերի ծննդաբանությունը») հեղինակը պատմական գրավոր սկզբնաղբյուրներից և հայոց

քանակցություններից քաղված տեղեկությունների հիման վրա պատմում է հայոց անվանադիր նախնի Հայկ Նահապետի ու նրան հաջորդած Հայկազուն սերունդների հայրենանվեր հերոսությունների ու աշխարհաշեն գործունեության մասին՝ մինչև Երվանդյան Տիգրանի և նրա զարմերի ժամանակները: Պատմահայրը զգալի տեղ է հատկացրել Աստվածաշնչին, ինչպես նաև հին առասպելներին և պատմական ավանդություններին:

Երկրորդ գիրքը կոչվում է «Բան միջակ պատմութեան մերոցն նախնեաց», որի շարադրանքում ամփոփված է Ք.ա. IV դ. վերջին քառորդից մինչև Ք.հ. IV դ. երրորդ տասնամյակի պատմությունը: Այս գրքի հիմնական դեմքերն են հայոց Երվանդ, Արտաշես, Տիգրան Մեծ, Արտավազդ, Վաղարշակ, Արգար, Տրդատ Մեծ թագավորները, Սբ Գրիգոր Լուսավորիչը և մյուս հոգևոր այրերը:

Երրորդ գիրքը վերնագրված է՝ «Ավարտաբանութիւն մերոց Հայրենեաց»: Այն ընդգրկում է մինչև 440 թ. ընկած պատմությունը և ավարտվում է Հայաստանում ստեղծված ծանր վիճակի նկարագրությամբ՝ «Ողբով»: Երրորդ գրքի պատմական դեմքերն են հայոց թագավորներ Խոսրով Կոտակը, Տիրանը, Արշակ II-ը, Պապր, Վասմշագուհիը և մյուսները, զինվորական գործիչները (Վասակ, Մուշեղ, Մանվել, Վարդան Մամիկոնյանները), հայոց կաթողիկոսներ Ներսես և Սահակ Պարթևները, հանձարեղ Մեսրոպ Մաշտոցը և նրանց ժամանակակից ազգային գործիչները: Մովսես Խորենացու «Հայոց պատմություն» երկը գրված է հայրենասիրական հզոր ոգով, որի հիմնական գաղափարն է հայոց ամբողջական պետության վերականգնումը՝ ապավինելով սեփական ուժին: Մովսես Խորենացին գրել է նաև «Աշխարհացոյց» երկը, որը VII դարում շարունակել է Անանիա Շիրակացին:

V դարում հայ ժողովրդի՝ Սասանյանների տիրապետության դեմ կազմակերպված մեծ ապստամբությունները նկարագրված են *Եղիշիի* «Կասն Վարդանայ եւ Հայոց պա-

*րտապահին*» ու *Ղազար Փարպեզու* «Պարմութիւն Հայոց» երկերում: Եղիշիի երկը նվիրված է Վարդան Մամիկոնյանի գլխավորած ժողովրդական հզոր ապստամբությանը: Ղազար Փարպեցին շարունակում է դեպքերի ընթացքն այնտեղից, որտեղ հասցրել էր Փավստոս Բուզանդը՝ 385-387 թթ.: Այդ շարադրանքը ներկայացնում է IV դ. վերջից մինչև V դ. վերջն ընկած պատմությունը, Վարդանանց ապստամբությունից հետո պատմում է Վահան Մամիկոնյանի գլխավորած ապստամբության մասին:

V դ. վարքագրական գրականության նմուշներից է Վարդան Մամիկոնյանի դստեր՝ Շուշանիկի նահատակությանը նվիրված վարքագրությունը:

**Փիլիսոփայություն:** Հայ գիտական միտքը վաղ միջնադարում ներկայանում էր փիլիսոփայության համակարգում: IV դարում փիլիսոփայությամբ կամ իմաստասիրությամբ զբաղվել է նշանավոր ճարտասան ու մանկավարժ *Պարոյր Հայկազնը*, իսկ V դարում հանդես եկան *Եզնիկ Կողբացին* և *Դավիթ Անհաղթը*: Եզնիկ Կողբացին իր «*Եղծ սարսևոց*» երկում քրիստոնեական հավատքը պաշտպանել է հակադիր ուսմունքներից:

Հայ մեծագույն փիլիսոփա Դավիթ Անհաղթն իր «*Սահմանք իմաստասիրութեան*» երկում մեծ տեղ է հատկացրել բնության ճանաչմանը: Նա ասում է. «Ո՛ր հասանէ գիտութիւն, ուր ոչ հասանէ բնութիւն»: Այս խոսքերն անսահման բնության ճանաչողությամբ կատարելության հասնելու արտահայտություն են, քանզի, ըստ մեծ մտածողի, իմաստասիրությունը նպատակ ունի զարդարելու մարդկային հոգին:

Անհաղթը կատարել է գիտությունների դասակարգում՝ ըստ բնագիտության, թվաբանության և աստվածաբանության: Հետևելով անտիկ գիտության ավանդույթներին՝ Դավիթ Անհաղթն իր փիլիսոփայական երկերում լայնորեն համադրում է գիտելիքների տարբեր բնագավառներից եկող դրույթները: Նա բուն փիլիսոփայական խնդիրների հետ մեկտեղ անդրադար-



ձել է նաև տիեզերագիտական կարգի որոշ դրույթների, որոնք մեծ նշանակություն ունեն վաղմիջնադարյան քննափոխության լայն մտքի զարգացման մեջ:

**Բնական գիտություններ:** Հայ քննափտության մեջ Երկրի գեոաձևության գաղափարն առավել ցայտուն դրսևորվել է V դարում **Դավիթ Անհաղթի** հայացքներում և **Գյուտ կաթողիկոսի** նամակում, իսկ VII դարում՝ ականավոր քննափոխության, մաթեմատիկոս, տիեզերագետ, աշխարհագետ ու մանկավարժ **Անանիա Շիրակացու** աշխատություններում:

Բնության զարգացման ուսումնասիրության առաջին աստիճանի վրա գիտնականները դնում էին տարրերի առաջացումը և դրանց փոխազդեցությունը: Հին մտածողները կարծում էին, որ նյութական աշխարհի հիմքում ընկած էին **չորս տարրեր՝ կրակ, օդ, ջուր, հող**: Արիստոտելն իր հերթին ներկայացրել է այդ խնդիրը: Անդրադառնալով իմաստասիրության սահմանմանն ըստ Արիստոտելի՝ Դավիթ Անհաղթը նույնպես համարում էր, որ «մարմինը բաղկացած է չորս տարրերից, որոնց պատճառը գիտի քնական իմաստասերը» (այսինքն՝ քննափոխական):

Դավիթ Անհաղթի ժամանակակից Գյուտ կաթողիկոսը նույնպես համարում էր, որ նյութական աշխարհի հիմքում ընկած են չորս տարրերը: Նա գրել է, որ չորս տարրերից բաղկացած աշխարհի մասին կարող է խոսել միայն նա, ով համարձակ ուսումնասիրություններ է կատարել տարբեր գիտությունների քննազավառում:

Անանիա Շիրակացին քննափոխության տեսանկյունից նոր և կարևոր դրույթներ արծարծեց՝ հիմքում ունենալով անտիկ գիտության դրույթները, որոնք նա ստեղծագործաբար մշակում և խորացնում էր: Շիրակացին հստակ ձևակերպել է աշխարհի գոյության գաղափարը՝ պայմանավորված հակադրությունների միասնությանը ու պայքարով. «*Ծնունդը մահվան սկիզբն է, և մահը վերադին սկիզբն է ծննդյան, քանզի այս անընդհար հակասությունից աշխարհը գոյավում է*»:

**Տիեզերագիտություն:** Տիեզերագիտության քննազավառում անտիկ գիտության հիմնական նվաճումներից էր Տիեզերքում գտնվող մարմինների գեոաձևության գաղափարը:

Դավիթ Անհաղթը, հիշատակելով գնդաձև մարմինների մասին, անտարակույս նկատի ուներ գիտելիքների այն քննազավառը, որին Արիստոտելը մանրամասն անդրադարձել էր «Երկնքի մասին» իր աշխատությունում:

Հետաքրքիր են Դավիթ Անհաղթի հաղորդած տեղեկություններն Արեգակի, Երկրի և Լուսնի համեմատական չափերի մասին: Նա գրում է. «*Ահավասիկ Արեգակը, բազմապատիկ մեծ լինելով, քան Երկիրը, թգաչափ է երևում*»: Մի այլ տեղ նա գրում է, որ «...*Արեգակը չափազանց մեծ է, քան Երկիրը, և Երկիրը՝ քան Լուսինը, թեպետ և անհավանական է, սակայն ճշմարիտ է*»: Դավիթ Անհաղթի ժամանակակից Գյուտ կաթողիկոսի հայացքները ևս վկայում էին, որ V դ. հայ գիտությունը շարունակում էր անտիկ գիտության առաջադեմ ավանդույթները:

### **Հարցեր և առաջադրանքներ**

1. Անտիկ շրջանի ինչ ստեղծագործություններ թարգմանվեցին հայերեն, դրանցից որոնք են պահպանվել միայն հայերեն թարգմանությամբ:
2. Պատմագրության քննազավառում ինչ ձեռքբերումներ եղան: Քանի գրքից է կազմված Խորենացու «Հայոց պատմությունը», ինչ ժամանակագրական սահմաններ է ընդգրկում այն: Ո՞րն է Խորենացու մյուս ստեղծագործությունները:
3. Նշե՛ք IV–V դդ. հայ փոխաբանների անունները և նրանց ստեղծագործությունները: Ի՞նչ հարցեր են արծարծել հայ փոխաբաններն իրենց ստեղծագործություններում:
4. Ներկայացրե՛ք Դավիթ Անհաղթի հայացքները:

### § 3. ՄՇԱԿՈՒԹԱՅԻՆ ՁԵՌՔՔԵՐՈՒՄՆԵՐԸ VI-VIII ԴԱՐԵՐՈՒՄ

**Պատմագրություն:** VI-VII դդ. իրադարձությունների մասին կարևոր սկզբնաղբյուր է *Սեբեոս* եպիսկոպոսի «*Պատմություն*»-ը: Պատմիչը մանրամասն տեղեկություններ է հաղորդում հայ-բյուզանդական և հայ-պարսկական հարաբերությունների, ինչպես նաև պարսկա-բյուզանդական հակամարտության և դրան հաջորդած Արարական խալիֆայության նվաճումների սկզբնական ժամանակաշրջանի մասին: Սեբեոսը հատուկ ուշադրություն է հրավիրում հայ ժողովրդի ազատագրական պայքարի և հայոց ամրոցական ու անկախ պետության վերականգնման՝ հայ քաղաքական և հոգևոր գործիչների հսկայական ջանքերի վրա: Ընդհանուր առմամբ Սեբեոսի երկն արժեքավոր սկզբնաղբյուր է Հայաստանի և հարևան երկրների պատմության մասին:

VII-VIII դարերի հայ պատմիչ *Մովսես Կողանկարպացին* իր «*Պատմության Աղասից աշխարհի*» երկում մանրամասն տեղեկություններ է հաղորդում Մեծ Հայքի Հայոց Արևելից կողմանց՝ Արցախ և Ուտիք աշխարհների, ինչպես նաև հայոց պետության և Հայ առաքելական եկեղեցուն ենթակա բուն Աղվանքի քաղաքական, եկեղեցական, մշակութային և ժողովրդագրական պատմության մասին:

**Տուփան Մամիկոնյանի «Պատմություն Տարսուտ»** երկը նվիրված է օտար նվաճողների դեմ հայ ժողովրդի մղած պայքարին:

VIII դ. պատմիչ **Ղևոնդ Ապղսպպեզն** իր «*Պատմություն*» երկում նկարագրել է հայ ժողովրդի ծանր վիճակը և հերոսական պայքարը Արաբական խալիֆայության տիրապետության դեմ:

**Բնափիլիսոփայություն և տիեզերագիտություն:** Հնագույն աշխարհընկալումային և անտիկ փիլիսոփայության տիեզերագիտական հայացքները կարևոր դեր են խաղացել վաղ միջնադարում բնափիլիսոփայական մտքի զարգացման գործում:

Երկրի՝ որպես տիեզերական մարմնի

ուսումնասիրությունն անտիկ դարաշրջանում հանգեցրեց աստղագիտության զարգացմանը:

**Անանիա Շիրակացին**, իր տիեզերագիտական աշխատություններում ամփոփելով վաղմիջնադարյան Հայաստանի բնափիլիսոփայական մտքի նվաճումները, **գիտականորեն հիմնավորել է Երկրի և տիեզերական մարմինների գնդաձևության զաղախարը:**

Նա քննադատում է աստղագուշակությունը և ցույց տալիս աստղային երկնքի ուսումնասիրության կարևորությունը՝ ճանապարհորդությունների և եղանակը կանխագուշակելու համար: Այս առումով կարևոր են նրա հաղորդումները Կենդանակերպի, Ծիր Կաթինի և Խեցգետնի համաստեղության մասին:

Անանիա Շիրակացին տեղեկություններ է հաղորդում Լուսնի ազդեցության հետ կապված մակընթացությունների ու տեղատվությունների, ինչպես նաև «աստղային երկնքի հետ կապված» երկրաշարժերի մասին: Շիրակացու տիեզերագիտական աշխատություններում ամփոփված են վաղմիջնադարյան Հայաստանի բնափիլիսոփայական մտքի նվաճումները:

**Աշխարհագրություն:** Վաղմիջնադարյան Հայաստանի աշխարհագրության և քարտեզագրության անզուգական հուշարձանն է **Մովսես Խորենացու** (V դ.) և նրա գործը շարունակողի՝ **Անանիա Շիրակացու** (VII դ.) «*Աշխարհացոյց*»-ը: Դա հին և վաղմիջնադարյան ժամանակներում հայտնի աշխարհի աշխարհագրական նկարագրությունը պարունակող աշխատություն է՝ հագեցած համապատասխան քարտեզագրական նյութերով: Այն հիմնված է Պտղոմեոսի «Աշխարհագրության ձեռնարկ»-ի մեթոդաբանության վրա: Միևնույն ժամանակ այն իր դարաշրջանի առումով կարևոր տեղեկություններ է պարունակում աշխարհի մասին: «Աշխարհացոյց»-ում մեծ տեղ է հատկացված Հայաստանի և հարևան երկրների աշխարհագրությանը: Դա նշա-



նակում է, որ գիտականորեն ստեղծվել էր թե՛ աշխարհագրական ձեռնարկ և թե՛ դրանում նկարագրված երկրների ու երկրամասերի քարտեզների ժողովածու՝ *«Ազրյաս»*:

Արշակունյաց թագավորության անկումից հետո հայ քաղաքական մտքի կենտրոնում էր հայոց պետականության և տարածքային ամբողջականության վերականգնման խնդիրը, ուստի կարևոր է համարվել հայոց երկրի տարածքային ամբողջական պատկերի ներկայացումը: Պատահական չէ, որ «Աշխարհացոյցը» հանգամանորեն նկարագրում է Մեծ Հայքի 15 աշխարհները և Փոքր Հայքը: «Աշխարհացոյց»-ի պարունակած համապատասխան նյութը հնարավորություն է տալիս խոսելու նաև գլոբուսի վերականգնման մասին: Անանիա Շիրակացին մեծ ներդրում ունի նաև մաթեմատիկայի բնագավառում: Նրա կողմից կազմված *թվարանության դասագիրքն աշխարհում հնագույնների շարքին է պատկանում:*

**Տոմար:** Տոմարական հաշվումների նպատակով Դվինի 554 թ. եկեղեցական ժողովն անդրադարձ է կատարում հայկական օրացույցին: *Բուն Հայոց թվականի (Ք.ա. 2492 թ.)* կողքին աստիճանվում է *«Հայոց Մեծ թվականը»*, որի սկիզբը համարվում է 552 թ. *հուլիսի 11-ը*: Այնուամենայնիվ, Հայաստանում եկեղեցական տոների և ծիսակատարությունների ժամանակը որոշելիս անհամապատասխանություններ էին նկատվում՝ կապված հայկական արեգակնային օրացույցի շարժական լինելու հետ: Ուստի քրիստոնյա ուրիշ երկրների նման՝ Հայաստանում ևս սկսեցին գործածել հատուկ աղյուսակներ՝ օրացուցային տարբերությունները կարգավորելու համար: Անանիա Շիրակացին «Անշարժ տոմար» կազմելու փորձ արեց:

**Իրավունք և եկեղեցական կանոնական գրականություն:** IV դարից աշխարհիկ իրավունքի կողքին Հայաստանում զարգացավ նաև եկեղեցական կանոնական իրավունքը: Հայ Արշակունիների թագավորության վերջից երկրի օրենքների

մշակման աշխատանքն իր վրա վերցրեց եկեղեցին: Հայ եկեղեցական իրավունքի մեջ կարևոր էին Սուրբ Գրիգոր Լուսավորչի, Սուրբ Սահակ Պարթևի և մյուս սուրբ հայրերի հաստատած կանոններն ու Հայ առաքելական եկեղեցու ժողովներում ընդունված կանոնախմբերը:

V դարի կեսերից հայ մտավորականներն իրենց ծանրակշիռ խոսքն են ասել՝ ի պաշտպանություն Տիեզերական առաջին երեք ժողովների քրիստոսաբանության վրա հիմնված Հայ առաքելական եկեղեցու դավանաբանության (Մովսես Խորենացի, Ղազար Փարպեցի, կաթողիկոսներ Հովհաննես Ա Մանդակունի և Բարզեն Ա):

Կազմվում է դավանաբանական բնույթի թղթակցությունների ժողովածու՝ *«Գիրք թղթոց»՝ գրված V-IX դդ.*: Կոմիտաս կաթողիկոսի ժամանակ (615-628 թթ.) կազմվել է եկեղեցու հայրերի գրվածքների հատվածներից հավաքված *«Կնիք հաապոյ»* ժողովածուն:

*Համաշխարհային պարսության մեջ «Կանոնագիրք Հայոց»* երկը, որը կազմվել է կաթողիկոս **Հովհան Գ Օձնեցու (717-728 թթ.)** ջանքերով, *կանոնական իրավունքի վերաբերյալ առաջին ժողովածուն է*: Դրանում գետնդրված են վաղմիջնադարյան կանոնական բազմաթիվ փաստաթղթեր: Հովհան Օձնեցու գրչին է պատկանում նաև պավլիկանների վարդապետության դեմ ներկայացված *«Ընդդեմ Պողիկեանց»* գրվածքը:

Եկեղեցին զբաղվել է նաև քաղաքացիական, քնտանեկան, քրեական և դատավարական իրավունքի հարցերով:



Հովհան Գ Օձնեցի



Երերույքի տաճավ բազիլիկ եկեղեցին




Միծեռնավանքի տաճավ բազիլիկ եկեղեցին. IV-V դդ.

**Արվեստ:** Հայ շինարարական արվեստի հնագույն ավանդույթները նշանակալից առաջին քայլ ապրեցին միջնադարում: *Հայ ազգային ճարտարապետությունն արեղծեց եկեղեցաշինության համաշխարհային գույնագործոցնը:*

Քաղաքաշինության և ամրոցաշինության մեջ ձեռք բերված մեծ փորձը լայնորեն օգտագործվեց վաղ միջնադարում: Հայ շինարարները շինությունների ամրությունն ապահովելու համար կիրառում էին հատուկ միջոցներ՝ օգտագործելով կա-

պակցող կրաշաղախ նյութով շարվածքը: Քրիստոնեական պաշտամունքային վաղ շրջանի շինությունները բազիլիկ տաճարներն էին, ինչպես *Միծեռնավանքի, Քասաղի, Արցախի Տիգրանակերպի, Երերույքի և Տեկորի տաճավ բազիլիկ եկեղեցիները:* Անուիեստ եկեղեցաշինության մեջ առաջ եկան կենտրոնագմբեթ կառույցները, որոնք ավելի դիմացկուն էին երկրաշարժերի ժամանակ: Երդիկավոր քարաշեն ծածկերը կառուցվում էին հնուց եկող հազարաշեն կրչվող ձևի օրինակով:



Վարդաշապատի Ա. Գայանե եկեղեցու ընդհանուր տեսքը. 631 թ.





Մրենի տաճարը. 613 թ.

Եկեղեցաշինության վաղ շրջանի կառույցներից էր Վաղարշապատի Մայր տաճար Ա. Էջմիածինը, որը հիմնադրվեց IV դարի սկզբին, ապա վերակառուցվեց V դարի 80-ական թթ.: Բագիլիկ շենքի հիմքի վրա է կառուցվել Մայր տաճարի խաչաձև գմբեթակիր շինությունը: Տարոն գավառում, Արցախում, Գառնիում, Դվինում, Արուճում, Աշտարակում, Թալինում և Բագավանում ևս եկեղեցիներ կառուցվեցին:

Նշանակալից էին *Նկանի* (590-ական թթ.), *Մրենի* (613 թ.), *Տոխիսիմնի* (618 թ.), *Գալանի* (631 թ.) և *Զվարթնոցի* (641-661 թթ.) եկեղեցիները:

Ճարտարապետության հետ միասին զարգանում էր նաև *քանդակագործությունը*: Այդ քնագավառի հիասքանչ նմուշներից են Աղձքի դամբարանի, Երերույքի, Զվարթնոցի, Աշտարակի և այլ ճարտարապետական հուշարձանների քանդակները:

Հայկական ճարտարապետության ու քանդակագործության մեջ նոր երևույթ էր *խաչքարը*, որի ակունքներում էր կոթողներ կանգնեցնելու վաղեմի ավանդույթը (հնագույն մենհիրներ, վիշապաքարեր, Արարատյան՝ Վանի թագավորության դարաշրջանի կոթողներ, սահմանաքարեր, թևավոր խաչեր և այլն): Ճարտարապետական մանր կոթողային ձև ներկայացնելով՝ *խաչքարը հայ կերպարվեստի յուրահատուկ տեսակ է*: Խաչքարը պատվանդանի վրա կանգնեցված ալաձև կոթող-խաչարձան է: Այն՝ որպես ճարտարապետական զարդ,

կարող է նաև ազուցվել եկեղեցու որմի մեջ: Խաչքարերը կանգնեցվել են որպես կոթողներ՝ ի նշանավորումն ուղղակի հաղթանակների, պատմական կարևոր իրադարձությունների, տաճարների, եկեղեցիների, աղբյուրների, կամուրջների կառուցման և ի հիշատակ նախնիների: Խաչքարի արվեստը դարերի ընթացքում նշանավոր վարպետների ստեղծագործ աշխատանքի շնորհիվ անզուգական կատարելության հասավ:

IV-VII դդ. կառուցված եկեղեցիները զարդարված էին *խճանկարներով* և *որմնանկարներով* (Քասաղ, Ս. Էջմիածին, Տեկոր, Զվարթնոց, Արուճ):

Հայ մատենագրության մեջ վաղմիջև դարյան շրջանից զարգացել է նաև գրքերը մանրանկարներով զարդարելու արվեստը, որը հետագա դարերում մեծ վերելք է ապրել: Պահպանված հայկական առաջին մանրանկարները (VI-VII դդ.) չորսն են, որոնք ունեն ավետարանական բովանդակություն: Հայտնության թեմային վերաբերող մանրանկարները կատարված են տպավորիչ գունազեղությամբ, իսկ կերպարների դեմքերն արտահայտչորեն ազգային ինքնատիպություն են կրում: Դրանք ներմուծված են «Էջմիածնի Ավետարանի» (989 թ.) ձեռագրի վերջում և պահպանվել են VI դ. փղոսկրյա կազմի տակ:

Վաղմիջնադարյան Հայաստանում զարգացել են նաև *եկեղեցական երգն ու երաժշտությունը*: Մեկրոպ Մաշտոցը, Սահակ Պարթևը, Կոմիտաս կաթողիկոսը հորինել են *չարականներ*՝ եկեղեցական արարողություններին և տոներին երգելու համար: Իսկ թատերական կյանքն արտահայտվել է թատերականացված խաղերի և հանդեսների ձևով:

Ուշագրավ էին հայ ոսկերիչների ստեղծած գործերը: Գեղարվեստական խեցեղենն ու ապակեղենը լայն կիրառություն են ունեցել հնադարյան ժամանակաշրջանից: Արմավիրում, Արտաշատում, Գառնիում և Դվինում հայտնաբերվել են գեղեցիկ զարդեր և քազմագույն անոթներ, ջրամաններ, պնակներ, թասեր, կարասներ և ապակույց պատրաստված տարբեր սրվակներ:

Հայկական արհեստագործության և արվեստի գյուխագործոցների համրավը քարածվեղ էր Հայաստանի սահմաններից դուրս: Վաղ միջնադարում արեղծված հարուստ

մշակութային արժեքները պարարտ հող նախապարտաստեցին հերագայում հայ մշակույթի հարստման և բուն գարգացման համար:

### Հարցեր և առաջադրանքներ

1. Ինչ տեղեկություններ է պարունակում Սեբեոսի «Պատմութիւնը»: Ո՞ր շրջանի իրադարձությունների պատմությանն է նվիրված Մովսես Կաղանկատվացու աշխատությունը: Ո՞վ է «Պատմութիւն Տարօնոյ» երկի հեղինակը: Ի՞նչ իրադարձությունների մասին է պատմում Անուղ Վարդապետի աշխատությունը:
2. Ի՞նչ գիտեք Անանիա Շիրակացու տիեզերագիտական հայացքների մասին:
3. Աշխարհագրական բնույթի ինչ աշխատություն է ստեղծվել վաղմիջնադարյան Հայաստանում:
4. Դվինի 554 թ. եկեղեցական ժողովը ինչ որոշումներ է կայացրել տոմարի վերաբերյալ:
5. Քրիստոնեությունը ընդունելուց հետո Հայաստանում ո՞ւմ էր պատկանում օրենքների մշակման իրավունքը: Ինչո՞վ է հայտնի «Կանոնագիրը Հայոց» երկը, ո՞վ է դա կազմել:
6. Վաղմիջնադարյան հայկական եկեղեցական ինչ շինություններ կարող եք նշել: Նկարագրե՞ք դրանք: Ի՞նչ է խաչքարը: Ո՞ր շրջանին են վերաբերում հայկական առաջին մանրանկարները:

## Թեմա 2. ՀԱՅԿԱԿԱՆ ՄՇԱԿՈՒՅԹԸ X-XIV ԴԱՐԵՐՈՒՄ

### § 1. ՄՇԱԿՈՒՅԹԻ ՎԵՐԵԼՔԸ: ԿՐԹՈՒԹՅՈՒՆԸ

**Հայ մշակույթի վերելքի պատմական պայմանները:** Արաբական տիրավետության ժամանակաշրջանում հայկական մշակույթն անկում ապրեց: Իրավիճակը փոխվեց հայոց անկախ պետականության վերականգնման, Բագրատունյաց թագավորության հաստատման շրջանից:

Հայկական մշակույթի նոր վերելքը ապված էր նաև տնտեսական կյանքում ռեղի ունեցող կարևոր տեղաշարժերի ետ: Քաղաքային բնակչությունը, որը հիմնականում զբաղված էր արհեստագործությամբ և առևտրով, արդեն չէր բավարարում գոյություն ունեցող կրթական համարգով, որը հիմնականում տալիս էր ստովածարանական գիտելիքներ: Քաաքներում ապրող հարուստ առևտրաանները և արհեստավորները սովորաբար իննց ձեռքում կուտակված միջոցների մի

մասը ծախսում էին եկեղեցիներ, առանձնատներ կառուցելու, դպրոցներին նյութական աջակցություն ցույց տալու և իրենց երեխաներին ավելի բարձր կրթության տալու համար: Այդպիսի գործունեությամբ նրանցից հետ չէին մնում հայկական իշխանական և արքայական տների ներկայացուցիչները:

Նախորդ ժամանակաշրջանում մշակութային կյանքի հիմնական կենտրոն վանքերի կողքին այժմ նման կենտրոն են դառնում քաղաքները՝ *Անին, Վանք, Դվինը, Կարսը, Արծնք, Սիսք, Տարսնք, Աղանակ:*

X-XIV դդ. հայկական մշակույթի զարգացման կարևոր առանձնահատկություններից մեկն այն էր, որ վերելքը ոչ միայն հայրենի հողի վրա էր, այլև Հայաստանից դուրս: Առաջավոր Ասիայի տարբեր շրջաններում և քաղաքական ու մշակութային



տարաբնույթ միջավայրերում հայտնված հայությունն իր ինքնության խնդիրը հիմնականում լուծում էր հայկական մշակույթի պահպանման և զարգացման միջոցով: Այդ պատճառով գաղթավայրերում ևս առաջանում էին հայկական մշակույթի կենտրոններ:

Սելջուկյան արշավանքներից մինչև Ջաքարյանների իշխանության հաստատումը հայկական մշակույթը գերազանցապես վերելք էր ապրում Կիլիկյան Հայաստանում: Իր գոյության ողջ ընթացքում Կիլիկյան Հայաստանը սերտ հարաբերությունների մեջ էր խաչակրաց Արևելքի, Բյուզանդիայի և մուսուլմանական երկրների հետ, որը մեծ ազդեցություն ունեցավ նաև հայկական մշակույթի զարգացման վրա, քանի որ այն իր մեջ ներառեց տարաբնույթ մշակույթների որոշ հատկանիշներ: Այս պայմաններում *համահայկական մշակութային կենտրոնի գործառույթն* իր վրա վերցրեց *Հայոց կաթողիկոսությունը*, որը, տեղից տեղ տեղափոխվելով, հաստատվեց Հռոմկայում (1151–1292 թթ.), ապա՝ Սսում (1292–1441 թթ.):

### Դպրոցները և համալսարանները:

Անիի Բագրատունյաց թագավորության, Կիլիկյան Հայաստանի և Ջաքարյանների իշխանության ժամանակաշրջանում նպաստավոր պայմաններ էին ստեղծվել նոր կրթական համակարգի առաջացման և զարգացման համար: Հասարակության սոցիալ-տնտեսական և քաղաքական կյանքի աշխուժացումը նպաստում էր կրթական գործի բուռն վերելքին: Կրթության ընագավառում ի հայտ եկան նոր երևույթներ: Արհեստը, առևտուրը և ապրանքադրամական հարաբերությունները կրթությանը նոր պահանջներ էին ներկայացնում, քանզի հասարակությանն անհրաժեշտ էին ոչ միայն կրոնափոխոփայական, այլև կիրառական գիտելիքներ ունեցող մարդիկ:

X դ. նախորդ ժամանակաշրջանից ժառանգեց կրթության կազմակերպման և գիտելիքների հարողման այնպիսի կարևոր քաղաղրիչ, ինչպիսին էր *«յոթ ազար սովևարների»* համակարգը: Այն բաղկացած



Սր Գրիգոր Տաթևացին իր աշակերտների հետ, Գրիգոր Տաթևացի, Սաղմունների մեկնություն, 1449 թ.

էր երկու ենթահամակարգերից՝ *Եղբայ* և *Քայսակ*: Առաջինը ներառում էր քերականությունը, տրամաբանությունը, ճարտասանությունը, իսկ երկրորդը՝ թվաբանությունը, երկրաչափությունը, երաժշտությունը, աստղագիտությունը:

Դպրոցները, որոնք հիմնականում եկեղեցու տնօրինության տակ էին, բաժանվում էին *ծիսական*, *վանական* և *լուսնարային* տիպերի: Արդեն IX դ. վանական և տաճարային դպրոցների հիման վրա ձևավորվում էին *նոր պիպի դպրոցներ՝ վարդապետարաններ*:

Քաղաքներում եկեղեցու իրավասությունից դուրս հիմնադրվում էին *աշխարհիկ դպրոցներ*, որոնց մի մասը վերածվում էր բարձրագույն տիպի դպրոցների:

Ուսումնագիտական գործի արդյունավետ կազմակերպման համար մեծ նշանակություն ուներ նաև անհրաժեշտ գրականության առկայությունը, ուստի դպրոցներին կից գոյություն ունեին *մազինադարաններ*: Գիրքը ձեռագիր էր՝ գրված մագաղաթյա թերթերի վրա, ուստի շատ թանկ արժեք և պահվում էր հատուկ խնամքով:



Գրիգոր Նարեկացի, Օնրուն, Նարեկ, 1390 թ.

X–XIV դդ. ուսումնագիտական գործը կազմակերպող նշանավոր գործիչներից էին *Գրիգոր Մագիարոսը*, *Հովհաննես Իմաստասերը*, *Անանիա Նարեկացին*, *Ներսես Մշեցին*, *Եսայի Նչեցին*, *Ներսես Լամբրոնացին*, *Վահրամ Բարունին*, *Գրիգոր Տաթևացին*:

X–XIV դդ. կրթական համակարգը բաղկացած էր երկու՝ տարրական և բարձրագույն տիպի դպրոցներից: Բարձրագույն տիպի դպրոցում կամ վարդապետարանում ուսումը տևում էր 7–8 տարի: Գասրնթացը հաջողությամբ յուրացրած շրջանավարտը ստանում էր *վարդապետական գախազան*, որը նրան իրավունք էր տալիս զբաղվելու ուսուցչությամբ, քարոզչությամբ և գիտական գործունեությամբ: Յուրաքանչյուր վարդապետարանում գիտության որևէ բնագավառ ուներ զերակա ուղղություն:

Միջնադարյան Հայաստանի նշանավոր ուսումնագիտական կենտրոններից էին *Սանահինի* և *Հաղպատի վարդապետարանները*: Իրենց գիտամանկավարժական գործունեությունն այստեղ են անցկացրել ժամանակի նշանավոր գործիչներ Դավիթ

Այվկաորդին, Վարդան Արևելցին, Հովհաննես Երզնկացին:

Ժամանակի նշանավոր կրթական կենտրոններից էր նաև *Նարեկի վարդապետարանը*, որն իր զարգացման քարձակետին հասավ *Անանիա Նարեկացու* ուսուցչապետության տարիներին: Այստեղ է կրթություն ստացել աշխարհահռչակ բանաստեղծ Գրիգոր Նարեկացին:

Եթե IX–XI դդ. համարվում են բարձրագույն դպրոցի կազմակերպման ժամանակաշրջաններ, ապա XII դարից սկսվում է նրանց վերելքի ժամանակաշրջանը: Դրանց մի մասը ձեռք է բերում համահայկական նշանակություն: Այս տեսակետից մեծ էր *Ասիի վարդապետարանի* դերը, որի ուսուցչապետ *Հովհաննես Իմաստասերը* մշակեց վարդապետական կրթության նոր ծրագիր: Այն բաղկացած էր երկու բաժնից: Առաջինում ներկայացված էր դասավանդվող առարկաների ցանկը, իսկ երկրորդում՝ հանձնարարվող գրականությունը:

Հայկական մշակույթի զարգացման գործում նշանակալից դեր խաղաց նաև *Նոր Գեղիկի* (Գոշավանք) վարդապետարանը, որն իր ծաղկումն ապրեց ուսուցչապետ *Մսիքթաթ Գոշի* օրոք: Այստեղ է կրթություն ստացել նշանավոր պատմիչ Կիրակոս Գանձակեցին:

Հայ մշակույթի զարգացման մեջ թերևս ոչ մի ուսումնագիտական կենտրոն այնքան կարևոր դեր չի խաղացել, որքան *Գրաձորի համարարանը*: 1280–ական թթ. նշանավոր մատենագիր *Ներսես Մշեցին* հիմնադրում է Աղբերց վանքի դպրոցը, որը Եսայի Նչեցու ռաբունապետության տարիներին հայտնի է դառնում *Գրաձորի համարարան* անունով: Ուսումնագիտական գործընթացի կազմակերպման տեսակետից այն նման էր միջնադարյան Եվրոպայում ծնունդ առած համալսարաններին: Համալսարանի ղեկավարը կոչվում էր ռաբունապետ, իսկ դասախոսները՝ ռաբունիներ: Համալսարանն ուներ երեք բաժանմունք, որոնք կոչվում էին ուսումնարաններ: Դրանք էին՝ գրչության արվեստի, հասարակական ու քնական գիտությունների և երաժշտության:



**Գրաձորի համալսարանը համահայկական ճանաչում ունի:** Բարձրագույն կրթություն ստանալու համար այստեղ սովորելու էին գալիս ինչպես Հայաստանի տարբեր շրջաններից, այնպես էլ հայկական գաղթավայրերից:

Հայ մշակույթի զարգացման մեջ մեծ դեր է խաղացել նաև **Տաթևի համալսարանը:** Այն բեղմնավոր գործունեություն է ծավալել հատկապես XIV դ. երկրորդ կեսին–XV դ. սկզբին, երբ համալսարանի ուսումնագիտական աշխատանքները ղեկավարում էին նշանավոր գիտնականներ **Տովհան Ռոտունցին** և **Գրիգոր Տաթևացին:** Վարդապետական աստիճան ստանալու համար համալսարանի սաները ներկայացնում էին ավարտական աշխատանք, որը հաջողությամբ պաշտպանելու դեպքում ուսուցչությամբ, քարոզչությամբ և գիտական աշխատանքով զբաղվելու իրավունք էին ստանում:

Կրթական համակարգի և մշակույթի զարգացման գործում որոշակի դեր խաղացին նաև հայ հասարակության մեջ գործող կաթոլիկ քարոզիչների և նրանց հայ գործընկերների հիմնած հոգևոր–մշակութային կենտրոնները: Դրանցից առավել նշանակալից էին Արտազ զավատի Ս. Թադևոս առաքյալի վանքին կից գտնվող **Ծործորի** և **Քոնայի դպրոցները:** Դրանց ուսումնական ծրագրերը ներառում էին հայկական և արևմտաեվրոպական կրթական համակարգի հատկանիշներ: Ուսումնագիտական ինքնուրույն աշխատություններից բացի, այստեղ աշխատող գիտնականները մեծ ավանդ ներդրեցին արևմտաեվրոպական գիտական գրականությունը հայերեն թարգմանելու ուղղությամբ:

Կիլիկյան Հայաստանի վերելքին և Մերձավոր Արևելքում հայկական գաղթավայրերի ձևավորմանը զուգահեռ առաջանում էին հոգևոր–մշակութային և կրթական նոր կենտրոններ:

Կիլիկյան Հայաստանում կրթական գործի կազմակերպումը տնօրինում էր ոչ միայն Հայոց եկեղեցին, այլև պետությունը: Կիլիկիայում գործող բարձրագույն դպրոցների շարքում մեծ հռչակ էր վայելում **Սսի համալսարանը**, որը կրում էր նրա հիմնադրմանը աջակցած նշանավոր մատենագիր **Ներսես Լամբրոնացու անունը:** Սսի համալսարանում էին կրթություն ստանում Կիլիկյան Հայաստանի պետական գործիչները և գիտության նվիրյալները:

Հայ մշակույթի, մասնավորապես մանրանկարչության, գրչության արվեստի և երաժշտության զարգացման գործում մեծ դեր խաղաց **Տոմկրայի** կաթողիկոսարանին կից **դպրոցը:**

Կիլիկյան Հայաստանի վանական տիպի դպրոցների շարքում հատկապես մեծ դեր խաղաց **Սկևոսայի դպրոցը**, որն իր գոյությունը պահպանեց շուրջ 200 տարի: Այն հիմնադրել էր Ներսես Լամբրոնացին: Այստեղ դասավանդվող առարկաների շարքում առանձնահատուկ տեղ էին զբաղեցնում մանրանկարչությունը, երաժշտությունը և գրչության արվեստը: Այստեղ է սովորել և աշխատել նշանավոր մանրանկարիչ Գրիգոր Մլիճեցին:

Կիլիկյան Հայաստանում գործող բարձրագույն դպրոցներից էին նաև Մեծքարի, Դրազարկի և Ակների դպրոցները, որոնց հովանավորում էր հայոց արքունիքը:

### **Հարցեր և առաջադրանքներ**

1. Պարզաբանեք այն նախադրյալները, որոնք նպաստեցին հայ մշակույթի վերելքին: Ինչ գործառույթ ստանձնեց Հայոց կաթողիկոսությունը:
2. Ինչ գործոններ նպաստեցին կրթության բարելավմանն ու զարգացմանը: Ինչ տիպի դպրոցներ էին գործում: Ինչու էին անհրաժեշտ մատենադարանները: X–XIV դդ. կրթական գործի ինչ նշանավոր կազմակերպիչներ գիտեք:
3. Ներկայացրեք X–XIV դդ. կրթական համակարգը: Ինչ նշանավոր համալսարաններ գիտեք: Որոնք էին նշանավոր ուսումնագիտական կենտրոնները Կիլիկիայում:

## § 2. ՊԱՏՄԱԳՐՈՒԹՅՈՒՆԸ

IX դ. վերջերից սկսած՝ հայ պատմագրության վերելքը պայմանավորված էր ոչ միայն երկրի ներսում, այլև միջազգային հարաբերություններում տեղի ունեցող բոլոր իրադարձություններով, որոնք առնչվում էին հայ ժողովրդի հետ: X–XIV դդ. հայ պատմագրությունը չէր կարող բավարարվել պատմության շարադրման այն ժանրերով, որոնք ժառանգություն էին մնացել նախորդ շրջանից, ուստի առաջանում են նաև նոր ժանրեր, որոնց թվում էին *պիեզերական պատմությունը* և *փարեզությունը* (ժամանակագրությունը):

Հայոց պատմության շարքը շարունակում է նշանավոր հասարակական–քաղաքական գործիչ, կաթողիկոս *Հովհաննես Դրասխանակերպցին* (897–929 թթ.): Նրա գրչին է պատկանում «Պատմութիւն Հայոց» աշխատությունը, որտեղ հեղինակը դեպքերի շարադրանքը սկսում է Հայկի ու Բելի ավանդությունից և հասցնում 924 թ.: Մասնավորապես Սմբատ I-ի և Աշոտ Երկաթի ժամանակաշրջանի պատմությունը նա շարադրում է մանրամասն՝ որպես դեպքերի մեծ մասի ականատես, իսկ որոշ դեպքերում՝ նաև մասնակից:

Հայոց պատմության շարքի հաջորդ պատմագիրը *Արիարակես Լսոսրիվերցին* է (XI դ.), որի «Պատմութիւն» աշխատությունը ներառում է 1000–1071 թթ. ընկած ժամանակաշրջանի իրադարձությունները, հայ–բյուզանդական հարաբերությունները, սելջուկյան արշավանքներն ու աղանդավորական շարժումները և այլն:

Հայոց պատմության ժանրով է իր աշխատությունը գրել նաև XIII դ. պատմագիր *Կիրակոս Գանձակեցին*: Նրա «Հայոց պատմությունն» ընդգրկում է քրիստոնեության ընդունումից մինչև 1265 թ. ընկած ժամանակահատվածը: Հեղինակը մանրամասն ներկայացնում է հայ–վրացական հարաբերությունները, Զաքարյանների իշխանությունը, Կիլիկյան Հայաստանում տեղի ունեցած կարևոր դեպքերը, հայ–մոնղոլական առնչությունները:

Հայ պատմագրության մեջ համաշխարհային պատմության շարադրանքի ժանրը որպես նոր ուղղություն, հիմնադրել է *Սրբեփանոս Տարունեցին* (Ասողիկ), որն ապրել և ստեղծագործել է X դ. երկրորդ կեսին–XI դ. սկզբին: Նրա աշխատությունը կոչվում է «*Տիեզերական պատմություն*» և բաղկացած է երեք բաժիններից: Առաջին բաժինն ընդգրկում է հնագույն շրջանից մինչև Հայաստանում հեթանոսության ավարտը: Երկրորդ բաժինը ներառում է Հայաստանում քրիստոնեության ընդունումից մինչև Բագրատունյաց թագավորության հաստատումը: Ամենաթեմքավորը աշխատության երրորդ բաժինն է, որն ընդգրկում է 885–1004 թթ., քանի որ հեղինակը Հայաստանի պատմությունը հանգամանալից շարադրում է՝ շաղկապված Արաքսկան խալիֆայության և Բյուզանդիայի պատմության հետ:

Համաշխարհային պատմություն շարադրելու երկրորդ փորձը կատարեց XIII դ. նշանավոր մանկավարժ, եկեղեցական գործիչ *Վարդան Արևելցին*: Նրա աշխատությունը, որը նույնպես կոչվում է «Տիեզերական պատմություն», ընդգրկում է «անսկիզբ» ժամանակներից մինչև 1267 թ.: Որպես ականատես և իրադարձությունների մի մասի մասնակից՝ Վարդան Արևելցին մանրամասն շարադրել է մոնղոլական ժամանակաշրջանի պատմությունը:

X–XIV դդ. հայ պատմագրության մեջ շարունակվում էր Հայաստանի առանձին տարածաշրջաններին նվիրված պատմության շարադրանքը: Այս ժանրի երևան գալը պայմանավորված էր նրանով, որ պետականության բացակայության դեպքում Հայաստանի որոշ տարածքներ ներառվում էին վարչաքաղաքական այլ միավորումների կազմում, կամ ստեղծվում էին տեղական թագավորություններ և իշխանություններ: Այս ժանրի հիմնադիրը համարվում է Մովսես Կաղանկատվացին:

Այս ժանրով ստեղծագործող հաջորդ պատմիչը *Թովմա Արծրունին* էր (IX դ.



երկրորդ կես–X դ. սկիզբ): Նրա աշխատությունը կոչվում է «Արծրունիների տան պատմություն» և նվիրված է Վասպուրական նահանգի ու Արծրունիների տոհմի պատմությանը: Այստեղ հեղինակը ներկայացնում է Արծրունիների ծագումը, նրանց պատմությունը մարզպանության և խալիֆայության շրջանում: Ամենաարժեքավորը աշխատության երրորդ մասն է, որն ընդգրկում է 850 թ. մինչև X դ. սկիզբն ընկած ժամանակահատվածը: Թուվմա Արծրունու պատմությունը շարունակել են այլ հեղինակներ և հասցրել մինչև XIV դ.:

XIII դ. երկրորդ կեսի նշանավոր եկեղեցական–քաղաքական գործիչ **Սյրեխանու Օրբելյանի** աշխատությունը վերնագրված է «Պատմութիւն նահանգին Սիսական» և նվիրված է Սյունիք նահանգի պատմությանը: Աշխատության սկզբում հեղինակը ներկայացնում է Սյունիքի տեղագրությունը, Սյունյաց նախարարական տոհմի առաջացումը, հայ Օրբելյանների իշխանության հաստատումը Սյունիքում և նրանց գործունեությունը: Քրիստոնեությունը մշակեց պատմության շարադրման սեփական ժանրը՝ **ժամանակագրությունը** (տարեգրությունը):

Հայ պատմագրության մեջ այս ուղղության **հիմնադիրը Մսարթնու Ուտհայեցին** է (XI–XII դդ.): Նրա «ժամանակագրությունը» ներառում է 952–1136 թթ. դեպքերն ու իրադարձությունները: Հետագայում այն լրացվել և հասցվել է մինչև 1162 թ.: Մսարթնու Ուտհայեցու ժամանակագրությունը տարածական լայն ընդգրկում ունի, քանզի

ներառում է Առաջավոր Ասիայի ողջ տարածաշրջանի X–XII դդ. պատմությունը:

Հայ պատմագրության մեջ հաջորդ նշանավոր ժամանակագիրը **Սասունել Անեցին** է (XII դ.): Նրա աշխատությունը սկսվում է արարչագործությունից և հասցվում մինչև 1180 թ.: Հետագայում այն լրացվել է տարբեր հեղինակների կողմից: Քրիստոնեությունը մշակել էր ժամանակագրության շարադրման սեփական եղանակը, երբ աշխատությունը պետք է սկսվեր արարչագործությունից և հասցվեր հեղինակի ապրած օրերը: Սասունել Անեցին հետևել է ժամանակագրության շարադրման այս եղանակին: Ժամանակագրության մեջ առավել արժանահավատ ու փաստական հարուստ տեղեկությունները վերաբերում են XII դ., քանզի դրանից առաջ շարադրածը ուրիշ աղբյուրներից համառոտագրված տվյալներ են:

XIII դ. նշանավոր ժամանակագիր էր Կիլիկյան Հայաստանի պետական գործիչ, օրենսգիր **Սմբար Գունդարսարը**: Նրա աշխատությունը, որը հայտնի է «**Տարեգիրք**» անվանումով, ներառում է 951–1272 թթ. իրադարձությունները: Ըստ տարիների՝ նա համառոտ շարադրում է Բագրատունյաց թագավորության շրջանի իրադարձությունները, իսկ առավել մանրամասն՝ Կիլիկյան Հայաստանի պատմության դեպքերը և երևույթները:

X–XIV դդ. հայ պատմիչների և ժամանակագիրների թողած աշխատությունները կարևոր սկզբնաղբյուրներ են ոչ միայն հայ ժողովրդի, այլև Առաջավոր Ասիայի երկրների պատմության ուսումնասիրության համար:

### Հարցիք և առաջադրանքներ

1. Ի՞նչ գործոններ նպաստեցին հայ պատմագրության վերելքին: Արո՞նք էին պատմագրության կարևոր խնդիրները:
2. Նշե՞ք հայ պատմագրության հիմնական ուղղությունները և հեղինակներին: Ներկայացրե՞ք այդ ուղղությունները և դրանց ներկայացուցիչներին աղյուսակի տեսքով՝ նշելով աշխատության վերնագիրը, ընդգրկած ժամանակաշրջանը, ստեղծման ժամանակը և այլն:

### § 3. ԻՐԱՎՈՒՆՔ ԵՎ ԲՆԱՓԻԼԻՍՈՓԱՅՈՒԹՅՈՒՆԸ

**Իրավունքը:** XII դ. սկսած՝ բուն վերելք ապրեց նաև հայ իրավագիտությունը: Նախորդ ժամանակաշրջանում հայ հասարակության իրավական հարաբերությունները կարգավորվում էին սովորության իրավունքով, «Կանոնագիրք հայոց» իրավունքի հավաքածուի մեջ ներառված կանոններով, որոնք հիմնականում մշակվել և ընդունվել էին եկեղեցու կողմից: Կիլիկյան Հայաստանում շրջանառության մեջ դրվեցին նաև բյուզանդական և խաչակրաց օրենքները՝ *սահլաներ* անվանումով: Սակայն սրանք չէին բավարարում հայ հասարակության ներսում ձևավորված նոր երևույթների կարգավորմանը, ուստի անհ-

րաժեշտություն էր գգացվում ստեղծելու օրենքների նոր ժողովածու: Հայկական *ստաջին դաստարանագիրքը սրեղծել է Դավիթ Ալավկատորին* մոտավորապես 1130 թ.: Այնտեղ ներառված են ինչպես եկեղեցական կանոններ, այնպես էլ աշխարհիկ օրենքներ: Դատաստանագիրքը բաղկացած է 97 հոդվածներից, որոնք կարգավորում էին հասարակության քաղաքացիական, ամուսնա-ընտանեկան և քրեական բնագավառները: Դավիթ Ալավկատորին հայ իրականության մեջ առաջին անգամ փորձ արեց իրավական մեկ համակարգի մեջ ներառելու եկեղեցական և աշխարհիկ իրավունքը և ստեղծելու միասնական օրենսդրություն:

Հայ իրավական մտքի հետագա զարգացման վրա որոշակի ազդեցություն ունեցավ նաև *Նեղմա Շնորհալի կաթողիկոսի* (1166–1173 թթ.) հեղինակած *«Թուղթ ընդհանրականը»*, ուր արձանագրված են ամուսնա-ընտանեկան իրավունքի որոշ նորմեր:

Միջնադարի հայ իրավական մտքի *գլոսագործուցը Մխիթար Գոշի «Դաստարանագիրքը»* է, որը կազմվել է 1184 թ.: Այդ ժամանակ Հյուսիսարևելյան Հայաստանում և Կիլիկյան Հայաստանում տնտեսական, քաղաքական և մշակութային կյանքը վերելք էր ապրում, ուստի հասարակական-քաղաքական հարաբերությունները վերափոխվում ու բարդանում էին: Անհրաժեշտ էր ստեղծել նոր դատաստանագիրք, որը կկարգավորեր հասարակության կյանքի բոլոր բնագավառները: Այդ նպատակին Մխիթար Գոշի *«Դատաստանագիրքը»* ծառայեց շուրջ 700 տարի:

Մխիթար Գոշից հետո՝ 1265 թ., *Կիլիկյան Հայաստանում* նոր դատաստանագիրք է կազմում *Սմբատ Գունդարաբլը*: Չնայած այդ դատաստանագրքում տեղ են գտնում օտարերկրյա ծագում ունեցող մի շարք իրավանորմեր, սակայն նրա հիմքում դրվում են գերազանցապես հայկական սովորության իրավունքը, «Հայոց կանոնագիրքը» և

Մխիթար Գոշ





Մխիթար Գոշի «Դատաստանագիրքը»: Սմբատի «Դատաստանագիրքը» բաղկացած էր 117 պարագրաֆներից, որոնք բավարար էին Կիլիկյան Հայաստանի հասարակության իրավական հարաբերությունների ողջ բնագավառը կարգավորելու համար:

Չնայած դատաստանագրքերի երևան գալուն, որոնցում փորձեր էին անում մեկ համակարգում ներառելու աշխարհիկ և եկեղեցական օրենսդրությունը, իրավահարաբերությունների որոշ բնագավառներ դեռևս կանոնակարգվում էին եկեղեցական կանոններով, որոնք ընդունվում էին եկեղեցական ժողովների կողմից: Այս տեսակետից *կարևոր նշանակություն ունեցավ 1243 թ. Սսի նկղնցական ժողովը*, որն ընդունեց հասարակության ամուսնա-ընտանեկան և բարոյական կյանքը կարգավորող չորս երկու տասնյակից ավելի կանոններ:

**Բնափիլիսոփայություն:** XI-XIV դդ. մեծ վերելք ապրեց նաև բնագիտությունը: Բագրատունյաց, ապա Զաքարյանների ժամանակաշրջանում Հայաստանում, այդ թվում՝ Կիլիկիայում զարգացում ապրող քաղաքային կյանքը և կրթական նոր համակարգը նոր խնդիրներ էին դնում բնագիտության առջև:

Մետաղագործության զարգացումը և ճյուղավորումը պահանջում էին քիչ թե շատ ճշգրիտ տվյալներ մետաղների ֆիզիկական և քիմիական հատկությունների ու համաձուլվածքների մասին: Մաթեմատիկական ճշգրիտ տվյալների կարիք ունեին ամրոցաշինությունը և քաղաքաշինությունը: Բնության, շրջակա միջավայրի և մարդու վերաբերյալ գիտելիքները ներառող, սակայն դեռևս լիովին չձևավորված գիտությունները (ֆիզիկա, քիմիա, բժշկություն) շարունակում էին զարգանալ փիլիսոփայության շրջանակներում: *Գիտության այս ճյուղը արագել է բնափիլիսոփայություն անվանումը:* Բնափիլիսոփայության շրջանակներում քննարկում էին նաև աստվածաբանության հետ կապված խնդիրները, ուստի նույն գիտնականը զբաղվում էր բնագիտությամբ, աստվածաբանությամբ և

փիլիսոփայությամբ: Բնափիլիսոփաները աշխատում էին ոչ միայն աստվածաբանության, այլ նաև փիլիսոփայության օգնությամբ հասկանալ և քացատրել, թե ինչ է Աստվածը, ինչու է արարել աշխարհը և մարդուն:

Հայ բնափիլիսոփայության ձևավորման ակունքների մոտ կանգնած է միջնադարի նշանավոր գիտնականներից մեկը՝ *Գրիգոր Մագիստրոս Պակավունին* (մոտ 990-1058 թթ.): Բնագիտության նկատմամբ աճող հետաքրքրությունն իր ազդեցությունը թողեց նաև նրա գիտական գործունեության վրա: Նա հունարենից թարգմանեց Էվկլիդեսի «Տարերք երկրաչափության» աշխատությունը: Գրիգոր Մագիստրոսի կարծիքով՝ գիտելիքը կարելի է ձեռք բերել քանականության, զգայարանների, փորձի և հավատի միջոցով:

Բնափիլիսոփայության ներկայացուցիչները փորձում էին ուսումնասիրել բնության տարրեր երևույթներ, որպեսզի կարողանային գտնել ընդհանուր և մասնավոր օրինաչափությունները: Գրիգոր Մագիստրոսը և Հովհաննես Սարկավազը բնության մեջ գոյություն ունեցող չորս հիմնական տարրերի (ջուր, հող, կրակ, օդ) փոխերգործության մեջ էին որոնում շրջակա միջավայրում տեղի ունեցող երևույթների քացատրությունը:

Բնափիլիսոփայության հետագա զարգացման հիման վրա տեղի էին ունենում բնական գիտությունների ճյուղավորում և նրանցից յուրաքանչյուրի հիմնախնդիրների որոշակիացում: Այսպես՝ նյութական աշխարհի և մարդու վերաբերյալ որոշ գիտելիքներ տեղ էին գտնում բժշկագիտությանը վերաբերող աշխատություններում:

Բնափիլիսոփայության ներկայացուցիչ կարելի է համարել նաև *XII դ.* նշանավոր բժիշկ *Մխիթար Հեղացուն*, որի «Ջերմանց մխիթարութեան» աշխատության մեջ քննարկված են բժշկությանը վերաբերող տարրեր խնդիրներ: Նրա կարծիքով՝ հիվանդությունները ոչ թե չար ուժերի ներգործության արդյունք են, այլ պայմանավորված են բնական, նյութական պատ-

ճաներով: Այսպես՝ հիվանդ մարդու բարձր ջերմությունը կապված է մարմնում առաջացած այրման և նեխման հետ:

XIII դ. նշանավոր գիտնական, Կիլիկյան Հայաստանի քաղաքական գործիչ **Վահրամ Բարունին** թողել է փիլիսոփայությանը վերաբերող մի շարք աշխատություններ: Նա գտնում էր, որ իրական աշխարհը գոյություն ունի՝ անկախ մարդու գիտակցությունից: Մարդն այդ աշխարհի մասին առաջին հերթին իմանում է իր զգայարանների միջոցով, ապա քանակականությամբ ստեղծում է ընդհանուր հասկացություններ:

Հայ քննափիլիսոփայության մյուս ականավոր ներկայացուցիչը **Տոփհաննես Երզնկացին է** (1250–1326 թթ.): Նա համակարգեց հայ քննափիլիսոփայության և փիլիսոփայության նվաճումները և մատնանշեց նրա զարգացման հեռանկարները:

XIV դ. հայ նշանավոր փիլիսոփա **Տոփ**

**հան Որոտնեցու** աշխատությունները նվիրված են տրամաբանության և իմացաբանության խնդիրներին: Նա գտնում էր, որ բնության մեջ իրը գոյություն ունի՝ անկախ այն հանգամանքից, թե մարդը զգայարանների միջոցով այն ընկալում է, թե ոչ: Սակայն Հ. Որոտնեցու կարծիքով՝ մարդը չպետք է բավարարվի միայն զգայարանների միջոցով ձեռք բերած գիտելիքներով, այլ պետք է աշխատի դրանք ձգգրտել քանակականության և փորձի միջոցով:

Միջնադարի ճանաչված փիլիսոփաներից էր **Գրիգոր Տաթևացին** (1340–1410 թթ.): Նա թողել է գիտական հարուստ ժառանգություն, որոնց մեջ նշանավոր են «Գիրք հարցմանց», «Ամուսն հատոր», «Ձմուսն հատոր» աշխատությունները:

X–XIV դդ. հայ քննափիլիսոփայության զարգացումը հիմք դարձավ հետագա դարերի գիտական մտքի զարգացման համար:

### Տարզեր և առաջադրանքներ

1. Ներկայացրե՛ք հայ իրավագիտական մտքի պատմությունը: Ի՞նչ նշանավոր գործիչներ գիտեք: Որո՞նք են նշված ժամանակաշրջանի իրավունքի նշանավոր հուշարձանները:
2. Քննափիլիսոփայական ինչ գիտություններ էին շարունակում զարգանալ փիլիսոփայության շրջանակներում, ընդհանրական ինչ անունով է հայտնի գիտության այդ ճյուղը և ինչ խնդիրներ է ուսումնասիրում: Ներկայացրե՛ք հայ քննափիլիսոփայական և քննափիլիսոփայական նշանավոր ներկայացուցիչներին ու նրանց գործունեությունը:

## § 4. ԳՐԱԿԱՆՈՒԹՅՈՒՆԸ ԵՎ ԱՐՎԵՍԸ

**Գրականությունը:** Մինչև X դ. գեղարվեստական գրականությունն ինքնուրույն քննազավտ չէր և հանդես էր գալիս եկեղեցական ու պատմագիտական գրականության հետ միասնաբար: X դ. գրականությունը ոչ միայն անջատվեց դրանցից և դարձավ մշակույթի ինքնուրույն քննազավտ, այլև առաջացան գրականության տարբեր ժանրեր:

X–XIV դդ. զարգանում էր ժողովրդական քանակաբանությունը, մասնավորապես՝ առակները և հերոսական վիպերգը: Հայ **առակագրության հիմնադիրը Մխիթար**

**Գոշն է**, որը հավաքել և գրի է առել շուրջ 190 առակ: Առակների միջոցով աշխատում են դաստիարակել, համախմբել և լուսավորել ժողովրդին: Այնտեղ սովորաբար քննադատվում են հասարակության մեջ տեղ գտած քացասական երևույթները՝ անարդարությունը, շահամոլությունը, խարդախությունը, բռնանքը: Գոշի առակներում տեղ են գտել նաև ազգային ինքնագիտակցության և օտարների դեմ պայքարելու գաղափարներ:

Հայ առակագրության մյուս ներկայացուցիչը **Վարդան Այգեկցին է** (XII–XIII դդ.):





Տարփի վանքի ընդհանուր տեսքը. IX-XIX դդ.

Նրա առակների հիմնական թեման հասարակական կյանքն է՝ իր դրական ու բացասական կողմերով:

Պատմությունը ավանդվում էր ոչ միայն պատմիչների աշխատություններով, այլև ժողովրդական բանահյուսության, մասնավորապես նրա մի մասը կազմող հերոսական վիպերգերի միջոցներով: Հերոսական վիպերգության նմուշներ եղել են նաև Նախորդ դարաշրջանում, սակայն դրանք իրենց զարգացման գագաթնակետին հասան IX-X դդ., երբ ստեղծվեց «Սասնա ծռեր»-ը: Այն իր մեջ խտացրել և ամփոփել է հայ ժողովրդի հոգևոր կյանքի կարևորագույն կողմերն ու քարոյական արժեքները: Միջնադարյան հայ մշակույթի ոչ մի ստեղծագործության մեջ այնքան ցայտուն ու խորիմաստ չի դրսևորվել հայ ժողովրդի ազատագրական պայքարի գաղափարախոսությունը, որքան «Սասնա ծռեր» վիպերգում: Քանի որ ժողովուրդն ի վիճակի չէր հիմնովին վերափոխելու աշխարհը, ապա վիպերգի հերոս Փոքր Մհերին ուղարկում է քարանձավ՝ այն հույսով, որ կգա աշխարհը վերափոխելու ժամանակը, և Փոքր Մհերը դուրս կգա քարանձավից:

Հայ գեղարվեստական գրականության առաջին նշանավոր դեմքը բանաստեղծ **Գրիգոր Նարեկացին** է (961-1003 թթ.): Դարաշրջանին հուզող խնդիրները դարձան նրա գլխավոր ստեղծագործության՝ «Մատյան ողբերգության» պոեմի թեման: Բանաստեղծը գտնում էր, որ մարդը պետք է այնքան մաքրվի, որ մերձենա Աստծուն: Ուստի Նարեկացին ստեղծում է Մատյանը (Նարեկ)՝ որպես աղոթագիրք, որով յուրաքանչյուր հավատացյալ պետք է խոսեր Աստծո հետ:



Սանահինի վանքը հարավ-արևելքից. X-XIII դդ.

Հայ գրականության հետագա զարգացման վրա մեծ ազդեցություն ունեցան նաև Նարեկացու գրած շուրջ քսան տաղերը: Չնայած դրանց նյութը հիմնականում վերցված է Աստվածաշնչից, սակայն դրանցում տեղ են գտել քնության, երկրային կյանքին նվիրված գեղեցիկ հաստիքներ:

Հայ գրականության հետագա վերելքը կապված է ժամանակի նշանավոր հասարակական-քաղաքական գործիչ, կաթողիկոս **Ներսես Շնորհալու** (1100–1173 թթ.) գրական ստեղծագործությունների հետ: Նրա գրական ժառանգությունը բաժանված է երկու մասի՝ արձակ և չափածո: Առաջինն ընդգրկում է Ներսես Շնորհալու հասարակական-քաղաքական գործունեության հետ կապված թղթերը, նամակները, մասնավորապես «Թուղթ ընդհանրականը», իսկ երկրորդը՝ քանաստեղծությունները, պոեմները, հանելուկները: Բանաստեղծի ամենանշանավոր ստեղծագործությունը «**Տղթ Եղևնոյ**» պոեմն է: Չնայած պոեմի ստեղծման համար առիթ դարձավ Եղևնիա քաղաքի գրավումը մուսուլմանների կողմից, այնուամենայնիվ այնտեղ առաջ են քաշված ցրված հայությանը հայրենիքում համախմբելու, ներքին միասնություն ստեղծելու և օտար նվաճողների դեմ պայքարելու գաղափարներ:

Հայ միջնադարյան գրականության մեջ աշխարհիկ թեման առավել մեծ տեղ է զբաղեցնում **Ֆրիկի** (XIII–XIV դդ.) ստեղծագործություններում: Միջնադարի ոչ մի բանաստեղծ այդքան խորաթափանց ու հստակ չի նկարագրել մոնղոլ նվաճողների նկատմամբ հայ հասարակության մեջ առաջացած դժգոհությունը, որքան Ֆրիկն իր քանաստեղծություններում: Նրա ստեղծագործություններում մեծ տեղ է զբաղեցնում նաև սոցիալական թեման: Նա քննադատում է հասարակության մեջ գոյություն ունեցող անարդարությունը, անհավասարությունը, աշխատավոր քնակչության շահագործումը և հարստահարումը:

**Ճարտարապետությունը և քանդակագործությունը:** X–XIV դդ. մեծ վերելք էր

ապրում նաև ճարտարապետությունը: Այս քնագնալատում հատկապես *զարգանում են քաղաքաշինությունը, ամրոցաշինությունը և եկեղեցաշինությունը:*

X–XIV դդ. նոր քաղաքների հատակագծման և կառուցման ժամանակ մեծ կարևորություն էին տալիս տեղանքին, առևտրական ճանապարհների վրա գտնվելուն, ջրամատակարարման հնարավորություններին: Սովորաբար քաղաքը բաղկացած էր երեք մասից՝ միջնաքերը, բուն քաղաք (շահաստան), արվարձան: Անկախ իրենց զբաղեցրած տեղանքից՝ միջնաքերը և շահաստանը պարսպապատվում էին, իսկ արվարձանը պարսպից դուրս էր և ամրացված չէր: Միջնաքերը սովորաբար կառուցվում էր դժվարամատչելի տեղանքում և պարսպապատվում էր: Այստեղ կառուցում էին թագավորական և իշխանական պալատներ, առանձին եկեղեցի, մթերքի շտեմարաններ և զենքի պահեստներ: Մայրաքաղաքի միջնաքերում էր արքունի գանձարանը:

Բագրատունյաց Հայաստանում, Զաքարյանների իշխանությունում, Կիլիկյան Հայաստանում մեծ վերելք էր ապրում նաև ամրոցաշինությունը: Այսպես՝ Կիլիկյան Հայաստանում կար 112 բերդ: Սովորաբար ամրոցը բաղկացած էր երկու մասից՝ միջնաքերից և բուն ամրոցից: Երկուսն էլ ունեին իրենց առանձին պարիսպները: Միջնաքերում էր իշխանական դոյակը՝ իր օժանդակ կացարաններով, իսկ բուն ամրոցում գինավորների համար նախատեսված շինությունները, արհեստանոցները և օժանդակ շինություններն էին:

X–XIV դդ. մեծ վերելք էր ապրում նաև եկեղեցական ճարտարապետությունը: Այս ժամանակաշրջանում կառուցում էին ոչ միայն առանձին եկեղեցիներ և վանքեր, այլև *վանական համալիրներ:* Վերջինս բաղկացած էր ոչ միայն պաշտամունքային շինություններից, այլև աշխարհիկ նշանակություն ունեցող շենքերից: Վանական համալիրներին կից կառուցվում էին ուսումնագիտական կենտրոններ, մատենադարաններ, ձեռագրատներ, արհեստանոցներ և ուսումնական շինություններ: Վանական համա-




լիրներից հատկապես նշանավոր էին Տաթևը, Մանախինը, Հաղպատը, Աևանը, Սկևտան, Այրիվանքը (Գեղարդավանք), Գոշավանքը: Գեղարդավանքը զարմացնում է իր ճարտարապետական ինքնատիպությամբ: Այն իր մեջ ընդգրկում է աշխարհի եզակի եկեղեցական կառույցներ, որոնց մի մասը փորված է առեղի ժայռի (այր) մեջ՝ երկու հարկով: Դրա համար էլ այն կոչվում է նաև Այրիվանք:

Ճարտարապետության զարգացման գործում նշանակալից դեր խաղացին *Մանվել* և *Տրդատ* ճարտարապետները: Մանվել ճարտարապետը նախագծել և կառուցել է Աղթամարի Ս. Խաչ եկեղեցին, իսկ Ռստան քաղաքում՝ Արծրունիների թագավորական պալատը: Բագրատունիների արքունի ճարտարապետ Տրդատը հիմնականում աշխատել և ստեղծագործել է Անի քաղաքում: Այստեղ նրա նախագծով կառուցվել են Մայր տաճարը, որի շինարարությունն ավարտվել է 1001 թ., և Ս. Գրիգոր Լուսավորչի զվարթնոցատիպ եկեղեցին:

Անի-Շիրակին ենթակա թագավորությունների տիրակալներն աշխատում էին եկեղեցիներ կառուցելու ճանապարհով ամրապնդել իրենց իշխանությունը և հեղինակությունը: Կիլիկյան Հայաստանում եւ մեծ ուշադրություն էին դարձնում եկեղեցական շինությունների կառուցմանը:

X–XIV դդ. քանդակագործությունը դեռևս ինքնուրույն քնագավառ չէր և զարգանում էր ճարտարապետությանը զուգընթաց: Քանդակները դրվում էին ոչ թե քաղաքների հրապարակներում, փողոցներում, շենքերի առջև, այլ եկեղեցիների և շենքերի պատերի վրա: Սովորաբար տեղադրում էին մարդկանց, կենդանիների, բույսերի, զանազան առարկաների պատկերներ և բարդ հյուսվածքներ (Աղթամարի Ս. Խաչ, Անիի Տիգրան Հոնենցի, Այրիվանքի եկեղեցիներ) և ընտրում էին աստվածաշնչյան–կրոնական ու աշխարհիկ թեմաներ: Այսպես՝ Աղթամարի Ս. Խաչ եկեղեցու պատերին պատկերված է խաղողի մշակության ամբողջ ընթացքը՝ որթի տնկումից մինչև գինու ստացումը:



Հովհաննես ավետարանիչ  
Չեյթունի Ավետարան, Թորոս Ռոսլին, 1256 թ.

IX–X դդ. քանդակագործության մեջ արվեստի ինքնուրույն ճյուղ դարձավ *խաչքարերի* արվեստը, որը յուրահատուկ է միայն հայկական մշակույթին: Խաչքարերն ունեցել են տարբեր նշանակություն և կիրառություններ: Ամենից տարածվածը գերեզմանների վրա դրվող մահարձաններն են: XI–XIV դդ. խաչքարեր էին կանգնեցվում նաև որևէ նշանակալից իրադարձության կապակցությամբ: Սովորաբար խաչքարերի վրա թողնվում էին արձանագրություններ, որոնք բովանդակում են խաչքարը ստեղծելու ժամանակը և առիթը, վարպետի և հուշարձանը կանգնեցնելու վերաբերյալ տեղեկություններ: Նշանավոր խաչքարագործ վարպետներից էին *Պողոսը* (Գոշավանք) և *Մամիկը* (Նորավանք): X–XIV դարերից մեզ են հասել տասնյակ հազարավոր խաչքարեր:

**Նկարչությունը:** XI–XIV դդ. մեծ վերելք ապրեցին նաև *մանրանկարչությունը* և *որմնանկարչությունը*: Մանրանկարչությունը՝ որպես արվեստի ճյուղ, ծառայում էր ձեռագրերի ձևավորմանը և զարդարմանը:

Մանրանկարներով զարդարված առաջին ամբողջական ձեռագիրը, որը հասել է մեզ, վերաբերում է 851 թ.: Հայ մանրանկարչությունը հատկապես մեծ վերելք ապրեց XI–XIV դդ.: Այս ժամանակաշրջանում ստեղծված ձեռագրերի մեծ քանակությունը վկայում է կրթական մակարդակի բարձրացման մասին: Շատ հաճախ առանձին անհատներ պատվիրում էին նկարագարող ձեռագրեր: Ձեռագիր պատվիրելը դարձել էր աստվածահաճո գործ: Մանրանկարչության բուռն վերելքը նպաստեց մի շարք դպրոցների առաջացմանը, որոնք միմյանցից տարբերվում էին ձեռագրի ձևավորման կանոններով և ընտրված թեմատիկայով: Դրանցից էին Սկևռայի, Դրագարկի, Հոռովկայի, Վասպուրականի և Սյունիքի դպրոցները: Ինչպես քանդակագործները, այնպես էլ մանրանկարիչներն իրենց գործերի համար իբրև նյութ ընտրում էին և աստվածաշնչյան, և աշխարհիկ իրականությունից վերցված կերպարներ: Այդ ժամանակաշրջանի նշանավոր մանրանկարիչներից էին **Գրիգոր Միջնցին** (Սկևռա), **Թորոս Ռուպինը** (Հոռովկա), **Սարգիս Պիծակը** (Սիս), **Մամիկը** (Գլաձոր), **Թորոս Տարնասցին** (Գլաձոր) և ուրիշներ:

Մանրանկարչության զուգահեռ X–XIV դդ. Հայաստանում և Կիլիկիայում զարգանում էր որմնանկարչությունը: Բագրատունի, Արծրունի, Սյունի, Հեթումյան թագավորները և Զաքարյանները իրենց կառուցած պալատների, ընդունելությունների դահլիճների և տաճարների ներսի պատերը զարդարել էին տալիս որմնանկարներով ու զարդանախշերով:

Տաճարների ներսի որմնանկարների նյութը հիմնականում վերցվում էր Հին և Նոր Կտակարաններից: Որմնանկարներն արվում էին այնպիսի կանոններով, որ վերարտադրվեն արարչագործությունից մինչև Հիսուս Քրիստոսի երկրային կյանքն ընկած ժամանակահատվածի կարևոր դրվագները: Այսպիսի կանոններով են կատարվել Աղթամարի Ս. Խաչ, Տաթևի, Անիի Տիգրան Հոնենցի և Ախթալայի եկեղեցիների որմնանկարները: Որոշ որմնանկարներում Աստվածաշնչից վերցված կերպարների կողքին հանդիպում են նաև պատմական գործիչների դիմանկարներ: Այսպես՝ Աղթամարի Ս. Խաչի որմնանկարներում պատկերված է Գագիկ Արծրունին, իսկ Տիգրան Հոնենցի եկեղեցում՝ Տրդատ III-ը և Սբ Գրիգոր Լուսավորիչը:

### Հարցեր և առաջադրանքներ

1. Մինչև X դարը ինչպես էր հանդես գալիս գեղարվեստական գրականությունը: Համառոտ ներկայացրեք գրականության ժանրերը և դրանց նշանավոր ներկայացուցիչներին ու ստեղծագործությունները:
2. Ի՞նչ գործոններ նպաստեցին ճարտարապետության վերելքին: Թվարկեք այդ ժամանակաշրջանի նշանավոր քաղաքներ, ամրոցներ, վանական համալիրներ: Ի՞նչ նշանավոր ճարտարապետներ գիտեք. ինչ են նրանք կառուցել:
3. Ի՞նչ գիտեք խաչքարերի մասին: Թվարկեք խաչքարագործ նշանավոր վարպետներ:
4. Նկարչության ի՞նչ տարատեսակներ զարգացան: Այդ ուղղությունների ինչ նշանավոր հուշարձան կարող եք նշել:



## Թեմա 3. ՄԵԱԿՈՒՅՈՒՆ ԴԺՎԱՐԻՆ ԺԱՄԱՆԱԿՆԵՐՈՒՄ (XV դ.–XVII դ. առաջին կես)

### § 1. ՀԱՅԿԱԿԱՆ ՏՊԱԳՐՈՒԹՅՈՒՆԸ: ԿՐԹՈՒԹՅՈՒՆԸ

**Մշակույթի պահպանման և զարգացման պայմանները:** Հայոց անկախ պետականության բացակայությունն ու Հայաստանում օտար տիրապետության հաստատումը, հայ իշխանական տների թուլացումը և տնտեսական անկումը լուրջ խոչընդոտներ էին նաև հայ մշակույթի ու գիտության զարգացման համար: Այլևս չկային մշակութային խոշոր ձեռնարկումներ իրականացնելու հնարավորություն ընձեռող քաղաքական և տնտեսական պայմանները:

XV–XVII դարերի հայկական մշակույթի ոլորտում սկսում են զերակայել նվազ ծախսատար րնագավառները, ինչպիսիք էին մանրանկարչությունը, գորգագործությունը, փայտագործությունը, խաչքարային արվեստը, մատուռների կառուցումը, վնասված եկեղեցիների վերանորոգումը, որմնանկարչությունը և այլն: Ծինարարության ոլորտում կարևոր ձեռքբերումներ են արձանագրվում կամուրջների և իջևանատների կառուցման գործում:

Հայկական մշակույթի զարգացման համար *կարևոր առանձնահատկություն էր հայկական գաղթօջախներում հայ մշակութային արժեքների պահպանումն ու փոխադրումը բուն Հայաստանի դարածք:* Այդ հանգամանքն առավել ցայտուն դրսևորվեց հայ տպագրության ու կրթության ոլորտներում: Տարբեր գաղթօջախներում տպագրված գրքերի գրեթե ողջ տպաքանակը փոխադրվում էր Հայաստան և քաշխվում հայկական րնակավայրերում, վանքերում ու եկեղեցիներում: Այլևայլ երկրների հայկական գաղթօջախներում կրթություն ստացած հայ գիտնականներն ու մշակույթի գործիչները վերադառնում էին հայրենիք և իրենց գիտելիքները փոխանցում Հայաստանի դպրոցներում, տարբեր լեզուներից հայերեն թարգմանում անհրաժեշտ րնագիտական, աշխարհագրական և այլ րնույթի աշխատություններ:



Երկու էջ Հակոբ Մեղակաբարի տպագրած «Ուրբաթագրքից». 1512 թ., Վենետիկ

**Տպագրության սկզբնավորում և զարգացումը:** Տպագրության գյուղեվրոպայում և հայերեն գրքերի տպագրության սկզբնավորումը թեն գործածությունից իսպառ չբացատեցին ձեռագիր գրքերի անհրաժեշտությունը, սակայն նոր փուլ նախանշեցին և անգնահատելի դեր ունեցան XVI–XVII դարերի հայկական մշակույթի զարգացման գործում:

Հայկական *տպագրության հիմնադիրը* եղավ **Հակոբ Մեղակաբարը:** Հայերեն առաջին տպագիր գիրքը՝ «*Ուրբաթագիրքը*», լույս տեսավ **Վենետիկում 1512 թ.:** Այդպիսով՝ մերձավորարևելյան լեզուների մեջ երբայերենից հետո հայերենը դարձավ հաջորդ լեզուն, որն ունեցավ իր տպագրական արվեստը: Տպագրված առաջին գրքերը ակնհայտորեն հասցեագրված էին ինչպես հայկական գաղթօջախների, Հայոց եկեղեցու, այնպես էլ միջազգային առևտրի մեջ ներգրավված հայ վաճառականության կարիքների բավարարմանը: Մեր միջնադարյան հեղինակներից առաջին անգամ տպագրության են արժանացել Ներսես Ծնորհալու, Մկրտիչ Նաղաշի, Ֆրիկի, Հովհաննես Թվուրանցու գործերը:

Հայ տպագրության մեջ հաջորդ քայլը

կատարում է 1562 թ. դիվանագիտական առաքելությամբ Հոռոմ ուղարկված Արգար դպիր *Թոխաթեցին*: Հոռոմի թուլլոսվոթյամբ հայերեն նոր տպատառեր պատրաստելով՝ Արգար դպիրը 1565 թ. անցնում է Վենետիկ: Վենետիկում նա մեծադիր թերթի վրա տպագրում է *«Խոսնայիկնորսր Կոսմարի գեղեցիկ և պիտանի»* տոմարացույցը, որի վրա կար երկու նկար: Առաջինում պատկերված էին հայերեն տպատառերը ձեռքին Արգար դպիրը և իր որդին՝ Հոռոմի պապի և երեք կարդինալների առջև, իսկ մյուս նկարում Արգարը կանգնած էր Վենետիկի դոժի և խորհրդականների առջև ընդունելության ժամանակ: 1566 թ. Արգար դպիրը Վենետիկում տպագրում է *«Սաղմոսարան»*, որի մեջ ընդգրկված է 150 սաղմոս:

Արգար դպիրը, որ այնուհետև Վենետիկից փոխադրվել էր Կ. Պոլիս, 1568–1569 թթ. կազմակերպում է մի շարք գրքերի հրատարակություններ և «Ս. Ժամագիրք–պատարագամատոյց», «Պարզատոմար», «Տոնացոյց», «Տաղարան», «Մաշտոց»:

Այսպիսով՝ XVI դարի ընթացքում մշակույթի հայ գործիչները, օգտագործելով տպագրական գյուտի ընձեռած հնարավորությունները, *նոր ուղի բացեցին հայ ժողովրդի մեջ լուսավորության տարածման համար*՝ տպագիր գիրքը դարձնելով հասու և մատչելի ընթերցողների անհամեմատ մեծաքանակ շրջանակների համար:

XVII դարը հայ տպագրության զարգացման գործում ավելի մեծ նվաճումների ժամանակաշրջան էր: Տպագրությունը ոչ միայն ավելի մեծ չափեր ընդունեց Վենետիկում և Հոռոմում, այլև տարածում ստացավ նաև հայկական մյուս գաղթօջախներում՝ Լվով, Նոր Ջուղա, Միլան, Լիվոռնո, Պարուա, Փարիզ, Ամստերդամ, Կոստանդնուպոլիս: Տպագրվեցին պատմական, հոգևոր, քերականագիտական, քնագիտական, աշխարհագրական և այլ բնույթի աշխատություններ: Հայերեն գրքեր տպագրվում էին ինչպես օտարներին պատկանող, այնպես էլ հայ գործիչների կողմից հիմնադրված տպարաններում: Տպագրվեց ավելի քան 160 անուն երկ, այդ թվում՝

իրականություն դարձավ Աստվածաշնչի հայերեն շքեղ հրատարակությունը:


Բաղիշեցի Հովհաննես Քարևատանենց երեցի ջանքերով 1616 թ. Լվովում տպագրվեցին սաղմոսարան և բժշկարան, իսկ 1618 թ.՝ հայաստառ դիչաղերեն աղոթագիրք:

1638 թ. *Խոսապուր Կեսարացու* ջանքերով հայկական տպարան է ստեղծվում նաև *Նոր Ջուղայում*: Այս տպարանը հիմնվել էր ոչ թե Եվրոպայից բերված տպագրական գործիքներով, այլ ամբողջը ստեղծվել էր տեղում՝ չունենալով անգամ տպագրական գործի վարպետ կամ ուսուցիչ, փաստորեն կրկին հայտնագործելով տպագրության արվեստը: Այդ է պատճառը, որ այս տպարանի հրատարակությունները տպագրական արվեստի առումով համեմատաբար պարզունակ են: Հայաստանին ու հայոց գաղթաշխարհին հայ գրքի հիմնական մատակարար կրկին մնացին եվրոպական քաղաքներում հիմնադրվող տպարանները: 1640–ական թվականներին շարունակվում էր հայերեն գրքերի տպագրությունը Հոռոմում և Վենետիկում:

**Գարոցը:** XV–XVII դարերում, չնայած քաղաքական ծանր իրավիճակին ու մեծամեծ կորուստներին, Հայաստանում փորձել են շարունակել նախորդ դարաշրջանների կրթական ավանդույթները: Օգտագործվել են նոր հնարավորություններ, այդ թվում՝ Հայաստանի բուն տարածքից դուրս ստվարացած հայկական գաղթավայրերում կրթական կենտրոններ կազմակերպելը: Բարձրագույն կարգի դպրոցները կամ համալսարանները եղել են նաև մատենագրական, գիտական ու մշակութային կյանքի կարևոր կենտրոններ:

*XV դարակզգրին* Հայաստանում կրթական կյանքի կարևոր կենտրոն էր *Տսթնի համալսարանը*, որտեղ դասավանդում էր *Գրիգոր Տսթնացին*: Նրա դասախոսությունները գրի են առնվել ու ձևավորվել որպես դասագրքեր, որոնք օգտագործվել են նաև հայկական այլ դպրոցներում: Առավել նշանավոր էին Գրիգոր Տաթևացու *«Գիրք հարցմանց»* և *«Համառօտ լուծման Աստի-*





Տերունական նկարներ և անվանաթերթ. Մշո Ճարմնտիր, 1202 թ.

*նորթանցն Արիստորենի»* աշխատությունները: Դասավանդման համար օգտագործվում էին մարդակազմության, թվաբանության, քերականության, աստղաբաշխության վերաբերյալ հայ և օտար հեղինակների աշխատությունները: Տաթևի համալսարանը եղել է վարդապետական աստիճան շնորհող առավել հեղինակավոր կենտրոնը:

1408 թ. Տաթևից շուրջ հարյուր ուսանողների հետ միասին *Մեծոփա* վանք է փոխադրվում Գրիգոր Տաթևացին և նոր շունչ հաղորդում այնտեղ Հովհաննես Մեծփեցու առաջնորդությամբ գործող նշանավոր դպրոցին: Գրիգոր Տաթևացուց հետո Մեծփա դպրոցի առաջնորդությունը ստանձնել են Գրիգոր Խյաթեցին (Ծերեց), Հովհաննես և Թովմա Մեծփեցիները: Դպրոցը գոյատևել է մինչև XV դարի կեսերը:

XV դարի առաջին կեսին *Սյունիքում* գործել է *Հերմոնի դպրոցը*<sup>1</sup>: Հովհաննես Հերմոնացու առաջնորդությամբ: Բուն Հայաստանում գործող դպրոցներից հիշատակելի են նաև Երզնկայի Ավագ և Կապուսի վանքերի, Արիվանքի, Եղիվարդի վանքերին առընթեր դպրոցները և այլ ուսումնական կենտրոններ:

Կապուսի վանքի ուսումնական հաստատությանը նվիրված 1494 թ. չափածո ներ-

քողում այն որակվում է որպես Հայաստան աշխարհում համայն հայոց ազգի լուսատու:

XV դարում մոտ վաթսուամյա բեղմնավոր գործունեություն է ունեցել *Ղրիմի Անտոնի անապարհի հայոց դպրոցը*, որի ուսուցչապետն էր Սարգիս փիլիսոփան: Դպրոցում ունկնդրել են Սարգիս վարդապետի դասախոսություններն Արիստոտելի ու Պորփյորի փիլիսոփայության վերաբերյալ:

XV-XVII դարերում դրիմահայոց կրթական կարևոր կենտրոնն էր Սուրբ Խաչ վանքը, որ Հակոբ Կաֆայեցու տաղերից մեկում անվանվում է ճեմարան, և որտեղ դասավանդում էին ոչ միայն տեղի, այլև հրավիրված հեղինակավոր վարդապետներ: Դպրոցներ կային նաև Ղրիմի Ղարասուրազար և այլ քաղաքներում:

XVII դարի առաջին տասնամյակներից հայկական դպրոցները բազմանում են ինչպես բուն Հայաստանում, այնպես էլ գաղթավայրերում: Դպրոցներ էին գործում հոգևոր շատ կենտրոններում: Առավել կարևոր էին *Էջմիածնի*, *Բաղեշի*, *Տաթևի*, *Խիզանի*, *Լվովի*, *Կաֆայի*, *Նոր Ջուղայի*, *Երուսաղեմի* և այլ *դպրոցները*:

XVII դարի սկզբներին Սյունյաց աշխարհում հիմնվում է *Հարսնց անապարհի դպրոցը*, որը նպաստում է Արևելյան Հա-

յաստանի կրթական ու մշակութային առաջընթացին: Դպրոցում դասավանդող Ներսես Մոկացին ժամանել էր Բաղեշի Ամիրդուլու վանքից և դասավանդում էր «արտաքին գիտություններ»:

Մովսես Տաթևացին 1620 թ. հիմնադրում է *Երևանի Անանիա ստաբլայի տնայադպր* և մի քանի տարի անց՝ *Հովհաննավանքի դպրոցը*: 1635–1637 թթ. Հովհաննավանքի դպրոցը փոխադրվում է Էջմիածին, սակայն Հովհաննավանքում ևս ուսուցումը չի դադարում, այնտեղ դեռևս ուսանում էին շատ ուսանողներ, որոնց թվում էր նաև Զաքարիա Քանաքեռցի պատմիչը:

Էջմիածնի վանական դպրոցն ուներ մոտ 50 աշակերտ: Այնտեղ դասավանդել են Մելքիսեդեկ Վժանեցին, Սիմեոն Ջուղայեցին, Ստեփաննոս Լեհացին և ուրիշներ:

*XVII դարում* գիտակրթական աշխույժ գործունեություն է ծավալում *Բաղեշի Ամիրդուլու վանքի դպրոցը*: Այն հիմնադրվել էր XVI դարի վերջին տասնամյակում: Վարդան Բաղիշեցու ուսուցչապետության ըն-

թացքում աճում է ուսանողների թիվը, հավաքվում և արտագրվում են մեծարժեք շատ ձեռագրեր:

XVII դարի դպրոցական կյանքի *կարևոր կենտրոն* էր նաև *Նոր Ջուղան*: Այնտեղ Խաչատուր Կեսարացու ջանքերով հիմնվում է դպրոց, որն ավելի քան հիսուն տարի կարևոր դեր է խաղում ջուղահայոց կրթական կյանքում: Կոստանդ Ջուղայեցին դասավանդման նպատակով կազմել է մի յուրահատուկ ձեռնարկ, որի մեջ ամփոփված են ժամանակի բազում երկրների չափերի ու կշիռների մասին արժեքավոր տվյալներ: Իր գոյության տարիներին դպրոցը տվել է ավելի քան 250 շրջանավարտ: Այս դպրոցի շրջանավարտներից էին Ռսկան Երևանցին, Հովհաննես Մրբուզբ, Հակոբ, Ստեփաննոս և Աղեքսանդր Ջուղայեցի, Աստվածատուր Համադանցի կաթողիկոսները և ուրիշ շատ անվանի գործիչներ: Ինչպես մյուս դպրոցները, սա ևս եղել է գրչության կարևոր կենտրոն, ունեցել իր մատենադարանը:

### Հարցեր և առաջադրանքներ

1. Մշակույթի որ բնագավառները սկսեցին զերակայել XV–XVII դարերում. ինչու:
2. Ո՞վ է հայ տպագրության հիմնադիրը: Ո՞րն է հայերեն առաջին տպագիր գիրքը, նրբ և որտեղ է լույս տեսել: Վերհանեք տպագրության գյուտի նշանակությունը հայ մշակույթի զարգացման գործում:
3. XV դ. սկզբին որ համալսարանն էր դարձել կրթական կարևոր կենտրոն: Նշեք Գրիգոր Տաթևացու գրչին պատկանող աշխատությունները:
4. Մինչև նրբ է գոյատևել Մեծոփա դպրոցը: Ինչ նշանավոր մարդիկ են դասավանդել այնտեղ: Թվարկեք Հայաստանում և հայկական գաղթավայրերում XV–XVI դդ. գործող ուսումնական կենտրոնները:
5. XVII դ. Հայաստանում ինչ նշանավոր կրթարաններ էին գործում: Ո՞վ և նրբ է հիմնադրել Բաղեշի Ամիրդուլու վանքի դպրոցը:

## § 2. ԳԻՏՈՒԹՅՈՒՆԸ ԵՎ ԱՐՎԵՍԸ

**Պատմագրությունը:** Ուշ միջնադարը ծանր ժամանակաշրջան էր նաև հայ պատմագիտության զարգացման համար: Օտար ավերիչ արշավանքներն իրենց ծանր ազդեցությունը թողեցին տնտեսական ու բաղադրական իրադրության վրա: Այդ ամենը հոռետեսական տրամադրություններով էր լցրել մարդկանց հոգիները,

ինչն իր արտացոլումն էր գտնում տարբեր ձեռագրերի արտագրությունների առիթով գրված հիշատակարանների մեջ: Պատահական չէ, որ նշված դարերում ավելի շատ կազմվում են մանր ժամանակագրություններ, դեպքերի համառոտ արձանագրումներ, և նվազում է խոշորածավալ «Պատմությունների» քանակը:



Այդ առումով մեծարժեք ստեղծագործություն է XV դարի հոգևոր ու հասարակական-քաղաքական խոշոր գործիչ *Թովմա Մեծովեցու «Պարմութին Թամուր Լանկին և յաջորդաց իւրոց»* աշխատությունը: Այդտեղ շարադրվել են XIV դարի վերջին քառորդի և XV դարի առաջին կեսին Հայաստանում ու հարակից երկրներում տեղի ունեցած կարևորագույն իրադարձությունները, Լենկ Թեմուրի և նրա հաջորդների ու թորքմենական ցեղախմբերի միջև պատերազմական գործողությունները, այդ իրադարձությունների պատճառով Հայաստանի կրած տնտեսական ու քաղաքական արհալիրքները:

XVII դարում գրված կարևոր աշխատություններից է *Գրիգոր Գարանազցու «Ժամանակագրությունը»*, որտեղ ականատես հեղինակը կարևոր տեղեկություններ է հաղորդում Օսմանյան կայսրության արևմտյան տարածաշրջանի քաղաքական իրադարձությունների ու հայ բնակչության վիճակի վերաբերյալ:

Մեծարժեք ստեղծագործություն է *Սիմոն Լեծացու*՝ XVII դարի առաջին տասնամյակներին ուղեգրական տպավորությունների տեսքով հեղինակած աշխատությունը, որտեղ ներկայացված են արժեքավոր տեղեկություններ Արևելյան Եվրոպայի երկրներում, Իտալիայում, Մերձավոր Արևելքում ու Եգիպտոսում հայկական գաղթավայրերի վերաբերյալ:

XVII դարի առաջին կեսին Հայաստանում տեղի ունեցած կարևորագույն իրադարձությունների հանգամանալի շարադրանք է *Առաքել Գավրիժեցու* մեծարժեք *«Պարմությունը»*, որը տպագրության է արժանացել արդեն իսկ հեղինակի կենդանության օրոք (1669 թ.): Աշխատությունը կարևոր տեղեկություններ է պարունակում շահ Աբաս I-ի և նրա հաջորդների՝ Հայաստանում ու հարակից երկրներում վարած քաղաքականության, թուրք-պարսկական պատերազմների, հայ բնակչության բռնագաղթի և բազում այլ իրադարձությունների վերաբերյալ:

XVII դարի աչքի ընկնող գործիչներից է

*Չարսրիա Քանաքեղցին*, որն իր հեղինակած *«Պարմության»* մեջ նկարագրել է ոչ միայն իր տեսած ու լսած դեպքերն ու իրադարձությունները, այլև հայ ժողովրդի պատմության նախորդ շրջանների համառոտ շարադրանքը՝ սկսած Արշակունիների թագավորության հաստատումից: Նույն ժամանակաշրջանի հեղինակ է *Հակոբ Կարնեցին*, որը պատմաաշխարհագրական բնույթի կարևոր երկ է թողել Արևմտյան Հայաստանի խոշորագույն վարչամիավորի՝ Կարնո նահանգի մասին:

### **Բնագիտությունը և բժշկությունը:**

XV դարի սկզբին գիտության խոշորագույն ներկայացուցիչներից էր *Գրիգոր Տաթևացին*: Նրա *«Գիրք հարցմանց»*-ը բնագիտական ու հասարակագիտական շատ խնդիրների շուրջ բացատրությունների, մեկնությունների հանրագիտարան է, որը կազմելու համար օգտագործվել են հայ և օտար գիտնականների աշխատություններ: Տաթևացին ինքնուրույն ստորաբաժանումներով է տեսակավորում բուսական ու կենդանական աշխարհը, ցուցադրում բնության երևույթների մեջ ու մարդկային կյանքում տարրերի նշանակությունը:

XV դարասկզբի նշանավոր գիտնականներից էր *Մապրեոս Չուղայեցին*: Գրիգոր Տաթևացու մահից հետո նա գլխավորել է Տաթևի համալսարանը: Գիտության բնագավառում ազգային ավանդույթների պահպանման, շարունակման ու զարգացման գործի ջատագով գիտնականը արժանապատվորեն նշում էր, թե օտար գիտական մտքին հետևելու հետ միաժամանակ անհրաժեշտ է չմոռանալ կամ չանտեսել սեփական ժողովրդի ունեցած նվաճումները:

Գիտական մեծ վաստակով հայտնի են XV դարի առաջին կեսին ստեղծագործած *Հակոբ Արխանցին* («Մեկնութիւն տումարի» և «Յաղագս բնութեան») և Ս. Անտոնի վանքի միաբան *Եսայի Արխանցին* («Տումար արեգական և լուսնի»): Նրանց հեղինակած աշխատությունները կատարել են նաև ուսումնական ձեռնարկների դեր:

XV դարի հայ նշանավոր գիտնական-

ներից է կենսաբան ու բժիշկ, աստղագետ *Անիրոպյաթ Անասիացին* (մահ. 1496 թ.): Նա վաստակել էր բուժող բժշկի համբավ, դարձել օսմանյան սուլթանի անձնական բժիշկը: Նրա «*Անգիրաց անպեր*» խորագիրը կրող աշխատությունը բնագիտական ու դեղագիտական գիտելիքների շտեմարան է, որտեղ կարևոր տվյալներ ու հետազոտական աշխատանքի արդյունքներ են ամփոփված բուսական, կենդանական ու հանրային նյութերի և նրանց բուժիչ հատկությունների վերաբերյալ:


Հայ գիտնականների տեսադաշտում են եղել նաև կենդանական ողջ աշխարհի ուսումնասիրման խնդիրները: 1611 թ. Կ.Պոլսում *Աբրահամ Պոսևցին* «Պատմութիւն անասնոց և գազանաց...» խորագրով իր արժեքավոր ուսումնասիրության մեջ նկարագրել է կենդանական աշխարհը:

XV դարավերջին սկիզբ առած աշխարհագրական մեծ հայտնագործություններն ու դրանց հետևանքով XVI–XVII դարերում համաշխարհային գիտական մտքի զարգացման նոր փուլն իր մեջ ներառեց նաև Հայաստանը:

Արդեն իսկ Քրիստափոր Կոլումբոսի ճանապարհորդությունների շրջանում (XV դ. վերջ) եվրոպական երկրներում և մասնավորապես Իսպանիայում իր ճանապարհորդությունների մասին էր պատմում *Մադրիդու եպիսկոպոս Երզնկացին*, որ վերադարձի ճանապարհին Իսպանիայում հայտնվել էր նոր երկրների հայտնաբերման համար հանդերձավորված նավերից մեկի մեջ և մոտ յոթանասուն օր նավարկել Ատլանտյան օվկիանոսում: Նրա ուղեգրությունը հետագայում բազմիցս քնդորինակվել է և ուղեցույց ծառայել նոր ճանապարհորդությունների համար:

Առավել հետաքրքիր ճակատագիր էր վիճակվել տեր *Եղիշե Սարբանկացուն*, որի գլխավորած արշավախումբը Մագելանից հետո այցելել էր *Հարավային Ամերիկա* (Հրո երկիր):

Հովհաննես Անկյուրացին 1621 թ. թարգմանել է գերմանացի քարտեզագիր և աշխարհագետ Պետրոս Ապիանի «Կոս-



Խաչքար, Պողոս վարպետ, Գոշախնք, 1291 թ.

մոգրաֆիա» աշխատությունը, որտեղ առաջարկվում էին աշխարհագրական երկայնության որոշման նոր եղանակներ:

Մաթեմատիկական գիտության զարգացման համար կարևոր ձեռնարկում էր XVII դարի սկզբներին *Էվկլիդեսի «Երկրաչափության» հայերեն նոր թարգմանությունը*՝ թարգմանչի կողմից կատարված լրացումներով և մեկնաբանություններով:

**Արվեստը:** Հայաստանի տնտեսական



ու քաղաքական ծանր վիճակն իր կնիքն էր թողել նաև արվեստի զարգացման վրա: Չնայած աննպաստ հանգամանքներին՝ արվեստի մի շարք բնագավառներ այնուամենայնիվ շարունակել են որոշակի զարգացում ապրել:

Հաջողություններն ակնառու էին հատկապես ձեռագիր մատյանների նկարչական ձևավորման՝ մանրանկարչության բնագավառում: Ձևավորվել էին մանրանկարչության մի շարք դպրոցներ՝ իրենց ինքնատիպ առանձնահատկություններով:

Հայկական գաղթավայրերում հայտնի էին բարձրարվեստ ոսկերչությունն ու որմնանկարչությունը: **Նոր Ջուղայից** ռուսական ցար **Ալեքսեյ Միխայլովիչին** նվիրված «**Ամնասրն գահը**» արվեստի նշանավոր գործ է: Նոր Ջուղայի հայ արվեստագետներից **Բոգդան Սաքթանովը**, հաստատվելով Մոսկվայում, աշխատել է զինապալատում և մեծ դեր խաղացել ռուսական արվեստի զարգացման գործում: Նոր Ջուղայի հայ որմնանկարիչների կողմից XVII դարի առաջին կեսին կատարված ստեղծագործությունները մեր օրերում ևս հիացմունք են պատճառում:

Մեծ զարգացում է ապրել նաև **գորգագործական արվեստը**: Հայկական գորգերը արտահանվում էին շատ երկրներ և մեծ հռչակ ունեին: Հայտնի էին հատկապես հայկական «վիշապագորգերը»:

XV–XVII դարերում մեծ զարգացում է ապրում նաև **խաչքարային արվեստը**: Հայ խոջաները **Հին Ջուղայի** գերեզմանատանը



Սիրիլյա (մարգարևուհի).  
Բոգդան Սաքթանով, XVII դ.

կանգնեցրել էին ավելի քան 10 հազար գեղեցիկ և ձոխ քանդակներով խաչքարեր ու խոյանման տապանաքարեր: Նրանց մի մասն արվեստի կատարյալ գլուխգործոցներ էին: Ցավալի է, որ մեր օրերում հայ բնակչության հետքերը Հին Ջուղայում ջնջելու նպատակով աղոթեցանցի ջարդարանների կողմից լիովին ոչնչացվել է համաշխարհային արժեք ունեցող հայ մշակույթի այդ հսկա գանձարանը:

### Հարգիր և առաջադրանքներ

1. Ո՞ր իրադարձություններն են նկարագրված Թովմա Մեծուհեցու աշխատության մեջ: XVII դ. գրված ինչ աշխատություններ կարող եք նշել, ում հեղինակությամբ: Ինչո՞վ է տարբերվում Ջաբարիա Քանաքեղցու «Պատմությունը» իր ժամանակակիցների աշխատություններից:
2. Ի՞նչ գիտեք XV–XVII դդ. հայ բնագիտության մասին:
3. Ինչո՞վ է հայտնի Ամիրդովլաթ Ամասիացին:
4. Արվեստի ո՞ր բնագավառներն էին զարգանում XV–XVII դարերում: Ի՞նչ ձևավորագիր ունեցան Հին Ջուղայի ավելի քան 10 հազար խաչքարերը:

## ԺԱՄԱՆԱԿԱԳՐՈՒԹՅՈՒՆ

- 2 մլն – մոտ 100000 թթ. – Ստորին պալեոլիթ  
Մոտ 100000–40000 տարի առաջ – Միջին պալեոլիթ  
Մոտ 40000–14000 տարի առաջ – Վերին պալեոլիթ  
Ք.ա. 12000–10000 թթ. – Մեզոլիթ (միջին բարի դար)  
Ք.ա. 10000–5500 թթ. – Նեոլիթ (նոր բարի դար)  
Ք.ա. 5500–4000 թթ. – Էնեոլիթ (պղնձի բարի դար)  
Ք.ա. IV–III հազարամյակներ – Բրոնզի դար  
Ք.ա. XXVIII–XXVII դդ. – Հայկական լեռնաշխարհի առաջին վաղ պետական կազմավորման՝ Արատտայի մասին հիշատակությունները  
Ք.ա. XXIV–XXIII դդ. – Հայա, Սուրբուր, Արմանի վաղ պետական կազմավորումների հիշատակությունը արձանագրություններում  
Ք.ա. XV–XIII դդ. – Հայասա թագավորությունը  
Ք.ա. 859 թ. – Ուրարտուի առաջին արքա Արամուի անվան հիշատակությունը ասորեստանյան արձանագրություններում  
Ք.ա. մոտ 835–825 թթ. – Սարգուրի I-ի գահակալումը  
Ք.ա. մոտ 830–ական թթ. – Տուշպա (Տոսպ, Վան) մայրաքաղաքի հիմնադրումը  
Ք.ա. մոտ 810–786 թթ. – Մենուայի գահակալումը  
Ք.ա. 786–764 թթ. – Արգիշտի Առաջինի գահակալումը  
Ք.ա. 782 թ. – Էրեբունի ամրոցի հիմնադրումը  
Ք.ա. 776 թ. – Արգիշտիխինիլի քաղաք-ամրոցի հիմնադրումը  
Ք.ա. 764–735 թթ. – Սարգուրի II-ի գահակալումը  
Ք.ա. 685–645 թթ. – Ռուսա II-ի գահակալումը  
Ք.ա. 612 թ. – Պարոյրի զլխավորությամբ Հայկազունների թագավորության վերականգնումը  
Ք.ա. 521–331 թթ. – Հայկազուն-Երվանդականների, որպես ասորապետի իշխանությունը Հայաստանում  
Ք.ա. 331 թ. հոկտեմբերի 1 – Գավգամելայի ճակատամարտը և Հայաստանի անկախության վերականգնումը  
Ք.ա. մոտ 260–240 թթ. – Շամ (Սամոս) Երվանդականի գահակալումը, մայրաքաղաք Սամոսատի հիմնադրումը  
Ք.ա. մոտ 240 թ. – Արշամի գահակալման սկիզբը  
Ք.ա. մոտ 220–201 թթ. – Երվանդ IV-ի գահակալումը  
Ք.ա. 201 թ. – Մեծ Հայքում Երվանդական ճյուղի իշխանության ավարտը  
Ք.ա. 190 թ. – Մագնեսիայի ճակատամարտը  
Ք.ա. 189 թ. – Մեծ Հայքի, Փոքր Հայքի, Ծոփքի և Կոսմագենների անկախացումը  
Ք.ա. 189–մոտ 160 թթ. – Արտաշես I-ի գահակալումը  
Ք.ա. մոտ 185 թ. – Արտաշատ մայրաքաղաքի կառուցումը  
Ք.ա. 160–115 թթ. – Արտավազդ I-ի գահակալումը  
Ք.ա. 115–95 թթ. – Տիգրան I-ի գահակալումը  
Ք.ա. 95–55 թթ. – Տիգրան II-ի գահակալումը  
Ք.ա. 94 թ. – Ծոփքի և Կորդուքի միացումը Մեծ Հայքին  
Ք.ա. 94 թ. – Հայ-պոնտական դաշինքի կնքումը  
Ք.ա. 87 թ. – Հայ-պարթևական հաշտության պայմանագրի կնքումը  
Ք.ա. 84 թ. – Տիգրան Մեծի բազմերը Մելիկյանների գահին  
Ք.ա. 80–70-ական թթ. – Տիգրանակերտի կառուցումը  
Ք.ա. 69 թ. գարուն – Հայ-հռոմեական պատերազմի սկիզբը  
Ք.ա. 69 թ. հոկտեմբերի 6 – Տիգրանակերտի ճակատամարտը  
Ք.ա. 68 թ. սեպտեմբերի 22 – Արածանիի ճակատամարտը  
Ք.ա. 66 թ. սեպտեմբեր – Արտաշատի պայմանագրի կնքումը  
Ք.ա. 55–34 թթ. – Արտավազդ II-ի գահակալումը  
Ք.ա. 53 թ. մայիսի 6 – Խառնի ճակատամարտը  
Ք.ա. 30–20 թթ. – Արտաշես II-ի գահակալումը



- Ք.ա. 20–8 թթ. — Տիգրան III-ի գահակալումը  
 Ք.ա. 8–5 թթ. — Տիգրան IV-ի գահակալումը  
 Ք.ա. 2–1 թթ. — Տիգրան IV-ի և Էրատոյի գահակալումը  
 1 թ. — Արտաշեսյան արքայատոհմի թագավորության ավարտը  
 18–34 թթ. — Զենոն–Արտաշեսի գահակալումը  
 52 թ. — Վաղարշի և Տրդատի գլխավորությամբ պարթևական զորքի մուտքը Հայաստան  
 62 թ. գարուն — Հռոմեացի ձկնորսական զորքի մուտքը Պետրոսի պարտությունը  
 65 թ. — Տրդատի մեկնումը Հռոմ  
 66–88 թթ. — Տրդատ I-ի գահակալումը  
 88–110 թթ. — Սանատրուկ II-ի գահակալումը  
 117–140 թթ. — Վաղարշ I-ի գահակալումը. Վաղարշապատ մայրաքաղաքի կառուցումը  
 185–198 թթ. — Վաղարշ II-ի գահակալումը  
 198–215 թթ. — Խոսրով I-ի գահակալումը  
 216–252 թթ. — Տրդատ II-ի գահակալումը  
 287–330 թթ. — Տրդատ III-ի գահակալումը  
 301 թ. — Բրիստոնեության հռչակումը որպես պետական կրոն  
 303 թ. — Վաղարշապատի Մայր տաճարի Վ. Էջմիածնի կառուցումը  
 325 թ. — Նիկեայի առաջին տիեզերական ժողովը. «Հավատո հանգանակի» ընդունումը  
 330–338 թթ. — Խոսրով III Կոտակի գահակալումը  
 339–350 թթ. — Տիրանի գահակալումը  
 350–368 թթ. — Արշակ II-ի գահակալումը  
 354 թ. — Աշտիշատի ժողովի գումարումը  
 363 թ. — Պարսկաստանի և Հռոմի միջև պայմանագրի («ամորթալի») կնքումը  
 361–440 թթ. — Սբ Մեսրոպ Մաշտոց  
 370–374 թթ. — Պապի գահակալումը  
 371 թ. — Զիրավի ձկնորսական ժողովը  
 374–378 թթ. — Վարազդատի գահակալումը  
 378–387 թթ. — Արշակ III-ի գահակալումը  
 385–388 թթ. — Խոսրով IV-ի գահակալումը  
 387 թ. — Հայաստանի առաջին բաժանումը (Հռոմեական կայսրության և Պարսկաստանի միջև)  
 388–415 թթ. — Վռամշապուհի գահակալումը  
 405 թ. — Հայոց գրերի գյուտը  
 422–428 թթ. — Վռամշապուհի որդի Արտաշես Արշակունու գահակալումը  
 428 թ. — Հայ Արշակունիների արքայատոհմի անկումը  
 444 թ. — Շահապիվանի ժողովի գումարումը  
 450–451 թթ. — Վարդանանց պատերազմը  
 450 թ. — Խաղխաղի ձկնորսական ժողովը  
 451 թ. մայիսի 26 — Ավարայրի ձկնորսական ժողովը  
 481–484 թթ. — Վահանանց ապստամբությունը  
 481 թ. — Ակոտի ձկնորսական ժողովը  
 482 թ. — Ներսեսապատի ձկնորսական ժողովը  
 484 թ. — Նվարսակի պայմանագրի կնքումը  
 484–VI դ. առաջին կես — Վաչագան Բարեպաշտի գահակալումը  
 506 թ. — Դվինի առաջին եկեղեցական ժողովի գումարումը  
 554 թ. — Դվինի երկրորդ եկեղեցական ժողովի գումարումը  
 571–572 թթ. — Հավաքարկական ապստամբությունը Վարդան Մամիկոնյանի (Կրտսեր Վարդան) գլխավորությամբ  
 591 թ. — Հայաստանի երկրորդ բաժանումը (Բյուզանդիայի և Պարսկաստանի միջև)  
 618 թ. — Ս. Հռիփսիմն եկեղեցու կառուցումը  
 631 թ. — Ս. Գայանն եկեղեցու կառուցումը  
 639 թ. — Հայաստանի արևելյան և արևմտյան մասերի վերամիավորումը հայոց իշխան և սպարապետ Թևողորդու Ռշտունու գլխավորությամբ  
 640 թ. — Արարական ներխուժումների սկիզբը  
 652 թ. — Հայ-արաբական պայմանագրի կնքումը

- 641-661թ. — Չվարթնոց տաճարի կառուցումը
- 701 թ. — Դվին կենտրոնով Արմինիա վարչաքաղաքական միավորի ստեղծումը
- 703 թ. — Հակաարաբական առաջին ապստամբությունը Սմբատ Բագրատունու գլխավորությամբ  
Վարդանանկերտի ձակառամարտը
- 748-750 թթ. — Հակաարաբական ապստամբությունը Գրիգոր և Գավիթ Մամիկոնյանների գլխավորությամբ
- 774-775 թթ. — Հակաարաբական ապստամբությունը Արտավազդ Մամիկոնյանի գլխավորությամբ
- 775 թ. ապրիլի 25 — Արձնիի ձակառամարտը
- 804-824 թթ. — Աշոտ Մսակեր Բագրատունին ճանաչվեց հայոց իշխան
- 826-851 թթ. — Բագրատ Բագրատունին՝ հայոց իշխան
- 850-855 թթ. — Հակաարաբական հուժկու ապստամբությունը
- 855 թ. — Աշոտ Բագրատունին՝ հայոց իշխան և սարապետ
- 862 թ. — Աշոտ Բագրատունու ճանաչվելը հայոց իշխանաց իշխան
- 869 թ. — Զաքարիա Չազեցու նախաձեռնությամբ հայ իշխանների ժողովի կրավորումը
- 885 թ. օգոստոսի 26 — Աշոտ Բագրատունու օձվելը հայոց թագավոր
- 885-1045 թթ. — Հայաստանի Բագրատունյաց թագավորությունը
- 908-1021 թթ. — Վասպուրականի թագավորությունը
- 961 թ. — Անիի հռչակվելը մայրաքաղաք
- 961-1003 թթ. — Գրիգոր Նարեկացի
- 963-1065 թթ. — Կարսի թագավորությունը
- 978-1113 թթ. — Տաշիր—Ձորագետի (Լոռիի) թագավորությունը
- 987-1170 թթ. — Այունիքի թագավորությունը
- 990-1020 թթ. — Գագիկ I Բագրատունի
- 1071 թ. — Մանազկերտի ձակառամարտը
- 1072-1090 թթ. — Փյաթրոս Վարաժնունու իշխանությունը
- 1080-1198 թթ. — Ռուբինյան իշխանությունը Կիլիկիայում
- 1082-1117 թթ. — Գող Վասիլի իշխանությունը
- 1151-1292 թթ. — Հոռմկյան՝ Ամենայն հայոց կաթողիկոսության նստավայր
- 1184 թ. — «Դատաստանագրքի» կազմումը Մխիթար Գոշի կողմից
- 1187-1219 թթ. — Լևոն II Ռուբինյան, 1198 թ. հունվարի 6-ից Լևոն I Ռուբինյանը՝ հայոց թագավոր
- 1198-1375 թթ. — Կիլիկիայի հայոց թագավորությունը
- 1199 թ. — Անիի ազատագրումը Զաքարյանների կողմից
- 1226 թ. — Հեթումյանների հաստատումը Կիլիկիայի հայոց գահին
- 1236-1244 թթ. — Հայաստանի նվաճումը մոնղոլների կողմից
- 1254 թ. աշուն — Հայ—մոնղոլական պայմանագրի կնքումը Կարակորումում
- 1280-ական թթ. սկիզբ — Գյւմրիի համալսարանի հիմնադրումը
- 1292-1441 թթ. — Սիւր՝ Ամենայն հայոց կաթողիկոսության նստավայր
- 1340-1410 թթ. — Աբ Գրիգոր Տաթևացի
- XIV դ. երկրորդ կես — 1412 թ. — Տաթևի համալսարանի գործունեությունը
- 1375 թ. ապրիլի 16 — Սիս մայրաքաղաքի գրավումը
- 1441 թ. — Մայր Աթոռի վերահաստատումը Ս. Էջմիածնում
- 1461 թ. — Կ. Պոլսի հայոց պատրիարքության հիմնումը
- 1465 թ. — Սմբատ Արծրունու օձվելը հայոց թագավոր Աղթամարի Ս. Խաչ եկեղեցում
- 1512 թ. — Հայկական տպագրության հիմնադրումը. «Ուրբաթագրքի» տպագրումը Հակոբ Մեղապարտի կողմից Վենետիկում
- 1547 թ. — Էջմիածնի գաղտնի խորհրդակցությունը Ստեփանոս Սալմաստեցի կաթողիկոսի գլխավորությամբ
- 1562 թ. — Գաղտնի ժողովի գումարումը Սեբաստիայում Միքայել Սեբաստացի կաթողիկոսի գլխավորությամբ
- 1604 թ. օգոստոս — 300 000 հայերի բռնագաղթեցումը դեպի Պարսկաստան
- 1616 թ. — Հայկական տպարանի հիմնումը Լվովում
- 1638 թ. — Հայկական տպարանի հիմնումը Նոր Զուղայում



# ՔՈՎԱՆ ԴԱԿՈՒԹՅՈՒՆ

Ներածութիւնը, «ՀԱՅՈՑ ՊԱՏՄՈՒԹՅՈՒՆ» ԱՊՈՒՐՄԱՆ ԱՎԱԳ ԴԴՐՈՑՈՒՄ.....	3
ՀԱՅԿԱԿԱՆ ՔԱՂԱՔԱԿՐԹՈՒԹՅԱՆ ՁԵՎԱՎՈՐՈՄԱՆ ՊԱՏՄԱՇԵՆԱՐՀԱԳՐԱԿԱՆ ՊԱՅՄԱՆՆԵՐԸ.....	6

## ՄԱՍ Ա

### ՀԱՅԿԱԿԱՆ ՔԱՂԱՔԱԿՐԹՈՒԹՅԱՆ ՁԵՎԱՎՈՐՈՒՄՆ ՈՒ ՋԱՐԳԱՅՈՒՄԸ

ԲԱԺԻՆ 1. ՆԱԽԱԳԻՐՅԱՆ ՀԱՍՏԱՐԱԿՈՒԹՅՈՒՆԸ ՀԱՅԱՍՏԱՆԻ ՏԱՐԱԾՔՈՒՄ.....	10
ԹԵՄԱ 1. ՔԱՐԻ ԴԱՐԻՅ ՄԻՆՁԵՎ ՔԱՂԱՔԱԿՐԹՈՒԹՅԱՆ ԱՎՈՒՆՔՆԵՐ.....	10
§ 1. ՀԱՅԿԱԿԱՆ ԼԵՌՆԱՇԵՆԱՐՀԸ ՀԻՆ ԵՎ ՄԻՋԻՆ ՔԱՐԻ ԴԱՐԵՐՈՒՄ.....	10
§ 2. ՀԱՅԿԱԿԱՆ ԼԵՌՆԱՇԵՆԱՐՀԸ Բ.Ա. X - II ՀԱՋԱՐԱՄՅԱՆՆԵՐՈՒՄ.....	12
§ 3. ՊԵՏՏԱՄՈՒՆՔԸ: ԱՐՎԵՍՏԸ: ԳԻՏՈՒԹՅԱՆ ՏԱՐԵՐԸ.....	17
ԲԱԺԻՆ 2. ՀԱՅԿԱԿԱՆ ՔԱՂԱՔԱԿՐԹՈՒԹՅԱՆ ՍԿՋԵՆԱՎՈՐՈՒՄԸ.....	20
ԹԵՄԱ 1. ՀԱՅՈՑ ԵՎԳՈՒՄՆԱԲԱՆՈՒԹՅՈՒՆԸ.....	20
§ 1. ՀԱՅՈՑ ԵՎԳՈՒՄՆԱԲԱՆՈՒԹՅԱՆ ՀԱՐՏԸ.....	20
§ 2. ՀԱՅԱՍՏԱՆԻ ԵՎ ՀԱՅԵՐԻ ՄԱՍԻՆ ՀՆԱԳՈՒՅՆ ԳՐԱՎՈՐ ՀԻՇԱՍԿՈՒԹՅՈՒՆՆԵՐԸ.....	23
ԹԵՄԱ 2. ՎԱՂ ՊԵՏԱԿԱՆ ԿԱՋՄԱՎՈՐՈՒՄՆԵՐԸ (Բ.Ա. III ՀԱՋԱՐԱՄՅԱՆ-Բ.Ա. I ՀԱՋԱՐԱՄՅԱՆ ՍԿՋԵՐ)	26
§ 1. ՔԱՂԱՔԱԿՐԹՈՒԹՅԱՆ ՍԿՋԵՆԱՎՈՐՈՒՄԸ ՀԱՅԿԱԿԱՆ ԼԵՌՆԱՇԵՆԱՐՀՈՒՄ.....	26
§ 2. ՀԱՅԿԱԿԱՆ ՊԵՏԱԿԱՆ ԿԱՋՄԱՎՈՐՈՒՄՆԵՐԸ Բ.Ա. II ՀԱՋԱՐԱՄՅԱՆՈՒՄ ԵՎ Բ.Ա. I ՀԱՋԱՐԱՄՅԱՆ ՍԿՋԵՐ.....	30
ԲԱԺԻՆ 3. ՀԱՄԱՀԱՅԿԱԿԱՆ ԹԱԳԱՎՈՐՈՒԹՅՈՒՆՆԵՐԸ.....	33
ԹԵՄԱ 1. ՎԱՆԻ ՀԱՄԱՀԱՅԿԱԿԱՆ ԹԱԳԱՎՈՐՈՒԹՅՈՒՆԸ.....	33
§ 1. ՎԱՆԻ ԹԱԳԱՎՈՐՈՒԹՅԱՆ ԿԱՋՄԱՎՈՐՈՒՄՆ ՈՒ ՀՋՐԳԱՅՈՒՄԸ: ԱՐԳԻՇՏԻ I.....	33
§ 2. ՎԱՆԻ ՏԵՐՈՒԹՅՈՒՆԸ ՄԱՐԴՈՒԻ ԻԻ-Ի ԵՎ ՆՐԱ ՀԱՋՈՐԴՆԵՐԻ ՕՐՈՔ: ԹԱԳԱՎՈՐՈՒԹՅԱՆ ԱՎՈՒՄԸ.....	37
§ 3. ՎԱՆԻ ԹԱԳԱՎՈՐՈՒԹՅԱՆ ՏՆՏԵՍՈՒԹՅՈՒՆԸ, ՊԵՏԱԿԱՆ ԿԱՐԳԸ ԵՎ ԲԱՆԱԿԸ.....	40
ԹԵՄԱ 2. ՀԱՅԿԱՋՈՒՆ-ԵՐՎԱՆԴԱԿԱՆՆԵՐԻ ԹԱԳԱՎՈՐՈՒԹՅՈՒՆԸ.....	44
§ 1. ՀԱՅԱՍՏԱՆԸ Բ.Ա. VII ԴԱՐԱԼԵՐՋՈՑ ՄԻՆՁԵՎ Բ.Ա. 330-ԱՎԱՆ ԹՎԱԿԱՆՆԵՐԸ.....	44
§ 2. ՀԱՅՈՑ ԹԱԳԱՎՈՐՈՒԹՅՈՒՆՆԵՐԸ Բ.Ա. 331-201 ԹՎԱԿԱՆՆԵՐԻՆ.....	48
§ 3. ՀԱՅԿԱՋՈՒՆ-ԵՐՎԱՆԴԱԿԱՆՆԵՐԻ ԹԱԳԱՎՈՐՈՒԹՅԱՆ ՏՆՏԵՍՈՒԹՅՈՒՆՆ ՈՒ ՊԵՏԱԿԱՆ ԿԱՐԳԸ.....	50
ԹԵՄԱ 3. ՄԵՇ ՀԱՅՔԻ ԱՐՏԱՇԵՍՅԱՆՆԵՐԻ ԹԱԳԱՎՈՐՈՒԹՅՈՒՆԸ.....	54
§ 1. ՆՐ ՀԱՐՏՈՒԹՅԱՆ ՀՈՒՄՆՈՒՄԸ: ԱՐՏԱՇԵՍ I.....	54
§ 2. ՀԱՅԱՍՏԱՆԸ ԱՇԵՆԱՐՀԱԿԱՆ ՏԵՐՈՒԹՅՈՒՆ: ՏԵՐԳԱՆ II ՄԵՇ.....	59
§ 3. ՈՋՄԱՔԱՂԱՔԱԿԱՆ ՆՐ ԻՐԱՐՈՒԹՅՈՒՆԸ ԱՊԱՋԱՎՈՐ ԱՄԱՅՈՒՄ.....	65
§ 4. ՀԱՅԱՍՏԱՆԻ ՊԵՏՔԱՐԻ ԸՆԴԴԵՄ ՀՈՈՍԻ ԵՎԱՄԱՊԱՇՏ ՔԱՂԱՔԱԿԱՆՈՒԹՅԱՆ: ԱՐՏԱՎԱՋԳ II.....	69
§ 5. ԱՐՏԱՇԵՍՅԱՆ ԹԱԳԱՎՈՐՈՒԹՅԱՆ ԱՆՎՈՒՄԸ.....	72
ԹԵՄԱ 4. ՄԵՇ ՀԱՅՔԻ ԱՐՇԱԿՈՒՆՅԱՑ ԹԱԳԱՎՈՐՈՒԹՅՈՒՆԸ I-III ԴԱՐԵՐՈՒՄ.....	74
§ 1. ՀԱՅԱՍՏԱՆԸ ԵՎ ՀՈՈՍԻ ՈՒ ՊԱՐԹԵՎՍԱՆԻ ՄՐՑԱԿՑՈՒԹՅՈՒՆԸ.....	74
§ 2. ՄԵՇ ՀԱՅՔԻ ԹԱԳԱՎՈՐՈՒԹՅՈՒՆՈՒՄ ԱՐՇԱԿՈՒՆՅԱՆ ԳԱՀԱԿԱՆՈՒՄԸ.....	78
§ 3. ՄԵՇ ՀԱՅՔԸ III ԴԱՐՈՒՄ: ԹԱԳԱՎՈՐՈՒԹՅԱՆ ՀԱՄԱՐԱԿԱԿԱՆ ԿՅԱՆՔԸ.....	82
ԲԱԺԻՆ 4. ՀԱՅԿԱԿԱՆ ՄՇԱԿՈՒՅԹԻ ՋԱՐԳԱՅՈՒՄԸ.....	85
ԹԵՄԱ 1. ՀԱՅԿԱԿԱՆ ՄՇԱԿՈՒՅԹԸ Բ.Ա. IX-Բ.Ա. III ԴԱՐԵՐՈՒՄ.....	85
§ 1. ՆՅՈՒԹՅԱՆ ՄՇԱԿՈՒՅԹԸ (Բ.Ա. IX - Բ. Ա. VII ԴԱՐԵՐ).....	85
§ 2. ՎԱՆԻ ԹԱԳԱՎՈՐՈՒԹՅԱՆ ՀՈՐԳԵՎՈՐ ՄՇԱԿՈՒՅԹԸ.....	88
§ 3. ՀԱՅԿԱՋՈՒՆ-ԵՐՎԱՆԴՈՒՆՅԱՆ ԺԱՄԱՆԱԿԱՇՐՋԱՆԻ ՄՇԱԿՈՒՅԹԸ.....	90
ԹԵՄԱ 2. ՀԱՅԿԱԿԱՆ ՄՇԱԿՈՒՅԹԸ ՀԵԼԼԵՆԻՋԻՄԻ ԴԱՐԱՐՋԱՆՈՒՄ.....	94
§ 1. ՀԵԼԼԵՆԻՋԻՍԱԿԱՆ ԴԱՐԱՐՋԱՆԸ ԵՎ ՀԱՅԱՍՏԱՆԸ.....	94
§ 2. ԳԻՐԸ, ՊԱՏՄԱԳՐՈՒԹՅՈՒՆԸ, ԳՐԱԿԱՆՈՒԹՅՈՒՆԸ ԵՎ ՏՈՒՄԱՐԸ.....	98
§ 3. ԺՈՂՈՎՐԴԱԿԱՆ ԲԱՆԱՀՅՈՒՍՈՒԹՅՈՒՆԸ ԵՎ ԹԱՏՐՈՒՆԸ.....	101
§ 4. ԱՐՎԵՍՏԸ: ԱՋԳԱՅԻՆ ԱՐԹԵՀԱՄԱԿԱՐԳԸ ԵՎ ՀԻՆ ՀԱՅԱՍՏԱՆԻ ՔԱՂԱՔԱԿՐԹԱԿԱՆ ՆՎԱՋՈՒՄՆԵՐԸ.....	103

**ՄԱՔ**  
**ՀԱՅԿԱԿԱՆ ՔԱՂԱՔԱԿՐԹՈՒԹՅՈՒՆԸ ՄԻՋԻՆ ԴԱՐԵՐՈՒՄ**

Ներածություն	II
ԲԱԺԻՆ 1. ՀԱՅԿԱԿԱՆ ՔԱՂԱՔԱԿՐԹՈՒԹՅԱՆ ՆԵՐԴԱՇՆԱԿՈՒՄԸ ԲԵՐՈՍՏՈՆԵԱԿԱՆ ԱՐԺԵՀԱՄԱԿԱՐԳԻՆ	III
ԹԵՄԱ 1. ԲԵՐՈՍՏՈՆԵՈՒԹՅԱՆ ՀՈՉԱԿՈՒՄԸ ՊԵՏԱԿԱՆ ԿՐՈՆ: ԱՎԱՏԱՏՐՈՒԹՅԱՆ ՀԱՍՏԱՏՈՒՄԸ	III
§ 1. ԲԵՐՈՍՏՈՆԵՈՒԹՅԱՆ ՀՈՉԱԿՈՒՄԸ ՊԵՏԱԿԱՆ ԿՐՈՆ	III
§ 2. ԱՎԱՏԱՏՐՈՒԹՅԱՆ ՀԱՍՏԱՏՈՒՄԸ ՀԱՅԱՍՏԱՆՈՒՄ	III
ԹԵՄԱ 2. ԱՐՇԱՌՆՅԱՑ ԹԱԳԱՎՈՐՈՒԹՅՈՒՆԸ IV ԴԱՐՈՒՄ ԵՎ V ԴԱՐԻ ՍԿԶԵՆ	III
§ 1. ՊԱՅՔԱՐ ԿԵՏՐՈՆԱԿԱՆ ԻՇԽԱՆՈՒԹՅԱՆ ՈՒԹԵՂԱՑՄԱՆ ՀԱՄԱՐ	III
§ 2. ԱՐՇԱՒ II ԵՎ ՊԱՂ ԹԱԳՎՈՐՆԵՐԻ ՔԱՂԱՔԱԿԱՆՈՒԹՅՈՒՆԸ	122
§ 3. ՀԱՅՈՑ ԱՐՇԱԿՈՆՆՅԱՑ ԹԱԳՎՈՐՈՒԹՅԱՆ ՄԱՅՐԱՄՈՒՅԸ	127
ԹԵՄԱ 3. ՀԱՅԿԱԿԱՆ ՊԵՏԱԿԱՆՈՒԹՅԱՆ ՆԱԽԱՐԱՐԱԿԱՆ ՇՐՋԱՆԸ	131
§ 1. ԱՐԵՎԵԼՅԱՆ ՀԱՅՈՍՏԱՆԻ ՄԱՐԶՊԱՆԱԿԱՆ ԿԱՐԳԱԿՆԱԿԸ: ԿԱՐԳԱՆԱՆՑ ՊԱՏԵՐԱՑՄԱՐԸ	131
§ 2. ՎԱՀԱՆ ՄԱՄԻԿՈՆՅԱՆԻ ԳԼԽԱՎՈՐՄԸ ԱՊՍՏԱՄԱՐՈՒԹՅՈՒՆԸ 481-484 ԹԹ	136
§ 3. ՀԱՅՈՍՏԱՆԸ VI ԴԱՐՈՒՄ	139
§ 4. ՀԱՅՈՍՏԱՆԸ VII ԴԱՐՈՒՄ	144
§ 5. ՀԱՅ ՆԱԽԱՐԱՐԱԿԱՆ ՀԱՄԱԿԱՐԿԸ ԱՐԱՔԱԿԱՆ ԽԱՆԻՑԱՅՈՒԹՅԱՆ ԳԵՐԻՇԽԱՆՈՒԹՅԱՆ ՇՐՋԱՆՈՒՄ	148
ԲԱԺԻՆ 2. ՀԱՅՈՑ ՊԵՏԱԿԱՆՈՒԹՅՈՒՆԸ ՋԱՐԳԱՅԱԾ ՄԻՋՆԱՐԱՐՈՒՄ	152
ԹԵՄԱ 1. ՀԱՅՈՍՏԱՆԻ ՔԱԳՐԱՏՈՒՆՅԱՑ ԹԱԳՎՈՐՈՒԹՅՈՒՆԸ	152
§ 1. ՀԱՅՈՍՏԱՆԻ ԱՆԿԱՆՈՒԹՅԱՆ ՎԵՐԱԿԱՆԳՆՈՒՄԸ ԵՎ ԱՄՆԱԳՆՂՈՒՄԸ	152
§ 2. ՔԱԳՐԱՏՈՒՆՅԱՑ ՀԱՅՈՍՏԱՆԻ ՎԵՐԵԼՔԸ	156
§ 3. ՊԵՏԱԿԱՆ ԿԱՌԱՎԱՐՄԱՆ ՀԱՄԱԿԱՐԿԸ: ՏՆՏԵՍՈՒԹՅԱՆ ՎԵՐԵԼՔԸ	159
§ 4. ՔԱԳՐԱՏՈՒՆՅԱՑ ԹԱԳՎՈՐՈՒԹՅԱՆ ՄԱՆԱՏՈՒՄԸ ՈՒ ԱՆԿՈՒՄԸ	164
ԹԵՄԱ 2. ՀԱՅՈՑ ՊԵՏԱԿԱՆՈՒԹՅՈՒՆԸ XI-XIV ԴԱՐԵՐՈՒՄ	167
§ 1. ՀԱՅՈՍՏԱՆԸ XI ԴԱՐԻ ԵՐԿՐՈՐԴ ԿԵՍԻՆ	167
§ 2. ՀԱՅ ԺՈՂՈՎՐԴԻ ԱՋԱՏԱԳՐԱԿԱՆ ՊԱՅՔԱՐԸ ՕՏԱՐ ԵՎԱՃՈՂՆԵՐԻ ԴԵՄ (XI-XIV ԴԱՐԵՐ)	170
ԹԵՄԱ 3. ԿԵՒԻԿՅԱՆ ՀԱՅՈՍՏԱՆԸ	174
§ 1. ՀԱՅԿԱԿԱՆ ՊԵՏԱԿԱՆՈՒԹՅԱՆ ԱՌԱՋԱՅՈՒՄԸ ԿԵՒԻԿԵԱՅՈՒՄ	174
§ 2. ԿԵՒԻԿՅԱՆ ՀԱՅՈՍՏԱՆԻ ԱՄՆԱԳՆՂՈՒՄԸ: ՀԱՅՈՑ ԹԱԳՎՈՐՈՒԹՅԱՆ ՎԵՐԱԿԱՆԳՆՈՒՄԸ	178
§ 3. ԿԵՒԻԿԱՅԻ ՀԱՅԿԱԿԱՆ ԹԱԳՎՈՐՈՒԹՅՈՒՆԸ XIII-XIV ԴԱՐԵՐՈՒՄ	182
§ 4. ԿԵՒԻԿՅԱՆ ՀԱՅՈՍՏԱՆԻ ԸՆԿԵՐԱՅԻՆ-ՏՆՏԵՍԱԿԱՆ ՀԱՐԱԲԵՐՈՒԹՅՈՒՆՆԵՐԸ ԵՎ ՊԵՏԱԿԱՆ ԿԱՐԿԸ	186
ԲԱԺԻՆ 3. ՀԱՅՈՑ ՔԱՂԱՔԱԿՐԹՈՒԹՅՈՒՆԸ ՈՐՇ ՄԻՋՆԱՐԱՐՈՒՄ	191
ԹԵՄԱ 1. ԿՈՐՈՒՍՏՆԵՐԻ ԵՎ ՎԵՐԱԿԱՆԳՆՈՒՄԻ ԺԱՄԱՆԱԿԱՇՐՋԱՆ (XV դ.-XVII դ. առաջին կես)	191
§ 1. ՀԱՅՈՍՏԱՆԸ XV ԴԱՐՈՒՄ	191
§ 2. ՀԱՅՈՍՏԱՆԸ XVI ԴԱՐՈՒՄ ԵՎ XVII ԴԱՐԻ ԱՌԱՋԻՆ ԿԵՍԻՆ	194
§ 3. ՀԱՅՈՍՏԱՆԻ ԱՋԱՏԱԳՐՈՒԹՅԱՆ ՀԱՄԱՐ ՊԱՅՔԱՐԻ ԱՃԻՈՒԺԱՅՈՒՄԸ	197
ԹԵՄԱ 2. ՀԱՅԿԱԿԱՆ ԳԱՂԹԱՎԱՅՐԵՐԸ XV-XVII ԴԱՐԵՐՈՒՄ	201
§ 1. ՀԱՅԿԱԿԱՆ ԳԱՂԹԱՎԱՅՐԵՐԻ ԱՌԱՋԱՅՈՒՄԸ: ԵՎՐՈՊԱՅԻ ԵՎ ԱՍԻԱՅԻ ՀԱՄԱՅՆՔՆԵՐԸ	201
ԲԱԺԻՆ 4. ՄԻՋՆԱՐԱՐԻ ՀԱՅԿԱԿԱՆ ՄՇԱԿՈՒՅԹԸ	205
ԹԵՄԱ 1. ԱՋԱՅՐԻՆ-ԲԵՐՈՍՏՈՆԵԱԿԱՆ ՄՇԱԿՈՒՅԹԻ ՋԱՐԳԱՅՈՒՄԸ	205
§ 1. ՀԱՅ ԳՐԵՐԻ ԳՅՈՒՅԸ	205
§ 2. ՀԱՅ ՄՇԱԿՈՒՅԹԻ ՈՍԿԵՂԱՐԸ	208
§ 3. ՄՇԱԿՈՒԹԱՅԻՆ ՁԵՆՔԵՐՈՒՄՆԵՐԸ VI-VIII ԴԱՐԵՐՈՒՄ	211
ԹԵՄԱ 2. ՀԱՅԿԱԿԱՆ ՄՇԱԿՈՒՅԹԸ X-XIV ԴԱՐԵՐՈՒՄ	215
§ 1. ՄՇԱԿՈՒՅԹԻ ՎԵՐԵԼՔԸ: ԿՐԹՈՒԹՅՈՒՆԸ	215
§ 2. ՊԱՏՄԱԳՐՈՒԹՅՈՒՆԸ	219
§ 3. ԻՐԱՎՈՐԿԸ ԵՎ ԲՆԱԹԵԼԿՈՒԹՅՈՒՆՈՒԹՅՈՒՆԸ	221
§ 4. ԳՐԱԿԱՆՈՒԹՅՈՒՆԸ ԵՎ ԱՐԿԵՍԸ	223
ԹԵՄԱ 3. ՄՇԱԿՈՒՅԹԸ ԴՅՎԱՐԻՆ ԺԱՄԱՆԱԿՆԵՐՈՒՄ (XV դ.-XVII դ. առաջին կես)	228
§ 1. ՀԱՅԿԱԿԱՆ ՏՊԱԳՐՈՒԹՅՈՒՆԸ: ԿՐԹՈՒԹՅՈՒՆԸ	228
§ 2. ԳԻՏՈՒԹՅՈՒՆԸ ԵՎ ԱՐՎԵՍԸ	231



Ա. ՄԵԼՔՈՆՅԱՆ, Գ. ԱՎԵՏԻՍՅԱՆ, Ա. ՄՈՎՍԻՍՅԱՆ,  
Պ. ՀՈՎՀԱՆՆԻՍՅԱՆ, Է. ԴԱՆԻԵԼՅԱՆ, Վ. ԲԱՐՆՈՒԴԱՐՅԱՆ,  
Գ. ՀԱՐՈՒԹՅՈՒՆՅԱՆ, Պ. ԶՈՐԱՆՅԱՆ

# ՀԱՅՈՑ ՊԱՏՄՈՒԹՅՈՒՆ

10-ՐԴ ԴԱՍԱՐԱՆ

ԸՆԴՀԱՆՈՒՐ ԵՎ ԲԼԱԳԻՏԱՄԱՁԵՄԱՏԻԿԱԿԱՆ ՀՈՍՔԵՐ

Հրատարակչության տնօրեն՝  
Լեզվական խմբագիր՝  
Գեղարվեստական խմբագիր՝  
Տեխնիկական խմբագիր՝  
Վերստուգող սրբագրիչ՝  
Սրբագրիչ՝  
Համակարգչային ձևավորող՝  
Քարտեզագիր՝

Էմին Մկրտչյան  
Հովհաննես Զաքարյան  
Արա Բաղդասարյան  
Նվարդ Փարսադանյան  
Լիանա Միքայելյան  
Սերժ Մելքունյան  
Արևիկ Հակոբյան  
Գրիգոր Բեգլարյան

Տպագրությունը՝ օֆսեթ: Չափեր՝ 70x100 1/16: Թիւղթը՝ օֆսեթ:  
Չափերը՝ 15 տպ մամուլ: Տպաքանակը՝ 40 000 օրինակ:



«ԶԱՆԳԱԿ-97» ՀՐԱՏԱՐԱԿՉՈՒԹՅՈՒՆ

0051, Երևան, Կոմիտասի պող. 49/2  
Հեռ.՝ (+37410) 23 25 28, ֆաքս՝ (+37410) 23 25 95

Էլ. փոստ՝ info@zangak.am, էլ. կայք՝ www.zangak.am, www.book.am

10

Վերջի դասարանի թիվը

